

ବିଳାତ ଦ୍ରବ୍ୟ

ଶ୍ରୀ ଅକ୍ଷୟକୂମାର ନନ୍ଦୀ ପ୍ରଣୀତ ।

ଦ୍ଵିତୀୟ ସଂସ୍କରଣ

(ପରିବର୍ଦ୍ଧିତ)

ମୂଲ୍ୟ ଦୁଇ ଟଙ୍କା ମାତ୍ର ।

প্রকাশক—শ্রীমুণীলা নন্দী ।
ইকনমিক জুয়েলারী ওয়ার্কস্
২০০ নং কর্ণওয়ালিস্ স্ট্রীট, কলিকাতা ।

১ম সংস্করণ—১৯২৯ ১লা মার্চ,—১১০০

২য় সংস্করণ—১৯৩২ ১লা মার্চ,—৩৩০০

প্রিণ্টার—মোহাম্মদ খায়রুল আনাম খাঁ

মোহাম্মদী প্রেস

৯১নং আগার সারকুলার রোড, কলিকাতা ।

উৎসর্গ

দাদা,

আমার বারো বছর বয়সের কালে তুমি আমাকে বলেছিলে “তোকে বিলেত পাঠাবো।” আমাদের দরিদ্র-জীবনের মধ্যেও তুমি যে শক্তিবলে আমাকে ঐ আশার বাণী দিয়ে গিয়েছিলে, তোমার সে শক্তি এখনো আমাকে ব’লে দেয়—বড় কাজ করবার পক্ষে অর্থসম্পদ তুচ্ছ জিনিস।

দাদা, আমি কোন বড় কাজ করিনি ; তোমার শিক্ষা নিয়ে জীবনের পথে যেভাবে চলছি, তারই নিদর্শন এই ‘বিলাত ভ্রমণ’ তোমার পারলৌকিক আত্মার উদ্দেশ্যে উৎসর্গ করলাম।

তোমার অনুজ

দ্বিতীয় সংস্করণের নিবেদন

স্বাধীন দেশের গতিবিধি চাক্ষুস দেখিয়া আসিয়া প্রচুর আনন্দ লাভ করিয়াছিলাম, সে আনন্দের কিঞ্চিৎ অংশ দেশের ভ্রাতা ভগিনীগণকে না দিয়া থাকিতে পারি নাই—তাহাই এই ‘বিলাত ভ্রমণ’ গ্রন্থখানি।

প্রথমে ইহা আমাদের পরিচালিত মাতৃমন্দির পত্রিকায় ধারাবাহিক প্রকাশিত হয়। বাংলার তরুণদের পাঠের উপযোগী করিয়াই গ্রন্থখানি লিখিয়াছিলাম, প্রবীণগণেরও ভাল লাগিয়াছে জানিয়া সুখী হইয়াছি। আমার সৌভাগ্য, আচার্য্য প্রফুল্লচন্দ্র রায়, অধ্যাপক বিনয়কুমার সরকার ডক্টর সুনীতিকুমার চট্টোপাধ্যায় প্রভৃতি কৃতিমানগণ, যাহারা ইয়োরোপের অভিজ্ঞতা বহুভাবে সঞ্চয় করিয়া আসিয়াছেন, তাঁহারা আমার এই ‘বিলাত ভ্রমণ’ পাঠ করিয়া আনন্দ প্রকাশ করিয়াছেন।

ইংরেজ জাতির দোষ সম্বন্ধে বিশেষ কিছু লেখা হয় নাই বলিয়া কেহ এমন মনে করিবেন না যে, আমি তাহাদিগকে নির্দোষ জাতি বলিয়া বুঝিয়া লইয়াছি। অপর জাতির দোষ গুণ লইয়া নিরপেক্ষ সমালোচনা করা তত সহজ নয়—যত সহজ তাহাদের গুণগুলি গ্রহণ করিতে চেষ্টা পাওয়া। আমি এই শেষোক্ত সহজ পন্থা অবলম্বন করিয়াছি।

দ্বিতীয় সংস্করণে গ্রন্থখানিকে অনেকস্থলে বর্ধিত করা হইয়াছে। একাদশ অধ্যায়ের মত বিষয় পূর্ণ ‘নানা কথা’ নামক দ্বাদশ অধ্যায়টি এবার নূতন যুক্ত করা হইল।

কলিকাতা:
১লা মার্চ, ১৯৩২।



শ্রী অক্ষয়কুমার নন্দী

ভূমিকা

আমাদের দেশে সাধারণতঃ স্কুল কলেজের ছেলেরাই বিলাত গিয়ে থাকেন, তাঁরা যান ডিগ্রি আনতে। আর যান বড়লোকেরা, তাঁরা যান স্মৃতি করতে। এ ভিন্ন প্রকৃত জ্ঞানার্জনের উদ্দেশ্যে অতি কম লোকেই গিয়ে থাকেন।

আমি পাঁচবার বিলাতে গিয়েছি, তবু আমার যদি সময় থাকত তবে সেখানে গিয়ে আরও দেখতাম, শিখতাম। ছেলেরা অনেকেই সেখান থেকে আসেন ইউনিভারসিটির বিজ্ঞান একটু গলধঃকরণ করে; এর চেয়েও দুঃখের বিষয় যে, কেউ কেউ আসেন একেবারেই “বিলাত ফেরতা” হ’য়ে; বিলাতের চাল-চলন পোষাক-পরিচ্ছদের একটা বিকট অম্লকরণ তাদের মধ্যে দেখতে পাই মাত্র। প্রায় দু’হাজার ভারতবাসী ছাত্র ইংলণ্ড ও ইয়োরোপের নানা স্থানে অধ্যয়নার্থ প্রবাস করে থাকে, কিন্তু তাদের মধ্যে শতকরা পঁচানব্বই বা ততোধিক ছাত্রই এ দেশ থেকে নিতান্ত কাঁচা শিক্ষা নিয়ে যায়। এই উপলক্ষে ভারতের এক কোটি টাকা প্রতি বছর ভারত থেকে চলে গিয়ে বিদেশে খরচ হয়। এ সব ছেলেরা স্বচ্ছন্দে ভারতের কলেজে পড়েই তাদের Education complete করে যেতে পারে।

অক্ষয়বাবু যখন আমার কাছে বিলাত-যাত্রার প্রস্তাব জানান, তখন আমি তাঁকে বিলাত-ফেরতা যুবকদের অবস্থার কথা শুনিয়েছিলাম। এঁকে কন্দী বলেও জানতাম, তাই বলেছিলাম, দেশে করবার মত কত

কাজ রয়েছে, এসব ছেড়ে আবার সুদূর বিলাত যাবার সখ কেন ? কেবল কতকগুলো ঘরের টাকা পরকে দেওয়া হবে মাত্র ।

তারপর তিনি বিলাত থেকে এলে জানলাম, লণ্ডনে বৃটিশ-এম্পায়ার একজিবিশনে তিনি তাঁদের ইকনমিক জুয়েলারী ওয়ার্কসের একটা ষ্টল করে ছ'মাসের মধ্যে বিশ হাজার টাকা রোজগার করে এনেছেন । তারপর আরও ছ'টি মাস ওদেশের বড় বড় শিল্প-বাণিজ্যের সহরগুলি ঘুরেছেন । এই বৃটিশ-এম্পায়ার একজিবিশনটি দেখা উপলক্ষ করেই তিনি যাত্রা করেছিলেন । আর এ সম্বন্ধে একটা শোনবার মত কথাও আছে । প্রথমে বেঙ্গল গভর্নমেন্ট তাঁদের ইকনমিক জুয়েলারী ওয়ার্কসের হাতের কাজকর্ম বৃটিশ-এম্পায়ার একজিবিশনে দেখাবার জন্তে সমস্ত বাতায়াত ব্যয় ও উপযুক্ত বেতন দিয়ে তাঁদের একজনকে নেবার প্রস্তাব করেন । কিন্তু অক্ষয়বাবু এ সুযোগ উপেক্ষা করে নিজে স্বাধীনভাবে সেখানে গিয়ে ষ্টল করলেন । বাঙ্গালীর ছেলের গভর্নমেন্ট সাহায্যের প্রলোভন ত্যাগ—শক্তির পরিচায়ক ; আর সেই শক্তি কার্য্যকরী হয়েছে তাও তাঁর ঐ একজিবিশনের কার্য্য থেকেই আমরা বুঝতে পারি । অত বড় একটা একজিবিশনে যোগ দেওয়ার ফল মাত্র ঐ বিশ হাজার টাকা উপার্জন নয় ; অভিজ্ঞতা লাভের মূল্যটা তার চেয়ে অনেক বেশী ।

বাঙ্গালীর ছেলের এই বিলাত যাত্রাকে আমি বিশেষ রকম জয়যাত্রা বলতে চাই । বাঙ্গালী এ কাল পর্য্যন্ত বিলাতে টাকা টেলেই আসছে, কিন্তু অক্ষয়বাবু বাঙ্গলার শিল্প দিয়ে তাদের কাছ থেকে টাকা নিয়ে এসেছেন—এটা বাঙ্গালীর পক্ষে নতুন আদর্শ বটে ।

তারপর অক্ষয়বাবুর ভ্রমণের কথা । আমি এই বইখানি পড়ে বুঝলাম, বেশ একটা খাটি রকমের ভ্রমণ । বইখানায় ইংরেজ জাতির বর্তমান civilizationএর বাহ্যিক চাকচিক্যের কথা বাদ দিয়ে বিলাতের সাধারণ

রীতিনীতির কথা লেখা হয়েছে। বিশেষতঃ তার মধ্যে আমাদের দেশের সম্মুখে ধরবার মত বিষয়গুলি বেশী করে ফুটে উঠেছে। এতে বাঙ্গালায় লেখা আর আর বিলাত-ভ্রমণ থেকে এখানা বেশ একটু স্বতন্ত্র রকমের হয়েছে। বিলাতের শিল্প-বাণিজ্যের দিকে আমাদের বাঙ্গালীরা কেউ মন দেন না ; অক্ষয়বাবু যে সকল কলকারখানা দেখে এসেছেন তার অনেক বিবরণ তাঁর এই পুস্তকে লিখেছেন।

এই পুস্তকে ভারতীয় ছাত্রদের বিলাতীপনা, পারিবারিক রীতিনীতি, বিলাতের খুঁটিনাটি ঘটনাবলী, ব্রিটিশ-এম্পায়ার একজিভিশন প্রভৃতি অংশগুলি খুবই কাজের কথায় পূর্ণ অথচ চিত্তাকর্ষক হয়েছে।

অক্ষয়বাবু নিজে শিল্পী, অথচ সাহিত্যেও তাঁর প্রবল আকাজক্ষা দেখতে পাই। তাঁর সম্পাদকতায় পরিচালিত ‘মাতৃগন্দির’ পত্রিকাখানির মধ্য দিয়ে তাঁর সাহিত্য ও দেশসেবার অনেক পরিচয় পেয়েছি। এই বিলাত-ভ্রমণ বইখানা তাঁর শিল্পবাণিজ্যপ্রচার ও দেশসেবার নিদর্শন। বইখানা দেখে সুখী হয়েছি। দেশের হাওয়া ফিরেছে, এ রকম বইয়ের আদর হবে।

বাঙ্গালীর ছেলে শিল্প বাণিজ্যে উন্নতি লাভ করুক, দেশ বিদেশ ঘুরে বাণিজ্য করে দেশের অর্থ সম্পদ বৃদ্ধি করুক—এইটাই আমাদের দেশের আজকালকার বড় আদর্শ হোক ;—এই-ই চাই।

সায়েন্স কলেজ, কলিকাতা
২০শে ফেব্রুয়ারী, ১৯২৯

}

শ্রীপ্রফুল্লচন্দ্র রায়

সূচীপত্র

প্রথম অধ্যায়

[কলিকাতা হইতে সুরেজ খাল]

বিষয়	পৃষ্ঠা	বিষয়	পৃষ্ঠা
যাত্রার সঙ্কল্প	... ১	কলকাতা হাবুবার	... ১৪
যাত্রা	... ৩	আরব সাগর	... ১৫
বঙ্গোপসাগর ও জাহাজ	... ৪	এডেন বন্দর	... ১৬
মাদ্রাজ বন্দর	... ৬	লোহিত সাগর	... ১৭
মাদ্রাজ মিউজিয়াম	... ৭	সুরেজ বন্দর	... ২০
মাদ্রাজের মেয়ে	... ৯	সুরেজ খাল	... ২২
জাহাজে অবস্থান	... ১১	পোর্ট-সৈয়দ	... ২৩
সিংহল দ্বীপ	... ১২	জোচোরদের কথা	... ২৫

দ্বিতীয় অধ্যায়

[সুরেজ হইতে লণ্ডন]

ভূমধ্যসাগর	... ২৮	প্যারিস যাত্রা	... ৩৪
জাহাজের কষ্ট	... ২৯	ফরাসী পল্লী-চিত্র	... ৩৫
গ্রীস ও ইটালীর উপকূল	... ২৯	লিয়ঁ সহর	... ৩৮
মার্সেলস বন্দর	... ৩২	প্যারিস নগর	... ৩৯

তৃতীয় অধ্যায়

[লণ্ডন সহর]

বিষয়	পৃষ্ঠা	বিষয়	পৃষ্ঠা
প্রথম পদার্পণ	... ৪২	রেভারেণ্ড্ পেজ	... ৫৬
লণ্ডনে প্রথম সপ্তাহ	... ৪৪	ইংরেজ স্ত্রী	... ৫৮
টিলবেরী ডক্	... ৪৭	পপ্‌লারে ভারতীয় পল্লী	... ৬০
হোষ্টেলে বাস	... ৪৯	ভারত সম্পর্কিত দু-চার কথা	... ৬২
ইংরেজ পরিবারে বাস	... ৫০	একটি ভারতীয় রেস্তোরা	... ৬৩
ভগবানের আশীর্বাদ	... ৫১	রীতিনীতির বৈষম্য	... ৬৪
ভারতীয় ছাত্র	... ৫২	মহাত্মার কথা	... ৬৭
ছাত্রদের 'বিনাতিপনা'	... ৫৪	আমাদের দোষ	... ৬৯

চতুর্থ অধ্যায়

[লণ্ডনের বিবরণ]

পরিচয়	... ৭১	আণ্ডারগ্রাউণ্ড্ রেলওয়ে	... ৭৮
টেমস্‌ নদী ও স্লুড্জ	... ৭২	প্রধান দ্রষ্টব্য	... ৭৯
ডক্, পার্ক ও রাস্তা	... ৭৩	রবিবারের চিঠি (প্রথম)	... ৮৩
সিটি	... ৭৫	রবিবারের চিঠি (দ্বিতীয়)	... ৮৫
গতিবিধি	... ৭৭	রবিবারের চিঠি (তৃতীয়)	... ৮৯

পঞ্চম অধ্যায়

[একজিবিশনে]

বিষয়	পৃষ্ঠা	বিষয়	পৃষ্ঠা
আমাদের কার্য	... ৯৩	বাংলার শিল্প	... ১০১

ষষ্ঠ অধ্যায়

[স্কটলণ্ড্]

এডিনবরা যাত্রা	... ১০৬	গ্রাসগো সহর	... ১১৭
স্কচ পরিবারে কয়েক দিন	... ১০৭	হোটেলওয়ালী	... ১২০
কো-অপারেটিভ ব্যাঙ্ক	... ১১১	গ্রালগোর বিবরণ	... ১২২
আতিথেয়তা	... ১১২		

সপ্তম অধ্যায়

[আয়ারলণ্ড্]

বেলফাষ্ট	... ১২৬	আইরিশ থিয়েটার	... ১৩৩
শ্রালভেশন্-আন্সির মহিলা		ধর্মভাব	... ১৩৪
বিভাগ	... ১২৮	পল্লীর তাঁত-বোনা	... ১৩৫
আইরিশ বালকদের সঙ্গে	... ১৩১	গরীবের দেশ	... ১৩৮

অষ্টম অধ্যায়

[শিল্প-বাণিজ্যের দেশ]

লিভারপুল	... ১৪১	ম্যাঞ্চেষ্টার	... ১৪৫
সানলাইট সোপ ফ্যাক্টরী	... ১৪২	বাসিংহাম	... ১৫৭

বিষয়	পৃষ্ঠা	বিষয়	পৃষ্ঠা
বান্ধিহামে আমাদের কার্য ...	১৪৯	ল্যাক্সায়ার	... ১৫৬
তামা ও পিতলের কারখানা	১৫১		

নবম অধ্যায়

[ওরিয়েন্ট লাইনের জাহাজে]

লণ্ডন পরিত্যাগ	... ১৫৮	নেপল্‌স্	... ১৭১
বিস্বে উপসাগর	... ১৬২	বিস্মবিস্ম্ ও পম্পী	... ১৭৫
জিব্রাল্টার (স্পেন)	... ১৬৩	পম্পীর কথা	... ১৮০
টুলন (ফ্রান্স)	... ১৬৬	পম্পীর ধ্বংসাবশেষ	... ১৮৩
মাদাগাস্কারী ভাট	... ১৬৮	ইয়োয়োপ বিদায়	... ১৮৬
রকমারী	... ১৬৯	প্রত্যাবর্তন	... ১৮৮

দশম অধ্যায়

[আমার অভিজ্ঞতা]

দৈনন্দিন জীবন	১৯২	সাধারণ অবস্থা	... ১৯৯
পারিবারিক রীতিনীতি	... ১৯৬		

একাদশ অধ্যায়

লোকচরিত্র	... ২০৭
-----------	---------

দ্বাদশ অধ্যায়

নানা কথা	... ২২৬
----------	---------

ত্রয়োদশ অধ্যায়

[ব্রিটিশ-এম্পায়ার-একজিবিশন]

বিষয়	পৃষ্ঠা	বিষয়	পৃষ্ঠা
বিবরণ	... ২৩৯	সিলোন প্যাভিলিয়ন	... ২৫৭
প্যালেস্ অব্ ইণ্ডাষ্ট্রি	... ২৪৩	হংকং প্যাভিলিয়ন	... ২৫৭
প্যালেস্ অব্ ইঞ্জিনিয়ারিং	... ২৪৩	মার্টা প্যাভিলিয়ন	... ২৫৮
ইণ্ডিয়া প্যাভিলিয়ন	... ২৪৪	প্যালেস্টাইন ও সাইপ্রাস	
অস্ট্রেলিয়া প্যাভিলিয়ন	... ২৫১	প্যাভিলিয়ন	... ২৫৮
নিউজিলণ্ড্ প্যাভিলিয়ন	... ২৫২	অক্কাথ প্যাভিলিয়ন	... ২৫৯
ক্যানাডা প্যাভিলিয়ন	... ২৫৩	এম্পায়ার ষ্টেডিয়ম্	... ২৫৯
সাউথ আফ্রিকা প্যাভিলিয়ন	... ২৫৪	অ্যানিউজমেন্ট পার্ক	... ২৬১
নিউফাউণ্ডল্যাণ্ড প্যাভিলিয়ন	২৫৫	একজিবিশনের নানা বিষয়	... ২৬৩
নর্থা প্যাভিলিয়ন	... ২৫৫		

চতুর্দশ অধ্যায়

পত্রাবলী	... ২৬৫
----------	---------

পঞ্চদশ অধ্যায়

[পরিশিষ্ট]

লগুনের প্রধান প্রধান দ্রষ্টব্য	২৮৪	বিদেশ-বাত্তীর জ্ঞাতব্য	... ২৯৭
সিংহলের বিবরণ	... ২৮৯		

চিত্র-সূচী

চিত্র	পৃষ্ঠা	চিত্র	পৃষ্ঠা
কলস্বে হারবার	... ১৪	হাইড পার্কের খালে নৌকাখেলা	১৪
সুয়েজখালে জাহাজ চলিতেছে	১৪	রিজেন্ট পার্কের একটি	
সুয়েজখালের দৃশ্য	... ২২	রাস্তা ...	৭৬
সিসিলি নারী	... ২৮	রিজেন্ট পার্কের অপর একটি	
আফ্রিকার কাক্রি বালক	... ২৮	রাস্তা ...	৭৬
প্যারিস নগর	... ৩৪	ট্রাফালগার স্কোয়ার	... ৭৮
অপেরা হাউস	... ৩৮	পিকাডিলি সার্কাস	... ৭৮
উপর হইতে লণ্ডনের আংশিক		ওয়েষ্টমিনিষ্টার ব্রিজ	... ৮৪
দৃশ্য ...	৪৪	ব্ল্যাকফ্রায়ার্স ব্রিজ	... ৮৪
হাউস অব পার্লামেন্ট	... ৪৮	ব্রিটিশ মিউজিয়াম	... ৯২
বাকিংহাম প্যালেস	... ৪৮	ডগলাসের সমুদ্রতীরে স্বাস্থ্য-	
ওয়েষ্টমিনিষ্টার আবি	... ৫৪	নিবাস ...	৯২
সেন্ট পলস্ ক্যাথিড্রাল	... ৬২	ব্রিটিশ এম্পায়ার একজিবিশনে	
টাওয়ার অব লণ্ডন	... ৬২	ইকনমিক জুয়েলারী ওয়ার্কসের	
হাইড পার্কের জলাশয়ে খেলনা		ষ্টল ...	৯৬
জাহাজ ভাসান	... ৭৪	বেঙ্গল কোর্টের একাংশ	... ১০২

চিত্র	পৃষ্ঠা	চিত্র	পৃষ্ঠা
বেঙ্গল কোর্টের টেক্সটাইল		চারি হাজার বৎসরের	
বিভাগ ... ১০২		নরকঙ্কাল ... ১৮৬	
ফোর্থ ব্রিজের বিভিন্ন দৃশ্য ... ১১২		প্যালেস অব ইণ্ডাস্ট্রি ... ২৪২	
পৃথিবীর মধ্যে জাহাজ তৈয়ারীর		ক্যানাডা প্যাভিলিয়ন ... ২৪২	
কারখানা ... ১১২		ইণ্ডিয়া প্যাভিলিয়ন ... ২৪৪	
জিব্রাল্টার বন্দর (স্পেন) ... ১৬৪		নিউজিল্যান্ডের মায়োডী	
অষ্ট্রেলিয়ার চাষ ... ১৬৪		কথাগণ ... ২৫২	
আকাশে জেপলীন, সাগরে		সাউথ আফ্রিকা প্যাভিলিয়ন ২৫৪	
সবমেরিণ ... ১৬৬		সিলোন প্যাভিলিয়ন ... ২৫৪	
টুলন বন্দরে ফরাসী যুদ্ধজাহাজ ১৬৬		বর্মা প্যাভিলিয়ন ... ২৫৬	
নেপলস্ বন্দর ... ১৭২		বর্মা প্যাভিলিয়নে মেয়েদের নাচ ২৫৬	
ইটালীর ধীবরগণ মৎস্য ধরিতেছে		মান্টা প্যাভিলিয়ন ... ২৫৮	
... ১৭২		প্যাগেটাইন প্যাভিলিয়ন ... ২৫৮	
জগদ্বিখ্যাত এস, কার্লো থিয়েটারের		পৃথিবীর দশটি শ্রেষ্ঠ সুন্দরীর	
অভ্যন্তর ... ১৭৪		একজন ... ২৬২	
ইটালীর নাচ ... ১৭৪		সিংহলে তামিলী রথযাত্রা ... ২৯০	
স্বংসীভূত পম্পী নগরী ... ১৭৬		সিংহলী নারী ... ২৯০	
‘ম্যাকরণি’ নামক ময়দার		ভ্রমণ পথে গ্রন্থকার ... ২৯৮	
খাদ্য প্রস্তুত ... ১৮৬			

বিলাত ভ্রমণ

প্রথম অধ্যায়

[কলিকাতা হইতে সুয়েজ খাল]

যাত্রার সঙ্কল্প

আমাদের দেশের যুবকরা বিলাতে যান কোন না কোন বিষয় অধ্যয়ন করবার জন্ত, কিন্তু আমার বিলাত যাত্রার প্রথম আকাজক্ষা হয়েছিল, ওদেশের মানব চরিত্র অধ্যয়নের জন্ত। ইয়োরোপ জগতে কেন এত প্রসিদ্ধি লাভ করেছে—ইয়োরোপের ক্ষুদ্র ক্ষুদ্র দেশগুলি কি গুণে সারা জগতে আধিপত্য বিস্তার করেছে—এ প্রশ্নটা অনেকদিন আগে থেকেই আমার মনে জেগেছিল এবং এই চিন্তা থেকেই আমার ইয়োরোপ দর্শনের আকাজক্ষা দিন দিন প্রবল হয়ে উঠেছিল; তাই আমি ঐ দেশগুলির কিছু কিছু দেখে এলুম। ঐ সকল দেশ দেখে এসে, বিশেষতঃ ইংলণ্ড, স্কটলণ্ড, আয়ারল্যান্ডের সহর ও পল্লীগুলিতে একটি বৎসর ভ্রমণ করে আমি সেখানকার মানব-চরিত্র

যতটুকু অধ্যয়ন করেছি তার ফলে আমার ঐ সমস্তার সমাধান হয়েছে, আমি তৃপ্ত হয়েছি। কিন্তু ঐ সব দেশের মানুষের উন্নতি-স্বাধীনতা এবং কার্যতৎপতার সঙ্গে আমাদের দেশের অসাড় জীবনের তুলনা বিষয়ক চিন্তা আমার ইয়োরোপ ভ্রমণের তৃপ্তিকে জ্বালা দেয়।

আমি বিলাতের অহুসরণের পক্ষপাতী নই, এমন কি বিলাতের অহুসরণে আমাদের দেশে যে উচ্চশিক্ষার ধারা চলেছে এরও পক্ষপাতী নই। কাজেই আমাদের দেশের উচ্চশিক্ষাপ্রাপ্ত ব্যক্তিগণের মধ্যে দু-একজন যারা বিলাতভ্রমণ-বৃত্তান্ত লিখেছেন, তাঁদের লেখা থেকে আমার লেখা একটু স্বতন্ত্র ধরণের হবে। আমি উচ্চশিক্ষার দিকটাকে একেবারে বাদ দিয়ে বিলাতের সাধারণ কথা, নিত্য-নৈমিত্তিক জীবনের খুটি-নাটি কথা—যা আমাদের দেশের সাধারণের জানা আবশ্যক বলে মনে করেছি, তারই কিছু কিছু উল্লেখ করলাম। এ থেকে পাঠক-পাঠিকাগণের বিলাতের স্বাভাবিক অবস্থা জানবার কিঞ্চিৎ সুযোগ হবে।

বিলাত যাত্রার ইচ্ছাটা যখন দিন দিনই প্রবল হয়ে উঠছিল, এমন সময় লণ্ডন নগরে ব্রিটিশ-এম্পায়ার একজিবিশনের সূচনা হয়। জগতের সমগ্র ইংরেজাধিকৃত ভূখণ্ড হতে ঐ একজিবিশনে শিল্প-বাণিজ্যাদি সহস্রাবধি নানা দ্রব্য প্রদর্শনের বিরাট আয়োজন চলছিল। ঐ সময় বেঙ্গল গবর্নমেন্ট আমাদের ‘ইকনমিক জুয়েলারী ওয়ার্কস’এর অলঙ্কার প্রস্তুত প্রণালী প্রদর্শনার্থ একটি কার্যকুশল লোক উক্ত প্রদর্শনীতে প্রেরণের জন্ত অহুরোধ করে আমাদের পত্র দেন; এবং তার সমুদয় ব্যয় ও উপযুক্ত বেতন গবর্নমেন্ট দেবেন—এ কথাও জানান। আমরা ভাবলাম—আমাদের দেশীয় অলঙ্কার প্রস্তুত-প্রণালী বিলাত বাসীদের শিখিয়ে দিয়ে আমাদের লাভ নাই, তবে আমাদের প্রস্তুত

অলঙ্কার ওদেশে বিক্রয়ের ব্যবস্থা করা চাই, তাই আমরা ঐ প্রস্তাব একটু পরিবর্তন করে উত্তরে জানালাম যে, অলঙ্কার প্রস্তুত প্রণালী প্রদর্শনের জন্য লোক প্রেরণের সুযোগ হবে না, তবে আমরা আমাদের প্রস্তুত অলঙ্কার বিক্রয়ার্থে আমাদের নিজ ব্যয়ে এবং নিজ তত্ত্বাবধানে ওখানে গিয়ে একটি ষ্টল (stall) করতে ইচ্ছা করি। গবর্ণমেন্ট এই প্রস্তাবে সম্মত হওয়ায় আমি নিজে এই উপলক্ষে বিলাত যাওয়া স্থির করলাম।

যাত্রা

১৯২৪ সালের জানুয়ারী মাস হতে এর আয়োজন আরম্ভ হল। পাসপোর্ট বের করা, জাহাজের টিকিট কেনা প্রভৃতির জন্য দুটি মাস কেটে গেল, পরে সিটি লাইনের “City of Exeter” জাহাজে ১৯শে মার্চ তারিখে কলিকাতা খিদিরপুর ডক থেকে জাহাজে উঠলাম।

যাত্রী তোলা শেষ হলে সন্ধ্যার সময় জাহাজ খিদিরপুর ডক ছেড়ে মেটেরুজের নিকট গঙ্গায় থেমে রইল। রাত্রিতে মনে মনে বিলাত যাত্রার সার্থকতার জন্য শ্রীভগবানের নিকট প্রার্থনা করলাম।

২০শে মার্চ সকালে জাহাজ ছেড়ে দিল। বেলা দু’টায় সাগরের মুখে গঙ্গার দক্ষিণ পারে হিজলী অঞ্চলের কুলে নোঙ্গর করে রইল। ভাঁটায় কম জলে জাহাজ চলা অসুবিধা, তাই জোয়ারের জন্মে অপেক্ষা করছিল। নিকটে আরও দু’খানি জাহাজ বাঁধা ছিল। সন্ধ্যায় আমাদের জাহাজ ছেড়ে দিয়ে সারা রাত চলতে থাকুল। সন্ধ্যা হ’তে হতেই চাঁদ উঠেছিল—পূর্ণিমার জ্যোৎস্নায় সাগরের মাঝে জাহাজ চলা বেশ নূতন লাগছিল। অনেক রাত্রে একবার প্রবল বাতাস বয়েছিল।

২১শে মার্চ সকালে ঘুম থেকে উঠে দেখলাম, কোন দিকে কুল কিনারা নাই, একেবারে গাঢ় নীল জলরাশির মধ্য দিয়ে আমরা চলেছি, জাহাজ খুব বাইরের পথ ধরে চলেছে। ডাইনে উড়িষ্যার কিছুই দেখা গেল না—কে জানে কুল থেকে কতদূর দিয়ে চলেছি !

বঙ্গোপসাগর ও জাহাজ

চারিদিকে অনন্ত সাগর, উপরে অনন্ত আকাশ, সারাদিন জাহাজ একইভাবে চলল। আশ্চর্য্য এই যে, আগে ভেবেছিলাম সমুদ্রের দৃশ্য আর বেশী কি দেখব, একটি দিন দেখলেই দেখার সখ মিটে যাবে, দেখা পুরোণো হয়ে যাবে ; কিন্তু কি বলব, সারাদিন দেখলাম, দেখা আর পুরোণো হল না, যত দেখছিলাম, ততই ভাল লাগছিল—বড়ই প্রশান্ত মধুর দৃশ্য।

সমুদ্রের জল সূর্য্যের কিরণের তারতম্যে সকাল, মধ্যাহ্ন, বিকাল এক এক সময় এক এক বর্ণের হয়—সকালে ক্রমশঃ নীল, মধ্যাহ্নে উজ্জল গাঢ় নীল, বিকালে পাতলা রকমের নীলবর্ণ। আবার আকাশের অবস্থানুসারেও সমুদ্রের দৃশ্যের পরিবর্তন দেখলাম। সন্ধ্যায় অন্তগামী সূর্য্যকিরণসম্পাতে আকাশ আর সাগর এক হয়ে মনোমুগ্ধকর লোহিত বর্ণ ধারণ করল। এক এক স্থানের সাগর এক এক রকমের অবস্থা এনে দিচ্ছিল। আমরা দক্ষিণ-পশ্চিমাভিমুখে চলছিলাম, আর দু'টি দিন পরে জাহাজ মাদ্রাজ বন্দরে পৌছবে। তার পর সিংহল দ্বীপ পর্য্যন্ত এই একই দিকে, ডাইনে মাদ্রাজ প্রদেশ আর বাঁয়ে অনন্ত সাগর দেখে চলতে হবে। এদিন সম্ভবতঃ আমরা পুরীর কাছ দিয়ে চলছিলাম, কিন্তু কোনো দিকে কিছুই দেখতে পাইনি, সাগর দেখে দেখেই দিন কেটে গেল।

জাহাজখানি বেশ বড় : দশ হাজার টন অর্থাৎ দু'লক্ষ আশী হাজার মণ মাল টানে। সর্ব প্রধান তিন জন কর্মচারী—কমান্ডার, চিফ-অফিসার, সার্জেন্ট। তারপর চিফ-ষ্টুয়ার্ড, পার্সার, মেয়ে-ষ্টুয়ার্ড ; এর পর ইঞ্জিনিয়ার, ডাক্তার প্রভৃতি বড় বড় কর্মচারী কত কত রয়েছে। আমরা বাতী চলেছি সর্বশুদ্ধ দুই শতের কিছু বেশী—তার মধ্যে বাঙ্গালী আমি একা, একজন ছিল ইহুদী, বাকী সব ইংরেজ। ক্যাবিনের ভিতর গরম বলে সারাদিন আমরা সকলেই ডেকের উপর থাকতাম। সাগরের নির্মল স্নিগ্ধ হাওয়ায় ডেকের উপর ক্যাবিনের ইঞ্জি চেয়ারে বসে বেশ আনন্দে কাটত।

২২শে মার্চ শনিবার ভোরে উঠেই আবার চারদিকে সমুদ্র দর্শন। এদিন আমরা বঙ্গোপসাগর ছেড়ে ভারত মহাসাগরের সীমায় এসে পড়েছি, রাত্রিদিন একইভাবে জাহাজ চলল। সুদীর্ঘ এক একটা ঘুড়ু ঢেউ খেলছিল, তখন চারদিকের সাগর-দৃশ্য বিক্ষাচলের উপরের উঁচু-নীচু পাহাড়ে' জমির মত মনে হচ্ছিল। জাহাজখানি অতি ধীরে চলছিল। চলতে গেলে গা যেন একটু টলতে থাকে। সাহেবরা কেউ কেউ আমাদের ভয় দেখাল—যদি আমরা ঝড়ে পড়ি তখন দেখবে কি অবস্থা হবে, সারা জাহাজে লোকগুলোকে তখন লুটোপাটী খেতে হবে, নীচের ডেকের উপর আট দশ হাত উঁচু হয়ে ঢেউ উঠবে। আমার এতে মোটেই ভয় লাগেনি।

এক ধরনের ছেলে আছে—ভূতের গল্প শুনেই মায়ের কোলে মুখ লুকোয়, আর এক ধরনের ছেলে আছে, ভূতের কথা শুনে ভূত দেখতে চায়—ভূতের সন্ধান তালপুকুরের পাড়ে ঘুরে বেড়ায়। আমি কিন্তু এই শেষের ধরনের ছেলে। আমি ভাবছিলাম, তারি মজা হবে, যদি পথে একটা ঝড়ের মধ্যে পড়ি।

মধ্যাহ্নের পর দূরে সাদা সাদা উঁচু বাদামের নৌকার শ্রেণীর মত কি চিহ্ন দেখতে পেয়ে মনে ভারি কৌতূহল হল। জাহাজের লোকের কাছে জিজ্ঞাসা করে জানলাম, মান্দ্রাজ প্রদেশের পাহাড় শ্রেণী দেখা যাচ্ছে। এগুলি ভিজাগাপটম্ থেকে কোকনদ পর্য্যন্ত স্থান। চার পাঁচ ঘণ্টা পর্য্যন্ত এই পাহাড় শ্রেণী আমাদের দৃষ্ণের অন্তর্গত থেকে আমাদের আনন্দ দিয়েছিল। জাহাজ রাত্রিদিনে ২৫০ মাইল করে অর্থাৎ ঘণ্টায় ১০।০ মাইল বেগে চলছে ; কাল সকালে আমরা মান্দ্রাজ পৌঁছব।

মান্দ্রাজ বন্দর

২৩শে মার্চ রবিবার ভোরে জেগেই জাহাজে বাঁশী দিতে শুনলাম। উঠে দেখি দূরে কুয়াশার মধ্য দিয়ে মিটি মিটি আলো দেখা যাচ্ছে, বুঝলাম মান্দ্রাজে এসেছি। ক্রমে সকাল হল, দূর থেকে দেখাচ্ছিল মান্দ্রাজ সहरটি যেন সমুদ্রের উপর ভেসে আছে। ক্রমে তীরের দিকে যেতে সहरটি পরিষ্কার হয়ে ফুটে উঠল। দেখতে দেখতে আমাদের জাহাজ সমুদ্রের মধ্যে পাথরের প্রাচীরে বেষ্টিত, পোতাশ্রয়ের (harbour) মধ্যে এসে পড়ল। জাহাজ প্রবেশের জন্য এক পার্শ্বে খানিকটা ফাঁক আছে। পোতাশ্রয়টি প্রায় দুই মাইল দীর্ঘ। তীরে এবং সমুদ্র মধ্যে জেটিতে সারি সারি রেলগাড়ী রয়েছে। বড় বড় ট্রেন মাঝে মাঝে সাঁজানো, বড় বড় 'ক্রেন'এ জাহাজে মাল তোলা-নাবা হচ্ছে। তীরে মাঝে মাঝে জাহাজ রয়েছে। অল্পক্ষণেই আমাদের জাহাজখানি বন্দরের কুলে বাঁধা হল। শোনা গেল, জাহাজ তিনদিন এখানে থেকে মাল ভুলবে।

পোতাশ্রয়টি খুব বড়, উপরেই বিরাট হারবার আপিস, তার মাথায় প্রকাণ্ড ঘড়ি রয়েছে। কলকাতার সময় থেকে মান্দ্রাজের সময় ৩৩

মিনিট প্লো, আমি মাদ্রাজ টাইমে ঘেড়ি মিল করে নিলাম। বেলা ১০টায় একাকী মাদ্রাজ সহর দেখতে বের হলাম। বিদেশে বড় সহরে নতুন উপস্থিত হয়ে প্রথমে বড় অসুবিধা বোধ হল, কোন দিকে কি দেখতে যাব কিছুই জানা নেই। রিক্সা-ওয়ালারা এসে ধরল, রিক্সা নিলাম না। দেখলাম, সমুদ্রের ধার দিয়ে সুপ্রশস্ত রাস্তা, দীর্ঘ একখানা করে ট্রাম চলছে। বরাবর দক্ষিণদিকে রাস্তা ধরে খানিকটা চলতে চলতে লোকের কাছে সহরের বিবরণাদি নানা কথা জিজ্ঞাসা করে নিলাম। এদেশের তামিলী ভাষা বুঝি না, ইংরেজী ভিন্ন গতি নাই। রাস্তার উপরেই সারি সারি বড় বড় বাড়ীগুলি—ইণ্ডিয়া ব্যাঙ্ক, কাষ্টম হাউস, মার্কেটাইল ব্যাঙ্ক, জেনারেল পোষ্টাপিস, রেলওয়ে আপিস, হাইকোর্ট প্রভৃতি পর পর সাজানো।

মাদ্রাজ মিউজিয়ম

প্রথমেই মিউজিয়মটি দেখতে গেলাম। সেখানে যা দেখলাম তার কিছু কিছু এখানে উল্লেখ করা গেল। মাটির পাত্রে প্রাচীনকালের কবর, প্রাচীনকালের ফাঁসির নানা প্রকার যন্ত্র, তার এক একটা যন্ত্র প্রকাণ্ড লোহার খাঁচার মত ; লৌহনির্মিত শিরস্ত্রাণ বক্ষস্ত্রাণ বহু প্রকার। দাক্ষিণাত্যের নানা জাতীয় ঘর বাড়ী, ধাতু ও প্রস্তর নির্মিত দেব মূর্তি, পিতলের ঢালাই করা পাত্র ও ছোট ছোট খেলনা, দক্ষিণ ভারতীয় মেয়েদের অলঙ্কার প্রাচীনকাল হইতে একাল পর্যন্ত, মহীশূরের চন্দন-কাষ্ঠের কারুকার্য, সামুদ্রিক জীবজন্তু বহু প্রকার, কচ্ছপের খোলস, প্রকাণ্ড বিলুক, শঙ্খ, কড়ি, শামুক অসংখ্য প্রকারের দেখা গেল। মৎস্য বহু প্রকার, বিশেষতঃ—সাপের মত চিতল মাছ, সাপের মত মাগুর মাছ, অতি অদ্ভুত রকমের টেপা, কঁাকড়া চিংড়ী এত বড় ও এত রকমের

কলকাতার যাদুঘরে নাই। কার্পাস বিভাগ বিশেষ দেখবার বিষয়, নানাজাতীয় কার্পাস, নানা রকমের তাঁতের ফটো, কার্পাস বনের ফটো, মেয়েরা শ্রেণীবদ্ধ ভাবে চরকা কাটছে তার ফটো, এ সব দেখে এদেশের চরকা কাটা ও কাপড় বোনা সম্বন্ধীয় অনেকটা নিদর্শন পাওয়া গেল। বাঁশের বুড়ী, খেজুর পাতার পেটরা অতি চমৎকার—এসব মেয়েদের হাতের প্রস্তুত। কলকাতার যাদুঘরে যে সকল শস্য রয়েছে তার দ্বারা ভারতের কৃষি সম্বন্ধে কোন অভিজ্ঞতা লাভের আশা নাই। কিন্তু এখানকার মিউজিয়মের ধান, কলাই, ফলমূল, হলুদ, আদা, মসলা এমনভাবে সজ্জিত রয়েছে, আর সেগুলির উৎপাদন প্রণালীর এমন সুন্দর ছবি ও মডেল রয়েছে, যাতে দেখামাত্র কৃষি সম্বন্ধে অনেক শিক্ষা হয়। দাক্ষিণাত্যের মন্দিরাদির গঠন ও কারুকার্য জগতে অতুলনীয়। মাদুরা, ত্রিচিনাপলি, তাম্বোর, কুয়ার্করম্, চিদাম্বরম্, তিরুভানামলি, মহীশূর, কোকনদ, কঞ্জাভরম্ প্রভৃতি স্থানের বিখ্যাত মন্দিরগুলির কারুকার্যের নমুনা এবং মন্দিরের ফটোগুলি খুব আনন্দের সহিত দেখলাম। এদিন এই মিউজিয়ম দেখা শেষ করেই জাহাজে ফিরে এলাম। জাহাজে অবিরাম রেলগাড়ী থেকে চিনে বাদাম তোলা হচ্ছিল।

পরদিন আহাঙ্গারাদির পর আবার সহর দেখতে গিয়ে ট্রামে করে সহরের পশ্চিমের দিক শেষ পর্যন্ত দেখে সন্ধ্যায় জাহাজে ফিরে এলাম। দেখলাম জাহাজের সিঁড়িতে নোটিশ দেওয়া হয়েছে—কাল সকাল ৮ টায় জাহাজ ছাড়বে।

মাদ্রাজের মেয়ে

জাহাজে এসে দেখলাম একদল মাদ্রাজী মেয়ে, সঙ্গে একটা পুরুষ, জাহাজে আগাদের সেকেন্ড ক্লাসে এসে কয়েকটি যাত্রী মেম সাহেবের সঙ্গে দেখা করল। তারা সকলেই ইংরাজীতে কথা বলছিল। বোধ হয় আগেই তাদিগকে দেখা করবার জন্য সংবাদ দেওয়া ছিল। মাদ্রাজী মেয়েরা রঙ্গিন কাপড় পরা, আমার ধারণা ছিল মাদ্রাজের মেয়েরা বুঝি কাছা দিয়ে কাপড় পরে। কিন্তু দেখলাম তা নয়। কলিকাতায় যে সব মেয়েদের আমরা কাছা দিয়ে কাপড় পরা দেখি তারা বোধ হয় বোম্বাই ও মহারাষ্ট্র অঞ্চলের। মাদ্রাজের মেয়েরা আঁটসাঁট রকমের ভদ্র ধরনে কাপড় পরে। এত যে গরম দেশ তবুও গরীব-মহৎ, ভদ্র-চাষা, ছেলে বুড়ো সব মেয়েদের গায়ে একটা করে জামা আছে। মেয়েরা বেশ সাদা সিন্দে ভাবে পুরুষদের সঙ্গে কথা কয়। বয়স্থা মেয়েদের প্রায় সকলেরই দেখলাম চুলের খোপায় ফুল পরা, বেশ টুকটুকে লাল ছোট ফুলগুলি খোপায় তাদের সুন্দর মানিয়েছে। গায়ের রং বাঙ্গালী মেয়েদের চেয়ে একটু কালো, কিন্তু বাঙ্গালী মেয়েদের চেয়ে মাদ্রাজী মেয়েরা সকলেই বেশ বলিষ্ঠ ও সুগঠন।

বাংলায় যেমন সহরে মেয়েদের একেবারেই বের হতে নাই, মাদ্রাজে তেমন নয়, এখানে মেয়েরা বেশ চলেফিরে বেড়ায়। প্রত্যেক ট্রামের শেষের বেঞ্চখানা মেয়েদের জন্য নির্দিষ্ট (reserve) করা। সেই বেঞ্চ খালি থাকলেও পুরুষেরা তাতে বসে না। কলিকাতার তুলনায় মাদ্রাজে সবই একটু হালকা রকমের, ট্রামগাড়ীগুলি দেখতে কলিকাতার মত সুন্দর নয়। দীর্ঘ একখানি করে ট্রাম চলে, ছুধারে ক্যান্ডিসের পরদায় আঁটা।

মাল্দ্ৰাজে কয়েকটা বড় বড় প্রস্থিতি ভবন আছে তার একটা গবর্ণ-মেন্ট কর্তৃক পরিচালিত। এখানে গরীব স্ত্রীলোকদের সম্ভান প্রসব করবার জন্ত ভাল বন্দোবস্ত আছে। অবৈধ গর্ভবতী হতভাগিনীরাও অনেকে এখানে স্থান পায়। তাদের গর্ভজাত শিশু সম্ভান পালনের ব্যবস্থা আছে। মাল্দ্ৰাজ একটু গরীব দেশ হলেও উড়িষ্যার মত গরীব নয়।

পরদিন সকালে জাহাজের কেউ আর নীচে নাবল না। তোড়জোড় করে জাহাজ ছাড়তে ১০টা বেজে গেল। জাহাজ ছাড়া বড় সোজা কথা নয়, কত যে তার শিকল কাছি টানতে হয়, কত যে কলকজা আঁটতে হয়—এতটা কাজ মাত্র এই দু'ঘণ্টার মধ্যে করে নেওয়া বিশেষ দক্ষতার পরিচায়ক।

জাহাজ ক্রমে হারবারের বাইরে এল, অসংখ্য জেলে সমুদ্রের মধ্যে বহুদূর পর্য্যন্ত গিয়ে মাছ ধরছিল। পুরীতে মাল্দ্ৰাজী জেলেদের মাছ ধরতে দেখেছি, তারা বিরাট বড় আকারের দড়িজাল টেনে মাছ ধরে কিন্তু এখানে কেউ নৌকায় কেউবা কাঠের ডোঙ্গায় সমুদ্রের নানাস্থানে ঘুরে ঘুরে মাছ ধরছে দেখা গেল। এখানে মাছের কারবার খুবই বড় রকমের। আমাদের যাত্রীদের জন্তও জাহাজের কর্তৃপক্ষেরা বড় বড় ভেটকি মাছ সহর থেকে এনেছিল।

মাল্দ্ৰাজ ছেড়ে জাহাজ দূরে গেলে দুই ঘণ্টা পর্য্যন্ত সহরটাকে দেখ-ছিলাম। তার পর মাল্দ্ৰাজের তীর ভূমিতে ক্রমে ক্রমে পাহাড় শ্রেণী দেখা দিতে আরম্ভ হল। একটা দু'টা করে ক্রমে বত্রিশটা পাহাড় সাগর তীরে শ্রেণীবদ্ধভাবে আমাদের চোখে পড়ল। অনেকেই জানেন, এগুলির নাম পূর্বঘাট পর্বতশ্রেণী। বেলা ৩টার পর কুল কিনারার আর কোন চিহ্ন দেখা গেল না।

জাহাজে অবস্থান

আমাদের জাহাজখানি অনন্ত সাগরের মাঝ দিয়ে চলতে থাকুক, এই অবকাশে জাহাজের ভিতরের ব্যাপারের কিঞ্চিৎ বর্ণনা করি। মাদ্রাজ থেকে অনেকগুলি সাহেব মেম জাহাজে উঠেছিল। আশ্চর্যের বিষয় এই যে, দু'একটা কথা হতে না হতে কলিকাতার প্যাসেঞ্জারদের সঙ্গে তাদের পারিবারিক সম্বন্ধের মত ভাব হয়ে গেল। জাহাজে কোনরূপ কষ্টই নাই, আহারের বন্দোবস্তও বেশ। সকাল ৭টায় চা বিস্কুট, তার সঙ্গে কলা বা কমলা একটা; ৯টায় পাউরুট ডিম, ভাজা মাছ। বেলা ১টায় ভাত, তরকারী, ভেড়ার মাংস। বিকাল ৪টায় চা, বিস্কুট তার সঙ্গে কলা কমলা প্রভৃতি দু' একটি ফল। রাত্রি ৯টায় রুটীর সঙ্গে মাছ মাংসাদি। ছোট ছেলেমেয়ে আর শিশুদের আহারের পৃথক বন্দোবস্ত। যত প্যাসেঞ্জার তার অর্ধেক পুরুষ, অর্ধেক স্ত্রীলোক; ছেলেপিলেও তদনুযায়ী। খাবার সময় ঘণ্টা পড়ে, অমনি সকলে খাবার ঘরে যায়।

জাহাজে অনেক রকম খেলার বন্দোবস্ত আছে, আমি সে সব খেলার নাম বলতে পারবো না; এই সব খেলার সরঞ্জামগুলিও জাহাজী ধরণের। সেগুলি দড়ি কাছি বালতি দাঁড় বৈঠার মত। সকালে জাহাজের একটা লোক এসে ডেকের উপর খড়ি দিয়ে খেলার ঘর এঁকে রেখে যেত। রোজই খেলার ঘর অঁকতে হত, কারণ জাহাজের ডেকের উপর রোজ সকালে ধোওয়া হয়। সাহেব মেম সবে মিলেই নানারকম ছোটোছুটা খেলে, ডেকের উপর দৌড়াদৌড়ি করে; খেলবার যথেষ্ট খোলা যায়গা আছে। ছেলেপিলে গুলো সারাদিন দোলায় ছলতো, ছোটোছুটা খেলা করতো। কোন গুগোল

নাই, বেয়াদপি নাই, মারামারি নাই। তিন বছরের একটি ছেলে বলল—আমি বাঘ। অমনি সে হামাগুড়ি দিয়ে বাঘ হল। বাঘ, বাঘ, বলেই সব ছোট ছোট ছেলেদের তাড়া করল, তারা ছুটে পালাতে আরম্ভ করল। বার বৎসরের একটি ছেলে এসে একটি বড় বসবার মোড়া এনে উঁচু করে বলল, কেমন বাঘ তুমি দেখব, আমি বাঘ ধরব—বলেই মোড়া দিয়ে তাকে চেপে ধরল। আমি মনে করলাম এইবার ছেলেটা কৈদে ফেলবে—কিন্তু খানিকটা সময় মোড়ার নীচেই চাপা পড়ে চূপ করে থেকে, ভয়ঙ্কর রবে হা-লু-ম করে উঠেছে। আমরা সবাই হেসে অস্থির। জাহাজে বেল্লীর ভাগ সময়ই লোকে পড়াশুনা করে, মেয়েরা কেউ কেউ সূচ-সূতার কাজ করে।

সন্ধ্যায় নাচের আসর হয়। বাজনা আরম্ভ হতেই চারিদিক থেকে সবে ছুটে এসে একটি মেয়ে একটি পুরুষ মুখো-মুখী হয়ে হাত ধরাধরি করে নাচতে আরম্ভ করে। কার সঙ্গে কে নাচবে তার কোন নিয়মও বোধ হয় নাই, ধাঁ করে জোড় বেঁধে যায়।

সিংহল দ্বীপ

২৬শে মার্চ বিকালে সিংহলের সমুদ্র-তীরের পাহাড়ের শ্রেণী অস্পষ্ট রকম দেখা গেল, মনে মনে ভাবলাম এই সেই রামায়ণ-বর্ণিত লঙ্কা দ্বীপ। আমরা দূরবীক্ষণ সাহায্যে সিংহলের তীরভূমি দেখে বড় আনন্দলাভ করলাম। দূরে পাহাড়ের শ্রেণী, তীরে বালির চড়া, তার নীচে ভারত মহাসাগরের প্রকাণ্ড ঢেউগুলি সন্ধ্যার সূর্য্য-কিরণে উজ্জ্বল শুভ্র রৌপ্য স্তরের মত দেখা যাচ্ছিল। সম্ভবতঃ আমাদের জাহাজ এখন সাগর তীর থেকে ২০ মাইল দূর দিয়ে চলেছে। এ পর্য্যন্ত কলকাতা থেকে বের হয়ে মালদ্বীপের পথে একবার কোকনদের

নিকটে পাহাড় দেখা গিয়েছিল, মাঝে মাল্দ্ৰাজ থেকে ছেড়ে পূর্বঘাট পর্বতশ্রেণী দেখেছিলাম, তারপর এই সিংহলের তীরভূমি দেখা গেল ; এছাড়া এ পর্য্যন্ত কোনখানেই তীরের কোন চিহ্ন দেখতে পাওয়া যায় নি। জলপথে খুব সোজা লাইন ধরে চলছিলাম। সন্ধ্যা পর্য্যন্ত তেমনই পাহাড়শ্রেণী।

২৭শে মার্চ সকালে উঠে আবার ডাইনে তেমনই সিংহলের পাহাড়-শ্রেণী দেখতে পেলাম,—তবে এবার একটু নিকটে। দূরবীক্ষণ নিয়ে দেখলাম, অসংখ্য নারকেল গাছ দেখা যাচ্ছে। গত দিবস সন্ধ্যায়ও নারকেল গাছের শ্রেণীর মত বোধ হয়েছিল কিন্তু বড় অস্পষ্ট ছিল। বেলা নয়টা পর্য্যন্ত একই ভাবে পাহাড় আর নারকেল গাছ দেখা গেল। মাল্দ্ৰাজ থেকে জাহাজ ছেড়ে আমরা এ পর্য্যন্ত দক্ষিণ-পশ্চিমে এসেছি।

এবার জাহাজ দক্ষিণ ছেড়ে ক্রমে পশ্চিম-মুখী হল। বেলা ১১টায় জাহাজ উত্তর-পশ্চিম-মুখী হয়ে চলতে লাগল। বুঝলাম, আমরা সিংহলের বাইর দিক দিয়ে অর্থাৎ ভারতবর্ষের বিপরীত দিক দিয়ে ঘুরে কলম্বো চলেছি। ভারতবর্ষ আমাদের কোন দিকে রইল এবং কলম্বো থেকে ছেড়ে আমরা কোন পথে যাব এই কথা নিয়ে একটা সাহেবের সঙ্গে আমার মতভেদ হল—দেখলাম সাহেবটির ভূগোলের জ্ঞান প্রকৃতই একটু কম, কিন্তু স্ব্থের বিষয় পরে তিনি তাঁর এ ভুল বুঝলেন। পরিচয়ে জানলাম তিনি ঢাকার পুলিশ-হুপারিটেণ্ডেন্ট। এ পর্য্যন্ত এই অনন্তদিকব্যাপী সমুদ্রের মধ্যে আমার একটুও দিক-ভুল হয় নি ; মানচিত্রের কথা স্মরণ করে মনে হচ্ছিল যেন পরিচিত পথ ধরেই চলছি।

দিক হারাই নি বলে বড়াই করলাম বটে কিন্তু এরই মাঝে একদিন গাবির তোড়াটি হারিয়ে বসেছিলাম। যা-কিছু অভাব-অভিযোগ

ষ্টুয়ার্ডকে জানাতে হয়; আমি গিয়ে বলতেই ষ্টুয়ার্ড আমার চাবির তোড়াটা এনে দিল, কে যেন পেয়ে ষ্টুয়ার্ডের কাছে রেখে দিয়েছিল।


কলম্বো হারবার

বেলা এগারটায় কলম্বো সহরের আভাস দেখা গেল। প্রথমে হারবারের জাহাজগুলির ধোঁয়া, পরে ক্রমে সহরের মন্দিরের চূড়াগুলি ও হারবার মধ্যস্থ জাহাজগুলি দেখা দিতে আরম্ভ হল। আশে পাশে আরও দু'একখানা জাহাজ রয়েছে। আমরা সকলেই দূরবীক্ষণের সাহায্যে আগে থেকে কলম্বো সহর দেখে নিলাম। বেলা বারোটায় কলম্বো-হারবারে জাহাজ প্রবেশ করে দু'টায় হারবার মধ্যে বাঁধা হল। তীরে ধরল না, তীরে ধরলে বেশী ভাড়া দিতে হয়। হারবারের উপরেই বন্দর।


দেখলাম কলম্বোর সমুদ্রতীর অতি রমণীয়। যেমন প্রাকৃতিক সৌন্দর্য্য তেমন ভিন্ন ভিন্ন গঠনের নানা প্রকার সুসজ্জিত সৌধশ্রেণী। হারবার আপিসটি সিংহলের প্রাচীন স্থাপত্যের নিদর্শনে গঠিত। হারবার মধ্যে নানা দেশীয় জাহাজ রয়েছে। সুন্দর ছোট ছোট মটর-বোট ইতস্ততঃ ছুটোছুটি করছে, নৌকার মাঝিগুলি খুব কালো রংয়ের। আমাদের জাহাজ তীর থেকে দূরে রইল। অনেক নৌকা, মটর-বোট সহরে লোক নেবার জন্ত জাহাজের গায়ে এসে ধরল।

সারাদিন এখানে থেকে বহু পরিমাণে নারিকেলের খোসার ঝাঁশ আর নারিকেল তেল বিলাত পাঠাবার জন্তে জাহাজে বোঝাই করা হল। মাল্লাজ থেকে অনেক চিনেবাদাম বোঝাই হয়ে এসেছিল।

রাত্রি বারোটায় জাহাজ কলম্বো থেকে ছেড়ে দিল। একটু দূরে এসে



কলম্বো হারবার —১৪ পৃষ্ঠা



সুয়েজ খালে জাহাজ চলিতেছে —২২ পৃষ্ঠা

সুদীর্ঘ আলোক-মালাশোভিত লঙ্কাকে যেন সমুদ্রে ভাসমান আলোক-পুরীর মত পরম রমণীয় দেখাচ্ছিল, তখন মেঘনাদ বধ কাব্যের—

“ভাসিছে কনক-লঙ্কা আনন্দের নীরে,

সুবর্ণ-দীপমালিনী, রাজেন্দ্রাণী যথা রত্নহার।”

ইত্যাদি মনে পড়ছিল। রাত্রি দুইটা পর্য্যন্ত আমরা লঙ্কাপুরীর সেই আলোক মালার দিকে চেয়ে রইলাম। পরে জাহাজ আবার অনন্ত সাগরে মিশে গেল।

মাদ্রাজ থেকে এপর্য্যন্ত দক্ষিণ-পশ্চিমে এসেছি, সকালে উঠে দেখলাম আমরা ভারত মহাসাগরের মধ্য দিয়ে উত্তর-পশ্চিমে চলেছি। এবার আমাদের খুবই দীর্ঘ পাড়ী দিতে হবে। আরব সাগর আর লোহিত সাগর পার হয়ে ৩৪০০ মাইল পথ চলে তবে স্নয়েজ খালে প্রবেশ করব। কলিকাতা থেকে কলম্বো পর্য্যন্ত এসেছি ১২৬০ মাইল মাত্র।

আরব সাগর

২৮শে মার্চ রাত্রিতে জাহাজ কলম্বো থেকে ছেড়ে ছয় দিন পর্য্যন্ত আরব সাগরে অবিরাম চলল। কলিকাতা থেকে কলম্বো পর্য্যন্ত দৈনিক আড়াই শত মাইলের বেগে জাহাজ চলেছে। এখন আর কোথায়ও কম জলের আশঙ্কা নাই, তাই এখন চলছে দৈনিক সাড়ে তিন শত থেকে চারিশত মাইলের বেগে। এই ছয় দিনের বিশেষ সংবাদ কিছু নাই। একদিন ফাষ্ট ক্লাসে একটি দু'বছরের ছেলে নিউমোনিয়ায় মারা গেছে। তাকে স্নন্দর লাল রঙ্গের কাপড়ে মুড়ে একখানা বড় চৌক কাঠের তক্তার উপর করে শিকলি বেঁধে ধীরে ধীরে সমুদ্রে নামিয়ে দেওয়া হল। তার জন্য কৃষ্ণবর্ণ শোকের নিশান তোলা হল। আর একদিন রাত্রির ঘটনা এই যে, যাত্রী ও জাহাজের কর্মচারী সাহেব-

মেমেরা অনেকে মিলে নানা রং-বেরংএর কাগজের টুপী পরে খুব নাচ-গান করেছিল। একটি সাহেবের টুপী হয়েছিল মস্ত বড় একখানা কাগজের জাহাজ, একটি মেমের অদ্ভুত রকম টুপীর সঙ্গে উড়ছিল তিনটা রবারের ফাল্গু। এই সব অদ্ভুত রকম সংএর সাজ! এ ছাড়া রোজই জাহাজে নাচ-গান কিছু কিছু হত, সে কথা আগেই বলেছি।

এর মাঝে একদিন আমরা মিনিকয় নামক ভারত মহাসাগরীয় একটি ক্ষুদ্র দ্বীপ দেখতে পেয়ে বড় আনন্দ পেয়েছিলাম, দ্বীপটি মাত্র তিন-চার মাইল দীর্ঘ বলে মনে হল। আমরা তার দু'মাইল তফাৎ দক্ষিণ দিয়ে চলে এলাম। দূরবীক্ষণ নিয়ে সেই দ্বীপটিকে অনেকক্ষণ দেখেছিলাম। তারপর পথে আমরা দু'খানি জাহাজ মাত্র দেখেছি।

সাত দিনের দিন ৩রা এপ্রিল সকালে আরব সাগরের মাঝে ডাইনে পাহাড় দেখা গেল। তারপর বেলা দ্বিপ্রহর থেকে সন্ধ্যা পর্যন্ত বামে সকোত্রা দ্বীপের পর্বতশ্রেণী বরাবর দেখলাম। সমুদ্র মাঝে পর্বতশ্রেণী—এ দৃশ্য বড় সুন্দর!

এডেন বন্দর

পরদিন বিকালে আবার ডাইনে পর্বত দেখা গেল। পর্বতের নিয়ে সাগরতীরে সাদা সাদা কি দেখা যাচ্ছিল; অনেকেই দেখেছিল, জিজ্ঞাসা করে জানলাম—এডেন। বড় আনন্দ হল,—এই সেই আরব দেশের ইংরাজরক্ষিত এডেন বন্দর। বিলাত যাবার অধিকাংশ জাহাজই এডেনে ধরে, কিন্তু আমাদের এখানে ধরবার কথা ছিল না। পর্বতের পাদমূলে সমুদ্র-তীরে সহরটি খুব সুন্দর, আমরা তার প্রায় চার-পাঁচ মাইল দূর দিয়ে চলেছিলাম। দূরবীক্ষণের সাহায্যে তীরে কয়েকখানা জাহাজ আর উপরে বড় বড় বাড়ীগুলি কিছু কিছু দেখতে পেলাম।

পাহাড়ের খানিকটা উপর থেকে সাগর কূল পর্য্যন্ত বহুদূর ক্রমে ঢালু হয়ে সহরটি নেমেছে। ক্রমে ঢালু হয়ে নেমেছে বলে সহরের বড় বড় রাস্তা বাড়ী ঘর সমস্তই দেখা গেল। ছুরবীণের দেখা, যেন সহরের ছবি দেখলাম, যাহ'ক তবুও এডেনটা দেখা হল।

প্রতিদিন জাহাজ যেখানে আসে, সেইখানকার সময় জাহাজে ধরা হয়। কলম্বো থেকে এডেন পর্য্যন্ত আসতে প্রতিদিন ঘড়ি পনর, কুড়ি মিনিট স্লো করা হয়েছে। এই রকমে আমরা ঘড়িতে দেখলাম কলম্বো থেকে এডেন পর্য্যন্ত আসতে এক সপ্তাহ মধ্যে ছ'ঘণ্টা আঠার মিনিট স্লো করা হয়েছে। এইভাবে কলকাতার সময়ের হিসাবে ধরলে দেখা যায়—কলকাতায় যখন সকাল ৬টা, মান্দ্রাজে তখন ৫টা ২৭, কলম্বোতে ৫টা ১৪, আর এডেনে তখন রাত্রি ২টা ৫৬ মিনিট। প্রত্যেক স্থানের দিবস ঠিক মধ্যাহ্নকে ১২টা ধরে সেই দেশের সময় নির্ণয় করা হয়। কলকাতা থেকে সূর্য্যকে এডেন পর্য্যন্ত আসতে এক প্রহরের বেশী সময় লাগে। কথাটায় একটু ভুল হল—কারণ সূর্য্য ত আর ঘোরে না—পৃথিবীই ঘোরে।

লোহিত সাগর

এই এপ্রিল সকালে আমরা লোহিত সাগরে এসে পড়লাম। লোহিত সাগর অপ্রশস্ত হলেও কোন দিকেই কূল দেখা গেল না। রাত্রিতে কখন যে আমরা বাবেলমাণ্ডেব প্রণালী অতিক্রম করে লোহিত সাগরে পড়েছি তা জানতে পারিনি। দিবসে হলে ডাইনে আরব দেশ আর বামে আফ্রিকা মহাদেশ একই সময়ে দেখতে পেতাম। আশা রইল স্নুয়েজ খালে গেলে আফ্রিকা দেখতে পাব।

লোহিত সাগরের জল যে লাল নয়, আর আর সাগরের মতই

নীলবর্ণ এ সকলেই জানেন। কেউ কেউ বলেন, এই সমুদ্রের তীরের বালুকা একটু লাল রংএর তাই লোহিত সাগর নাম হয়েছে। সেদিন খুব ভোরে উঠেই ডাইনে সমুদ্র মধ্যে মাঝে মাঝে পাহাড় দেখছিলাম। একটা খুব উঁচু পাহাড়ের উপর আলোক-স্তম্ভ (Light-house), তাতে তখনও বাতি জলছিল; ঠিক ছয়টায় সূর্য্য উঠল, আর বাতি নিবিয়ে দেওয়া হল। ঐ বাতির আলো অল্প আলো থেকে পৃথক করে বোঝাবার জন্ত এমন কৌশলে ঘোরবার বন্দোবস্ত আছে যাতে আলোটি একবার নিবছে একবার জলছে বলে বোধ হয়।

লোহিত সাগরের মাঝে মাঝে দু'একখানা করে জাহাজ আসছে-যাচ্ছে দেখা গেল। সাতদিন অল্প প্রাণী দেখিনি। এদিন অনেকগুলি সাগর-পায়রা আমাদের জাহাজের পাছে পাছে চলে মাছ ধরতে লেগে গেল। কচিং দু'একখানা সাগরগামী বড় নৌকা পাল তুলে চলছিল।

এতদিন বড় বড় সমুদ্র পার হলাম, সে সমস্ত সমুদ্র বেশ স্থির—কিন্তু লোহিত সাগরে এসে তুফান আরম্ভ হল; জাহাজের দোলানীতে আমার মাথা ঘুরছিল। নীচের ডেকে দোলানী একটু কম, তাই আমি নীচের ডেকে গিয়ে রইলাম। জাহাজের সমস্ত ছোট ছেলে মেয়েগুলিকেও নীচে আনা হল। তার পর আর এক অস্থবিধা দেখা দিল—যত বেলা বাড়তে লাগল ততই গরম বাতাস বইতে আরম্ভ হল। ডাইনে আরব, বামে আফ্রিকা, দুই দিকেই মরুভূমির দেশ, এর মাঝ দিয়ে উত্তর-দক্ষিণ লম্বা ভাবে লোহিত সাগর, কাজেই এই যে কূল-কিনারা দৃষ্টিশূন্য জলরাশীর মাঝ দিয়ে চলেছি, তবুও অত্যন্ত গরম হাওয়া। একে জাহাজের দোলানী তাতে আবার এই গরম হাওয়া, এই দুয়ে জাহাজের প্রায় সকল লোকই অস্থির হয়ে পড়েছিল। সন্ধ্যায় বাতাস কমে গিয়ে গরমও

একটু কমল। রাত্রিতে সমুদ্রের মাঝে মাঝে পাহাড়ের গায়ে সিগ্‌তাল-
ষ্টেশনের রঙিন বাতি দেখা গেল।

এদিন রাত্রি ৯টার পর আমাদের সেকেন্ড ক্লাসের প্যাসেঞ্জারেরা
চমৎকার অভিনয় করেছিল। সাহেবদের এ রকম অভিনয় আমি এই
প্রথম দেখলাম। নাচ, গান, কথোপকথন, প্রহসন সবই সুন্দর।
সেকেন্ড ক্লাসের উপরের ডেকটি নানাবর্ণের পতাকায় সুন্দর করে
সাজান হয়েছিল। জাহাজের সমস্ত লোক দেখবার জন্তে নিমন্ত্রিত
হয়েছিল। আশ্চর্য্য এই যে, দশ জায়গার দশ জন বিদেশী মিলে এমন
সুন্দর অভিনয় করল যে এর কোনখানে একটুকু ক্রটি দেখলাম না।
স্ত্রীলোকদেরই বেশী দক্ষতা দেখা গেল; রাত্রি ১২টায় অভিনয়
শেষ হল।

৭ই এপ্রিল একটু ঠাণ্ডা হাওয়া টের পাওয়া গেল। লোহিত
সাগরের দক্ষিণাংশের গরম দেশ ছেড়ে গিয়ে উত্তরাংশে আমরা এখন
ক্রমেই শীতের দেশে গিয়ে পড়ছিলাম। এ দিন আমাদের মধ্য-
বাংলার অগ্রহায়ণ মাসের মত শীত ছিল। পরদিন ৮ই এপ্রিল পৌষ
মাসের মত শীত বোধ হল। শুনলাম শীতের দিনে এখানেই জাহাজের
গায়ে বরফ পড়ে। এদিন থেকে আমি স্নানের জন্য প্রতিদিন এক
বালতি গরম জল দিতে একটা লোক বন্দোবস্ত করলাম। জাহাজে
গরম জলেরও অভাব নেই, বরফ-জলেরও অভাব নেই। যেখানে
জাহাজ ধরে সেখান থেকে ষথেষ্ট ভাল জল নেওয়া হয়। স্নান
আহারাদিতে ভাল জল ব্যবহৃত হয়। সমুদ্রের লোনা জলে কেবল
জাহাজের ডেক প্রতিদিন ধোয়া হয়, আর কোন কাজ সে জলে হয় না।
লোহিত সাগরের জল মুখে দিয়ে দেখলাম তীব্র লোনা।

লোহিত সাগরে নানা দেশের জাহাজ দেখা গেল। একথানা

প্রকাণ্ড জাহাজ জাহাজ দেখলাম। বিকালে লোহিত সাগরের উত্তর সীমায় এসে পড়লাম। মানচিত্র দেখলে বোঝা যায় এই খানটা ক্রমে কেমন চাপা হয়ে চলেছে। এ স্থানটি আফ্রিকার অন্তর্গত। দু'ধারেরই পর্বত শ্রেণী ধূঁয়ার মত দেখাচ্ছিল। সাগর ক্রমে আরও চেপে এসে দু'ধারের জমি নিকট হল। সন্ধ্যার পূর্বে দু'ধারের জমির এতই নিকট হল যে, এ অঞ্চলের স্থলভাগের অবস্থা অনেকটা বোঝা গেল। উপরে পাহাড় আর পাহাড়ে' জমি, আর সাগর কূলে প্রকাণ্ড বালির চড়া। এ সময় আমরা দু'দিকে প্রায় ৫১৬ মাইল করে ১০১২ মাইল প্রশস্ত স্থানের মাঝ দিয়ে চলছিলাম, কিন্তু মনে হচ্ছিল কিনারা মাত্র ১ মাইল দূর হবে।

লোহিত সাগরে এ পর্যন্ত পূর্বে আরব আর পশ্চিমে আফ্রিকা রেখে এসেছি, কূলকিনারা কিছুই দেখতে পাইনি; এখন আফ্রিকায় এসে পড়েছি, দু'কূলেই আফ্রিকার মিশরদেশ।

এখানকার হাওয়া বেশ ঝরঝরে। আরব সাগরে সূর্য্যোদয় দেখেছি, খুব খানিকটা উপরে না উঠলে সূর্য্য প্রকাশ পায় নি, যত এদিকে আগছি, সূর্য্যোদয় ততই পরিষ্কার দেখছি। এখানে একেবারে লাল সূর্য্যটি সাগরের গা থেকে ফুটে ওঠে। সাগরে এ রকম সূর্য্যোদয় বড় সুন্দর দেখায়, অন্তও তেমনই সুন্দর। সূর্য্য অস্ত গেল, আমরা স্নয়েজ খালের মুখে স্নয়েজ বন্দরে এলাম।

স্নয়েজ বন্দর

সন্ধ্যার পরই স্নয়েজ বন্দরের সুবিস্তীর্ণ আলোকশ্রেণী দূর থেকে দেখা গেল। আমাদের জাহাজ খালের মুখে এসে ধরল। খালের মাগুলাদি সংক্রান্ত দেনা পাওনা মিটানর জন্য এখানে জাহাজ থামান হয়। এক

রকম নূতন ধরণের নৌকা (Dehabiah) কয়েকখানা খুব উঁচু মাস্তুলে পাল বাঁধা, আনাদের জাহাজের ছুঁধারে ভিড়ল। কতকগুলি সেই দেশীয় লোক সেই উঁচু মাস্তুল বেয়ে জাহাজের ডেকের উপরে উঠল। এরা নানা রকম সুন্দর সুন্দর রঙিন পাথরের মালা, হালুয়া নামে এক রকম মিষ্টির বরফি, গালিচা, এদেশের দৃশ্য অঙ্কিত কার্ড প্রভৃতি বিক্রি করতে এনেছিল। তাদের ভাব গতিক আর ব্যগ্রতা দেখে খুব ঠগ লোক বলে মনে হল।

জাহাজ ধরবার আগেই জাহাজের কর্মচারীরা প্যাসেঞ্জারদের সাবধান করে দিয়েছিল যে, প্রত্যেকে যেন তাদের জিনিষ পত্র সাবধানে রাখে, নৈলে স্থানীয় লোকে চুরি করে নিয়ে যেতে পারে। আমরা আগে অতটা সাবধান হবার দরকার বুঝি নি—কিন্তু এই সব বিক্রেতাদের দেখে জিনিষপত্র নিয়ে খুবই সাবধানে রইলাম। এখান থেকে ডাকে চিঠি দেবার সুযোগ ছিল, কিন্তু চারিদিকের এই সব হৈ চৈ এর মধ্যে আমি চিঠি পোষ্ট করতে পারলাম না।


জাহাজ রাত্রিতে স্নয়েজ খালে প্রবেশ করবে, দেখবার জন্য ডেকের উপরে গিয়ে জেগ্নে রইলাম। জাহাজের ইঞ্জিনিয়ার সাহেব আমাকে জিজ্ঞাসা করলেন, আপনার জিনিষপত্র সাবধানে আছে তো? আমার সঙ্গে দুইটি বাক্স ছিল। মূল্যবান জিনিষপূর্ণ বাক্সটী আর টাকা কড়ি জাহাজের ষ্টয়ার্ডের কাছে সাবধানেই ছিল, কিন্তু একটা বাক্সে জিনিষের বড় বাক্স উপরের ডেকে শিকলে বাঁধা ছিল। ইঞ্জিনিয়ার সাহেবের সতর্কতায় উপরে উঠে সেই বাক্সের কাছে গিয়ে বসলাম। ঠাণ্ডা বাতাসে ঘুম এল না বটে কিন্তু সেই অন্ধকার রাত্রিতেও চারিদিকে স্নয়েজের দৃশ্যাবলী যা দেখছিলাম তাতে বেশ আনন্দ পাচ্ছিলাম।

সুয়েজ খাল

রাত্রি ১২টায় জাহাজ ছেড়ে সুয়েজ খালে প্রবেশ করল। রাত্রির আধা অন্ধকারের ভিতর দু'ধারে কত কি দেখলাম, Signal-light এর লাল নীল আলোগুলিই স্পষ্ট দেখা যাচ্ছিল। প্রবেশ পথে খালের খানিকটা স্থান দু'ধারেই পাথরে বাঁধা। অতি ধীরে খালের ভিতর দিয়ে জাহাজ চলল, আমি অনেকক্ষণ দেখলাম। তখন আর চোর চোটার ভয় নেই, আমি ঘরে গিয়ে ঘুমলাম।

২ই এপ্রিল অতি ভোরে ঘুম থেকে উঠেই খালের নতুন দৃশ্য দেখলাম, দু'ধারের খালের পাড় বড় বড় পাথরে ঢালু করে বাঁধা, উপরে সারি সারি বৃক্ষশ্রেণী পশ্চিম পাড়ের সৌন্দর্য্য বৃদ্ধি করেছে। যত দূর দৃষ্টি চলে, দু'পাশেই বালি আর পাহাড়, মাঝে মাঝে দু'চারটি খেজুর গাছ। দেখলাম একেবারে নতুন রকমের দেশ।

গত রাত্রি ১২টায় জাহাজ সুয়েজ খালে প্রবেশ করেছে, সারা সকাল বেলাটা খালের মধ্য দিয়েই চললাম। খালের অধিকাংশ স্থলই দুই শত ফিট মাত্র প্রশস্ত, মাঝে মাঝে খানিকটা স্থান তিন চার শত ফিট হবে; মাঝ খানে ছোট ছোট হ্রদের সঙ্গে মিলিত হয়ে খুব প্রশস্ত আকার ধারণ করেছে। দক্ষিণ প্রান্তে সুয়েজ বন্দর আর উত্তর প্রান্তে ভূমধ্যসাগর তীরে সুবিখ্যাত পোর্ট-সৈয়দ বা সৈয়দ বন্দর পর্য্যন্ত জাঁকজাঁক পথে খালটি প্রায় একশত মাইল দীর্ঘ। স্থানে স্থানে Dredging machine দ্বারা খালের মধ্য হ'তে মাটি তুলে খালের ধার থেকে দূরে ফেলা হচ্ছে। খালের গভীরত্ব ঠিক রাখবার জন্তে এই কাজটা সর্বদাই কোন না কোন স্থানে করতে হয়। এই ড্রেজিং-মেশিনগুলি বড় বড় ষ্টিমারের উপর স্থাপিত।



সুয়েজ খালের দৃশ্য

পাশ্বে সৈয়দ বন্দর হইতে সুয়েজ বন্দর পর্য্যন্ত রেল লাইন

খালের দুই ধারে মকুড়মি -২৩ পৃষ্ঠা

স্নয়েজ বন্দর থেকে সৈয়দ বন্দর (Port Syed) পর্য্যন্ত খালের পশ্চিম ধার দিগ্বে রেল লাইন গিয়েছে। কাঁটারা স্টেশন থেকে উত্তরে জেরুশালেম পর্য্যন্ত এই রেল লাইনের আর একটি শাখা লাইন গিয়েছে। এখান থেকে জেরুশালেম মাত্র ১২ মাইল পথ। এখানে এসেই সেই প্রাচীন যিহুদী জাতির কথা মনে পড়ছিল, আর মনে পড়ছিল সেই জেরুশালেমবাসী খ্রীষ্টের কথা। স্থানীয় দৃশ্যাবলীর মধ্যে পার্বত্য প্রদেশ, সমুদ্র, হ্রদ, উট, গাধা, মেঘপাল—এ সমুদয়ই খ্রীষ্টের জীবনকাহিনীর স্মৃতি বিজড়িত।

খালের পশ্চিম তীরে এই খাল সংক্রান্ত আপিস এবং রেল-স্টেশনগুলি অতি পরিষ্কার পরিচ্ছন্ন। মাঝে মাঝে বায়ু চালিত কল (Wind mill) দেখলাম। এই কল বেশী কিছু নয়, একটা স্তম্ভের মাথায় চারখানি প্রকাণ্ড পাখা বাতাসের বেগে উপর-নিচে হয়ে ঘোরে; এই ঘোরার শক্তির সাহায্যে খালের জল জমিতে সরবরাহ হচ্ছে। সেকালে এই কলের সাহায্যে গম পেয়া, তেল প্রস্তুত প্রভৃতি কাজ সম্পন্ন হত। ডাইনে ধূ ধূ মরুভূমি, মাঝে মাঝে বালুকাস্তূপ পাহাড়ের মত মাথা উচু করে রয়েছে। কোথাও সমতল বালুকার উপর সূর্যের কিরণ একেবারে বিস্তীর্ণ সরোবরের মত দেখাচ্ছিল—এই বৃষ্টি মরীচিকা !

পোর্ট-সৈয়দ

বেলা ১২টায় আমরা ভূমধ্যসাগর তীরে সৈয়দ বন্দরে গিয়ে পৌঁছলাম। বন্দরটির তিনদিকেই জল, উত্তরে ভূমধ্যসাগর, পূর্বে স্নয়েজ খাল, পশ্চিমে একটি হ্রদ; পাড় খুব উচু নয়, বন্দরটি যেন জলের

উপর ভেসে রয়েছে। অনেকগুলি ছোট বড় জাহাজ খালের দু'ধারে লেগে আছে। খালের পূর্বদিকে সমুদ্র তীরে বড় বড় লবণের গুদাম, এখানে অনেক লবণ তৈরীর কারখানা আছে। খালের প্রান্তে ভূমধ্যসাগর তীরে এই খাল খননকারী ফরাসী ইঞ্জিনিয়ার Lesseps এর প্রস্তর মূর্তি স্থাপিত করা হয়েছে। ১৮৬৯ খৃষ্টাব্দে এই খাল প্রস্তুত সম্পন্ন হয়।

মধ্যাহ্নের আহ্বানের পর বিকাল তিনটায় আমরা সৈয়দ বন্দর দেখতে তীরে নামলাম। কলথোতে যেমন পাস্‌পোর্ট দাখিলের গুরুতর ব্যাপার ছিল, এখানে তার কোন প্রয়োজন হল না। প্রথমেই বড় ডাকঘরে গিয়ে দু'খানা লেখা চিঠি আর কয়েকখানা কার্ড লিখে পোষ্ট করলাম। স্নয়েজ খালের চিত্র অঙ্কন করা নানা রকম সুন্দর কার্ড জাহাজে কিনেছিলাম, তাতেই চিঠি লিখলাম। এখান থেকে ভারতে চিঠি পাঠাতে পোষ্টকার্ডে দুই আনা আর এন্ডেলপে তিন আনা মাসুলের টিকিট দিতে হয়।

প্রথমে বড় বড় কয়েকটা রাস্তা ধরে চললাম। যেদিকে তাকাই কেবল প্রকাণ্ড অট্টালিকাশ্রেণী, তার কোনটিতে যে কি হচ্ছে ভাল বোঝা গেল না। অনেক দোকানেই সে দেশের মিশরীয় ভাষা ছাড়া ইংরেজীতে ও ইউরোপের অনেক বিভিন্ন ভাষায় সাইনবোর্ড দেওয়া রয়েছে। এই পোর্ট-সৈয়দ বন্দরটি এসিয়া, ইউরোপ, আফ্রিকা—এই তিনটি মহাদেশের কেন্দ্রস্থল; নানা দেশের নানা ভাষা-ভাষী জাতির কার্জ কারবার এখানে রয়েছে। কতকগুলি বড় বড় রেষ্টোরাঁর (resturent) মত দেখলাম, ভিতর বাইরে নানা জাতীয় লোক চেয়ারে বসে আছে। সম্ভবতঃ তারা চা, ড্রাফারস, স্ত্রী প্রভৃতি পান করছিল। ঐ সব

জায়গা দিয়ে যেতেই আমাকে কেউ কেউ ডাকছিল, আমি কিন্তু সোজা রাস্তা ধরে চললাম।

জোচ্চোরদের কথা

পোর্ট-সৈয়দ কেমন জোচ্চোরের দেশ একটু দৃষ্টান্ত দিই,—

একটি ছোট্ট মুচীর ছেলে আমার পাছ ধরল—জুতা বুরুস করে দেবে ব'লে। আমার জুতা বুরুসের দরকার নেই জানালাম তবুও সে পাছ ছাড়ল না, বলল—ওয়ান্ পেনী, ওয়ান্ পেনী। আমি বললাম আমার সময় নাই, সে আবার বলল—ওয়ান্ মিনিট, ওয়ান্ মিনিট। তার গরজে পড়েই দাঁড়িয়ে পা এগিয়ে দিলাম; যা তা করে খুব শীঘ্রই সেরে দিল বটে, কিন্তু একটি পেনী দিতেই পেনীটি হাতে নিয়ে তাদের মিশরী ভাষায় কি আপত্তি আরম্ভ করল, তার কিছুই বুঝলাম না। আমি আর একটি পেনী তাকে দিয়ে ভাবলাম অব্যাহতি পাওয়া গেল। সে দুটি পেনী পকেটে ফেলে আবার সেই কিচির-মিচির আরম্ভ করল। তার কথার অর্থ অহুমানে এই বুঝলাম, পেনীতে হবে না, পেনীর মূল্যে তাদের দেশের পয়সা চায়;—এটা তার দুইমি মাত্র। আমি এই মুষ্কিলে পড়ে তাকে আরও একটি পেনী দিলাম, তবু দেখি সে আমার পাছ ছাড়ে না। তখন তাকে শক্ত তাড়া দিতে সে হাসতে হাসতে সরে পড়ল। রাস্তায় অনেক money changer (অর্থাৎ যারা বিভিন্ন দেশের মুদ্রা বদল করে দেয়) দোকান খুলে বসে আছে, তাদের কাছেও কিছু টাকাকড়ি ভান্ধাতে গেলাম না, পাছে কি-দিতে কি দেয়।

পরে বড় বাজারটির ভিতর প্রবেশ করে নানা জাতীয় ফলমূল,

শ্যাকস্জী দেখলাম। ফলগুলির মধ্যে কিছু কিছু আমরা কলকাতার ফলওয়ালাদের দোকানে দেখে থাকি। কমলা লেবু প্রচুর—তবে তার খোসা মোটা, আর আমাদের দেশের মত সরস মিষ্টিও নয়। এখানে ভদ্র আর চাষা মেয়েরা সবাই কেনা-বেচা করছে দেখলাম। এক শ্রেণীর ভদ্র স্ত্রীলোক দেখলাম চোখের নীচেয় নাকমুখ কালো কাপড়ে বাঁধা, বোধ হয় ওটা আমাদের ঘোমটার মত কোন একটা প্রথা।

সন্ধ্যা সাতটায় জাহাজ ছাড়বে তাই মন চঞ্চল ছিল, সংক্ষেপে একটু এদিক-সেদিক দেখেই ফিরলাম। পথে আসতে অনেকগুলি জুয়েলারী দোকান দেখা গেল, তাতে সুন্দর সুন্দর রঙের পাথরের হার প্রভৃতি সাজান রয়েছে। খানিকটা দেখে শুনে আমাদের জাহাজের দিকে ফিরলাম। খালের মোহনায় সারি সারি জাহাজ রয়েছে, কুল দিয়ে বরাবর পাথরের সিঁড়ি বাঁধা, এই সুদীর্ঘ তীরভূমি জল পর্যন্ত ছাউনি করে ঢাকা। জাহাজে তুলে দিবার জন্ত বহু ছোট ছোট নৌকা তীরে রয়েছে। আমাকে উপর থেকে একটা মাঝি ডাক দিল, আমি তার উগ্র চেহারা দেখে তার নৌকায় পার হতে অনিচ্ছা প্রকাশ করলাম,—বললাম আমাদের জাহাজের কাছে আরও নৌকা রয়েছে, এখানে গিয়ে পার হব। লোকটা এমন পাজি যে, আমার হাত ধরে টানটানি আরম্ভ করল, আমি খুব রাগ করলাম; কয়েকটা লোক ভিড়ে গেল, আমি তাদের জানালাম, এর নৌকায় আমি পার হব না। সে লোকদের বুঝিয়ে দিল যে, জাহাজ থেকে নামতে আমি তার নৌকায় বিনা পয়সায় এসেছি, এখন ফিরতে তাকে ফাঁকি দিয়ে অস্ত্র নৌকায় পার হতে যাচ্ছি। আমি তখন তাকে খুব জোরের সঙ্গে বললাম—তোমার এই অসদাচরণের জন্ত তোমাকে আমি শাস্তি

দেওয়াব। তখন আশেপাশের দু'চারটি ভদ্রলোক তাকে জোর করে খামিয়ে রেখে আমাকে যেতে বলল। নিকটেই একটা মিশরী পুলিশ দাঁড়িয়ে দেখছিল, আমাকে চলে যেতে বলল, কিন্তু মাঝীটাকে কিছুই বলল না। ভাবলাম, বাপরে কি ভয়ানক জোচ্ছোরের দেশ! আমি অল্প নৌকায় চড়ে জাহাজে এলাম। সন্ধ্যার পর জাহাজে এসে দেখলাম, সাহেবরাও উপরে গিয়ে আমারই মত কিছু কিছু ব্যবহার পেয়ে এসেছে।



দ্বিতীয় অধ্যায়


[সুরেজ হইতে লণ্ডন]

ভূমধ্যসাগর (Mediterranean Sea)

৯ই এপ্রিল রাত্রিতে পোর্ট-সৈয়দ থেকে ছেড়ে আমাদের জাহাজ ভূমধ্যসাগরে পড়ল। পরদিন সকালে উঠে দেখি ভারী ঠাণ্ডা পড়েছে, কোয়াসায় আকাশ ভরা, প্রবল বাতাস বইছে। ডেকের উপরের পর্দা খুলে দেওয়া হল, শুনলাম বাতাস বাড়বে—তুফান হবে। জাহাজের Barometer (বায়ুমান যন্ত্র) সাহায্যে ঝড় বাতাসের থবর পূর্ব হতেই পাওয়া গেল। যে বাতাস হবে সেটা বড় ঝড় নয়, তবে সমুদ্রে মাঝে মাঝে এমন অবস্থা হয়। বেলা এক প্রহরের সময় প্রবল বাতাস বইতে আরম্ভ হল, সমুদ্রের তুফান ক্রমেই বেড়ে উঠল। জাহাজ আগে-পাছে, এপাশে-ওপাশে দুলছিল। অনেক ছেলেপিলে ও স্ত্রীলোক মাথাঘোরায় আর বমি করতে করতে অস্থির হল। আমারও গা অস্থির করছিল, আহারের সময় বয়ে গেল, আহার করতে ইচ্ছা হল না। বেলা তিনটার পর—অতিকষ্টে দু'টা ভাত নিয়ে বসলাম। দেশ থেকে গৃহিনীর দেওয়া কুলের আচার, আমসবু সঙ্গে ছিল তাই দিয়ে সামান্য দুটো খাওয়া গেল; সেই দুলতে দুলতেই খাওয়া। উঠে মুখ ধোবার আগেই অর্দ্ধেক আহার বমি হয়ে উঠে গেল। জাহাজে দু'জন ইংরেজকে বন্ধুরূপে পেয়েছিলাম,



সিসিলি নারী—আধা গাউন আধা শাড়ী



আফ্রিকার কাক্রি বালক



একজন রাজনাহীর মিশনারী ডাক্তার, আর একজন কলকাতা বিশপ কলেজের ভাইসপ্রিন্সিপাল। আমার যে কোন একটু অসুবিধা হলেই এঁদের সাহায্য পেতাম।

জাহাজের কষ্ট

বিকালে তুফান আরও বাড়িল, জাহাজের দু'পাশ দিয়ে নীচের ডেকের উপর ঢেউএর জল আসছিল, এক একটা ঢেউ ঘের ছোট ছোট এক একটা পাহাড়। সমস্ত লোকই উপর ছেড়ে নীচে এল, নীচেয় জাহাজ একটু কম দোলে। আমি সন্ধ্যার আগেই নীচেয় একটা অন্ধকার স্থানে গিয়ে শুয়ে পড়লাম। সেখানে অত্যন্ত দুর্গন্ধ, অতি কষ্টে আমাকে রাত্রি কাটাতে হল। দিনরাত্রির অবস্থাটা মনে করে ভাবলাম—কে জানে বিলাত যাত্রায় এত কষ্ট, এটা যদি ভবপারের যাত্রা হত তবু না হয় মনকে প্রবোধ দিতাম যে, আর জগতের দুঃখ কষ্ট ভুগতে হবে না।

পরদিন সকালের একটা ঘটনা—বস্ত্রণার চীৎকার শুনতে পেলাম, দেখলাম ডাক্তারখানায় একজনের হাতে অস্ত্র করা হচ্ছে; দেখে আমার গত দিনের কষ্ট হাল্কা জ্ঞান হল। পরদিনও সমুদ্রের একই অবস্থা। সন্ধ্যার পর বাতাস সামান্য কম পড়ায় কতকটা আরাম বোধ হল। এই দু'দিন লোকজনের অত্যন্ত দুঃখবস্থা গেল। তার পরদিন সমুদ্র একটু স্থির হল।

গ্রীস ও ইটালীর উপকূল

১১ই এপ্রিল সকাল হতেই আমরা ডাইনে ক্রীট দ্বীপ দেখলাম। এই ক্রীট দ্বীপের অতি প্রাচীন কালের এক নররাক্ষসের বিবরণ আমার মনে পড়ছিল। এখানকার এক দুর্দান্ত রাক্ষস রাজা গ্রীসের এথেন্স রগন

হতে রাজকর স্বরূপ মাহুষ নিয়ে এসে উদর পূরণ করত। এটা গ্রীস দেশের অংশ, নিকটেই একটু উত্তরে গোটা গ্রীস দেশ। তার কোন কিছু চিহ্ন আমরা জাহাজ থেকে দেখতে পেলাম না।

১২ই এপ্রিল সকালে আমরা বামে সিসিলী দ্বীপে এটানা আগ্নেয়গিরিতে ধূম উদগীরণ হতে দেখলাম। ডাইনে অর্থাৎ উত্তরে ইটালী দেশ। সিসিলী ও ইটালীর মধ্যে খুব সঙ্কীর্ণ স্থান দিয়ে অনেকক্ষণ জাহাজ চলল। খানিকটা স্থানে পদ্মা নদীর মত মাত্র প্রশস্ত। দু'ধারেই স্তম্ভোত্তর পর্বতশ্রেণী আর পর্বতের নিয়ে সমুদ্রের ধার দিয়ে নগর পল্লী। বাড়ী ঘরগুলিকে পাহাড়ের গায়ে দূর থেকে যেন টুকরো কাগজ ছড়ান রয়েছে বলে বোধ হচ্ছিল। কোন কোন স্থানে জাহাজ খুবই নিকট দিয়ে চলছিল, তখন বাড়ীর গঠন বেশ পরিষ্কার দেখা গেল। মাহুষের গতি অতি সামান্য ভাবে লক্ষ্য করা গেল। বোটে স্ত্রী পুরুষ এপার ওপার হচ্ছে, মাঝে মাঝে দু'একখানা ছোট জাহাজ ঘাটে বাঁধা রয়েছে। সিসিলী দ্বীপে মেশিনা সহরে বেতার টেলিগ্রাফের উঁচু পোষ্ট, এবং তীরে জাহাজ রয়েছে দেখলাম। আর একস্থানে যুদ্ধের সময়ের প্রস্তুত দুর্গ দেখা গেল। দু'একটা উঁচু পাহাড়ের চূড়ায় বরফে মেঘে এক হয়ে রয়েছে। এদিন ইটালীর বসবাসের কতকটা আভাস পাওয়া গেল। বসতিগুলি সমুদ্রের দিকে ঢালু পাহাড়ের গায়ে বলে জাহাজ থেকে বেশ পরিষ্কার দেখাচ্ছিল। বেলা ১২টায় ষ্ট্রম্বলি (Stromboli) নামে আর একটা প্রকাণ্ড আগ্নেয়গিরি সমুদ্র মধ্যে দেখলাম। আশ্চর্যের বিষয়, উপরে ধূম উদগীরণ হচ্ছে, নীচে বহু লোকজনের বসবাস। এই আগ্নেয়গিরিটার কোন কোন স্থানে ধূম উঠছে আর কোন কোন স্থানে গরম হাওয়া উঠে উপরের শীতল বাতাসে মিলে মেঘ হয়ে চলে যাচ্ছে। আগ্নেয়গিরিতে সব সময় ধূম উঠতে পারে, আমার এ ধারণা ছিল না।

এ দিনকার এই দেখা শুনা গুলিতে জীবনে বিশেষ একটা নূতন ভাব এনে দিল।

শীতের দেশে এসে পড়েছি, ভয়ানক ঠাণ্ডা হাওয়া। কাপড় চোপড়ের সাধ্য নেই গরম রাখে। মাঝে মাঝে আকাশ মেঘে এমন বিশী ঢেকে যাচ্ছিল যেন সন্ধ্যা হয়েছে। কখন বা কুয়াসা, কখন দু'এক বিন্দু করে বৃষ্টি, এই মত দিনের মধ্যে নানা অবস্থা। দিনের পর দিন বিভিন্ন দৃশ্য, বিভিন্ন আবহাওয়ার মধ্য দিয়ে আমরা ক্রমাগত চলছিলাম।

১৪ই এপ্রিল (বাংলা ১লা বৈশাখ ১৩৩১) সকালে আমরা বামে সার্দিনিয়া ও ডাইনে কশিক দ্বীপ অতি অস্পষ্টভাবে দেখতে পেলাম। সারা দিনটা কশিকার নিকট দিয়েই চললাম। এই ভূমধ্যসাগর মধ্যে যত দ্বীপ সবই কেবল পাহাড়-পর্বতময়। কশিকার অত্যুচ্চ পর্বতগুলির উপরে বরফ জমে সাদা হয়ে রয়েছে। কোন কোন খানে বরফের উপর মেঘ জমে আছে। আমাদের বাংলার সঙ্গে এ সব দেশের কোন অংশেও মিল নাই।

আমরা ফ্রান্স দেশের কাছে এসেছি, মার্সেল্‌স্ বন্দর আমাদের সম্মুখে। কলকাতা থেকে সমুদ্রপথে এ পর্য্যন্ত এসেছি—কলকাতা পর্য্যন্ত ১২৬০ মাইল, সুয়েজ পর্য্যন্ত ৪৬৫০ মাইল, পোর্টসৈয়দ পর্য্যন্ত ৪৭৪০ মাইল, এবং এই মার্সেল্‌স্ পর্য্যন্ত এলাম ৬২৪৬ মাইল। মার্সেল্‌স্ থেকে জলপথে লণ্ডন পর্য্যন্ত ২০১০ মাইল। তাহলে কলকাতা থেকে লণ্ডন যেতে এ পথে জাহাজে ৮২৫৬ মাইল। সৈয়দ বন্দর থেকে ভূমধ্যসাগরের মধ্য দিয়ে ক্রমাগত সাতটি দিন চলবার পর ১৫ই এপ্রিল সকাল ৯টায় জাহাজ মার্সেল্‌স্ বন্দরে এল।

মার্সেল্‌স্ বন্দর

মার্সেল্‌স্ ফরাসীদেশের অন্তর্গত ভূমধ্যসাগরের তীরবর্তী একটি অতি সমৃদ্ধিসম্পন্ন বন্দর। সমুদ্রতীরে জাহাজ, বোট, মালের আপিস প্রভৃতির বিশালতা দেখে ঐক্যবারে তাক্ লেগে গেল। ডকের ভিতর ছোট বড় অনেক মাল বোঝাই বোট এদিক ওদিক ছুটোছুটি করছিল : সবগুলিই কলের বোট। লোকজন কুলি মজুর সবই সাদা, তারা কাজ করছিল কলের মত দ্রুত। আমার মনে হচ্ছিল যেন চারিদিকে বায়স্কোপ দেখছি। উপরে ছোট বড় দু'রকম রেলগাড়ী, সদর রাস্তায় ট্রামগাড়ী ; আর ছোট বড় নানাপ্রকার মালের মটর লরী চারিদিকে ছুটোছুটি করছিল। গাড়ী ঘোড়া, লোকজন, কুলী মজুর সকলেই গতিবিধি অতি দ্রুত,—চার-দিকেই যেন এক বিশাল কর্ম-ব্যস্ততা।

জাহাজ ডকে ভিড়বামাত্র জাহাজের এজেন্ট কুক কোম্পানী, কক্স কোম্পানী প্রভৃতির কর্মচারীগণ আপন আপন পার্টির প্যাসেঞ্জারদের সাহায্য করবার জন্ত জাহাজে এল। আমরা দশ-বার জন ইংলণ্ড যাত্রী মার্সেল্‌স্‌এ নামলাম। বেলা দু'টার সময় প্যারিসের জন্ত ট্রেন ছাড়বে, এই অবকাশে সকাল বেলা আমরা মার্সেল্‌স্‌ সহরটি দেখতে বের হলাম। প্রথমেই আমরা ডাকঘরে গেলাম। ডাকঘরের একটি কর্মচারীকে জিজ্ঞাসা করলাম, এখানে ইংরাজী জানা কে আছেন? আপিসের একটি মেয়ে-কর্মচারী অতিকষ্টে জানাল যে, ইংরাজী-জানা বর্তমানে এখানে কেউ নাই। মেয়ে পুরুষে প্রায় সাত আট জন ফরাসী কর্মচারী তখন ডাকঘরে কাজ করছিল, কিন্তু তাদের একজনও ইংরাজী জানে না শুনে আশ্চর্য্যস্থিত হলাম। আমার ধারণা ছিল, ইংরাজীটা ইয়োরোপের সকল জাতিই ভালভাবে জানে; পরে জানলাম যারা বিত্তা-ব্যবসায়ী

অথবা যাদের ব্যবসায় সম্পর্কে ইংরাজদের সঙ্গে ঘনিষ্ঠতা, তাদের কেউ কেউ ইংরাজী শেখে মাত্র। ফরাসীদের ভাষায় উচ্চারণ অনেকটা আরবীর মত। আরবী উচ্চারণের সঙ্গে আবার পারস্য আফ্গান উচ্চারণের আভাস পাওয়া যায়। আমাদের বাংলা থেকে যত উত্তর-পশ্চিম, ততই মাত্রাঘের আকৃতি, প্রকৃতি, ভাষা প্রভৃতি* ক্রমে পরিবর্তিত হয়ে অবশেষে ইংরাজীভাবে পরিণত হয়েছে।

আমাদের সময় সংক্ষেপ বলে এখান থেকে কোন চিঠিপত্র ভাকে না দিয়েই সহর দেখতে চললাম। কলকাতা হাওড়া পোলের দক্ষিণে গঙ্গার ধার দিয়ে ষ্ট্রাণ্ড রোডের উপর কয়েকটা বড় বড় মালগুদাম দেখা যায়, ঐ রূপের গঠনে পাথরের তৈরী পাঁচতলা, ছয়তলা প্রকাণ্ড মালগুদাম সব রাস্তার দু'ধারে দণ্ডায়মান—এক একটা পাঁচ সাত শত হাত লম্বা হবে। যতদূর নজর চলে এই ভাবেই চলেছে। এটা পাহাড়ে' দেশ, তাই কোন কোনখানে সহর খুব উঁচুনীচু। উঁচু যারগায় বাড়ীগুলো অপেক্ষাকৃত কম দীর্ঘ। সমুদ্রের তীরে একস্থানে যুদ্ধের গোলাগুলি প্রভৃতি সাজান রয়েছে।


এক ঘণ্টা সহর দেখে আহালাদি করে প্যারিস লাইনের ট্রেন ধরবার জন্তু ষ্টেশনে যাত্রা করলাম। আড়াই মণ ওজনের দু'টি বড় ষ্টিল ট্রান্স আর ত্রিশ সের ওজনের একটা বিছানা-পত্রের মোট আমার সঙ্গে ছিল। একটা ফরাসী মুটে একটা চামড়ার ফিতে দিয়ে ট্রান্স দু'টোর হাতল বেঁধে কাঁধে ঝুলিয়ে দিয়ে, বিছানার মোট দু'টি দু'হাতে নিয়ে অনায়াসে জাহাজের উপর থেকে নীচে নামিয়ে দিল। তার জন্তু সে এক শিলিং (অর্থাৎ বার আনা) নিল। এখানে ফরাসী মুটের ভদ্রতার কথা একটু বলি। ষ্টিল ট্রান্স দুটিতে জুয়েলারী অলঙ্কার ছিল বলে রেলকোম্পানী তা নিতে অস্বীকার করল। সে-দুটিকে আবার জাহাজেই লণ্ডনে

পাঠাবার আবশ্যক হয়েছিল বলে জাহাজে তুলবার জন্ত সেই মুটেকে খুঁজে আনলাম। সে পুনরায় জাহাজে তুলে দিয়ে এল কিন্তু তার জন্য কি দিতে হবে জিজ্ঞাসা করায় সে কিছুই নিল না। সে প্রকাশ করল, মালটা নামান যখন কাজের হল না তখন বিনামূল্যেই আবার তুলে দেওয়া তার উচিত। আমাদের দেশের মুটে হলে প্রত্যেক বারেই একটু-না-একটু ঝগড়া করতে হত। এদের মুটে-মজুর পর্যন্ত ভাল প্রকৃতির মানুষ, এরা উন্নত হবে না কেন।

প্যারিস যাত্রা

বেলা ১টায় আমরা রেল ষ্টেশনে গিয়ে ট্রেনে চাপলাম। ট্রেনে প্রথম, দ্বিতীয়, তৃতীয় তিন শ্রেণীর গাড়ী আছে। আমার তৃতীয় শ্রেণীতে গেলে কম খরচে হত কিন্তু সঙ্গী সাহেবদের সঙ্গে মিলে দ্বিতীয় শ্রেণীর টিকিটই কিনতে হল। আমরা যদিও প্যারিস চলেছি, তবুও একেবারে লণ্ডন পর্যন্তের টিকিট কিনলাম। মাসেঁলস্ থেকে লণ্ডন ৮০০ মাইলে সাড়ে পাঁচ পাউণ্ড (প্রায় আশী টাকা) ভাড়া লাগল। ফ্রান্স দেশের প্রচলিত মুদ্রার নাম ফ্রাঙ্ক; ৭০ ফ্রাঙ্কে ১ পাউণ্ড (১৫২ টাকা)। ফরাসী গাড়ীগুলো খুব সুন্দর। গাড়ীর চারদিকের দেওয়াল সুন্দর কারুকার্য-শোভিত পরদায় ঢাকা, বসবার পুরু গদিগুলো কার্পেটে মোড়া। চার দিকের দেওয়াল রেল কোম্পানীর প্রধান প্রধান স্থানের দৃশ্যাবলীর চমৎকার ছবি দিয়ে সাজানো। বেলা ছ'টায় ট্রেন প্যারিস অভিমুখে রওনা হল।

আমাদের ট্রেনখানির নাম পি, এল্, এম, মেল অর্থাৎ প্যারিস-লিয়ন-মেডিটারেনিয়ান-মেল। ট্রেন ছেড়ে দিতেই দেখলাম, আমরা



কম্বিক শে প্যারিস নগর
বাকি ভ্রমণের ক্ষেত্রে লক্ষিত সৈনিকদের স্থিতিভ্রমণ ৩৩ পৃষ্ঠা

উপর দিয়ে চলেছি। অনেকখানি পথ সহরের মাথার উপর দিয়ে ট্রেনখানি চলছিল, তাই সহরের দৃশ্যটি আমরা বেশ দেখতে পেয়েছিলাম। কয়েকটা ষ্টেশন গিয়েই ট্রেন সুবিস্তীর্ণ প্রান্তরের মধ্য দিয়ে চললো। আমরা উত্তর দিকে চলছিলাম, বামে একটি মনোরম পর্বত শ্রেণী। পর্বতের পাদদেশ দিয়ে বরাবর ছোট ছোট পল্লী। পল্লীগুলির দৃশ্য অতি মনোহর। পল্লীবাসীদের অবস্থান, ঘরবাড়ী, বাগান প্রভৃতি দেখে বাস্তবিকই খুব আনন্দিত হলাম। আনন্দ—তাদের পরিষ্কার পরিচ্ছন্নতা ও সৌন্দর্য্যজ্ঞানের বিকাশ দেখে। ভাল করে দেখবার জন্য আমি গাড়ীর ভিতরে না থেকে বাইরে একধারে যে চলবার পথ আছে, সেখানে বসলাম। সে পথ বেশ প্রশস্ত, একধারে একজন লোক বসলেও লোকের গতিবিধির কোন ব্যাঘাত হয় না। সমস্ত গাড়ীই কাচের আবরণে ঢাকা, কারণ শীতের দেশ, বাইরের ঠাণ্ডা বাতাস ভিতরে প্রবেশ করতে পারে না।

ফরাসী পল্লীচিত্র

পাহাড়ে দেশ, দূরে নিকটে ছোট ছোট পাহাড়। মাঝে মাঝে গাড়ী পাহাড়ের এমন সুড়ঙ্গের মধ্য দিয়ে চলছিল যে, অনেকক্ষণ পর্যন্ত একেবারে অন্ধকার হয়ে যাচ্ছিল। এই রকমে কখন পাহাড়ের নীচে দিয়ে, কখন পাহাড়ের পাশ দিয়ে, কখন শস্তক্ষেত্র দু'ধারে রেখে আমরা চলছিলাম। সারা পথেই কোথোঁও ফাঁক ফাঁক, কোথাও ঘন সন্নিবিষ্ট গৃহস্থ-ভবন। বাড়ীগুলি ছোট বড় আকারে নানা বৈচিত্র্যময়। সমস্ত বাড়ীর দেওয়ালই পাথরের বা পাথুরে

মাটির, উপরে চারদিকে ভাঁজ করা ঢালু পাথরের ছাদ। ফাঁকা জমিতে শস্তক্ষেত্রের মধ্যেই বাড়ীগুলো অবস্থিত। বাড়ীর কোনখানে একটুও অপরিষ্কার নয়, একেবারে ছবিটির মত সাজান।

স্ত্রী-পুরুষ সবাই জমিতে কাজ করছে। সেই পাথরের জমিতে মেয়েরাও কোদাল ধ'রে কোপাচ্ছে। বড় বড় জমিগুলিতে পুরুষেরা ঘোড়ায়-টানা এক রকম বড় লাঙ্গলে চাষ করছে। বাড়ীর পাশের জমিতে মেয়েরা কাস্তে কোদাল নিয়ে কাজ করছে। এক টুকরা জমিও পতিত নাই, কোন জমি শস্তে ভরা, কোনগুলিতে চাষ হচ্ছে। শস্তের গাছগুলি খুব ছোট, আমাদের দেশের ছোলা মস্তুর প্রভৃতি গাছের মত। ট্রেণে সহযাত্রীদের কাছে এত ছোট শস্তের গাছের কারণ জিজ্ঞাসা করে জানতে পারলাম যে, শস্তের গাছ বড় করলে জমির উর্বরতা-শক্তি অনেক নষ্ট করে, কাজেই কম ফসল পাওয়া যায়। এই জন্যই এরা বিজ্ঞানের বলে গাছ ছোট রেখে ফসল বেশী পাবার ব্যবস্থা করেছে। কোন কোন ফসলের গাছের খুব ছোট অবস্থায়ই মাথা কেটে দেয়, তাতে গাছ আর উঁচু হতে পারে না এবং তার ফসল খুব বেশী পরিমাণে হয়। কোন কোন শস্তক্ষেত্রের মাঝে শস্তের গাছের ফাঁকে ফাঁকে বড় বড় ফলের গাছ দেখা গেল। এত পথ চলে কোথাও একটি অকেজো গাছ দেখলাম না। এক রকম সরু লম্বা ঝাউ গাছের মত গাছ দেখলাম; সেগুলোকে অকেজো গাছ বলেই মনে হল, পরে জানলাম আমাদের দেশের বাঁশের মত কাজ এই গাছের দ্বারা 'করা হয়। প্রত্যেক গাছ, চারা, এমন কি ফসলের গাছটি পর্যন্ত স্নন্দর শ্রেণীবদ্ধ করে সাজানু। এতে জমির মনোহর সৌন্দর্য্য ফুটে উঠেছে। মনে হয় এদের প্রত্যেক চারাটি যেন গোনাগাঁথা, নম্বর

দেওয়া। স্ত্রী-পুরুষ চাষীদের পোষাক অত্যন্ত সাদা-সিদে কিন্তু বেশ কার্যোপযোগী ও পরিষ্কার পরিচ্ছন্ন। আমরা জানি পরিষ্কার পরিচ্ছন্ন কাপড় পরে কেবল বাবুগিরি করা চলে, কিন্তু কেমন করে পরিচ্ছন্নতার সঙ্গে শ্রমসাধ্য কাজ করা যায় তা এদেশের শ্রমিকদের কাজ দেখলে বোঝা যায়। আমাদের দেশে এটা নিতান্তই দুর্লভ, কারণ ভদ্রঘরের মেয়ে পুরুষ সাফ কাপড় পরে বসে কাটান, আর ছোট ঘরের লোকগুলো ময়লা কাপড় পরে শ্রমসাধ্য কাজ করে।

কি কঠোর পরিশ্রম ক'রে যে ফরাসীরা এই পাথরের উপর চাষ করে সোণা ফলাচ্ছে তা দেখলে অবাক হ'তে হয়। পাথুরে জমিতে চাষ করছে, আবার উপরের পাহাড় ঢালু করে কেটে জমি সমান আর ধাপ ধাপ সিঁড়ির মত করে তাতে চাষ দিয়ে ফসল ফলাচ্ছে। নীচে থেকে জল তুলে দিতে হয়। কেবল পরিশ্রমের গুণেই এরা মাহুষের মত মাহুষ হয়ে টিকে রয়েছে। দেশের ভদ্র, চাষা সকলেই পরিশ্রম করে।


ষ্টেনে প্রায় স্ত্রী-পুরুষ সকল লোকেরই হাতে কাঁধে জিনিষের মোট। ষ্টেনে মুটের হাঁকাহাঁকি নাই। স্ত্রী-পুরুষ প্রত্যেকেই নিজের মোট নিজেই বহন করে নিয়ে চলেছে। বেগুলি অত্যন্ত ভারী মোট সেগুলি ছোট কলের গাড়ীতে করে ষ্টেনের বাইরে এনে দিচ্ছে। শুনেছিলাম ফরাসী মেয়েরা নাকি খুব বিলাসী, কিন্তু এখানে বিলাসিতার লক্ষণ বেশী কিছু দেখলাম না, তবে পারিপার্শ্বিক বড় চমৎকার।

ট্রেনের দু'ধারে চাষের জমি, তার মধ্যে মধ্যে ব্যবসা-বাণিজ্যের বিজ্ঞাপনের বোর্ড টাঙান রয়েছে। চা, সিগারেট, মদ প্রভৃতির অনেক কোম্পানির নাম দেখলাম, যারা আমাদের দেশে কাগজে

বড় বড় বিজ্ঞাপন দিয়ে থাকে। মাঝে মাঝে নির্জন গ্রামপথ দেখা যাচ্ছিল। সেগুলো বড়ই মনোরম। পথগুলি পরিষ্কার পরিচ্ছন্ন ঝরঝরে—যেন এখনি তৈরী হয়েছে। খানিকটা যাবার পরে দেখলাম, রেল-লাইনের ধার দিয়ে একটি সুন্দর নদী সেই পাহাড়-পথে একেবেঁকে চলেছে। নদীটির উপরে প্রতি মাইলেই দু'একটা করে সুন্দর পোল। এটি ফ্রান্সের সুবিখ্যাত রোণ নদী। ট্রেন প্রায়ই পল্লীর ভিতর দিয়েই চলছিল, পল্লী-পথেও মটরগাড়ী, মটর-সাইকেল প্রভৃতির গতিবিধি প্রচুর। বড় বড় পল্লীর ভিতর এক একটি উঁচু চূড়াওয়ালা গির্জা দেখা গেল।

লিয়ঁ সहर

সন্ধ্যার আগেই ট্রেন লিয়ঁ (Lyons) সহরে প্রবেশ করল। লিয়ঁ ফ্রান্সের একটি প্রধান সহর, Rhone আর Saone দু'টি নদীর ত্রিমোহনায় অবস্থিত। সহরের মাঝখানে আমাদের ট্রেন Rhone-এর পোলের উপর দিয়ে যখন নদী পার হল তখন বহুদূর পর্যন্ত সহরের শোভা দেখা গেল। সেখানকার নদীমধ্যস্থ জাহাজ, দূরস্থ পৃথক পোলের উপরের জনতা আর ট্রামের শ্রেণী, সহরের সুদীর্ঘ রাজপথের পার্শ্বস্থ অট্টালিকাসমূহ একেবারে আমাকে মুগ্ধ করে তুলল। আমাদের গাড়ীর ভিতরের দেওয়াল যে সকল সুন্দর স্থানের চিত্রযুক্ত ছবিতে সাজানো ছিল তার মধ্যে লিয়ঁ সহরের এই ছবিও ছিল। অল্পক্ষণ পরেই ট্রেন লিয়ঁ স্টেশনে ধরল। এখানে ট্রেন পনের মিনিট দাঁড়িয়েছিল। অনেক লোক এই অবকাশে নেমে বৈকালের জলযোগ শেষ করে নিল। আমি মাত্র পাউরুটি, মাখম ও ছোটো



অপেরা হাউস

কমলালেবু খেলাম। এই লেবুগুলো আমাদের দেশের শ্রীহট্টের লেবুর মত মিষ্টি নয় বটে, তবু বেশ তৃপ্তিকর খাদ্য। এক একটি লেবুর দাম পাঁচ আনা।

সন্ধ্যার পর আমাদের প্রত্যেকের শোবার জন্য সিট reserve করা হল। প্রতি বেঞ্চে দু'জন করে শোবার বন্দোবস্ত। প্রত্যেকের স্থানের উপরে একটা কল ঘুরিয়ে “Reserved” মার্কি বের করে তাতে প্রত্যেকের নাম ও টিকিটের নম্বর লিখে দেওয়া হল। সারারাত্রি বেশ আরামেই ঘুমিয়ে কাটালাম। ভোর পাঁচটায় আমরা ফ্রান্সের রাজধানী প্যারিস সহরে উপস্থিত হ'লাম।

ট্রেন ষ্টেশনে আসতেই সঙ্গী সাহেবরা চা পান করল, আমি সামান্য কিছু খাবার খেলাম। নানা ধরণের জিনিষ থরে থরে সাজান, আমার কাছে সবই নূতন, আমি Sandwich আর দু'তিন রকমের ছোট কেক মাত্র খেয়েছিলাম। প্যারিসের অনেক জিনিষের দাম সাধারণতঃ কলকাতার চারগুণ হবে, তবু একে বড় দুর্ভাগ্য বলব না, কারণ ইয়োরোপের সহর!

প্যারিস নগর

বেলা আটটায় আমরা প্যারিস সহর ভ্রমণে বের হলাম। সহযাত্রী বার জন মিলে মটরবাস reserve করে সহরের ঠিক মাঝখানের প্রধান কয়েকটি রাস্তায় ঘুরলাম। প্যারিস পৃথিবীর মধ্যে সব চেয়ে সুন্দর সহর। এর সৌন্দর্য্য ও বিশালতার কথা আমি আর কতটুকু বর্ণনা করতে পারব? যেদিকে তাকাই একেবারে সোজা রাস্তা আর দু'ধারে ঠিক একই রকমের বাড়ী। বাড়ীগুলি পাঁচতলা, ছয়তলা আর

খুব উচু। কোন কোন রাস্তার দুই পার্শ্বে সজ্জিত বৃক্ষশ্রেণী। বড় বড় রাস্তার চৌমাথায় খুব খানিকটা ফাঁকা জায়গায় কোথাও একটা অপূর্ব ধরণের সজ্জিত স্তম্ভ, কোথাও ফোয়ারা, কোথাও প্রসিদ্ধ ব্যক্তির মূর্তি স্থাপিত। বিভিন্ন গঠনের উদ্যান, সেতু, গীর্জা, প্রমোদাগার অনেক দেখা গেল। আমাদের কলকাতার কারবারী আপিস, ব্যাঙ্ক প্রভৃতির বাড়ীগুলিই দেখবার মত বড়, কিন্তু প্যারিসের হোটেল গুলিই বেশী প্রাধান্য প্রকাশ করেছে। আমার এই কয়েক ঘণ্টা ভ্রমণের মধ্যে এই মহানগরীর চিত্র পাঠক পাঠিকাগণের সম্মুখে উপস্থিত করতে পারব, এমন আশা করা বৃথা।

আমাদের দ্রুতগামী মটরবাসস্থানিতে সহরের বিভিন্ন স্থানগুলি দেখে ঐ দিনই আমরা লগুন যাবার জন্ত সহরের উত্তর সীমানায় টেনসনে ট্রেন ধরলাম। পথে বর্ণন যোগ্য বেশী কিছু মনে পড়ে না— কেবল খুব বড় বড় মাঠ, তার কোনটায় চাষবাস হচ্ছে, কোনটা কেবল গবাদি পশু চরবার জন্ত নির্দিষ্ট রয়েছে। পথে একস্থানে যুদ্ধের সময়ের প্রস্তুত সেনা-নিবাস নির্জন অবস্থায় পড়ে রয়েছে দেখা গেল, আর একস্থানে সৈন্তদের গোরস্থান দেখলাম। সেনা-নিবাসে এখন কিছু নাই, ফাঁকা মাঠের মধ্যে অনেকগুলো টিনের চালা ঘর রয়েছে মাত্র। গোরস্থানটিতে শ্রেণীবদ্ধভাবে মৃত সৈনিকদের স্মৃতিস্তম্ভ। পথে কয়েকটা কাঠের কারখানা দেখলাম—কাঠ, তক্তা, নানারকমের বাস্তব প্রভৃতি সাজানো রয়েছে। পথে যত বাড়ী ঘর জিনিষপত্র গাছপালা দেখলাম তার কোনটাই এলোমেলো নয়, সবই সুন্দরভাবে সাজানো।

বেলা ১-৩৫ মিনিটের সময় ট্রেন ইংলণ্ডের নিকটবর্তী ইংলিস চ্যানেলের উপকূলে বুলন (Boulogne) নামক ফ্রান্সের আর একটি

সহরে এসে তার গতি শেষ করল। এখানে নেমে আমরা ইংলিস চ্যানেল পার হবার জন্ত একখানা সব দীর্ঘ জাহাজে উঠলাম; জাহাজখানি ইংরেজ ফরাসী বহু নর-নারীতে ভরপুর হল। এক ঘণ্টা সময়ের মধ্যেই পার হয়ে আমাদের জাহাজ ইংলণ্ডের উপকূলে ফোক্‌স্টোন (Folkestone) নামক বন্দরে উপস্থিত হল।

তৃতীয় অধ্যায়

[লণ্ডন সহর]

প্রথম পদার্পণ

১৬ই এপ্রিল (১৯২৪) ইংলিস চ্যানেল পার হয়ে জাহাজ থেকে নামলাম। ইংলণ্ডের ভূমিতে পদার্পণ করেই একবার ভগবানকে স্মরণ করে মনে মনে বললাম—যিনি মুকের মুখে বাগ্মিতা ফুটাতে পারেন, যিনি পঙ্কুকে গিরি লঙ্ঘন করাতে পারেন, সেই সর্বশক্তির আধার শ্রীভগবান আমার সহায় হউন ; যেন ইংলণ্ডের কৰ্মক্ষেত্রে যোগ্যতা দেখাবার মত শক্তি পাই।

এ পর্যন্ত জাহাজে যে সকল ইংরেজের সঙ্গে একত্র এসেছি, তাঁদের মধ্যে ঋাা বিভিন্ন পথে যাবেন, তাঁরা আমার নিকট বিদায় নিয়ে অত্র ট্রেনে উঠলেন। লণ্ডনে পৌছে কোথায় গিয়ে উঠব বিশেষ স্থির ছিল না, তবে তার জ্ঞাত উদ্দিগ্গত ছিলাম না। এমন সময়ে একটি মাদ্রাজী যুবককে পেলাম। তিনি ভিন্ন জাহাজে দেশ থেকে রওনা হয়ে এখানে পৌঁচেছেন ; আমরা একত্রে ট্রেনে রওনা হলাম।

ট্রেনখানি সমুদ্রের ধার দিয়ে দক্ষিণ-পশ্চিম দিকে চলল। পরে পথের হুঁধারে আমরা ইংলণ্ডের অনেক বিস্তীর্ণ প্রান্তর, গো-মহিষাদি

পশ্চাচরণের মাঠ দেখতে পেলাম। খুব দ্রুতগামী ট্রেনে আমরা চলেছি, ছোট ছোট স্টেশনগুলি ভ্রূক্ষেপে পার হয়ে দু'একটি বড় স্টেশনে ট্রেন ধরল। পরে ক্রমেই সহরের ঘন সন্নিবেশ দেখতে পেয়ে লগুনের নিকটবর্তিতা অনুভব করলাম—ক্রমেই সহরের ঐশ্বর্য ফুটে উঠল। তারপর যখন লগুনের সীমানার মধ্যে ক্রমে এসে পড়ল তখন সহরের গুরুত্ব অনুভব করতে লাগলাম। দেখতে দেখতে ট্রেন নদী পার হল। নদী এবং তার দু'ধারের দৃশ্য দেখে বুঝতে বাকী রইল না যে, এই সেই জগদ্বিখ্যাত টেমস্ (Thames)। তারপর ট্রেন সহরের ঘন সন্নিবিষ্ট বাড়ী ঘরের উপর দিয়ে কিয়দূর গিয়ে ভিক্টোরিয়া স্টেশন নামক লগুনের মধ্যবর্তী একটি বিরাট স্টেশনে পৌঁছল।

মান্দ্রাজী যুবকটির থাকবার বাসা নির্দিষ্ট ছিল। ভিক্টোরিয়া স্টেশন থেকে একখানি ট্যাক্সী করে আমরা উভয়েই Gawer Streetএ Indian Students' Union নামক ভারতীয় ছাত্রাবাসে উঠলাম। সে মান্দ্রাজী যুবকটির জন্য পূর্বে হতেই সেখানে স্থান বন্দোবস্ত ছিল কিন্তু আর সিট (seat) খালি নাই, তাই আমার স্থান সেখানে হল না। হোস্টেলে কোন বাদ্দালী যুবক আছে কিনা অনুসন্ধান করায় একটীমাত্র বাদ্দালী যুবককে পেলাম। তিনি আমাকে 21, Cromwell Roadএ গভর্ণমেন্ট পরিচালিত ভারতীয় ছাত্রাবাসে নিয়ে গেলেন। সেখানে মাত্র তিন দিনের জন্য আমার স্থান হল। সেদিন বিকালে একাকী বেড়িয়ে সহরের অবস্থা একটু বুঝে নিলাম।

এই ছাত্রাবাসে থেকে তিন দিনের মধ্যে আমি আমার বিশেষ দু'টি কাজ সম্পন্ন করে নিলাম। একটি হচ্ছে—যে উদ্দেশ্য নিয়ে লগুনে এসেছি (অর্থাৎ ব্রিটিশ এম্পায়ার একজিবিশনে আমাদের

ইকনমিক জুয়েলারী ওয়ার্কসের ষ্টল করা) সেই একজিবিশনের স্থান দেখে এলাম এবং আমাদের নিরুপিত ষ্টলের বন্দোবস্ত করে নিলাম। আর একটি কাজ—একটি বড় হোট্টেলে গিয়ে দু'সপ্তাহের জন্ত বাসা নিলাম। বড় হোট্টেলের আবশ্যক ছিল না, হঠাৎ যেমন জুটে গেল তেমনই নিলাম।

একাকী অভ্যস্ত নূতনত্বের মধ্যে এসে পড়ে যে অসুবিধা এবং উদ্বেগ ভোগ করছিলাম, এই হোট্টেলটিতে স্থান নিয়ে সে সব কেটে গেল। বেশ একটু নিশ্চিন্ত হলাম। একজিবিশনে আরও এক সপ্তাহ পরে কাজ আরম্ভ হবে, তাই এই একটি সপ্তাহ আমি আমার আবশ্যক কর্তব্যাকর্ম সম্পাদনের সঙ্গে সঙ্গে লণ্ডনের মোটামুটি অবস্থা ঘুরে-ফিরে একটু দেখে নিলাম।


লণ্ডনে প্রথম সপ্তাহ

লণ্ডন সहरটি দেখবামাত্রই আমার খুব চমক লেগে যায় নি, কারণ এর আগে প্যারিস দেখে এসেছি। প্যারিসের সেই অপূর্ব সুন্দর সুদূর-প্রসারিত প্রাসাদাবলী শোভিত রাজপথ এর চেয়েও সুন্দর; তবে যার জন্য লণ্ডন পৃথিবীর মধ্যে সর্বাপেক্ষা বড় সহর, সে সমস্ত গুরুত্ব আপাত-দৃষ্টিতে বোঝা যায় নি; পরে বুঝতে পেরেছি।

প্রথমতঃ যা যা নূতন রকম বলে লাগছিল সেইগুলি দু'একটা সংক্ষেপে উল্লেখ করি,—

প্রথমতঃ দেখলাম—অধিকাংশ বাড়ীরই সাধারণ জমির নীচে আর এক তলা আছে; যে বাড়ীটা পাঁচ তলা বলে দেখাচ্ছে সেটা প্রকৃতপক্ষে ছ-তলা। এ রকম নীচে একটি তলা থাকার জন্য সহর

1562-2-2 — 1562-2-2 — 1562-2-2



1562-2-2 — 1562-2-2 — 1562-2-2

খুব উঁচু হয়ে অঙ্ককার করতে পারে নাই। শুকনো পাথরের দেশ বলে নীচে সঁতা (Damp) হবার ভয় মোটেই নাই।

আগার-গ্রাউণ্ড রেলওয়ে এখানকার একটা আশ্চর্য ব্যাপার। সহরের ভিতরে যত রেলপথ, তার অধিকাংশই জমির নীচে দিয়ে স্ফুড়-পথে গিয়েছে। তার কোন কোন লাইন ৫০।৬০ ফিট বা তারও বেশী নীচে দিয়ে গিয়েছে। এই বেশী নীচু লাইনগুলি এক-একটা গোলাকার প্রকাণ্ড চোঙ্গের ভিতর দিয়ে চলেছে ; একে টিউব (Tube) রেলওয়েও বলা হয়। এই রকম সারা সহরের নীচে দিয়ে কোনটা পাশাপাশি, কোনটা বা একটার উপর দিয়ে cross করে আঁকা-আঁকা পথে গিয়েছে। কমি-বেশী এক মাইল অন্তর স্টেশন, দু'এক মিনিটের মধ্যেই ধাঁ ধাঁ করে স্টেশনগুলি পার হয়ে যায়। স্টেশনে আধ মিনিট মাত্র ধরে, এর মধ্যেই লোকের ওঠা-নামা শেষ হয়ে যায়। মাটির নীচে রেল স্টেশন, পরিষ্কার পরিচ্ছন্ন আলো বাতাস পূর্ণ, উপর নীচে ব্যবসায়ীদের স্ফুড় বিজ্ঞাপনে ঢাকা। লণ্ডনের বিজ্ঞাপনের কথা বলতে গেলে প্রকাণ্ড আকারের বই লিখতে হয়, সে কথা এখন থাকুক। এই টিউব রেল লাইনে চলতে হলে কলে (Lift) ওটা নামা করতে হয় ; সে বেশ ছোট একখানি ঘরের মত, ৩০।৪০ জন লোক নিয়ে ওঠা-নামা করে। নীচের লাইনগুলিতে ঠাণ্ডা বা গরম কিছুই নাই, ভিতরে হাওয়া বাতাস বইবার বন্দোবস্ত আছে। স্টেশনের পার্টিফর্মগুলিতে খুব আলো দেওয়া, সব গাড়ীতেই প্রচুর আলো। দূরবর্তী স্থানে যাবার জন্যে উপরের ট্রাম বা বাসে না গিয়ে এই Under-ground ট্রেনেই বেশী লোকে চলাফেরা করে, কারণ এখানে সময়ের মূল্য অত্যন্ত বেশী। এই রকম কোন কোন স্থানে আবার ঘর বাড়ীর উপর দিয়েও রেল লাইন গিয়েছে। এ ভিন্ন ট্রামগাড়ী

আর মটরবাসে সহরের সকল রাস্তা একেবারে ভরা। সমস্ত ট্রাম ও বাসগুলিই দোতলা। শুনলে অনেকেই অসম্ভব বলে মনে করবেন যে, সহরের রেল লাইনে অনেক স্থলেই যাতায়াতে গড়ে দু' মিনিটে একখানি ট্রেন পাশ করে, আর মটরবাস কোন কোন রাস্তায় প্রতি মিনিটে যাতায়াতে কুড়ি পঁচিশ খানা করে চলে। তবে সবগুলিই সব যায়গায় ধরে না, রাস্তার পোষ্টে নম্বর দিয়ে নিয়ম করা আছে যে, কোন্ লাইনের গাড়ী কোন্‌খানে ধরবে। লোক চলবার জন্য মটরগাড়ীও যথেষ্ট আছে। কিন্তু ঘোড়ার গাড়ীতে লোক চলে না। ঘোড়ার গাড়ীতে মাল, ময়লা টানে; ঘোড়াগুলি খুবই বড় ও মোটামোটা, পা লম্বা লম্বা লোমে ভরা। গরুর গাড়ী একেবারেই নাই।

ষ্টেসনে, রেলগাড়ীর ছাদে, গাড়ীতে, সব স্থানেই পথ চলবার মানচিত্র ও নিয়মাবলী লেখা আছে। আর বিদেশী প্রত্যেক লোকের পকেটেই লণ্ডনের গাইড বই থাকে। বই দেখা ছাড়া পথ ঘাট মনে রাখবার কোন উপায় নাই। আমি এক শিলিংএর একখানা পকেট লণ্ডন গাইড বই কিনেছিলাম, তাতে ৮০ পৃষ্ঠা রাস্তা-ঘাটের ম্যাপ, দু'খানি বড় Sheet ম্যাপ, দেড়শত প্রধান প্রধান দ্রষ্টব্য স্থানের বিবরণ আর লণ্ডনের সাড়ে তেরহাজার ষ্ট্রীটের নকশা সহ লিষ্ট ছিল। লণ্ডনের গাইড বই ছোট বড় অনেক রকমের আছে।

লণ্ডনের রাস্তাগুলি খুব বড় বড় আর পরিষ্কার পরিচ্ছন্ন বটে, কিন্তু প্যারিসের মত সোজা স্রবৃহৎ রাস্তা লণ্ডনে বিশেষ দেখা যায় না। চার-পাঁচ তলা বাড়ীই বেশী, ছাদ প্লেট জাতীয় পাথরের টালীতে ঢালু করে তৈরী। অনেক যায়গায় কাচের ঢালু ছাদ আছে। ঘরের চারদিকের জানালা বড় বড় কাচের পরদায় ঢাকা। সে গুলি

অনায়াসে উপরে তুলে দিয়ে জানালা ফাঁক করা যায়। খুব শীতের দেশ বলে ঠাণ্ডা বা বৃষ্টির হাওয়ার সময়ে কাচের আবরণে জানালা বন্ধ রাখে। সব বাড়ীতেই নীচের তলার ঘরের দেওয়ালে আগুন রাখবার স্থান আছে, সকালে ও রাত্ৰিতে আগুন জ্বালা হয়, শীতকালে সারা দিনরাত আগুন জ্বালা হয়। আগুনের ধোঁয়া চিমনি দিয়ে উপরে উঠে যায়। এই চিমনিতে উপরের ঘর কিছু গরম রাখে, এ ছাড়া ষ্টিমের বা গরম জলের পাইপ আছে, তার দ্বারাও অনেক ঘর গরম রাখা হয়।

টিলবেরী ডক্

আমি মার্সেল্‌স থেকে ট্রেনে প্যারিসের পথে সোজাসুজি লগুনে এসেছি। আমার জুয়েলারী সংক্রান্ত জিনিষপত্র মার্সেল্‌স থেকে সেই জাহাজেই লগুনে চালান দিতে হয়েছিল; কারণ বৃটিশ এম্পায়ার একজিবিশনে নেবার জুয়েলারী জিনিষ অর্থাৎ মূল্যবান অলঙ্কারাদি, মার্সেল্‌সে রেল কোম্পানী ফ্রান্সের ভিতর দিয়ে আনয়ন করা মঞ্জুর করে নি। আমি লগুনে পৌঁছে কয়েকদিন পরেই আমার মালের জাহাজ পৌঁছার সংবাদ পেয়ে সেই মাল জাহাজ থেকে আনবার চেষ্টা করলাম। জানলাম, লগুনের টিলবেরী ডকে (Tilbery Dock) আমাদের জাহাজ এসেছে। ট্রেনে টিলবেরী রওনা হলাম। দেড় শিলিংএর একখানা থার্ড ক্লাসের টিকিট নিয়ে জানতে পেলাম, ডকটি বিশ মাইল দূরে অবস্থিত। প্রথমে দশ বার মাইল ট্রেনখানি সহরের বাড়ী-ঘরের উপর দিয়ে গিয়ে দক্ষিণে টেম্‌স্‌ নদী এবং উত্তরে কয়েক মাইল গোচরণের জায়গা রেখে অবশেষে


টিলবেরী পৌছল। আমি আমার নির্দিষ্ট স্থানে পৌঁছে মালের বাস্তু একজিবিশনে পৌঁছে দেবার জন্য টমাস কুক কোম্পানীর মাফৎ গছিয়ে দিয়ে ডক্ দেখতে বের হ'লাম।

বিশাল টিলবেরী ডক। খুব উঁচু একটা ওভারব্রিজের ওপর উঠেও ডকের আগাগোড়া দৃষ্টিপাত হল না। দেশদেশান্তরের বহু বহু জাহাজ, বহু দেশবাসী বহুভাষী নাবিক দেখলাম। এর মধ্যে ভারতীয় নাবিকও অনেক দেখলাম। চাট্‌গাঁর নাবিকদের সঙ্গে বাংলায় কথা বলে বেশ একটু আনন্দ উপভোগ করলাম। তাদের অনেকেই ইংরাজি জানে না। ফিরবার পথে একটা গেট-পুলিশের হাতে আটক পড়লাম। সে আমাকে অতি ভদ্রতার সঙ্গে তার ঘরে নিয়ে বসাল বটে কিন্তু বলে বসল—আপনাকে আটক করা হচ্ছে, কারণ আমি বুঝতে পেরেছি আপনি একজন জাহাজের কর্মচারী, পালিয়ে যাচ্ছেন। তখন আমি তাকে তার ভুল বুঝিয়ে দিলাম। আমার সঙ্গে একখানা পাসপোর্ট ছিল তাও তাকে দেখালাম। এতে সে আমার নিকট ক্ষমা চাইল এবং সসম্মানে বিদায় দিল। আমাদের দেশে পুলিশের হাতে আটক পড়লে প্রথমেই উভয়ের মধ্যে যে অগ্নীতিকর ভাবের বিনিময় হয় এখানে তার কিছুই হ'লনা দেখে আমি মনে মনে এদেশবাসিকে এই প্রথম শ্রদ্ধার্পণ করলাম।

বাইরে এসে টিলবেরী রেল-স্টেশনটিতে একটু বিশ্রাম করছিলাম, একটা মহিলা ছেলে কোলে করে ঘুরছিল। আমি তাকে বললাম—“ভাল আছ ত, কবে এখানে এলে?” মহিলাটি উত্তর করল—“ওয়েটিং রুমে আসুন, আমাদের কথা শেষ করব।” সে আমাকে মেয়েদের ওয়েটিং রুমে নিয়ে গেল; পরে তার দু'কথাতেই বুঝলাম আমি ভুল করেছি, জাহাজের সহকারী বলে যে মহিলাটিকে মনে করেছিলাম, এ সে নয়। এই



হাউস অব পার্লামেন্ট, লণ্ডন —২৮৫ পৃষ্ঠা



ব্যাংকিংহাম প্যালেস ও ভিক্টোরিয়া মেমোরিয়াল, লণ্ডন —২৮৭ পৃষ্ঠা

জন্মের জন্ত আমাকে লজ্জিত হবারই কথা ছিল কিন্তু দেশের রীতি-গুণে আমাদের মধ্যে আলাপ পরিচয়ের ভিতর দিয়ে খানিকটা আনন্দেরই সৃষ্টি হল।

বাইরে এসে টিলবেরীর সদর রাস্তাটিতে এদিক-ওদিক একটু ঘুরলাম। লগুন সহরের ভিতরে মূদী দোকানে চাল-ডাল বিশেষ দেখতে পাই নি। টিলবেরী এসে দেখলাম চাল-ডাল প্রভৃতি ভারতীয় ধরণের জিনিস হৃন্দর ভাবে সাজান র'য়েছে। সম্ভবতঃ ভারতীয় নাবিকদের জন্তই এরূপ আয়োজন। সকাল আটটায় বাসা থেকে প্রাতর্ভোজনের পর হোটেল থেকে বেরিয়েছিলাম, বারটায় ফিরে এলাম।

হোট্টেলে বাস

আমি যে হোটেলটিতে ছিলাম সেটি গাওয়ার ষ্ট্রিটের (Gawer Street) উপর অবস্থিত; ত্রিতলে সদর রাস্তার দিকে আমার ক্রম। শোয়া আর প্রাতঃকালের সামান্য জলযোগের জন্ত দৈনিক নয় শিলিং দিতে হত। সারাদিন নানা কাজে ঘোরাফেরা করতাম, তাই মধ্যাহ্ন এবং সন্ধ্যার আহাৰাদির কোন স্থান নির্দিষ্ট ছিল না। তখন পাউরুটি, বিস্কুট, মাখন, কলা, আপেল, কমলালেবু প্রভৃতিই ছিল আমার প্রধান খাদ্য। সকালে ঘুম থেকে উঠেই জানালার পানে চেয়ে দেখতাম ঘোর ঘোর কুয়াসা, বেলা ন'টা পর্যন্ত প্রায় সেই মত। গাওয়ার ষ্ট্রিটটি ছিল খুব প্রশস্ত, নিরিবিলা; প্রায় অর্ধমাইল ব্যাপী রাস্তাটি, দু'ধারে একই ভাবের শ্রেণীবদ্ধ খুসর রঙের চারতলা বাড়ী, গায়ে গায়ে মেশা। এদেশের সমস্ত বাড়ী ঘরই ধোঁয়াটে রঙের। এ সময় আমার আহাৰাদি আর চলাফেরার জন্ত খুব কম করেও দৈনিক পনয় শিলিং অর্থাৎ দশ এগার

টাকা খরচ হচ্ছিল। এ ছাড়া বাজে খরচও অনেক। এত খরচ দেখে প্রথম প্রথম বড়ই ভাবনায় পড়লাম।

ইংরেজ পরিবারে বাস

দু'টি সপ্তাহ হোষ্টেলে থাকবার পর আমি চেষ্টা করে এখানকার একটি মধ্য-অবস্থাপন্ন গৃহস্থের বাড়ীতে থাকবার জন্য একটি সুন্দর বাসা পেলাম। চার তলার উপর সুন্দর ছোট পরিষ্কার একখানি ঘর, ভাড়া সপ্তাহে নয় শিলিং মাত্র। ঘরখানিতে পরিষ্কার একখানি খাট-বিছানা, একটি লিথবার টেবিল, একটা জামা কাপড় প্রভৃতি রাখবার আলমারী, একটি হাত মুখ ধোবার জল পাত্রাদি পূর্ণ পাথরের টেবিল,—এই মত ছোট ছোট আসবাবে সজ্জিত ছিল। ঘরখানি পাবার পর থেকেই মনে হল আর আমি যেন বিদেশী নই—যেন এই সহরেরই একজন হয়ে গিয়েছি। গৃহস্থ পরিবারটি দু'টি দিনের মধ্যে সাহায্য-সহানুভূতি দিয়ে আমাকে পরিবারেরই একজন করে গড়ে তুললেন। সংসারে লোক—কর্তা, গৃহিণী, একটি বারো বছরের মেয়ে, একটি চার বছরের ছেলে; আর একটি অতি বৃদ্ধা ছিলেন গৃহিণীর মা। কর্তা ডাকবিভাগে চাকরী করতেন, গৃহিণী সংসারের কাজ করতেন, মেয়েটি স্কুলে পড়ত, আর বুড়ী সারাদিন চশমা চোখে দিয়ে খবরের কগজ ও ভাল ভাল বই পড়তেন। মেয়েটির ডাক নাম ডলী, ভাল নাম ইমেলী; সে আমাকে এখানকার চলিত কথা বলা শিখতে সাহায্য করত।

ঘরখানি পেয়ে আমি আমার বাঙ্গালী জাতির পরমাত্মীয় অন্তর সহিত নিত্য সম্বন্ধের ব্যবস্থা করে নিলাম। নিজে হাতে রান্না করে খেয়ে আমি বরাবরই তৃপ্তি লাভ করে থাকি, তাই দেশ থেকেই ছোট ষ্টোভ ও

ছোট ছোট এ্যালুমিনিয়ামের পাত্র সঙ্গে নিয়ে এসেছিলাম। আমার ঐ ছোট ঘরখানিতে পাথরের টেবিলের উপরে ঠোভে করে রোজ সকালে ভাত রান্না করে খেতাম। এখানে রেজুনের আতপ চাউল একটুপাউণ্ড: অর্থাৎ আধসেরের দাম পাঁচ পেণি বা পাঁচ আনা। মসুর ডাল, আলু, ডিম, মাখম, কপি, সিম প্রভৃতির আমাদের দেশের তিনগুণ বা চারগুণ দাম। আমি ভাতে ভাত করে বা ডাল, চাল, তরকারীতে মিশিয়ে সিদ্ধ করে মাখম যোগে পরম তৃপ্তিতে আহার করতাম।

ভগবানের আশীর্বাদ

সম্পূর্ণ নূতন দেশে এসে আমার নানাপ্রকার অজ্ঞতা ও অযোগ্যতা সত্ত্বেও আমাকে কোন বিষয়ে কিছু অস্থবিধায় পড়তে হয় নাই—যেন অন্তরাল থেকে শ্রীভগবানের দৃষ্টি আমার উপর রয়েছে, এই ভাবটা বিশেষভাবে অনুভব করতাম। কন্সের দেশ দেখে, মালুয়ের মত মালুয়ের দেশ দেখে আমার প্রাণের আনন্দ বেড়ে উঠল; দেশের জল হাওয়ার গুণে এবং প্রাণের আনন্দের জগ্ন আমার শারীরিক মানসিক উভয়বিধ স্বাস্থ্যই অপেক্ষাকৃত ভাল হয়ে উঠল; শরীরের ওজনও বাড়ল। ঘরে বাইরে প্রত্যেকের কাছে এমনই ভাল ব্যবহার পেলাম, দেশবাসীদের পরস্পরের মধ্যে এমনই ভাল ব্যবহার দেখলাম, যেন এই দেশের লোকের চরিত্র অধ্যয়ন করেই বিলাত আগমন সার্থক হল বলে মনে করলাম। বাস্তবিকও আমি যে-যে উদ্দেশ্য নিয়ে এসেছিলাম—এদেশবাসীদের চরিত্র অধ্যয়ন করাও তার মধ্যে একটি প্রধান বিষয় ছিল, তা প্রথমেই বলেছি।

পথ-ঘাটে যখন যাকে যে বিষয়ের জগ্ন জিজ্ঞাসা করতাম তখনই সে

হৃন্দর ভাবে আমাকে সে বিষয় বলে দিত—শুধু বলে দিয়েই ক্ষান্ত হত না, আমি যে সে বিষয়টি ভালরূপ বুঝলাম, সে বিষয়ে আমার নিকট হতে সন্তোষজনক উত্তর পেয়ে তবে আমার নিকট থেকে বিদায় নিত। কখন কখন অযাচিত ভাবেও আমাকে নানাপ্রকার সাহায্য করে আমার উপকার করত। বস্তুতঃ বিলাতবাসীদের সরলতা, উদারতা ও কর্তব্যজ্ঞান দেখে আমি মুগ্ধ হ'লাম। একাকী বিদেশে সব দিকেই আমি এই মত অল্পকূল অবস্থা পেয়ে ভগবানকে অশেষ ধন্যবাদ দিলাম।

দু'টি সপ্তাহ লগুনে বাস করবার পরেই বিদেশ-বাস সম্পর্কিত সকল অসুবিধা আমার কেটে গেল। এই সময় থেকে একজিবিশনে আমাদের কাজ আরম্ভ করবার জগু মনোযোগ দিলাম। এই ব্রিটিশ-এম্পায়ার-একজিবিশনটি হ'য়েছিল লগুন সহরের প্রান্ত থেকে পাঁচ মাইল দূরে—ওয়েসলি পার্ক নামক সুবিস্তীর্ণ পার্কভ্য-উদ্যানে। এরূপ বিরাট প্রদর্শনী নাকি একশো বৎসরের মধ্যে ইংরেজ রাজত্বে হয়নি, এবং অনেকে বলেছেন, এইটাই পৃথিবীর মধ্যে সর্বাপেক্ষা বৃহৎ প্রদর্শনী। এই প্রদর্শনীর সংক্ষিপ্ত বিবরণ আমি পরবর্তী একটি অধ্যায়ে বলব।

ভারতীয় ছাত্র

আমাদের দেশের লোক এখানে যারা আসেন তাঁদের মধ্যে অধিকাংশই কলেজের ছাত্র। ভারতের যে যে বন্দরের সঙ্গে বিলাতের জাহাজের গতিবিধি আছে অর্থাৎ কলিকাতা, মাদ্রাজ, বম্বে, করাচী, কলম্বো, রেঙ্গুন, এই সব জায়গার ছেলেই বেশী। মেয়েদের মধ্যে মাদ্রাজ, বোম্বাই এবং বর্মার মেয়েই বেশী এবং তাঁদের শ্রম-কুশলতার

জুগে তাঁরা এদেশে বেশ শিক্ষা লাভ করেছেন। বাঙ্গালী মেয়েও অনেক দেখতে পেরেছি।

ভারতীয় ছাত্রদের থাকবার জন্য লণ্ডনে প্রধান তিনটি স্থান আছে। একটি 21, Cromwell Roadএ, এটি ভারত গবর্ণমেন্টের তত্ত্বাবধানে; একটি 112, Gower Streetএ, এটি ভারতীয় Y. M. C. Aর তত্ত্বাবধানে; আর একটি 54, Amherst Parkএ, এটি শ্রীরামপুর কলেজের ভূতপূর্ব প্রিন্সিপাল Rev. W. Sutton Page মহাশয়ের তত্ত্বাবধানে পরিচালিত। Gower Streetএ নিরামিষভোজী হিন্দুদের জন্য ভারতবাসীর তত্ত্বাবধানে একটি নিরামিষ ভোজনাগার সম্প্রতি হয়েছে। নেপালী রন্ধনকারী দ্বারা রন্ধন করান হয় কিন্তু পরিবেশন করে ইংরেজ মেয়েরা। ছেলেদের স্কুলের বেতনাদি সমেত মাসে কম পক্ষে দুইশত টাকা খরচ হয়। এদের মধ্যে কেউ গবর্ণমেন্ট বৃত্তিধারী, কেউ বা খুব বড় লোকের ছেলে। অত্যন্ত দুঃখের বিষয় যে, ব্যবসায় বাণিজ্য সম্বন্ধীয় শিক্ষার্থী অথবা কারবারী ভারতবাসী বিলাতে নিতান্তই কম; যা আছে—বোম্বাই, পাঞ্জাব, সিন্ধু প্রভৃতি স্থানের কয়েকজন সদাগর মাত্র। বাঙ্গালীর ছেলেরা কেবল কলেজের ছাত্র, আর তাদের ভবিষ্যৎ আশা কেবল চাকুরী। ছাত্রদের মধ্যে যারা খরচ পত্র একটু সংক্ষেপে চালাতে চান তাঁরা গৃহস্থ ঘরে মাসিক খরচ দিয়ে বাস করেন। সেখানে তাঁদের বিশেষ কোন অনুবিধা হয় না, কারণ ইংরেজ গৃহস্থগণের নিকট তাঁরা ভদ্র ব্যবহার পেরে থাকেন। মধ্যবিত্ত গৃহস্থ পরিবারে ১৫০ টাকায় এবং গরীব পরিবারে ১০০ টাকায় কোন রকমে খাওয়া ও থাকার ব্যবস্থা করা যায়।

ছাত্রদের ‘বিলাতীপণা’

বান্ধালী ছাত্রদের সঙ্গে দেখাশোনা ক’রে যতখানি তাদের কাছ থেকে পাব আশা করেছিলাম, ততখানি কিন্তু পাই নি। দেখলাম তারা তাদের শিক্ষণীয় বিষয় নিয়েই ব্যস্ত, আর যেটুকু তাদের বাকী সময়, সেটুকু কেবল ‘বিলাতীপণা’ নিয়েই কাটিয়ে দেয়। আমি বেশী স্থখী হ’তাম, যদি তাদের কাছে বিলাতের ভাল ভাল বিষয়ের আলোচনা শুনতে পেতাম, আর সেই সকল বিষয় নিয়ে আমাদের দেশ গঠনের কিছু কিছু উপাদান পেতাম।

কলেজের বান্ধালী ছেলেরদের প্রথমেই নজর পড়ল আমার চালচলন আর বেশভূষার উপরে। তারা দেখল, সভ্যদেশের আদব-কায়দা আমার পোষাক পরিচ্ছদ এবং কথাবার্তার ভিতর দিয়ে মোটেই ফোটে নি। আমার গায়ে ছিল গলা-ঢাকা কোট, তাতে কলার ছিল না, আর ওভারকোটের স্থলে ছিল ‘বিবেকানন্দী’ ধরণের একটা আলখেল্লা। মাথায় ছিল মাল্লাজী টুপি। ছেলেরা বলল—“আপনার ওই বেশভূষা নিয়ে এদেশে ব্যবসা করা চলবে না, এটা কেতা-দোরস্তর দেশ, সবই বাইরের চালচলনের উপর নির্ভর করে। আপনাকে অন্ততঃ তিনশো টাকার একটা ‘সুট’ (কোট, প্যান্ট, ওয়েষ্টকোট ইত্যাদি) করতে হবে। জুতো সর্বদাই চক্চকে বকুবকে রাখতে হবে, এদেশে লোকে প্রথমেই জুতোর ওপরে নজর ক’রে ভদ্র অভদ্র চেনে। তারপর, আপনার ও ‘বিদিকিচ্ছি’ লম্বা দাড়ী এদেশে চলবে না। গোঁফ দাড়ী পরিষ্কার ক’রে টেঁচে ছুলে ফেলতে হবে, রোজ কামাতে হবে—নইলে এদেশবাসীর সঙ্গে ব্যবসা বাণিজ্য করে জুয়লাভ করতে পারবেন না।”

আমি মনে মনে ভাবলাম—এ যে বিরাট প্রায়শ্চিত্তের ব্যবস্থা! মুখে



ওয়েস্টমিনষ্টার আবি, লন্ডন —২৮৮ পৃষ্ঠা

তাদের বললাম—“এদেশে ব্যবসা বাণিজ্য করবার সঙ্গে অতশত করবার খুব প্রয়োজন আছে বলে আমার মনে হয় না। আর বাইরের চালচলনের উপরেই কাজ কর্ত্বের কৃতিত্ব নির্ভর করে—এ কথাটার আমি বিশেষ মূল্য দিই না।” অবশ্য মুখে যতটুকু বললাম তার চেয়ে এই কথাগুলোর উপর আমার মনের জোর ছিল অনেক বেশী। আমি তাদের বিলাতী-পণায় ম’জে যাওয়া দেখে মনে মনে দুঃখিত হয়েছিলাম। এইখানেই বলে রাখি—একমাস পরে একজিবিশনে আমাদের অলঙ্কারের দোকানটি যখন সুন্দরভাবে সাজানো হ’য়েছিল, যখন কার্যাদিক্য বশতঃ তিনটি ইংরাজ মহিলাকে কর্মচারিণী রাখা হয়েছিল, যখন দলে দলে নানাদেশীয় লোকের উৎসুক দৃষ্টি আমাদের সুসজ্জিত ষ্টলটির উপর পড়েছিল, তখন কিন্তু ঐ সকল ভারতীয় ছেলেরাই ইংরাজ বন্ধু-বান্ধবদের সঙ্গে নিয়ে বাঙ্গালীর কাজ দেখিয়ে তৃপ্তিলাভ ক’রতো।

যাক সে কথা। ভারতীয় ছাত্রাবাসগুলিতে তাদের পোষাক-পরিচ্ছদ ও আহার-বিহারের ব্যয়বাহুল্য দেখে আমি মনে মনে অনেকবার দুঃখ অনুভব করেছি। ভারতের যত ছাত্র বিলাতে বাস করে, সকলেই বিলাতবাসীদের তদ্বাবধানে—হয় ছাত্রাবাসে, না হয় গৃহস্থ বাড়ীতে বাস করে। নিজেরা মিলেমিশে বোর্ডিং বা মেস (mess) করে থাকলে অনেক দিকে সুবিধা হয়, আর খরচও খুব কম হয়—এ আত্মবোধটুকু এখনো কোন ভারতীয় ছাত্রের মধ্যে জাগে নি দেখে আমি আশ্চর্য্য বোধ করলাম। এ সম্বন্ধে চেষ্টা করতে আমি তাদের অনেক পরামর্শ দিয়েছি।

রেভারেণ্ড্ পেজ্

একটা ছাত্রাবাস আছে সহরের পূর্বোত্তর প্রান্তে Stamford Hillএর Amherst Parkএ। এটির তত্ত্বাবধায়ক Rev. W. Sutton Page. ইনি পূর্বে বাংলায় শ্রীরামপুর কলেজের প্রিন্সিপ্যাল ছিলেন, তাই ভারতীয় ছাত্রদিগকে অন্তরের সঙ্গে ভালবাসেন। দু'এক দিনের পরিচয়েই তাঁর চিন্তার গভীরতায় আমি আকৃষ্ট হই। তারপর দেখলাম জগতের বহু ভাষায় তিনি সুপণ্ডিত। তাঁর মুখে যে বাংলাভাষা শুনেছি অমন আর কোন ইংরেজের মুখে শুনি নি, একেবারে মাতৃভাষার মত আমার সঙ্গে বাংলায় বলতেন। তাঁর ছাত্রাবাসে আমেরিকা, চীন, জাপান, বর্ম্মা, সিংহল, ভারতবর্ষ প্রভৃতি পৃথিবীর নানা স্থানের নানাবিধ উচ্চতত্ত্বের শিক্ষার্থী বাস করে। রেভারেণ্ড্ পেজ্ যেমন পণ্ডিত তেমন অমায়িকও বটেন। সারা পৃথিবীর ছাত্র নিয়ে সাহিত্যচর্চায় তাঁর আনন্দে দিন কাটে।

একদিন তাঁর আবাসে একটি তত্ত্বালোচনার সভায় আমি নিমন্ত্রিত ছিলাম। সভায় উপস্থিত হ'তেই পেজ্ সাহেব অনেক বড় বড় পণ্ডিতের সঙ্গে আমাকে পরিচিত করে দিলেন। আমি নিজের দুর্বলতার দিক দিয়ে একজন চীন দেশীয় পণ্ডিতকে ব'লছিলাম—“বলতে লজ্জিত হচ্ছি যে, আমি ইংরাজী ভাষায় কথা কইতে বড়ই কাঁচা।” কথাটি শুনবামাত্রই পেজ্ সাহেব আমাকে বললেন—“মিষ্টার নন্দী, আপনি কখনো আর ও কথা ব'লবেন না, আপনি বেশ ইংরাজী জানেন।” এই যে পেজ্ সাহেবের মুখে কথাটি শুনলাম, এতেই আমার এই রকম মনের

দুর্বলতা কেটে গেল। যেন কি একটা জুজুর ভয় ময়শক্তি
বলে ঝাড়া হয়ে গেল। আর কখনও মুখে ত নয়ই, অন্তরেও
ইংরাজী না জানার দৈন্ত অহুভব করি নি।

রেভারেণ্ড্ পেজ্ অনেক সময় আমাদের ভারতবর্ষের কল্যাণ
সম্বন্ধে আলোচনা করে থাকেন। আমাদের দেশের ভবিষ্যত
সম্বন্ধে আমি কোন দিকেই কোন কুল কিনারা দেখি না এই
চিন্তা নিয়ে ইতিহাসের নজির দেখিয়ে একদিন প্রশ্ন করলাম—
“ভারতের ভবিষ্যত উন্নতি সম্বন্ধে আপনি কি আশার বাণী
শোনাতে পারেন?” তিনি বললেন—“ভারতের উন্নতি সম্বন্ধে
নিরাশ হবার কারণ নাই। কালের ইতিহাসের কতটুকু অংশ
আমাদের মানব সমাজে পরিজ্ঞাত? হুদূর অতীতের কতটুকু খবর
আমরা রাখি এবং হুদূর ভবিষ্যতের কতটুকু চিন্তাই বা আমরা
করতে পারি?” কথাটা খুবই পণ্ডিতের মত হ’ল বটে, কিন্তু
এতে আমার তৃপ্তি হ’ল না। আমি বিষয়টি আরও খাট করে
জিজ্ঞাসা করলাম, “ভারতের অত্র অত্র প্রদেশের ছেলেদের সঙ্গে
তুলনা করে বাংলার ছেলেদের সততা, কর্মদক্ষতা প্রভৃতি বিষয়ে
দুর্বল মনে হয়; আপনি এ সম্বন্ধে কি বলেন?” তিনি বললেন—
“তা-তো নয়-ই, বরং অনেক বিষয়ে বাঙ্গালী ছেলেরা প্রতিভাশালী।”

বাংলায় বাসকালে পেজ্ সাহেব যে বাংলার খাতটা ভাল
করেই অহুভব করেছিলেন, অনেক ভাবেই তার নিদর্শন পাওয়া
যায়। একদিন একজিবিশনে আমাদের বেঙ্গল কোর্টে গিয়ে এমন
ঢাকাই-বাঙ্গালের কথা র আবৃত্তি করেছিলেন যে, আমরা সবাই
হেসে অস্থির হ’য়ে প’ড়েছিলাম। ঢাকার পাড়াগোঁয়ে চাষাদের
কথার অবিকল অহুকরণ হ’য়েছিল। ধর্ম-আলোচনা প্রসঙ্গে আমি

বাইবেলের উপদেশের অল্পরূপ বাক্য আমাদের দেশের ধর্মগ্রন্থেও আছে, এই কথা প্রকাশ ক'রতে গিয়ে খ্রীষ্টচৈতন্য-চরিতামৃতের উল্লেখ করতেই, দেখলাম, তিনি চৈতন্য-চরিতামৃত বিশেষ-ভাবে অধ্যয়ন ক'রেছেন। এক দিন রবিবারিক গির্জা দেখতে গিয়েছিলাম, রেভারেণ্ড্ পেজ্ সেদিনকার আচার্য্যের কাজ ক'রেছিলেন। দেখলাম, উপাসনার মধ্যে তিনি ভগবানের নিকট ভারতবাসীদের কল্যাণ কামনা ক'রলেন। আমি মাঝে মাঝে তাঁর আবাসে নিমন্ত্রিত হয়ে গিয়ে নানাভাবে আনন্দ উপভোগ ক'রতাম।

ইংরেজ স্ত্রী

একজন বাঙালীকে বন্ধুরূপে পেয়েছি, নাম—ডাক্তার দত্ত। কিছু-কাল পূর্বে মিঠার গুপ্ত বলে লগুন সহরে আমাদের অলঙ্কারের একজন ক্যানভাসার ছিলেন, ইনি ডাক্তার দত্তের বন্ধু। এই হিসাবেই ডাক্তার দত্তের সঙ্গে আমার পরিচয় হয়। গুপ্ত তারপর লগুনের বাইরে কোথায় কোন চিনির ফ্যাক্টরীতে চাকরী নিয়েছিলেন। ডাক্তার দত্ত ১০।১২ বৎসর পূর্বে লগুনে এসেছিলেন, অর্থ-সম্পদ হারা হয়ে বড় বিপদে পড়েন। পরে এক ইংরেজ মহিলার সাহায্যে ডাক্তারী বিদ্যা অধ্যয়ন করেন এবং সেই মহিলার কন্যাকে বিবাহ করে স্বামী-স্ত্রীতে একটি ডিম্পেন্সারী চালাচ্ছেন। একটি ছেলে হয়েছে—এই একটি মাত্রই সন্তান, বয়স সাত বৎসর। ডাক্তার দত্ত বেশ ভাল মানুষ, ইংরেজ স্ত্রীটিও অতি শান্তশিষ্ট। সাধারণ দৃষ্টিতে ইং-বন্ধের মিলিত এই দাম্পত্যজীবন বেশ এক নুকমে কেটে যাচ্ছে বলে বোধ হয়। আমি মাঝে মাঝে তাঁদের কাছে যেতাম, দেখতাম স্বামী রোগী দেখছেন, স্ত্রী

কম্পাউণ্ডারের কাজ করছেন। কখন কখন একলা ডাক্তার দত্তকে ডিম্পেন্সারীতে পেয়ে আমাদের দু'জনের প্রাণ খুলে দিতাম। তিনি খুবই আমোদ প্রিয়—আমাকে একলা পেয়েই প্রাণ খুলে বাংলা গান শুনিতে তাঁর প্রাণের রক্ত সঙ্গীত-রসে একটু শ্রোত বহাতেন। বাঙ্গালী আমি, নিরবচ্ছিন্ন কিচির-মিচির ভাষার দেশে এসে পড়ে তাঁর মুখে সরস মধুর বাংলা গান শুনে মুগ্ধ হতাম বটে—কিন্তু আর এক দিকে ডাক্তার দত্ত এই বাংলার রসভরা প্রাণখানি এই ইংরেজ-মহিলার প্রাণে মিলিয়ে দিয়ে কি বিকট জীবন ভোগ করছেন, তাই ভেবে অভিভূতও হতাম। মনে হ'ত তাঁর প্রাণপাখী বাংলার ঘনশ্যাম নিবিড় কুঞ্জপানে ছুটছে—বাঁধা আছে কেবল বিদেশিনীর মোহলুক জালে আটকে পড়ে। ছেলেটির মুখে শুনেছি, তার বাবা কখন কখন মধ্যরাত্রে বারান্দার এককোণে ব'সে পাগলের মত কি এক বিকট রব করেন, অর্থাৎ কিনা ঐ তাঁর বাংলা গান। বিদেশিনীর হাতে বাঁধা পড়ে ডাক্তার সাহেবের জীবনটা যে উদ্দেশ্য বিহীন ভাবে কেটে যাচ্ছে, তাঁর গভীর প্রাণের একথাটা আমি তাঁর কাছ থেকে আদায় করতাম। ইং-বঙ্গ সম্মিলিত দাম্পত্য জীবনের আরও অনেক গভীর তত্ত্বও তাতে বেরিয়ে পড়ত। ডাক্তার একদিন আমাকে বলছিলেন—“বলব কি নন্দী নশায়, আমার হাত কেটে একদিন রক্ত বেরিয়েছিল, মেমসাহেব দেখে তাজ্জব হয়ে বলেছিলেন—“এ্যা, ভারতবাসীর রক্ত ত তাদের গায়ের রঙের মত কাল নয়, এ যে আমাদেরই রক্তের মত লাল।” আমি ভাবলাম, এক দেশের সম্বন্ধে আর এক দেশের অভিজ্ঞতা এমনই বৈচিত্র্যময় বটে। ডাক্তার দত্ত আমার অনেক উপকার করতেন, সেটা শুধু আমাকে বলেই নয়, বাংলার অধিকার থেকে বঞ্চিত হ'য়ে যে অভাব অনুভব করতেন, তারই কতকটা পূরণ করতেন বাঙ্গালীর প্রতি সহানুভূতি দেখিয়ে।

পপলারে ভারতীয় পল্লী

লণ্ডনের পূর্ব প্রান্তে পপলার (Poplar) বলে একটা স্থানে অনেকগুলি ভারতীয় লোক বাস করে। এরা অনেকটা স্থায়ীভাবে লণ্ডনের অধিবাসী হয়ে গিয়েছে। এদের অধিকাংশই পঞ্জাব, পেসোয়ার প্রভৃতি ভারতের উত্তর পশ্চিম প্রান্তের লোক, বিশেষ শিক্ষিত নয় বরং অনেকেই অশিক্ষিত। এদের কারও কারও সহরে ভারতীয় রেশমী কাপড়, পাথরের মালা, হাতীর দাঁত, পিতলের খেলনা প্রভৃতির দোকান আছে—অশিক্ষিতেরা রেশমী কাপড়ের ফেরি করে। কেউ কেউ এখানকার নিম্নশ্রেণীর ইংরেজ কল্যাণ নিয়ে করে সপরিবারে বাস করছে। অশিক্ষিত লোকগুলিকে দেখে মনে হয়, কেউ কেউ ভারতবর্ষ থেকে জাহাজের খালাসী প্রভৃতি নিম্নতর কর্ম নিয়ে লণ্ডনে পৌঁচেছে। এই পপলারের নিকটেই অনেকগুলি জাহাজের ডক আছে। আমি কয়েকদিন তাদের পাড়া দেখতে গিয়েছি। যদিও তারা অনেকেই হীন অবস্থার লোক, তথাপি ভারতীয় হিসাবে আমাকে খুবই আদর বহু করত। আমি আমার স্বদেশবাসীদের মধ্যে বেশ একটু কর্ম-প্রবণতার সাড়া দেখে সুখী হয়েছিলাম।

একদিন সন্ধ্যায় তাদের একটি হোষ্টেলে গিয়ে দেখলাম, নিজেরা রান্না-বাণ্ণা করছে—সেই জাহাজের খালাসীদের মত মস্ত বড় তামার ডেক্‌চিতে ভাত ডাল রান্না হচ্ছে, তবে বিশেষ নোংরা নয়, বেশ পরিষ্কার পরিচ্ছন্ন—এটা বোধ হয় এদেশের শিক্ষার গুণে। যার যার কাজ থেকে এসে সন্ধ্যার পর সবাই একত্র হয়েছে, কোথাও জন কয়েক মিলে আড্ডা দিচ্ছে—কোথাও তাস খেলছে—কয়েকজন মিলে একটা ইংরেজ ঝিকে নিয়ে রং তামাসা করে তাকে ব্যতিব্যস্ত করে তুলেছে। কয়েকটি অল্প

বয়সের যুবক ছেলেকে দেখলাম—নিরিবিলা একপ্রান্তে গিয়ে মোমের বাতির আলোতে সামান্য ইংরেজী লেখাপড়া শিখছে। এরা সকলেই ভাঙ্গা ভাঙ্গা অশুদ্ধ ইংরেজীতে কথা বলে। অবশ্য নিজেরা পরস্পর কথা কইবার সময় যার যার মাতৃভাষায় কথা কয়। বলা বাহুল্য তাদের মধ্যে হিন্দু মুসলমানদের পার্থক্যটা তারা একেবারে দূর করেছে।

সহরের পূর্বপ্রান্তে একদিন অল্গেটের গরীবদের হাট দেখতে গিয়েছিলাম। সেখানে কয়েকটি গরীব ভারতীয় লোকও বাজার করতে এসেছে দেখলাম। একজনের সঙ্গে আলাপ করতেই সে আমাকে পপলারে তার বাড়ীতে নিয়ে যেতে চাইল। আমি ঔৎসুক্য বশত: রাজি হলাম। মটরবাসে করে আমাকে দু' মাইল দূরে তার বাড়ীতে নিয়ে পৌঁছল। সে মেম বিয়ে করেছে, মেমটি একটু ভদ্র ধরণের, আমার চায়ের ব্যবস্থা করে দিয়ে আমার সঙ্গে বেশ গল্প আরম্ভ করল। আশ্চর্যের বিষয় স্বামী ইংরেজী জানে না—পাঁচটি শব্দের কথাটি দু'তিন শব্দে শেষ করে কোনমতে ভাব প্রকাশ করে; এই রকম করেই স্ত্রীর সঙ্গেও কথা করে সংসার করে। স্ত্রীটি স্বামীকে শুনিয়ে আমাকে বলছিল—দেখ আমার স্বামী কেমন নির্দয়, আমি একটু পিয়ানো বাজানো ভালবাসি—কিন্তু কত বলি, তবু আমাকে একটা পিয়ানো কিনে দেয় না। আমি ভাবলাম, মেয়েদের বায়নাগুলো অনেকস্থলেই অবস্থা ডিঙ্গিয়ে একটু উপরে চলে। পুরুষটি কিন্তু বেশ হিসেবী, নিজে সহরে গিয়ে রেশমী ক্রমাল, তোয়ালে ফেরি করে বিক্রী করে—আর স্ত্রীকে দিয়ে বাড়ীর কাছে রেশমী কাপড়ের ছোট একটি দর্জি দোকান করে দিয়েছে। স্বামী ফেরিতে গেলে স্ত্রী দোকানে রসে দর্জির কাজ করে। তারা ছোট একটি বাড়ী কিনে তাতেই বাস করছে, তার খানিকটা অংশ আবার অন্তর্কে ভাড়া দিয়েছে।

ছ'বছরের একটি মাত্র ছেলে—বেশ মায়ের মত সাদা গায়ের রং তার, ইংরেজীতে সে আমার সঙ্গে বেশ আলাপ করল। পিতার ভাষা সে একটুও পায় নি। সংসারটিতে বিশেষ অশান্তির কোন লক্ষণ দেখা গেল না—লোকটা ব্যবসায়ী, তাই বেশ চলছে; কেরাগী হলে বোধ হয় বাবুগিরির চোটে সিকের হাঁড়ি ঝুলত। এই মত অনেক ভারতীয় লোক নানাভাবে পপলারে বসবাস করে। আমাদের দেশের শিক্ষিত লোকেরা বিলাতে গিয়ে এদের সঙ্গে বড় একটা আলাপ পরিচয় করেন না—তাই এদের সংবাদ অনেকেই জানেন না।


ভারত সম্পর্কিত দু'চার কথা

লণ্ডনে ভারত সম্পর্কীয় বিষয়গুলির মধ্য থেকেই আমি কয়েকটি কথা বলেছি এবং আরও ছোটখাটো কয়েকটি কথা এখানে উল্লেখ করব—

লণ্ডনের উত্তর প্রান্তে গোল্ডাস'গ্রীণ বলে একটা জায়গায় ভারতীয় প্রথায় শবদাহ করবার জন্ত একটি শ্মশান তৈরী হয়েছে। লোহার ফ্রেমের উপর শব রেখে গ্যাসের চুল্লীর ভিতর নিয়ে দাহ করা হয়। শ্মশান বাড়ীটি সুবিস্তীর্ণ জমির উপর ফুলের বাগানে সুসজ্জিত, একদিকে তোরণ-দ্বার ও বহু প্রকোষ্ঠযুক্ত অট্টালিকা এবং আর তিন দিক উঁচু দেওয়াল দিয়ে ঘেরা। কুচবিহারের মহারাজা নৃপেন্দ্রনারায়ণ ভূপ বাহাদুরের, তাঁহার দুই পুত্রের এবং আরও অগ্রাগ্র ভারতীয় বিশেষ বিশেষ লোকের মৃত্যুর স্মৃতিচিহ্ন বিভিন্ন গৃহের দেওয়ালে অঙ্কিত রয়েছে।



সেট, পল্‌স্‌ ক্যাথিড্রাল, লন্ডন — ২৮৮ পৃষ্ঠা



টাওয়ার অব লন্ডন

কয়েকজন ভারতীয় মুসলমান ধর্মপ্রচারক ইয়োরোপের বড় বড় সহরে ধর্ম প্রচার করে থাকেন,—লগুনে তাঁদের হুঁতিন জনের সঙ্গে আমার দেখা হয়েছিল ; এঁরা লগুনের এক প্রান্তে একটি মসজিদ করেছেন। সেখানে মাঝে মাঝে সভা করে সর্ব সাধারণকে আহ্বান করেন। হাইড্‌ পার্ক কর্ণারে যে সকল বক্তৃতা ক্ষেত্র আছে সেখানেও তাঁদের ধর্ম প্রচার করতে দেখেছি। ইয়োরোপবাসী সকলেই হিন্দুধর্ম অপেক্ষা মুসলমান ধর্মের খবর বেশী রাখেন, কেন তা বুঝি না, বোধ হয়—মুসলমান ধর্ম ও সমাজের সঙ্গে খৃষ্টান জাতির ধর্ম ও সমাজের অনেকটা সাদৃশ্য আছে বলে। আর, একটা স্বাধীন জাতির ধর্ম অপেক্ষা পরাধীন জাতির ধর্মকে একটু তাক্ষিল্যের চক্ষে দেখা স্বাধীন জাতির রীতিও বটে—তাই বিলেতে মুসলমান ধর্মের যেমন স্থান আছে, বৌদ্ধ ধর্মের স্থানও তার চেয়ে কম নয়। বুদ্ধদেব ও মহাম্মদের জীবনী প্রত্যেক ছেলেমেয়ে পর্যন্ত জানে। কিন্তু হিন্দুধর্ম সম্বন্ধে বিশেষ কোন ধারণা অনেকেরই নাই। হিন্দুর দর্শনের আদর—সে কেবল গুটিকতক উচ্চ শিক্ষিতের মধ্যে সীমাবদ্ধ।

একটি ভারতীয় রেষ্টোরা

ভারতীয় মুসলমান একজন লগুনের শ্রেষ্ঠ অংশ পিকাডেলীতে একটি ভারতীয় রেষ্টোরা অর্থাৎ হোটেল করেছে। এটির নাম তার নিজের নাম অনুসারে ‘আবদুল্লা রেষ্টুরেন্ট’। লোকটা উচ্চ শিক্ষিত না হলেও ভাল মানুষ বটে। যে সকল ইংরেজ ভারতে এসে মুসলমান বাবুর্চিদের হাতের নবাবী রান্না খেয়েছে—তারা দেশে গিয়ে সে স্বাদ তুলতে পারে না, তাদের অনেকে বন্ধুবান্ধব সঙ্গে এনে এই

হোটেলটিতে থায়। আবছা প্রথমে বোধ হয় নিজেই হোটেলের রান্না করত, এখন সে অনেক ইংরেজকে শিখিয়ে নিয়েছে—তাদের দিয়েই রান্না ও আর আর হোটেলের সব কাজ করায়। দেখলাম আবছা যুবক; চেহারাটা খুব ভাল না হলেও ভাল মানুষ। প্রথমে এদেশে এসে ইংরেজের হোটেলের বাসন-কোসন ধোয়া চাকুরী নিয়ে পরে এ দেশের হোটেল চালাবার সমস্ত আদব কায়দা শিখে নেয়। তার পর ঐ হোটেলের পরিচারিকা একটা ইংরেজ মেয়ে বিয়ে করে তাকে নিয়ে এই রেষ্টুরেন্ট খুলেছে। বেশ সুনাম হয়েছে—বেশ ছ'পয়সা আয় করছে। এখন তারা স্বামী স্ত্রী দু'জনেই ভদ্র ভাবে চলে। ইংরেজ চাকর চাকরাণী রেখে সমস্তের সঙ্গে কাজ চালায়। বাইরে থেকে বা দেখেছি তাই লিখলাম, ভিতরের সুখ দুঃখের খবর জানি নে।

রীতিনীতির বৈষম্য

বিলাতের রীতিনীতির সঙ্গে আমাদের বৈসাদৃশ্যের বিষয়ে ছ'একটা কথা এখানে উল্লেখ করব—

একটা হোটেলের একজন নিরামিষ-ভোজী মহিলার সঙ্গে আমার গল্প হচ্ছিল—তার কাছে জানলাম, নিরামিষ-ভোজীরা মাছ মাংস খায় না বটে কিন্তু ডিম খায়। ডিম যে মাছ মাংসের মতই আমিষ খাত্ত এই কথা আমি তাকে বুঝাতে চেষ্টা করবার পর তিনি আমাদের দেশের নিরামিষ ব্যবস্থা জানতে চাইলেন। আমি নানা নিরামিষ খাত্তের সঙ্গে দুধ, ছানা, মাখমের উল্লেখ করতেই তিনি দুখাদিকে সম্পূর্ণ আমিষ বলেই আমাকে বোঝালেন। কথাটা আমার কাছে খুব নতুন লাগলেও অনেকাংশে যে সত্য তা স্বীকার করতে হল।

ভারতীয় রীতিনীতির ধারা এদেশীয়দিগকে বোঝান বড়ই শক্ত। এ দেশে খেয়ে কখনও মুখ ধোয় না, অবশ্য চামচে দিয়ে খায় বলে খাওয়া দ্রব্য ঠোঁটে লাগে না। আমি একদিন একটি স্ত্রীলোককে শুনাচ্ছিলাম যে, আমাদের দেশে আহারের পর জল দিয়ে মুখ ধোবার ব্যবস্থা আছে। তবু স্ত্রীলোকটি জিজ্ঞাসা করেছিলেন—“মুখ ধোও খাওয়ার আগে কি পরে?” আমাদের দেশের স্ত্রীলোকদের আচার পদ্ধতি সম্বন্ধে ইয়োরোপবাসীদের ধারণা অদ্ভুত রকমের। আমার প্রতি প্রশ্ন হত—ভারতীয় মেয়েদের নাকি কত কি সৃষ্টিছাড়া নিয়মে জীবন কাটাতে হয়? মাথা মুখ চোখ কাপড় মোড়াই করে নাকি থাকতে হয়? সাধারণের সম্মুখে নাকি স্বামীর সঙ্গে কথা কওয়া নিষেধ? স্বামীকে নাকি কোন কিছু বলে সম্বোধন করতে নেই? স্বামীও নাকি স্ত্রীকে কোন কিছু বলে ডাকে না? আবার নাকি এক সংসারে বাস করতে হয় অথচ সারাজীবন কথা কইতে পারবে না, স্ত্রী পুরুষের মধ্যে এমন সম্বন্ধও পালন করে চলতে হয়? ইত্যাদি ইত্যাদি। এই সকল অভিযোগের ভাল কিছু উত্তর যে আমি দিতে পারি নি, তা বোধ হয় পাঠক পাঠিকাগণ সকলেই অনুমান করে নিতে পারেন।

একটি মহিলা একদিন গভীর দুঃখের সঙ্গে একটা কথা বলেছিলেন—কথাটা খুবই সাধারণ হলেও চিন্তা করবার বিষয় বলেই এখানে উল্লেখ করছি। তিনি বললেন—“ভারতে বাসকালে আমি সেখানকার অনেক রীতিনীতি পছন্দ করতাম, কিন্তু একদিনের একটি ঘটনা আমাকে বড়ই ব্যথিত করেছিল। মাদ্রাজে একটি ভদ্রলোকের বাড়ীতে নিমন্ত্রিত হয়ে গিয়েছিলাম। কিছুক্ষণ গল্পাতির পর তাঁর কন্ঠার সঙ্গে আলাপ করতে একটি ঘরে গিয়ে দেখলাম,

কত্না তখন আহারে বসেছে—হঠাৎ আহার পরিত্যাগ করল,—
জানলাম আমি ঘরে প্রবেশ করার জন্ত তার আহাৰ্য্য দ্রব্য অভক্ষ্য
হয়ে গিয়েছে।” আমি নিতান্তই দুঃখিত হলাম, লজ্জিতও হলাম।
সেই দিন মনে হল—এমন কুরীতি, এত ক্ষুদ্রতা, এমন মনের দুর্বলতা
যাদের মধ্যে, জগতে তারা কখনও বড় হতে পারে না। স্ত্রীলোকটি
গভীর দুঃখের সঙ্গেই কথাটা বলেছিলেন।

এরা দেশে বসে ভারতের সম্বন্ধে বা একটু গল্প শোনে, তার মৰ্ম
বুঝতে না পেলে অনেকে অনেক রকম ভ্রান্ত মত পোষণ করে। এতে
ভারতকে খাটো করা হয় দেখে দুঃখিত হয়েছি। কেউ কেউ
জিজ্ঞাসা করেছিল—তোমরা নাকি বানর পূজা কর? বানর কি
রকম দেবতা? পূজা করবার সময় সে কি করে? ঠিক হস্তে
বসে থাকে তো, অথবা তাকে বেঁধে নিয়ে পূজা করতে হয়? সাপ
দেবতাকে কি রকম পূজা কর? তাকে মেসমেরিজ (মঙ্গমুগ্ধ)
করে নাও, কি মেরে ফেলে তারপর পূজা কর?—এই রকম অনেক
সত্য-মিথ্যা জড়িত অদ্ভুত কথা ভারতবাসীর সম্বন্ধে ইংরেজের দেশে
প্রচলিত আছে।

একদল অশিক্ষিত লোক রাস্তার ধারে আগুন পোয়াছিল, আমি
পথ চলতে চলতে তাদের কাছে গিয়ে একটু হাত পা গরম করছিলাম,
তাদের একজন আমাকে জিজ্ঞাসা করল—“ক’টা বিয়ে করেছ?”
আমি সাদাসিধে ভাবে ‘একটা’ বলে উত্তর করতেই তারা হো-হো
করে হেসে ফেলল। কেউ কেউ বলল, “একটা বিয়ে তোমার
কখনো না—ভারতবাসী এক-এক জনের অনেকগুলো করে স্ত্রী থাকে,
আর তুমি বলছ কিনা একটা স্ত্রী তোমার!” আমি অবশ্য আগুনে
বেশ গরম হচ্ছিলাম কিন্তু তাদের কথায় আমার মন একটুও গরম

হয়নি, কারণ আমাদের দেশে এরকম দোষ কোনকালে নাই বলা তো চলে না ; তবে বিভিন্ন দেশবাসীরা সেই দোষটাকে একটু জমকাল করে তুললে তাতে রাগ করবার আর কি আছে ?

এখানকার ত্যাচারাল হিষ্টোরিক্যাল মিউজিয়মে দেখেছি, নানাদেশীয় চিত্রিত মনুষ্য-মূর্তির সঙ্গে ভারতীয় হিন্দু মূর্তি বলে একটা কিছুত-কিমাকার মূর্তি রাখা হয়েছে—মূর্তির মুখে লম্বা লম্বা চুল দাড়ী, গৌফগুলি চারিদিকে ছড়িয়ে অঙ্কন করা হয়েছে, তাতে মুখখানা একটা নরসিংহের আকার ধারণ করেছে—তার উপর মোটা মোটা সাদা সাদা রংএর তিলকের ছাপ। ভারতীয় হিন্দুদের পক্ষ থেকে এদের কর্তৃপক্ষকে জানান উচিত, হয় ঐ মূর্তির পরিবর্তে ভারতীয় হিন্দুমূর্তির একটি আদর্শ (যেমন বালগঙ্গাধর তিলকের মূর্তি প্রভৃতি) ঐ স্থানে রাখা হোক, নৈলে হিন্দুমূর্তি কথাটা তুলে দেওয়া হোক।

মহাত্মার কথা

একদিন সহরের একটা জনাকীর্ণ ক্ষেত্রে কতকগুলি সমর বিভাগীয় ইংরেজের সঙ্গে আমার ছোটখাটো একটা বাকযুদ্ধ হয়েছিল, তাতে চারিদিকে খুব লোক জমে গিয়েছিল। তারা বলছিল—ইংরেজ রাজত্বের অধীনে তোমরা নিশ্চয়ই বেশ শান্তিতে আছ।

আমি বললাম—প্রত্যেক জাতিই স্বাধীনতা ভালবাসে।

সৈন্তেরা—ইংরেজ যে তোমাংগিকে অনেক রকম শান্তিতে রেখেছে, তোমরা নিজেরা কি আর তেমন পারতে ?

আমি—পারতাম না কেন ? আমাদের ভালর ব্যবস্থাগুলি অবশ্য আমরা ভাল বুঝি।

সৈন্তেরা—দেশ পরিচালনের জন্য দেশে খুব ভাল মানুষ চাই, যথেষ্ট বুদ্ধি থাকা চাই, তোমাদের কেউ তেমন আছে কি ?

আমি—আমাদের দেশের মহাত্মা গান্ধির মত ভাল মানুষ, অমন বুদ্ধিসম্পন্ন মানুষ আজকাল সারা জগতে নাই, তা তোমরা শোন নাই কি ?

সৈন্তেরা—হো—হো, গান্ধি ! গান্ধি তো অতি মন্দ মানুষ, অনর্থক ভারতের নিরীহ মানুষগুলি ফ্রেপিয়ে তুলছে ।

আমি—ভারতের অধিকাংশ মানুষ যার নামে মস্তক অবনত করে, সারা জগতের মনীষিগণ যার আদর্শ মানবতায় মুগ্ধ, তাঁকে কখন মন্দ মানুষ ব'ল না, বললে পাপ হয় ।

সৈন্তেরা—গান্ধি যদি দোষী না হবে তবে তাকে জেলে আটক রাখা হয়েছিল কেন ?

আমি—ইঁ দোষীই বটে, যিনি দেশবাসী ধনী দরিদ্র, শিক্ষিত-অশিক্ষিত সকলের অন্তরের রাজা, বিদেশী রাজার কাছে তিনি অপরাধীই বটেন । মনে কর সেই যীহুদিদের খুষ্টের কথা । তবে মহাত্মা গান্ধি আমাদের কতখানি অন্তরের রাজা—সে হিসাবে তিনি তোমাদের কাছে কতখানি অপরাধী, তা তোমরা অতি অল্পই জেনেছ, তাই জেলে দিয়েছিলে ; তাঁকে সম্যক যদি জানতে—তবে তাঁকে বোধ হয় ক্রুশে দিতে । ‘ক্রুশ’ কথাটার আমি নিরপরাধ বীণখুষ্টের প্রতি শাস্তির কথাটাই তাদিগকে স্মরণ করিয়ে দিয়েছিলাম ।

তারা সকলেই আবার হো-হো করে হাসল । তখন সন্ধ্যা হয়েছে—কনকনে শীত, তারা আমাকে একটা মদের দোকানের দিকে অঙ্গুলি নির্দেশ করে বলল,—চল ভাই, একটু গরম হওয়া যাক ।

আমি বললাম—না, আমি ওলব খাই না ।

তারা বলল—কেন ?

আমি বললাম—গান্ধি মহারাজের হুকুম।

আমাদের দোষ

আমাদের ভারতবর্ষে আমরা ইংরেজদের সঙ্গে কথা কইতে যেমন একটু সঙ্কোচ ভাব দেখাই, উচিত কথা বলতেও ভয় করি, বিলাতে ও রকম করবার কিছুই দরকার হয় না। সোজাসুজি মানুষের সঙ্গে মানুষের যেমন ব্যবহার আবশ্যক তেমনই চলে। পরাধীন জাতি বলে কেউ কখন অবজ্ঞার চক্ষে আমাকে দেখেছে, এমন মনে পড়ে না; বরং বিদেশী আগন্তুক বলে একটু বেশী সম্মান সহানুভূতি তারা অনেকস্থলেই দেখিয়েছে।

ভারতের সম্বন্ধে অনভিজ্ঞতা বিষয়ক উপরে কয়েকটি দৃষ্টান্ত দিলাম বটে, কিন্তু আমাদের দেশের বহু আবশ্যক জ্ঞাতব্য বিষয় ওদের প্রত্যেকেরই জানা আছে। একটা মেটাল ফ্যাক্টরী (ধাতুদ্রব্যের কারখানা) দেখতে গিয়েছিলাম। দেখা-শুনার পর মালিক আমাকে প্রশ্ন করলেন—“আপনাদের বাংলার তাপের পরিমাণ কত থেকে কত ডিগ্রী?” আমি তখন খুব সঠিক উত্তর দিতে পারি নাই। এই শীতোষ্ণতার উপর দেশের বহু আবশ্যক বিষয় নির্ভর করে। ধাতুদ্রব্যের বর্ণ পরিবর্তন, গালা মোম সাবান রবার স্ত্রানুলয়েডের দৃঢ়তার তারতম্য, মাছ মাংস স্নাত মাখন দুগ্ধাদি খাদ্য দ্রব্যের গুণ পরিবর্তন, সূতা ও পশমী বস্ত্রের ব্যবহারের পরিমাণ নির্ণয় প্রভৃতি অনেক ব্যবসা-বাণিজ্যগত বিষয় নির্ভর করে এই দেশের শীতোষ্ণতার পরিমাণের উপর। পাঠকপাঠিকাগণের জ্ঞাতার্থে এখানে উল্লেখ করি, ইংলণ্ডের তাপের পরিমাণ—শীতকালে ৩০

থেকে গ্রীষ্মকালে ৬০ ডিগ্রি। স্কটলণ্ডে শীতকালে কখনও ২০ ডিগ্রি, ক্বচিৎ ১০ ডিগ্রি মাত্র তাপ থাকে। বাংলার তাপ সাধারণতঃ শীতকালে ৬০ ডিগ্রি, গ্রীষ্মকালে ১১০ ডিগ্রি পর্য্যন্ত ওঠে।

আমাদের দেশে আমরা নিজের জ্ঞান নিয়েই তুষ্ট—বরং তাই নিয়ে আবার অহঙ্কারও যথেষ্ট। কিন্তু ইংরেজের জ্ঞানের অহঙ্কার নাই, শিক্ষার আকাঙ্ক্ষায়, জ্ঞানের আকাঙ্ক্ষায় আজীবন তারা ছাত্রের মত।

একটা কথা পাঠকগণের স্মরণ রাখতে হবে, ভারতে সাধারণ ইংরেজগণের সঙ্গে আমাদের যে রকম সম্বন্ধ, তা নিয়ে ইংরেজ জাতটার বিচার করা চলবে না। আপন দেশে ইংরেজ চলে মাহুষের মত—আর জয় করা দেশে চলে প্রভুর মত। এই প্রভু ভূত্যের সম্বন্ধের ভিতর উভয় পক্ষেই আমরা বিশ্বপ্রেম ভুলে যাই, প্রকৃত মনুষ্যত্ব হারিয়ে ফেলি।

চতুর্থ অধ্যায়

[লণ্ডনের বিবরণ]

পরিচয়

লণ্ডন সহরটি টেমস্ নদীর উভয় পার্শ্বে পূর্বদিক থেকে পশ্চিম দিক পর্য্যন্ত অন্যান্য বোল মাইল স্থান মধ্যে অবস্থিত। প্রস্থে বারো তেরো মাইল ধরা যেতে পারে, সহরের অধিকাংশ প্রধান বিষয় উত্তর পারে। টেমসের পূর্বদিক সমুদ্র থেকে আরম্ভ করে লণ্ডন পর্য্যন্ত পঁচিশ ত্রিশ মাইলের মধ্যে নদীর উভয় তীরে কেবল জাহাজপূর্ণ ডক ; তন্মধ্যে গ্রেভসেণ্ড, টিলবেরী, উলউইচ প্রভৃতি কয়েকটি বড় বড় বন্দরে প্রচুর জাহাজী মাল আমদানী রপ্তানী হয়—এ সবই লণ্ডন সহর সম্পর্কীয়। এই ভাবে আর তিনটি দিকেও সহরের সীমা ছেড়ে বহুদূর পর্য্যন্ত লণ্ডনের প্রভাব। এগুলি বাদ দিয়ে ঘন সন্নিবদ্ধ বোল মাইল দীর্ঘ, বারো মাইল প্রস্থ স্থানকে সাধারণতঃ লণ্ডন সহর বলা হয়।

লণ্ডন সহরের লোক সংখ্যা বর্তমানে সহরতলী সমেত সত্তর লক্ষ। কলকাতার প্রায় ছয়গুণ। এ ছাড়া প্রতিদিন দশ লক্ষের উপর লোক ডেলি-প্যাসেঞ্জার বাইরে থেকে এসে সহরে কাজ করে সন্ধ্যায় ফিরে যায়। সহরের মধ্যে লোকের গতিবিধির প্রধান তিনটি উপায় আছে—আগার-গ্রাউণ্ড রেলওয়ে, মটরবাস এবং ট্রামওয়ে ; এ ছাড়া ট্যাক্সি মটর গাড়ীতে সহর ভরপুর। রেলগাড়ীর প্রত্যেক-খানার ভিতরের দিকের ছাতে রেলকোম্পানীর স্টেনসমূহের অতি

পরিষ্কার সহজবোধ্য মানচিত্র অঙ্কিত আছে। ষ্টেশনে ও সহরের বিশেষ বিশেষ রাস্তার মোড়ে সহরের পূর্ণ মানচিত্র বোর্ডে আঁটা কাচের আবরণে ঢাকা রয়েছে; এবং সহরের যে স্থানে ঐ মানচিত্র স্থাপিত হয়েছে, একটি রক্তবর্ণ তীরের অগ্রভাগ দ্বারা সেই স্থানটি নির্দেশ করা হয়েছে। তীরের গায়ে লেখা আছে—You are here.

টেমস্ নদী ও সুড়ঙ্গ

টেমসের পূর্বদিক থেকে সমুদয় জাহাজ সহরে আমদানী হয়। তাই ঐ দিকে নদীর উপর দিয়ে কোন পোল তৈরী করা হয় নি—টেমসের নীচে দিয়ে পরপর চারটি টানেল বা সুড়ঙ্গ করা হয়েছে। এর প্রথম সুড়ঙ্গটি ১৮২৩ খৃষ্টাব্দে আরম্ভ করে বিশ বৎসরে সম্পন্ন হয়। টেমসের সুড়ঙ্গ পৃথিবীর সপ্ত আশ্চর্যের মধ্যে একটি আশ্চর্য বলে গণ্য হয়ে আসছে। তারপর আরও দুটি সুড়ঙ্গ হবার পর ১৯০৮ খৃষ্টাব্দে শেষটি তৈরী হয়। বড় সুড়ঙ্গ দু'টি—প্রত্যেকটির দৈর্ঘ্য প্রায় ছয় হাজার দুই শত ফিট, প্রস্থ ছত্রিশ এবং উচ্চতা কুড়ি ফিট। আরও আশ্চর্য্য বিষয়, সুড়ঙ্গের মাত্র পনের ফিট উপরেই নদী। সুড়ঙ্গের ভিতর রাত্রি-দিন বৈদ্যুতিক আলোকে আলোকিত থাকে।

এই চারটি সুড়ঙ্গের পর টেমসের উপর একটি আশ্চর্য্য কৌশল সম্পন্ন পোল করা হয়েছে, এটির নাম টাওয়ার-ব্রিজ। এই পোলের মধ্যকার খানিকটা অংশ কবাট খোলার মত মাঝখান থেকে দু'দিকে উঠু করে জাহাজ গতিবিধি করান হয়। প্রতিদিন গড়ে সাড়ে তের হাজার গাড়ী, মটরলরী প্রভৃতি ভারী যান এবং পঞ্চাশ হাজার পায়ে হাঁটা লোক এই পোলের উপর দিয়ে যাতায়াত করে। এই পোলের প্রায় এক মাইল পশ্চিমে লণ্ডন-ব্রিজ নামক সুপ্রশস্ত

সেতু, আর তারপর থেকেই প্রায় আধ মাইল অন্তর বিভিন্ন রকমের এক-একটি চমৎকার সেতু টেমসের উপর দিয়ে গিয়েছে। মোট এই ষোল মাইল স্থানের মধ্যে টেমস্ নদীতে ৪টি সুড়ঙ্গ, ৬টি আণ্ডার-গ্রাউণ্ড রেল সুড়ঙ্গ, ৫টি রেলওয়ে সেতু এবং লোকজন চলবার ১৬টি উৎকৃষ্ট সেতু আছে। এই যে ষোলটি লোক চলাচলের সেতু, এর ৫টির উপর দিয়ে ট্রামওয়ে গিয়েছে—আর লোক চলবার সমস্ত পোলগুলির উপর দিয়েই দ্বিতল মটরবাস প্রচুর পরিমাণে গতিবিধি করে। টেমস্ নদীটি সহরের মধ্য দিয়ে খুবই সর্প-বক্রগতিতে গিয়েছে। এই ষোল মাইল দীর্ঘ সহরের মধ্যে বক্রতার জন্ত টেমসের দৈর্ঘ্য অনুমান ২৪ মাইল হবে। সমুদ্রের দিকে টেমস্ বেশ প্রশস্ত কিন্তু সহরের মধ্যস্থলের পাঁচ মাইলের মধ্যে টেমস্ প্রস্থে পাঁচ শত ফিট মাত্র, কলকাতার নিকটের গঙ্গা নদীর অর্ধেক মাত্র; আর লগুনের বাহিরে পশ্চিম দিকে প্রস্থ তিন শত ফিটের বেশী নয়। রিচমণ্ড, কিংষ্টন প্রভৃতি অঞ্চলে টেমস্ অতি ক্ষীণকায়—প্রস্থে দুইশত ফিটের বেশী নয়। টেমসের তীরে কোথাও শিল্পদ্রব্যের কারখানা, কোথাও বা মনোহর উদ্যান।

ডক্, পার্ক ও রাস্তা

সহরের মধ্যে টেমসের পূর্বাংশের দুইধারে অনেকগুলি ডক্ জাহাজে পূর্ণ থাকে, এ ছাড়া টেমসের ভিতরে ছোট বড় জাহাজ, মাল বোট প্রভৃতিতে ভরা, তারপর থেকে চার মাইল পর্যন্ত টেমসের উত্তর ধারে সুন্দর সুপ্রশস্ত রাস্তা করা। তার মধ্যে ভিক্টোরিয়া এম্ব্যাক্সমেন্ট নামক প্রায় এক মাইলের উপর স্থান পরম রমণীয় এবং সরকারী বড় বড় অফিস প্রভৃতি এরই অনতিদূরে পর পর সুসজ্জিতরূপে

অবস্থিত। সুপ্রসিদ্ধ পালিয়ামেন্ট হাউস টেমসের তীরে সগর্বে বিরাজমান; এমন সুবৃহৎ সৌধ লণ্ডন সহরে চার-পাঁচটির বেশী নাই। লণ্ডন টাওয়ার নামক বিখ্যাত প্রাচীন ঐতিহাসিক-ভবনও টেমসের তীরে অবস্থিত। চীন, ভারতবর্ষ, আফ্রিকা প্রভৃতি স্থান থেকে সংগৃহীত কয়েকটি সুদীর্ঘ কামান লণ্ডন টাওয়ারের নিকট টেমসের তীরে সারি সারি সাজান রয়েছে। টেমসের ভিতর দিয়ে বরাবর প্যাসেঞ্জার ষ্টিমার যাতায়াত করে।

লণ্ডন সহরের ভিতরে ছোটবড় অনেকগুলি পার্ক বা উদ্যান আছে। তার এক-একটি এমনই বিশালায়তন, এমনই বৃক্ষাদি পূর্ণ যে, তার মধ্যে প্রবেশ করলে চারদিকের সহরের কোন সাড়াই পাওয়া যায় না। এর প্রত্যেকটা বিভিন্ন রকমের সুন্দর। হাইড-পার্ক, কেন্সিংটন-গার্ডেন, রিজেন্ট-পার্ক, বাটার-সি-পার্ক প্রভৃতি খুবই বড়। এর এক-একটির পরিধির বেঠিন প্রায় তিন-চার মাইল। হাইড-পার্কে নোকায় ভ্রমণের জন্য সুন্দর খাল কাটা আছে। ছোট ছোট পার্কগুলি বসন্তকালে নানাজাতীয় ফুলে সুশোভিত হয়। এত বড় সহরের মধ্যে এমন সুন্দর সুন্দর পার্ক না থাকলে লোকের প্রাণ অতিষ্ঠ হয়ে উঠতো। হাইডপার্ক-কর্ণার, ট্রাফালগার-স্কোয়ার প্রভৃতি কয়েকটি স্থান বিকালে বহু জনাকীর্ণ হয় এবং সেখানে নানা বিষয়ের বক্তৃতা হয়ে থাকে। হাইড পার্ক-কর্ণারে কখন কখন আট-দশটি স্থানে একই সময়ে বিভিন্ন রকমের বক্তৃতা হতে দেখেছি।

পিকাডিলি, অক্সফোর্ড স্ট্রীট, নিউ অক্সফোর্ড স্ট্রীট, চেরিংক্রস্ প্রভৃতি স্থানের রাস্তার দু'ধারে সুসজ্জিত বড় বড় দোকানগুলি দেখলে প্রাণে বিস্ময় ও আনন্দের সঞ্চার হয়। সহরের প্রধান প্রধান থিয়েটার, বায়স্কোপ



হাউস পার্কে হাউসিং ও বেল্লা ভাস্কর্য



হাউস পার্কে থলে নৌকা-খেল — ৭৯ পৃষ্ঠা

প্রভৃতি আমোদ উৎসবের কেন্দ্রস্থল পিকাডিলি। পিকাডিলি সার্কাস নামক স্থানটি বড়ই জমকাল। রাত্রিকালে চারিদিকে উৎসব গৃহ, হোটেল, রেষ্টুরেন্ট প্রভৃতি আলোকমালায় সুশোভিত হয়, এ ছাড়া বৈজ্ঞানিক আলোক সম্পন্ন নানাপ্রকারের বিজ্ঞাপন সমূহ প্রতি মুহূর্তে নবভাবে নানাবর্ণে রূপান্তরিত হয়ে দর্শকের মনোহরণ করে। ঐ সকল বিজ্ঞাপনের কোন কোনগুলিতে আশ্চর্য আলোকের ছবিতে অভিনয় প্রদর্শিত হয়। সন্ধ্যার পর পিকাডিলি বেন ইন্দ্রপুরী।

সিটি (City)

সহরের খানিকটা অংশের নাম চিফ্ সাইড্ বা সিটি, অর্থাৎ কলকাতার হিসাবে এর নাম বড়বাজার রাখা যেতে পারে; অত্যন্ত ঘন সন্নিবদ্ধ এবং বহু মালপত্রের পাইকারী আমদানী রপ্তানীর স্থান। যে দোকানে যে জিনিষের কারবার ঐ জিনিসের সামান্য দু'একটা নমুনা সদর দরজায় সাজান রয়েছে—দোকানের ভিতরে ঢুকলে বিশাল এক একটি হল্‌এ বহু প্রকারের জিনিস স্তরে স্তরে সজ্জিত দেখা যায়। এই মত সেই বাড়ীটির তিন-চার তল পর্যন্ত বিভিন্ন প্রকার পণ্য জিনিসে পূর্ণ। সিটি এত বড় আমদানী রপ্তানীর স্থান—তবু ভিতর-বাইর, পথ-ঘাট সমস্তই অতি পরিষ্কার পরিচ্ছন্ন এবং গাড়ী ঘোড়ার ভিড়ও কলকাতার বড়বাজারের ভিতরকার মত বিশ্রী নয়।

লণ্ডনের কোন্ জিনিস কোথায় পাওয়া যায়, নূতন লোকের পক্ষে তা নির্ণয় করা দুঃসাধ্য হলেও বন্দোবস্তের গুণে অতি সহজ হয়েছে। কমাশিয়াল-গাইড্ বলে বই আছে, তাতে সহরের প্রত্যেক বড় বড় দোকানের বিবরণ আছে—আবার বিভিন্ন দ্রব্যের প্রাপ্তি

স্থানের সুন্দর তালিকা আছে। কমাশিয়াল-গাইড্‌ বই অবশ্য কলকাতার জ্ঞাত আছে, কিন্তু তাতে সাহেবদের কারবারের সাহায্য হতে পারে, কিন্তু আমাদের দেশীয়দের বিশেষ কাজ হয় না। পৃথিবীতে যেখানে যত বড় বড় কারবার আছে, তাদের অধিকাংশেরই আপিস লণ্ডনে আছে। তারপর বিলাতের বিভিন্ন সহর-পল্লীর বড় বড় কারবারগুলির প্রধান আপিস তো লণ্ডনে রয়েছেই।

লণ্ডনের রাস্তাগুলি অধিকাংশই আঁকা-বাঁকা, কিন্তু অতি পরিষ্কার পরিচ্ছন্ন। রাস্তার উপর কেউ কোন কিছু ফেলে না, এমন কি দেশলাইয়ের খালি বাত্ম, কলা, কমলা প্রভৃতি ফলের খোসা, টুকটাক্ কাগজপত্রটুকু পর্য্যন্ত কেউ রাস্তায় ফেলে না—এ সকল ফেলবার জন্য রাস্তার মোড়ে পোষ্টারের গায়ে লোহার জালের ছোট ছোট খাঁচা বাঁধা রয়েছে। অনেক রাস্তার মোড়ে ফলবিক্রেতারা খোলা গাড়ীর উপর নানাপ্রকার দেশী-বিদেশী ফল বিক্রয়ার্থে সাজিয়ে রাখে। ঘর বাড়ীগুলি সমস্তই ছাইয়ে রংএর, আমাদের দেশের সহরের মত সাদা লাল, হলুদ প্রভৃতি রং করা বাড়ী নাই। বাড়ীগুলি অধিকাংশই চার-পাঁচ তলা কিন্তু এ ছাড়া প্রত্যেক বাড়ীতেই সাধারণ জমির নীচে আর এক তল আছে। বিশেষ ঘন-সম্মিলিত স্থানগুলি ব্যতীত প্রায় স্থানেরই গৃহস্থ বাড়ীর সম্মুখে ও পশ্চাতে একটু খালি জমি আছে। সম্মুখের অংশে পাতাবাহার গাছ ও নানারকম ফুল গাছ দিয়ে সাজানো। গৃহস্থ বাড়ীগুলি সম্মুখ ভাগের জানালাগুলি নানারকম সুন্দর সুন্দর কাচের মালা আর কাপড়ের ঝালোর দিয়ে সাজানো। ঘরের জানালাগুলি খুব বড় কাচের আবরণে ঢাকা। শীতকালে সমস্ত জানালা কবাট বন্ধ থাকে, নৈলে বাইরের ঠাণ্ডা হাওয়া ঘরের ভিতর ঢুকে ঘরের উত্তাপ নষ্ট করে দেয়।



রিজেন্ট পার্কের একটি রাস্তা



রিজেন্ট পার্কের অপর একটি রাস্তা — ৭৭ পৃষ্ঠা

গতিবিধি


সহরের মধ্যে গতিবিধির জন্ত দু'এক মাইলের বেশী পথ চলতে মটরবাসই সুবিধা। একটু বেশী দূরে যাবার জন্ত আগার-গ্রাউণ্ড রেলপথ উত্তম। সহরের যে-কোন স্থান থেকে যে-কোন স্থানে যেতে আগার-গ্রাউণ্ড রেলপথে পনর-কুড়ি মিনিটের বেশী সময় লাগে না। বাস্, ট্রাম বা ট্রেনের ভাড়া সাধারণতঃ প্রতি মাইল ১ পেনি (১ আনা)। কোনপ্রকার যানেই বেশী ভিড় হয় না, বাসে কখন কখন যাত্রীর স্থান অকুলান হয় কিন্তু বসবার নির্দ্ধারিত সিট পূর্ণ হবার পর কণ্ডাক্টরের ইচ্ছাক্রমে মাত্র ৪টি কি ৫টি লোক দাঁড়িয়ে যাবার জন্ত নিতে পারে। সকল রকম যানেই স্ত্রী-পুরুষ, বালক-বালিকা সম পরিমাণে গতিবিধি করে। পথ-ঘাট, দোকান, হাট-বাজার সর্বত্র স্ত্রী-পুরুষ সমভাবে চলে। গ্রীষ্মকালে বিকাল চারটার পর থেকে রাত্রি দশটা পর্যন্ত রাস্তা পথ বহু লোকপূর্ণ হয়। শীতকাল অপেক্ষা গ্রীষ্মকালেই বেশী লোক রাস্তায় বের হয়। সারা শীতকালটা লোকে ঘরে বসে খুব কাজকর্ম করে, আর গ্রীষ্মকালে খুবই আমোদ-আহ্লাদ খেলাধুলায় কাটিয়ে বেড়ায়। বিশেষ বিশেষ উৎসব, মেলা, প্রদর্শনী প্রভৃতি গ্রীষ্মকালেই খোলা হয়। বেড়াবার সখটা বিলাতবাসীদের মধ্যে ধনী-দরিদ্র, ছেলে-বুড়ো, স্ত্রী-পুরুষ সকলেরই সমান। রবিবার অথবা বিশেষ বিশেষ ছুটির দিনে বহুসংখ্যক লোক সহরের বাইরে দশ-বিশ মাইল দূরে পর্বত, প্রান্তর বা বনে বেড়াতে যায়। সহরের বাইরে অনতিদূরে—এই রকম হেগুনের মাঠ, পলিয়ামেন্ট হিল, হ্যামস্টেড্ হিথ, ইপিং ফরেস্ট, ওয়ান্ স্টিভ ক্লাট্, রিচমণ্ড পার্ক, কিউ গার্ডেন নামক ভিন্ন ভিন্ন রকমের বন, উপবন,

পাহাড়, সমতল ভূমি প্রভৃতিতে স্ত্রী-পুরুষ বহু লোক ছুটির দিনে বন্ধুবান্ধব সহ বেড়াতে যায়। এই সব বেড়াবার স্থানে বেশী কিছু দেখবার ন্না থাকলেও সহরের আবদ্ধতার মধ্যে বাসের পর মুক্ত স্থানে ভ্রমণ বিশেষ আনন্দদায়ক হয়।


লণ্ডনের রাস্তাগুলি খুব প্রশস্ত; হুঁধারে শ্রেণীবদ্ধ ধূসর বর্ণের উচ্চ চারতলা পাঁচতলা বাড়ী। ষ্ট্রীটগুলি খুবই দীর্ঘ; সহরতলী সমেত লণ্ডনের রাস্তার সংখ্যা চৌদ্দ হাজারের উপর। সহরে যতগুলি বাড়ী তার কম বেশী অর্ধেক বাড়ীতে লোক বাস করে। বাকী অর্ধেক দোকান-পাট, কারখানা, অফিস প্রভৃতি। কলকাতার মত বহু লোক ঠেসাঠেসি করে একবাড়ীতে কদাচ বাস করে না। এক একটি শয়ন ঘরে একজন মাত্র লোক শয়ন করে, কদাচিৎ অবস্থা বিশেষে একঘরে দু'তিন জনেও শয়ন করে।

আণ্ডার গ্রাউণ্ড রেলওয়ে

এই আণ্ডার গ্রাউণ্ড রেলওয়ে লণ্ডনের অতি বিস্ময়কর ব্যাপার। কয়েক মিনিটের মধ্যে সহরের যে কোন অংশে যাওয়া যায়। সাধারণ জমির ৫০।৬০ ফিট নিম্নদেশ দিয়ে সুপ্রশস্ত সুড়ঙ্গের মধ্য দিয়ে রেলগাড়ী চলে। সেই ৫০।৬০ ফিট নীচেই খুব বড় স্টেশন। Lift এ সহজেই উপরে ওঠানামা করা যায়। পায়ে হাঁটবার সিঁড়ি পথও আছে। শীঘ্র গতিবিধির জন্য এই রেলওয়ে বড়ই সুবিধা। সহরে ট্রামওয়ে খুব বেশী না হলেও কলকাতার বিশৃঙ্খলের কম নয়। ট্রামগুলি দ্বিতল। মটরবাসেই বেশী লোক যাতায়াত করে, জনাকীর্ণ রাস্তায় প্রতি মিনিটে যাতায়াতে চল্লিশ পঞ্চাশখানা মটর বাস চলে। কলকাতায় এখন বহু প্রকার



ট্রাফালগার স্কোয়ার ও নেলসন মনুমেন্ট, লন্ডন — ২৮৮ পৃষ্ঠা



পিক্যাডিলি সার্কাস
লন্ডনের নৈশ আমোদ প্রমোদের কেন্দ্রস্থল — ২৮৬ পৃষ্ঠা

ছোটবড় রকমের মটরবাস চলা আরম্ভ হয়েছে কিন্তু লগুনে মটরবাস সমস্তই বৃহৎ এবং দ্বিতল।

বাইরের চারদিক থেকে চৌদ্দটি রেল কোম্পানীর পৃথক্ পৃথক্ রেলওয়ে এসে লগুন সহরের উপর পড়েছে, সেগুলি সহরের বাড়ী ঘরের মাথার উপর দিয়ে এসে সহরের বুকের উপর বিশাল আয়তন এক একটি ষ্টেসনে শেষ হয়েছে। এই সকল রেলওয়ের প্রায় সকলগুলির সঙ্গেই সহরের আণ্ডার-গ্রাউণ্ড রেলওয়ের সংযোগ রয়েছে। আণ্ডার-গ্রাউণ্ড রেলওয়ে যেমন মাটির বহু নিম্ন পথ দিয়ে গিয়েছে তার ষ্টেসনগুলিও তেমনি মাটির নীচে। বড় বড় আণ্ডার-গ্রাউণ্ড ষ্টেসনগুলির বিশালতা চিন্তা করলে বিস্ময়াপন্ন হতে হয়। জমির নীচে আছি বলে মনেই হয় না।

লোকে ভুলক্রমে ট্রেনে, ট্রামে, বাসে বা ট্যাক্সিতে কোন জিনিস ফেলে গেলে, যে ব্যক্তি হারাণো জিনিসটি পায়, সেই গিয়ে লষ্ট-প্রপার্টি আপিসে জমা দেয়; এই উপায়ে যার মাল সে লষ্ট-প্রপার্টি আপিসে গিয়ে সন্ধান করলেই পায়। দেশের সাধারণ লোকের সততার গুণে প্রায় কোন জিনিসই হারিয়ে যেতে পারে না।

প্রধান দ্রষ্টব্য

লগুনের দেখবার বিষয় সমূহের ষথাযথ বর্ণন করা কখন সম্ভবপর নয়। যারা দেখেছেন তাঁদের প্রাণের ভিতর সেগুলি আজীবনই ফুটে উঠতে থাকবে। যে বিষয়ে যার অল্পসন্ধিৎসা আছে, তিনি সেই বিষয়গুলি দেখে আসেন। হাজার বৎসর আগে থেকে দিনে দিনে

একটু একটু করে লণ্ডন সহর গড়ে উঠে বর্তমানে পৃথিবীর সর্বশ্রেষ্ঠ সহরে পরিণত হয়েছে। এত অর্থ, এত শক্তি, এত চিন্তা জগতে আর কোন ক্ষেত্রে ব্যয়িত হয় নাই। এত দেখবার বিষয় জগতে আর কোথায়ও বুঝি প্রতিষ্ঠিত হয় নাই। অসীম ক্ষমতাপন্ন ইংরাজ সারাজগতের যেখানে যা কিছু নূতন, যা কিছু সুন্দর পেয়েছে— তাই এনে বা তারই ভাব নিয়ে লণ্ডনের ঐশ্বর্য্য বৃদ্ধি করেছে।

বিশিষ্ট জ্ঞানোপার্জনের জন্য লণ্ডনে বহুপ্রকার শিক্ষালয় রয়েছে। সেগুলির বিবরণ পুস্তকে বা সংবাদপত্রে অনেকেই পাঠ করেছেন। আমার পক্ষে সেগুলির উল্লেখ বাহ্যল্যমাত্র।

বিভিন্ন প্রকারের মিউজিয়াম, আর্টগ্যালারি, চার্চ প্রভৃতি লণ্ডনে এত অধিকসংখ্যক আছে যে, ক্রমাগত একটি বৎসর পর্য্যন্ত দেখলেও তার ভিতরের সমস্ত দ্রষ্টব্যগুলি দেখা শেষ হয় না। এ ছাড়া কত প্রাচীন ঐতিহাসিক উপাদানপূর্ণ সৌধ, কত রাজকীয় কার্যালয়, কত লাইব্রেরী, কত ক্লাব, কন্সট-হল, কত মনুমেন্ট, পার্ক, উদ্যান সমস্ত সহরের শোভা সম্পদ বৃদ্ধি করে অবস্থান করছে। নিবিষ্টমনে এ সকল দেখলে যেমন আনন্দ উপভোগ হয়, তেমনই আবার নানাপ্রকারের অভিজ্ঞতা জন্মে।

নবাগত লোকের পক্ষে লণ্ডন সহরে চলাফেরা করিতে বা এই সকল দ্রষ্টব্যগুলি দেখতে বিশেষ কোন অসুবিধা ভোগ করতে হয় না। পথের লোককে অথবা পুলিশকে জিজ্ঞাসা করলেই সব বলে দেয়। রাস্তার মোড়ে পোষ্টারের গায়ে বোর্ড দিয়ে অনেক স্থলে প্রধান প্রধান স্থানের পথ নির্দেশ করে দেওয়া হয়েছে। অনেক স্টেশন বা বিশ্রামক্ষেত্রে দেওয়ালের গায়ে লণ্ডনের মানচিত্র আঁটা রয়েছে এবং দর্শক যে স্থানে দাঁড়িয়ে মানচিত্র দেখেছে, সেই স্থানও তীরের

অগ্রভাগ দ্বারা নির্দেশ করা রয়েছে। তীরের গায়ে লেখা আছে—
“আপনি এইস্থানে রয়েছেন।”

লগুনে অন্যান্য পঞ্চাশটি প্রসিদ্ধ থিয়েটার হল আছে। থিয়েটার-
গুলিতে প্রত্যেক দিন দু’বার অভিনয় হয়—সন্ধ্যা ৫টা থেকে ৮টা,
আর ৮টা থেকে ১১ টা। প্রতিবারে ২৥ ঘণ্টা মাত্র দেখানো
হয়। প্রতিবারেই উৎসব-ক্ষেত্রগুলি লোকে পরিপূর্ণ হয়ে যায়।
কখন কখন বসবার সিট পূর্ণ হয়ে গেলে লোকে দাঁড়িয়েই দেখে।

লগুনে বহুসংখ্যক মিউজিয়াম, প্রদর্শনী ও আর্টগ্যালারী আছে,
তন্মধ্যে নিম্নলিখিত কয়টি বিশেষ উল্লেখযোগ্য—

- (১) ব্রিটিশ মিউজিয়াম
- (২) ভিক্টোরিয়া এবং আলবার্ট মিউজিয়াম
- (৩) গ্রাচারল হিষ্টোরী মিউজিয়াম
- (৪) লগুন মিউজিয়াম
- (৫) রয়াল ইউনাইটেড্‌ সাভিস মিউজিয়াম
- (৬) সায়েন্স মিউজিয়াম
- (৭) ইণ্ডিয়া মিউজিয়াম
- (৮) হার্মিয়ান মিউজিয়াম
- (৯) সার জনসন্স মিউজিয়াম
- (১০) গেফরী মিউজিয়াম
- (১১) বেথগ্যাল গ্রীণ মিউজিয়াম
- (১২) লেইটন মিউজিয়াম
- (১৩) ওয়ার মিউজিয়াম
- (১৪) ইম্পিরিয়াল মিউজিয়াম
- (১৫) সোয়েন মিউজিয়াম

- (১৬) পার্কস মিউজিয়াম
- (১৭) "জিয়োলজিক্যাল মিউজিয়াম
- (১৮) এগ্রিকালচারাল হল্
- (১৯) রয়্যাল বোটানিক গার্ডেন
- (২০) জুলোজিক্যাল গার্ডেন
- (২১) শ্রাস্ত্রাল গ্যালারী
- (২২) টেট্ গ্যালারী
- (২৩) ওয়ালেস্ কলেকসন্
- (২৪) ডাল্‌উইচ কলেজ আর্টগ্যালারী
- (২৫) শ্রাস্ত্রাল পোর্টরেট গ্যালারী
- (২৬) টেস্ত্রান্ট গ্যালারী
- (২৭) ম্যাডাম টুসোড একজিবিশন :

ঐতিহাসিক দৃষ্টব্য ভবনের মধ্যে নিম্নলিখিতগুলি প্রধান—

- (১) টাওয়ার অব্ লণ্ডন
- (২) ওয়েষ্টমিনিষ্টার আবি
- (৩) লেন্ট পলস্ ক্যাথিড্রল
- (৪) সাউথ ওয়ার্ক ক্যাথিড্রল
- (৫) চার্টার হাউস্
- (৬) ক্রসবি হল্
- (৭) গিল্ড্ হল্

রবিবারের চিঠি—প্রথম

বিলাতে প্রথম প্রথম গতিবিধি করতে কতটুকু সুবিধা অসুবিধা ভোগ করতে হয়েছে, তারই একটা চিত্র—লণ্ডন হতে আমার লিখিত রবিবারের ভ্রমণ বৃত্তান্ত কয়েকখানি চিঠি থেকে উদ্ধৃত করা গেল।

১৭ই আগষ্ট—১৯২৪


মধ্যাহ্নের আহার বাসায় শেষ করে বিকাল ৩টায় বেড়াতে বের হলাম। বাসার নিকট Kilburn High Road থেকে ৪B নং bus ধরে থানিকটা গিয়ে পথে New Oxford Street এ এলাম। যদিও রবিবার—সবই বন্ধ রয়েছে—তবু বাইরেই অসংখ্য দেখবার রয়েছে। প্রায় বেশীর ভাগ দোকানগুলিতেই বড় বড় কাঁচের পরদা, তার ভিতর দিয়ে দোকানের প্রায় সব জিনিসই দেখা গেল। এই রাস্তার বড় বড় দোকান গুলির সাজসজ্জা অতি অপূর্ব। আমি New Oxford Street পার হয়ে Oxford Street ধরে ক্রমাগত পূর্বদিকে চলতে চলতে দু-ধারের দোকানগুলি অনেক দেখলাম। লণ্ডনের এই দু'টি রাস্তাই সবচেয়ে বড় বড় দোকানে সজ্জিত।

পরে অল্প বাসে করে Westminster Bridge নামক টেমস্ নদীর উপরের সুন্দর পোলটি পার হয়ে স্মৃহৎ Waterloo Station টি দেখলাম। এ ষ্টেশনটি সহরের প্রান্তে সুবিস্তীর্ণ স্থানব্যাপী। রেল ষ্টেশন যে এত বড় হতে পারে, তা না দেখলে কল্পনায় আনা যায় না। হাওড়া ষ্টেশনের কয়েকটা তার মধ্যে স্থান পেতে পারে। অনেকক্ষণ পর্যন্ত ষ্টেশনটিতে ঘুরে ফিরে দেখলাম। এখানে এসে আর এক নূতন বুদ্ধি মনে হল—টেম্‌সের উপর দিয়ে পোল পার হয়ে এসেছি, এবার ফিরবার পথে Tube রেলের করে টেম্‌সের নীচে দিয়ে যেতে হবে ;


“উপরে জাহাজ চলে, নীচে চলে নর”—দেখতে হবে। টেমসের সুড়ঙ্গ বলে যা বিখ্যাত সে কিন্তু এ নয়, সেগুলি সহরের পূর্বে সমুদ্রের দিকে। আমি Charring Crossএর একখানা টিকিট করলাম।

আমাদের দেশের রেলপথে চলতে নূতন লোকের কত কি যে জিজ্ঞাসা করতে হয় আর কত যে আপিসের বাবুদের তাড়া খেতে হয়, তার অন্ত নাই। এখানে রেলপথের অজানা ব্যাপার আমাদের দেশ অপেক্ষা বহুগুণ বেশী, কিন্তু এমন ভাবেই সব লেখা রয়েছে যে, এত কাণ্ডকারখানার মধ্যেও কাউকে কিছু জিজ্ঞাসার আবশ্যক হয় না। সবই সুন্দর পরিস্কার ভাবে বোঝান। কোন কোন স্থানে এমন বন্দোবস্ত রয়েছে যে, টিকিটের দামের পেনী কয়েকটা কলের মধ্যে ফেলে instruction মত কল টিপলেই যেখানকার টিকিট চাই সেখানকার টিকিট বের হয়ে পড়ে। অথচ সকলেই এ কাজটি সহজে বুঝে নিতে পারে। ষ্টেশনগুলিতে সিগারেট, ম্যাচ, চক্লেট ও নানারকম ব্যবহার্য দ্রব্য কিনতে কলে পেনি দিয়ে কল টানলেই ঐ সব জিনিস বের হয়। আমি আড়াই পেনি দিয়ে একটি টিকিট বের করলাম। এখানে প্রতি দু’ মিনিটে একখানা করে ট্রেন টেমসের নীচে দিয়ে পার হয়।

ট্রেনে উঠবামাত্রই গাড়ী ছেড়ে টেমসের নীচের সুড়ঙ্গে প্রবেশ করল; টেমসের নীচের ট্রেনে চলতে অত্যন্ত Underground পথের মতই বোধ হল। মুহূর্ত মধ্যে Charring Cross ষ্টেশনে গাড়ী এল। Charring Cross ভারী জমকাল স্থান। আমি এখানে আর একটি bus ধরে একেবারে Hyde-Park Corner অতিক্রম করে Marble Archএ এসে পৌঁছলাম। এখানে রবিবার বিকালে বহু লোকের সমাগম হয়। লোকে Hyde-Parkএ বেড়াতে আসে আর এই



ওয়েষ্টমিনস্টার ব্রিজ, লন্ডন
টেমসের তীরে সারি সারি সরকারী আফিস —৮৩ পৃষ্ঠা



Hyde-Park Cornerএর কাছে নানা প্রকার বক্তৃতা হয় তাই শোনে। আমি এক একটি করে তিন-চার জায়গায় খানিকটা করে দাঁড়িয়ে নানা প্রকার বক্তৃতা শুনলাম।

একটা জীলোকের বক্তৃতায় একটা কথা বড় মনে ধরল। তিনি বললেন “স্বর্গ বলে কোন স্থান আছে কিনা জানি না, কিন্তু খ্রীষ্টই আমার স্বর্গ—তঁার অনুসরণই আমার স্বর্গভোগ।” তঁার বক্তৃতার পর আমি খানিকটা তঁার সঙ্গে গল্প করে বাসায় ফিরলাম।

রবিবারের চিঠি—দ্বিতীয়

২৪শে আগষ্ট—

আজ সকালকার কাজকর্ম সম্পন্ন করে প্রথমে মনুমেণ্ট দেখব বলে বের হলাম। লণ্ডনে অনেক বড় বড় মনুমেণ্ট আছে তথাপি একটাই বিখ্যাত, শুধু মনুমেণ্ট বললে সেটাকেই বোঝায়। কোন্ busএ চড়তে হবে জানা নাই—অনুমানই সেই দিকের একটা busএ চাপলাম। লণ্ডন-গাইড বই ছোট একখানা পকেটে ছিল, তাই দেখেই ঠিক করলাম—কোন খানে নামতে হবে। ৮ পেনির পথ চলবার পর মনোনীত জায়গায় পৌঁছে—নামলাম। নেমে দেখি মস্ত বড় একটা জায়গা, আটটি বড় বড় রাস্তার মোহনা এটা, একে Heart of the city বলা চলে। তিন দিকে তিনটা প্রকাণ্ড বাড়ী Bank of England, Royal Exchange, Mansion House. দেখলাম, প্রত্যেক রাস্তার মাথায় Undergroundএর স্তম্ভ রয়েছে—একটা পথ ধরে নীচে গিয়ে দেখি রেলস্টেশন, পাতালপুরীতে দ্বিতীয় এক লণ্ডন সহর। স্টেশনটির নাম ‘ব্যাঙ্ক’, মাটির নীচে স্তম্ভ-পথে নানা দিকে কয়েকটি রাস্তা গিয়েছে। তাঁর প্রত্যেক দ্বারে ভিন্ন ভিন্ন স্থানে বাবার

পথ লেখা রয়েছে। রাস্তার গোলাকার ছাদ ও পাশের দেওয়ান বড় বিজ্ঞাপনের টিনের প্লাকার্ডে ঢাকা। লন্ডন সহরের বিজ্ঞাপনের কথা বলতে গেলে সে স্বতন্ত্র আর এক প্রবন্ধ আরম্ভ করতে হয়, সেকথা এখন থাকুক। যদিকে মনুমেণ্টের রাস্তা লেখা রয়েছে সেইদিকে খানিকটা গিয়ে উপরে উঠলাম—একটু হেঁটেই মনুমেণ্টে গিয়ে হাজির হলাম। রবিবার—কাজেই আজ উপরে ওঠা যাবে না—তার চারিদিকে ঘুরে দেখে নিকটেই London Bridge নামক টেমসের একটা পোলের উপর গিয়ে উঠলাম। লন্ডনের মধ্যবর্তী টেমসের ১২ মাইল পথের মধ্যে ২৫টা পোল, আর টেমসের নীচে পাঁচ-ছটা সুড়ঙ্গ-পথে কেবল ট্রেন চলে। উপরেও রেলের পোল আছে। Bridge পার হয়ে অপর পারে এসে London Bridge নামক ষ্টেশনটিতে উপস্থিত হলাম। ওপারে দেখে এসেছি জমির নীচের ষ্টেশন, এপারে এ ষ্টেশনটি সাধারণ জমি ছেড়ে প্রায় ১৫ হাত উঁচুতে; দুই পারেই লন্ডন সহর। ষ্টেশনটিতে খানিকটা বিশ্রাম করা গেল। এখানে আমি সাত পেনির কয়েক রকম ফল ও দু'পেনির পাউরুটি কিনে মধ্যাহ্নের ভোজন সম্পন্ন করলাম।

এখান থেকে সুবিখ্যাত London Tower এবং Tower Bridge দেখব মতলব করলাম। একটা ট্রাম ধরে এক পেনির পথ অর্থাৎ প্রায় এক মাইল গিয়ে নামলাম—এটা কোন্‌ খানে এসেছি ঠিক করতে না পেরে সঙ্গে Guide বই দেখে একটা রাস্তা ধরে চলতে চলতে একটা ছোট বস্তীর ভিতরে গিয়ে পৌঁছলাম—দেখলাম অনেক ছোট ছোট বাড়ী, অনেক ছেলেমেয়ে পথে খেলা করছে।

বেশী ছেলে মেয়ে একস্থানে খেলতে দেখে আমার বড় আনন্দ হল, সেখানে একটু দাঁড়াতেই অনেক ছেলে মেয়ে আমার কাছে ছুটে এল—তাদের অনেকেই ভারতীয় মাছুষের সঙ্গে কোন দিন পরিচয় করে নাই—

তারা ঈশ্বর সময়ের মধ্যেই অনেক ভারতীয় কথা আমার কাছে শুনল এবং তাদের স্কুলের অভিজ্ঞতা থেকেও অনেক বলল। আমি Tower Bridgeএ যাব শুনে পথ দেখাবার উপলক্ষে অনেক ছেলে মেয়ে আমার সঙ্গে চলল—এখানে কুড়ি বছর বয়স পর্য্যন্ত মেয়েদেরও বালিকা স্কুলভ স্বভাব দেখলাম। যে এক দল ছেলে মেয়ে আমার সঙ্গে এল, তাদের মধ্যে দু'টা মেয়ে অহুমান আঠার কি কুড়ি বছরের। এরা দু'জনে খানিকটা পথ দেখিয়ে ফিরে গেল—আর ৮১০টা ছেলে মেয়ে আমার সঙ্গে এসে গল্প করতে করতে চলল। ঠিক Bridge যখন দেখা গেল, চারটি মেয়ে বাদে আর সব ছেলে মেয়ে ফিরে গেল। মেয়ে চারটি আমার সঙ্গে এসে Bridgeটীর সমস্ত বৃত্তান্ত আমাকে বলে ভাল করে দেখাল। জাহাজ চলবার সময় মাঝখানে কবাট খুলে হু'পাশে উঁচু করা হয় কি উপায়ে তাও দেখাল। বাস্তবিকই Tower Bridge একটা বিস্ময়কর জিনিস।

পোল দেখান শেষ করে তাদের আর দু'টা মেয়ে ফিরে গেল, বারো তেরো বছরের দু'টা মেয়ে নদীর অপর পারে আমাকে Tower দেখাতে চলল। আমি বললাম, তোমরা বাড়ীতে না বলে আমার সঙ্গে এতদূর চলছ, এতে তোমাদের বাপ মা রাগ করবে না ত? তারা বলল, না কিছুই না—এখন আমাদের স্কুলের গরমের ছুটির দিন তাই আমরা এখন খুব বেড়াতে পারি। বুঝলাম, স্বাধীন দেশের মেয়ে বটে। আমাদের দেশের পল্লীগ্রামে একটা বিদেশী ইংরাজ গেলে ছেলে মেয়েরা ঘরের জানালা দিয়ে উঁকি মেরে দেখে, যার বড় সাহস সে না হয় একটু নিকটে গিয়ে দাঁড়িয়ে দেখে—আর এই মেয়ে দু'টা নিঃশব্দচিন্তে, পরিচিত ভাইদের সঙ্গে চলার মত আমার সঙ্গে গল্প করতে করতে চলল। অল্পক্ষণেই আমরা পোল পার হয়ে Towerএর দরজা

অতিক্রম করে ভিতরে ঢুকলাম। টেমসের তীরে খুব খানিকটা স্থান নিয়ে London Towerএর বড় বড় বাড়ীগুলি।

লণ্ডনের সব চেয়ে বেশী প্রাচীন ঐতিহাসিক দৃশ্য সকল এই Towerএর ভিতরে রয়েছে। রবিবার বলে ভিতরের জিনিষ সব বন্ধ। আমরা বাইরের জিনিষগুলি দেখলাম। বাইরেই এত দেখবার রয়েছে যে, একদিনে সেইগুলিই দেখে শেষ করা দায়। টেমসের তীরে সারি সারি প্রায় একশত বড় বড় প্রাচীন কালের কামান রয়েছে। আহা, ভারতের জিনিষ দেখলেই প্রাণে কেমন লাগে! ভারতীয় কামানগুলি আমি দূর থেকে দেখেই চিনলাম। একটীর গায়ে লেখা রয়েছে—“ভরতপুর থেকে East India Company কর্তৃক ১৮১৬ সালে আনীত।” দু’টি বড় পিতলের কামান দেখলাম, তার একটা ৭ হ’ত, অপরটা ১২ হাত দীর্ঘ। তাতে লেখা রয়েছে—“সলিমের পুত্র সলোমন কর্তৃক হিজরী ৯৩৭ সালে প্রস্তুত।” এত বড় কামান ভারতে তৈরী হয়েছে জেনে বড়ই আশ্চর্য্য বোধ হল। ভাবলাম—বিলাতে এই যে ভারতীয় এত বড় বড় কামান আনা হয়েছে, এর দু’একটা তো কলকাতা যাছুঘরে থাকা উচিত ছিল। কলকাতা যাছুঘরে আমরা যে ছোট দু’একটি পিতলের কামান দেখতে পাই, ওকেই ভারতীয় শিল্পের পরাকাষ্ঠা মনে করতাম, কিন্তু বিলাতে এত বড় বড় কামান ভারত থেকে এসেছে, এর খবর আমাদের দেশবাসী অনেকেই জানেন না।

এর পর আমরা চীন, জাভাদ্বীপ ও আফ্রিকা থেকে আনীত অনেক কামান দেখলাম, চীন ও জাভার কামানগুলিও বেশ বড় বড় এবং তার গায়ে সুন্দর সুন্দর চিত্র আঁকা।

এক পশ্চাৎ বৃষ্টি এল, আমরা একটা গেটের নীচেয় গিয়ে দাঁড়ালাম, সেখানে একটা বুড়ীকে পেয়ে তার সঙ্গে গল্প আরম্ভ করতেই সে, তার

বাপ ভারতে মরেছে, সেই দুঃখের কাহিনী আরম্ভ করল। বৃষ্টি থামল কিন্তু বুড়ীর কাহিনী আর থামতে চায় না। পরে আমরা Towerএর আর আর বাগানবাড়ী প্রভৃতি অনেক দেখলাম। এই টাওয়ারটা অতি প্রাচীন কালে একটা জেলখানা ছিল—এখন একে একটা প্রাচীন ঐতিহাসিক প্রদর্শনীতে পরিণত করা হয়েছে। এর ভিতরেই কোহিনুর, রাজমুকুট প্রভৃতি রক্ষিত আছে।

মেয়ে দু'টা বাড়ী ছেড়ে এক মাইলের বেশী পথ এসেছে এখন এদের শীঘ্র করে বাড়ী ফেরাই উচিত, তা না করে এরা জানাল আমাকে বাসায় পৌঁছবার busএ তুলে দিয়ে তবে দু'জনে ফিরবে—কি সম্বন্ধই যে দু'এক ঘণ্টার পরিচয়ে হয়ে গেল এদের সঙ্গে, তা বোধ হয় কখনও ভুলব না। পথে চলতে চলতে এরা আমাকে অনেক নূতন বিষয় দেখাল। খানিকটা দেখাশুনার পর পুলিশকে জিজ্ঞাসা করে আমার বাসায় ফিরবার busএ তুলে দিল। আমি চাইতেই তারা আমার নোট বইতে তাদের নাম-ধাম দিল, আমি দু'জনকে মাত্র ৪টা পেনি উপহার দিলাম এবং ওয়েস্টলীতে একজিবিশনে গেলে আমার ষ্টলে দেখা করতে বলে আমার কার্ড দিলাম। বিদায়ের কালে তাদের দু'জনের কাছে কৃতজ্ঞতা জ্ঞাপন করলাম; তারা আনন্দে আমাকে ট্রামে তুলে দিয়ে রুমাল তুলে গুড়বাই, গুড়বাই করতে করতে বিদায় নিল।

রবিবারের চিঠি—তৃতীয় (লগুনের উপপ্রান্তে)

১৪ই জুলাই, রবিবার। এদিন আর ঘড়ির কাঁটা মেনে চলতে ইচ্ছা হ'ল না, খুব অলস ভাবেই শুয়ে পড়ে দিনটা কাটিয়ে দিলাম। বিকাল পাঁচটায় বিছানা ছেড়ে একটু নিকটের কোন বাগানে বেড়াতে যেতে ইচ্ছা হল। বাড়ীর ছেলে মেয়েদের বেড়াতে যেতে ডাকতেই তারা

আনন্দে সেজে এল। ডলি নামে মেয়েটি সকলের বড়, বয়স তার বার বছর, আর দু'টা ছোট ছেলে—ফ্রাঙ্ক এগার বছরের, এরিক পাঁচ বছরের। বাড়ীতে আড়াই বছরের আর একটি ছেলে ছিল, তার নাম বিলি; সেও যাবার জন্ত ব্যগ্র হয়েছিল কিন্তু তার বাবা তাকে তুলিয়ে উপরে নিয়ে গেল।

ডলির মা আমাদের পরামর্শ দিলেন—সহরের বাইরে একটি ক্ষুদ্র নদীর তীরে বেড়াতে যেতে। আমরা ঠিক ছ'টার মধ্যে চা ও খাবার খাওয়া শেষ করে বের হলাম। ১৫২ নং লাইনের bus এ চড়ে Edgware Road ধরে উত্তর পশ্চিম দিকে চলে ১৫ মিনিটের মধ্যে সহর ছেড়ে বাইরে গিয়ে সেই ছোট খালের ধারে পৌছলাম। চারদিকেই বেশ ফাঁকা জায়গা, সহরের গুণ্ডগোল থেকে বাইরে গিয়ে প্রাণটা যেন একটু হাঁফ ছেড়ে বাঁচল। প্রথমেই আমরা একটা ছোট পাহাড়ে উঠলাম, পাথুরে পাহাড় নয়—মাটির পাহাড়। সেখানটা ঘাস আর ছোট ছোট ফুলে ভরা। আমরা সকলেই সেই ছোট ছোট ফুল তুললাম। আমাদের দেশের ফসলের জমি নষ্ট করা ফুলকাঁটা গাছও সেখানে দেখা গেল।

ক্রমে আমরা সেই ছোট পাহাড়টির একেবারে মাথায় গিয়ে উঠলাম। তখন আমাদের চোখে দূরবর্তী নানা স্থান ভেসে উঠল—দক্ষিণে সহর, উত্তরে খাল, পাহাড়, ফাঁকে ফাঁকে সহরতলীর ছোট ছোট সুন্দর পল্লী, মাঝে মাঝে শস্যের ক্ষেত।

পাহাড়ের উপর চারিদিক দেখবার পর আমরা ঐ খালের ধারে বেড়াতে যেতে মনস্থ করলাম। খালের ধারে ছোট পোল পার হয়ে অনেক লোকে ওপারে বেড়াতে যাচ্ছে। ওপারের গাছের তলায় কত লোক বসে গল্প করছে, কত লোক বেড়াচ্ছে। আমরা পোল পার না হয়ে এপারেই খালের ধারে চললাম। এক

বুড়ো তার কুকুরটিকে নিয়ে বেশ মজা করছিল। একগাছা খাটো লাঠি খালের মধ্যে ছুঁড়ে ফেলছিল আর কুকুরটা তৎক্ষণাৎ সাঁতরে গিয়ে সেই লাঠিটা কামড়ে ধরে এনে বুড়োকে দিচ্ছিল। আমরাও বুড়োর কুকুরের সঙ্গে সেই খেলায় যোগ দিলাম।


তারপর খালের ধারে ধারে আমরা আরও খানিক পথ চললাম। ফ্রাঙ্ক ভারি দুঃস্থ; সে একটা লম্বা শুকনো ডাল দিয়ে পচা পানা টেনে টেনে উপরে আনছিল। জলে নামা চলে না, সকলেরই পা জুতা-মোজায় আঁটা। খানিকদূর গিয়ে নদীর তীরে একটা মটর স্ট্রির জমি পেলাম। দু'চারটা মটর স্ট্রি তুলে খেলাম। এদেশে মটর স্ট্রি খুব আদরে খায়, কাঁচা মটর সবুজ অবস্থায় শুকিয়ে রেখে অনেকেই সারা বছর ধরে খায়। দুটরের শাকও যে একটা সুখাত্ত এটা ছেলেরা জানতো না। দেশে আমরা কেমন করে এই শাক খাই তা আমি তাদের কাছে বর্ণনা করলাম। মটরের ক্ষেত পার হয়ে আমরা খালের ধারে খুব একটা নোংরা জায়গায় গিয়ে পড়লাম। জল শুকিয়ে পচা ধাপ বেরিয়ে পড়েছে। সেখানটা কাদা আর আবর্জনা, মাঝে মাঝে জীবজন্তুর হাড় দু একখানা, একটা মরা কুকুর, একটা মরা শুকনো মোরগ আর একটা মরা পচা কি পাখী—এইসব দেখলাম। অনেকদিন লগুন সহরের অফুরন্ত বৈভব দেখে দেখে বিরক্তি ধরে গেছিল তাই এ সবই আমার বড় নূতন লাগছিল। লগনের বাইরের এই অঞ্চলের মানচিত্রের বই আমাদের সঙ্গে ছিল, কখন কোথায় পৌছছি সবই মানচিত্রে দেখছিলাম।

তারপর বাঁয়ে খাল ও ডাইনে সারি সারি গৃহস্থ বাড়ী রেখে আমরা আরও দূরে চললাম। বিকালে গৃহস্থেরা নদীর তীরের দিকে তাদের ছোট ছোট বাগানে ছেলেমেয়ে নিয়ে বসে গল্প

করছিল। অনেকে বাগানে কাজও করছিল। ছোট ছেলেরা আমার পানে চেয়ে যে রকম বিস্ময় প্রকাশ করছিল তাতে মনে হল লণ্ডনের এরকম জায়গায় ভারতবাসী কচিৎ আসে কিনা সন্দেহের বিষয়।

খালধারে চলতে চলতে একটা খুব বড় রাস্তা পাওয়া গেল। সেখানে নদীর পোলের উপর দিয়ে অনবরত ট্রাম, বাস, মোটর আর লোকজন যাতায়াত করছে। মানচিত্রে দেখা গেল, রাস্তাটা বার্মিংহামের দিকে বহু দূর চলে গিয়েছে। আমরা পোল পার হয়ে রাস্তার অপর পারে একটা পোড়ো বাড়ীতে গিয়ে উঠলাম—ভাঙ্গা দালান কোটা, ভাঙ্গা একখানা মালটানা মটরলরী পড়ে রয়েছে, একধারে প্রকাণ্ড খড়ের পাল। ফ্রাঙ্ক গিয়ে ভাঙ্গা গাড়ীঘানার মধ্যে লুকাল। এদিকে এরিক (৫ বছরের ছেলেটি) একটা কালো বিড়ালের সঙ্গে ছুটোছুটি আরম্ভ করে দিল। কিছুক্ষণ ছুটোছুটি করে সে বিড়ালটাকে ধরে আনল। ডলি সেই বাড়ীর পাশে জঙ্গলে ফুল তুলছিল।

সকলেই এই সব বৃহৎ ব্যাপারে নিযুক্ত, আমি অতি কষ্টে সবাইকে একত্র করে আরও খানিক দূর গিয়ে দেখে আসবার মতলব করলাম। ঘড়িতে তখন আটটা, আমরা আরও একঘণ্টা বেড়াব ঠিক হল। জুলাই মাস, ন'টার পর সন্ধ্যার অন্ধকার আরম্ভ হয়। আমরা Hendon-এর মাঠের দিকে চললাম। ডলি তার ফুলের তোড়াটি সুন্দর করে সাজিয়েছিল। তার হাতে সেই ফুলের তোড়াটি, ফ্রাঙ্কের হাতে এলোমেলো ফুল আর একরাশ আগাছা ডালপাতা, এরিকের কোলে সেই কালো বিড়ালটি। সবাই আমার ছুটলাগ একখানি খড়ের জমীর দিকে। সেখানে গিয়ে আমরা খুবই আনন্দে ছুটোছুটি আরম্ভ করছিলাম। খড় কোথাও লম্বা,



গণিত মিউজিয়াম, লন্ডন ---১৯৬৪ পৃষ্ঠা



ডগলাসের সমুদ্রতীরে স্বাস্থ্য-নিবাস—বালির চড়ার উপর বসিয়া বাবু সেবন

কোথাও খাটো, কোথাও একেবারে মাটিতে ভুয়ে পড়েছে। আমি খানিকটা আগে চলেছি; হঠাৎ আমি একটা লম্বা উলুখড়ের বোপের ভিতরে ঝুকিয়ে পড়লাম—হো হো করে তিন জনে দৌড়ে এসে আমাকে খুঁজে বের করল। এইমত যা-তা আমাদের খেলা চলছিল। লগুন সহরের বাইরে এই নির্জন প্রান্তরে এসে আজকার ভ্রমণ আমাদের এক স্মরণীয় দিন হয়ে রইল।

তারপর আমরা একটা বাগানের পাশ দিয়ে চললাম। তার চারদিকের লম্বা লম্বা গাছগুলি এমন সুন্দর করে সাজানো যে, হঠাৎ দেখলে আকাশ-ছোয়া গাছের দেওয়ালে ঘেরা বাগানটি বলে বোধ হয়। বাগানের শেষ সীমা বড় রাস্তার ধারে এসে উঠলাম। সেখানে রেল গাড়ীর মত গাড়ীর মধ্যে অতি ছোট ছোট দোতলা কুঠরীতে অনেক গরীব পরিবার বাস করছে দেখলাম। গাড়ীতে চাকা আছে, দরকার মত স্থানান্তরে নেওয়া যেতে পারে। পূর্বে শুনেছিলাম, ইংলণ্ডে গরীব বা পথের লোকদের বাসের জন্য সরকারী গাড়ী আছে,—ঐ সব দেখে সে কথা মনে হল। ওঃ, কত কষ্টে যে তারা বাস করে তা বলা যায় না। দেখলাম, গায়ে তাদের খাটো জামা, পরণে বিশী প্যান্ট, ছেলেদের গায়ে ছেঁড়া জামা, ছেঁড়া জুতো পায়। দেখে মনে বড়ই কষ্ট হল। ঠিক বুঝলাম না, কেন তাদের এমন নির্জন প্রান্তরে বাস করবার ব্যবস্থা হয়েছে।

তারপর আমরা সদর রাস্তায় এসে পড়লাম। রাস্তায় ট্রাম চলছিল। আমরা ঘরে ফিরব, কিন্তু এক মুস্কিল হল। এরিক তার বিড়ালের বাচ্চা কিছুতেই ছাড়বে না, ডলিও নিয়ে যেতে দেবে না। আমি নিয়ে যেতেই পরামর্শ দিলাম। ডলি বুঝিয়ে বলল, পরের বিড়াল নেওয়া যেতে পারে না। ফ্রাঙ্ক ভারি চালাক ছেলে, সে

বিড়ালটাকে নিয়ে খেলা করতে করতে এমন ভাবে তাড়িয়ে দিল যেন বিড়ালটি দৈবাৎ ছুটে পালিয়ে গেল। বিড়াল পালানোর কান্না থামাতে গিয়ে ডলিকে এরিকের হাতের অনেক কিল চড় সহ করতে হয়েছিল।

তারপর আমরা আর খানিকটা ঘুরে ফিরে চারদিকের দৃশ্য দেখলাম। দূরে পাহাড়ের গায়ে অঁকা-বাঁকা পথ উঠেছে পথের দুধারে বৃক্ষশ্রেণী। সহর ছেড়ে প্রান্তরে এসেছি তবুও চারদিকে যেন সব সুসজ্জিত রয়েছে, প্রত্যেক গাছপাতাটি পর্যন্ত মাহুষের পরিণত বুদ্ধির পরিচয় দিচ্ছে। মনে মনে ভাবলাম, এখানেও এত সুন্দর!

ন'টার সময় সূর্য ডুবে গেল। আমরা ফিরবার জন্ত রাস্তায় এসে ট্রামপোন্টের ধারে গিয়ে দাঁড়ালাম। সেদিন রবিবার; এত লোক সহরের বাইরে বেড়াতে গিয়েছিল যে, পর পর বার-চৌদ্দ খানা ট্রাম বোঝাই হয়ে আমাদের পোন্টে না ধরেই চলে গেল। নিরুপায় হয়ে আমরা খানিকটা পথ হেঁটে এসে মোটরগাড়ী ধরে বাড়ীতে ফিরলাম। তখন সন্ধ্যা হয়েছে।

পঞ্চম অধ্যায়

[একজিবিশনে]

আমাদের কার্য্য

২৯শে এপ্রিল (১৯২৪) ব্রিটিশ এম্পায়ার একজিবিশন খোলা হয়। সম্রাট পঞ্চম জর্জ এর দ্বারোদঘাটন করেন। একজিবিশনে ইংরেজ রাজত্বের প্রত্যেক দেশের জ্ঞাত পৃথক প্যাভিলিয়ন বা মণ্ডপ তৈরী হয়েছিল। পরম রমণীয় সুবিশাল ইণ্ডিয়া প্যাভিলিয়নের বেঙ্গলকোর্ট নামক অংশে আমাদের ষ্টল হয়েছিল। এইরূপ বিরাট প্রদর্শনীটির বিবরণ প্রত্যেকেরই জানা দরকার। এই পুস্তকের শেষাংশে ব্রিটিশ এম্পায়ার একজিবিশনের কিছু কিছু বিবরণ দেওয়া গেল।


বেঙ্গল কোর্টে বাংলা গবর্ণমেন্টের পক্ষ থেকে বাংলার কৃষিজাত দ্রব্য ও নানাবিধ শিল্পের ছয়টি ষ্টল হয়েছিল। তার মধ্যে বটকুষ্ঠ পালের ঔষধাদি, বেঙ্গল ক্যানিংএর রক্ষিত ফল ও মিষ্টাদি খাদ্য, এইচ, বসুর সুগন্ধি দ্রব্যাদি, ঢাকার কাপড় ও শব্দের শাখা, মুশিদাবাদের হাতির দাঁতের খেলনা, বাংলার বিভিন্ন স্থানের কাঁসা পিতলের বাসন প্রভৃতি ছিল। বাংলা থেকে কেবল আমরাই বেসরকারী অর্থাৎ স্বাধীনভাবে আমাদের ইকনমিক জুয়েলারী ওয়ার্কসের অলঙ্কারের একটি ষ্টল ক'রেছিলাম।

আমাদের ষ্টলে আমি প্রথমে শ্রীমতী মৃণালিনী ঘোষ নাম্নী

একটি সম্ভ্রান্ত বংশীয়া বাঙ্গালী মহিলাকে ষ্টল-পরিচালনের কার্যে নিযুক্ত করি। এ সময়ে এঁর স্বামী লগুনে ইণ্ডিয়ান সিভিল সার্ভিস পরীক্ষার জগ্গে প্রস্তুত হচ্ছিলেন। ইনি প্রদর্শনীক্ষেত্রে নানাদেশীয় সুশিক্ষিতা মহিলাকে কার্য্য করতে দেখে বাঙ্গালী মহিলার যোগ্যতা প্রদর্শনের জগ্গ নিজেই কার্য্যে নিযুক্ত হবার জগ্গ আমার কাছে প্রস্তাব করেছিলেন। শ্রীমতী ঘোষ শাখা-শাড়ী পরতেন, কপালে সিন্দূর পরতেন। অভিনব সাজে সজ্জিতা বাঙ্গালী মেয়ের তত্ত্বাবধানে বাংলার অভিনব ধরণের অলঙ্কারের দোকান ইয়োরোপীয়দের চক্ষে সত্য সত্যই খুব চিত্তাকর্ষক হয়েছিল।

মে, জুন, ছ'মাস একজিবিশন চলবার পর আমাদের ষ্টলের বিক্রি খুব বৃদ্ধি পেল। তখন আমি আর দু'টি ইংরাজ কন্যাকে আমাদের ষ্টলে কার্য্যে নিযুক্ত করলাম। বড়টির নাম Miss Adams, বয়স ২৪ বৎসর, ছোটটির নাম Miss Jones, বয়স ১৫ বৎসর। শ্রীমতী ঘোষ এবং এই দু'টি কন্যা—এঁরা সকলেই অতি সুন্দর ভাবে কাজ করতেন। সমস্ত কাজই নিজের কাজের মত যত্নের সঙ্গে করতে দেখে আমার বড় আনন্দ হত। এঁদের প্রত্যেককে আমি সাপ্তাহিক পোঁণে তিন পাউণ্ড অর্থাৎ মাসিক কমিবেশী পোঁণে দু'শো টাকা হিসাবে বেতন দিতাম।

মিস্ জোনস্ নারী ১৫ বৎসর বয়স্কা যে মেয়েটি আমাদের ষ্টলে কাজ করত, সে অল্প দিন হ'ল স্কুলের পড়া শেষ করেই আমাদের কাজে এসেছিল। তার সদানন্দ চঞ্চল ছুটোছুটিতে আমাদের ষ্টলটি আনন্দে ভরপুর থাকত। আমি তাকে একখানি বাংলার সাড়ী উপহার দিয়েছিলাম। ষ্টলে সে তাই পরে বাঙ্গালী বেশে গ্রাহকদের নিকট জিনিস বিক্রি করত। দর্শকগণ তাকে ভারতীয় মেয়ে মনে করে কখন কখন ভারতীয় সংবাদের প্রশ্ন জিজ্ঞাসা করত, সে হেসে জানাত—সে



মগার্শে স্বত্বধিকারী শ্রী অক্ষয়কুমার নন্দী (গ্রন্থকার) মধ্যে ভারতীয় বেশে মিস জোন্স, দক্ষিণে মিস্‌ ম্যাডামস্‌

বৃটিশ এম্পায়ার একজিবিথনে ইকনমিক জুয়েলারী ওয়ার্কসের টেল

ইংলণ্ডেরই মেয়ে। মিস জোনস্ অল্প বয়সের বালিকা হলেও স্বাস্থ্যের উৎকর্ষতায় তাকে পূর্ণাঙ্গ-সুন্দরীর মত দেখাত। এই পুস্তকে আমাদের ষ্টলের যে ছবি দেওয়া হয়েছে, তার মধ্যস্থলে এই কন্ঠাটি ঠিক বাঙ্গালী মহিলার মতই সুন্দর শোভা পাচ্ছে।

আমাদের ষ্টলের এই ইংরেজ মেয়ে দু'টি বড় শাস্ত স্বভাবের ছিল, গ্রাহকের নিকট বেশী কথা বলে জিনিস বিক্রির অত্যধিক চেষ্টা এরা কখনও করত না, আমিও এদের এই ভাব বেশ পছন্দ করতাম।

শনিবারে একজিবিশনে খুবই ভিড় হত, আমি যে পরিবারে বাস করতাম, সেই বাড়ীর একটি বার বছরের মেয়ে প্রতি শনিবারে এক-জিবিশনে এসে আমার কাজের সহায়তা করত। শনিবারে বিলাতের ছেলে মেয়েদের স্কুল বন্ধ থাকে তাই একজিবিশনে আসার তার সুযোগ ছিল। হাসিখুসি স্বভাবের মেয়ে, এর কথা আগেও বলেছি। এ সেই ডলি, একে নিয়ে মাঝে মাঝে প্রদর্শনীর উৎসব ক্ষেত্রে বেড়িয়ে বড়ই আনন্দ পেতাম।

বিলাতে শ্রমসাপেক্ষ কাজগুলি পুরুষেরা করেন, অপেক্ষাকৃত অল্প পরিশ্রমের কাজ মেয়েরা করেন। ভাল ভাল দোকানে দ্রব্যাদি বিক্রয় অধিকাংশ স্থানে মেয়েদেরই কাজ। বৃটিশ এম্পায়ার একজিবিশনের কার্য্যকারকদিগের মধ্যে মেয়েদের সংখ্যা ছিল সতর হাজার। এ হতেই পাঠকগণ প্রদর্শনীর বিশালতা কিঞ্চিৎ অহুমান করতে পারেন।

বিলাতের মেয়েরা আমাদের দেশের মেয়েদের মত বেশী দামী গহনা পরা বিশেষ পছন্দ করে না। মোটামুটি গলায় সরু হার, কানে লম্বা ছল, হাতে একটা আংটি—এই তাদের গহনা। কেউ মাত্র একটা হাতে অতি সাদাসিধে রকমের ব্রেসলেট বা বালা পরে; আজকাল হয়েছে আর্মলেট,—তাগার মত একটা জিনিস ওপর হাতে পরে, গলায় হারের

স্থানে হাল ফ্যাসানে হয়েছে—এক রকম সুরুমোটা মালা, এগুলি হাতিদাঁত, ঝিহুক, রঙ্গিন পাথর প্রভৃতির তৈরী ; উপরে সুরু আরম্ভ হয়ে ক্রমে নীচেয় মোটা ।

আমাদের হাতিদাঁতের উপর গিনিসোনায় মোড়া ‘বীণাপাণি শাঁখা’ ইংরেজ মেয়েরা পছন্দ করেছে । ‘বীণাপাণি আর্মলেট’ নানা রকম খুবই বিক্রি হয়েছিল, কারণ আর্মলেট পরা ইংরেজদের হাল ফ্যাসান ।

আমরা আমাদের অলঙ্কারের সঙ্গে হাতিদাঁতের প্রস্তুত নানা রকম সেপটাপিন, মালা, ফুল, লকেট, খেলনা, পুতুল প্রভৃতিও বিক্রয় করতাম ; সেগুলো কতক আমাদের ঘরে আর কতক মুর্শিদাবাদের তৈরী ।

বেঙ্গল-গবর্ণমেন্ট-ষ্টলগুলিতে যে সকল শিল্পদ্রব্য ছিল, তার মধ্যে বাংলার মেয়েদের হাতের প্রস্তুত লেস্, রুমাল ও নানা রকম সূচীশিল্প ছিল । অনেকগুলি সুন্দর কাঁথা বাংলার পল্লী থেকে সংগ্রহ করে এক-জিবিশনে পাঠান হয়েছিল । সেগুলো দেখে ইংরেজ-মেয়েরা বাংলার মেয়েদের ধৈর্যের খুবই প্রশংসা করত । কাঁথাগুলো এতই সুন্দর যে কোন কোন খানা ২০ পাউণ্ড অর্থাৎ পৌনে তিন শত টাকা পর্য্যন্ত বিক্রি হয়েছিল ।

বিলাতের সর্বত্র সমস্ত জিনিষই এক দরে বিক্রি, মূল্যবান দ্রব্য থেকে শাক তরকারী পর্য্যন্ত কোন জিনিষেরই দর দস্তুর করবার প্রথা নাই । এইরূপ সুনিয়ম থাকায় আমরা অল্প সময়ের মধ্যে অনেক জিনিষ বিক্রি করতে পেরেছিলাম ।

তিনটা মেয়ের উপর সমস্ত কার্যভার দিয়ে আমি প্রদর্শনীক্ষেত্রের নানাস্থান ঘুরে নানাপ্রকার শিল্প-বাণিজ্য সম্বন্ধীয় দ্রব্যের বিষয় অবগত হতাম । ছ’মাস কালব্যাপী দীর্ঘ সময় একজিবিশন দেখবার সুযোগ পেয়েছিলাম, তথাপি অনেক বিষয় দেখতে সময় হয় নি ।

প্রদর্শনীক্ষেত্র নানাপ্রকার আমোদ-উৎসবাদিতে সর্বদা ভরপুর থাকত, আমরা অবকাশ মত সেগুলির কিছু কিছু দেখতাম। বিলাতে পথ ঘাটে সর্বত্র সমপরিমাণ মেয়েপুরুষের গতিবিধি, কিন্তু প্রদর্শনী বা আমোদ-উৎসবাদিতে বেশীর ভাগ মেয়েরাই যোগ দিয়ে থাকেন। আমি দেখতাম, একজিবিশনের সমস্ত লোকের মধ্যে তিনভাগের দুই ভাগই স্ত্রীলোক। প্রায় সকলেই ছোট ছেলে মেয়েদিগকে সঙ্গে নিয়ে আসতেন। শিশুদিগকে রাখবার একটা চমৎকার বাড়ী প্রস্তুত হয়েছিল। যে সকল স্ত্রীলোকের শিশুসন্তান বাড়ীতে রেখে আসবার সুযোগ নাই, তাঁরা সন্তান সঙ্গে করেই এসে ঐ স্থানে তাদের রেখে দিয়ে নিশ্চিতভাবে একজিবিশন দেখতেন। শিশুদের সেখানে রাখবার খরচ ৪ ঘণ্টায় ছয় আনা এবং সমস্ত দিনের জগ্গ বার আনা নির্দ্ধারিত ছিল। সন্তান রাখবার কর্তৃপক্ষেরা সন্তান রেখে অভিভাবককে একটি টিকিট দিতেন, সন্তান নেবার সময় ঐ টিকিট দেখিয়ে সন্তান ফিরিয়ে নিতে হত। শিশুদের আহাারাদির ও সর্বপ্রকার তত্ত্বের চমৎকার ব্যবস্থা সেখানে ছিল, অধিকন্তু সেখানে শিশুদের উপযোগী এমন সুন্দর সুন্দর আমোদ উৎসবের ব্যবস্থা ছিল যে, তাদের পক্ষে উহাই প্রদর্শনীর আমোদ উপভোগের জগ্গ যথেষ্ট হয়েছিল।

সহর ও পল্লী থেকে স্কুলের শিক্ষক শিক্ষয়িত্রীগণ আপন আপন স্কুলের ছাত্র ছাত্রীগণকে নিয়ে একটি দল বেঁধে একজিবিশন দেখতে আসতেন। ঐ সকল শিক্ষক শিক্ষয়িত্রীগণকে ছাত্র ছাত্রীদের প্রতি সন্তানের মত ব্যবহার করতে দেখতাম। তাদের সকলকারই জ্ঞানস্পৃহা অত্যন্ত প্রবল।

আমাদের ষ্টলে বিক্রয়ের জগ্গ হাতির দাঁতের প্রস্তুত তাজমহল, হাতির উপর সজ্জিত বেশে ভারতীয় রাজা, জগন্নাথের রথ, গরুর গাড়ী,

ময়ূরপঙ্খী বাইচের নোকা, বজরা নোকা, রাধাকৃষ্ণ, শিবদুর্গা, বুদ্ধ, গৌরাঙ্গ প্রভৃতির মূর্তি এবং নানাবিধ ভারতীয় জীবজন্তুর মূর্তি দিয়ে সুসজ্জিত করা হয়েছিল। শিক্ষক শিক্ষয়িত্রীগণ এবং অহুসন্ধিৎসু দর্শকগণকে আমরা ঐ সমস্ত জিনিষের বিবরণ শুনাতে, তাতে আমাদের ষ্টলের সম্মুখে অনবরত ২৫ হতে ১০০ দর্শক উপস্থিত থাকত।

সন্ধ্যাট পঞ্চম জর্জের মহিষী রাণী মেরী একদিন বেঙ্গল কোর্টে এসেছিলেন,—আমাদের তৈরী অলঙ্কার দু'একটি হাতে নিয়ে দেখে প্রশংসা করেছিলেন। আর একদিন স্পেনের রাণী আমাদের ষ্টলে এসে 'বীণাপাণি আম'লেট' কিনে নিজে পরেছিলেন; তাঁর সঙ্গে আর একটা রাজপরিবারস্থ কণ্ঠা ছিলেন, তিনিও একটা কিনে হাতে পরেছিলেন।

একজিবিশনে সারা পৃথিবীর বিভিন্ন দেশের মানুষ দেখতাম। ভারতের নানা প্রদেশের অনেক লোকও সেখানে একজিবিশন দেখতে গিয়েছিলেন। একটা বাঙ্গালী মহিলা নিযুক্ত হয়েছিলেন—বেঙ্গল গভর্নমেন্টের বস্ত্রবিভাগীয় ষ্টলে; ইনি বাংলার সুবিখ্যাত বাগ্মী বিপিনচন্দ্র পাল মহাশয়ের মধ্যমা কণ্ঠা কুমারী লীলা পাল। ইংলণ্ডের নানাস্থানের বাঙ্গালী ছাত্র-ছাত্রীগণ আমাদের ষ্টলে আসতেন এবং বাংলার শিল্পকে বিলাতে সুপ্রতিষ্ঠিত করবার এই ক্ষুদ্র প্রয়াসের প্রতি অন্তরের শ্রদ্ধা জ্ঞাপন করতেন। ১০।১২টা বাঙ্গালী মহিলার সঙ্গে আমাদের বিশেষ পরিচয় হয়েছিল; তার মধ্যে শ্রীমতী লতিকা বসুর নাম এ দেশের অনেকেই জানেন।

মে মাসের প্রথমেরই সুরু হয়ে অক্টোবরের শেষ পর্য্যন্ত ছ'টা মাস বেশ সরগরমের সঙ্গে একজিবিশনটি চলেছিল। এই ছ'টা মাস আমরা যে কত আনন্দে কাটিয়েছি, কত নূতনত্বের মধ্য দিয়ে চলেছি তা মনে করেও আনন্দ হয়।

বেঙ্গল কোর্টে ইংরেজ বাঙ্গালী স্ত্রীপুরুষে আমরা প্রায় পঞ্চাশ জন লোক কাজ করতাম, আমাদের সকলের মধ্যে বড়ই সম্ভাব জন্মেছিল। একজিবিশন শেষ হবার পর আমাদের পরস্পরের এই বিচ্ছেদ আমাদের প্রাণে বড়ই ব্যথা দিয়েছিল।

বেঙ্গল গবর্ণমেন্ট-পক্ষ থেকে কলকাতা কো-অপারেটিভ সোসাইটির রেজিষ্ট্রার রায় যামিনীমোহন মিত্র বাহাদুর, খাঁ বাহাদুর কোমরুদ্দিন আহম্মদ এবং শ্রীযুক্ত কিরণচন্দ্র সেনগুপ্ত মহাশয় বেঙ্গল কোর্টের তত্ত্বাবধায়ক হয়ে গিয়েছিলেন। এঁরা প্রত্যেকেই আমাকে নানাভাবে সাহায্য করেছিলেন। এঁদের সহায়তায় আমি নানা অযোগ্যতার মধ্য দিয়েও আমাদের ষ্টলের কার্যে সফলতা লাভ করেছিলাম।

বাংলার শিল্প

বাংলার শিল্প ও বাণিজ্যের জিনিস বাংলার বাইরে কিরূপ আদর পেতে পারে এবং বিদেশে রপ্তানি করে কিরূপ এর প্রসার ও উন্নতি করা যায়, সে সম্বন্ধে দু'চারটা কথা আমি এখানে বলছি।

রাণাঘাটে কংসবণিক শিল্প প্রদর্শনীতে বেঙ্গল গবর্ণমেন্ট পক্ষ থেকে লোক গিয়ে প্রদর্শনীর উদ্বোধনগণকে লণ্ডন একজিবিশনে জিনিস পাঠাবার জন্ত উৎসাহিত করেছিলেন—এবং তার ফলে লণ্ডন ব্রিটিশ-এম্পায়ার একজিবিশনে কংসবণিক শিল্পজাত দ্রব্য প্রদর্শনের জন্ত একটা ষ্টল করা হয়। জিনিষ প্রদর্শন ও বিক্রয় করবার জন্ত দেশীয় শিল্পীগণের পক্ষ থেকে কেউ না যাওয়ার, গবর্ণমেন্ট নিয়োজিত কর্মচারীগণের হস্তে উক্ত ষ্টলের ভার প্রদত্ত হয়। একজিবিশনে বিক্রয়ের আধিক্য দেখে মনে হয়েছিল যে, যদি দেশীয় মহাজনদের পক্ষ থেকে কেউ উপস্থিত হতে পারতেন, তবে বিক্রয়ও বেশী হত এবং প্রদর্শকগণেরও বেশ লাভ

হত। তবে আমাদের ষ্টলটা এই ষ্টলের সম্মুখেই ছিল বলে, আমি স্বেচ্ছাং পেলেই এই ষ্টলের সাহায্য করতাম।


যে সকল জিনিস বিলাতে প্রেরিত হয়েছিল তন্মধ্যে খাগড়া, নবদ্বীপ, বহিরগাছি, কলম প্রভৃতি স্থানের কাঁসার ডিসগুলিই বিশেষ উল্লেখযোগ্য। কলকাতা সিমলার পিতলের পুতুল, শান্তিপুর এবং রাণাঘাটের কমণ্ডলু, সর্প-বাতিদান প্রচুর পরিমাণে বিক্রি হয়েছিল।

গবর্ণমেন্টের নিয়োজিত ছু'টা ইংরেজ মহিলার উপর এই সব জিনিসের বিক্রয়ের ভার ছিল। অবসর পেলেই আমি গিয়ে ইংরেজ মহিলাদ্বয়কে জিনিষগুলির নাম ও পরিচয় বুঝিয়ে দিতাম, এবং সেগুলি কি কি কার্যে ব্যবহৃত হয়, কেমন করে পরিষ্কার রাখতে হয় ইত্যাদি শিখিয়ে দিতাম। কাঁসার পাত্র পরিষ্কার রাখতে বিশেষ কোন মেটাল-পালিশের প্রয়োজন হয় না, কাঠ বা কয়লার ছাই দিয়েই চমৎকার পরিষ্কার করা চলে, শুনে ইংরেজ মহিলারা আশ্চর্য্য বোধ করতেন।

ধাতুদ্রব্য পরিষ্কার করবার জন্য ইংরেজরা নানা প্রকারের কোর্টার ভরা পালিশ ব্যবহার করে থাকেন। যে মেটাল পালিশ আমরা সচরাচর বাজারে দেখতে পাই, তা অতি সূক্ষ্ম কাচের গুঁড়ার সঙ্গে মোম, প্যারারফিন বা ভ্যাসেলিন মিশিয়ে প্রস্তুত করা হয়ে থাকে। বিলাতের Wales (ওয়েল্‌স্) দেশের সমুদ্রতীরের কাদা থেকে রুজ্‌ নামক সোনা পালিশের উৎকৃষ্ট গুঁড়া প্রস্তুত হয়। এইরূপে ওদেশের ছাই-মাটি বুদ্ধি-কৌশলে বিদেশে বিক্রীত হয় এবং দেশের ধনবৃদ্ধি বিষয়ে সহায়তা করে। আমার মনে হয় যে, কাঠের ছাই গুলিকে রং চঙ করে সূদৃশ কোর্টারি ভরে “কাঁসার পালিশ” নাম দিয়ে



বেঙ্গল কোর্টের একাংশ
ব্রিটিশ এম্পায়ার একজিবিশন, লন্ডন —২৫ পৃষ্ঠা



বেঙ্গল কোর্টে টেক্সটাইল বিভাগ
বাহাদুরী মহিলার তত্ত্বাবধানে —১০০ পৃষ্ঠা

আমরাও দেশবিদেশে বিক্রয় করে একটা ব্যবসায় চালাতে পারি।

আমাদের বাংলার শিল্পদ্রব্যগুলি বিক্রির একটা অসুবিধা এই যে, ইহার প্রত্যেক জিনিষটি পৃথক রকমের, বিভিন্ন সাইজের, বিভিন্ন প্যাটার্নের। প্রত্যেকটি জিনিস বিভিন্ন দামে বিক্রি করায় বড়ই অসুবিধা হয়। আরও বেশী অসুবিধার কথা এই যে, একই প্রকারের একই মূল্যের বহু বহু জিনিস না হলে পাইকারী বিক্রির জন্ত মহাজনেরা নিতে চায় না। সকলেই দেখে থাকবেন যে বিলাতী জিনিস গুলি কেমন সেট সেট ডজন ডজন করে প্যাক করা থাকে। আবার ১২ ডজনের প্যাকেট কেমন বিদেশে পাঠাবার উপযোগী করে কাঠের বাক্সে সুন্দরভাবে প্যাক করা থাকে। আমাদের দেশীয় জিনিস গুলিও ঐরূপ একই গঠনের এক এক প্রকারের অনেক গুলি এক সঙ্গে প্রস্তুত করা উচিত।

কাঁসা পিতলের ছোট ছোট জিনিসগুলির বিক্রয়াদিক্য দেখে কতকগুলি ইহুদী বণিক বেঙ্গল কোর্টে এসে কর্তৃপক্ষের নিকট বাকী সমুদয় ছোট জিনিস গুলি খরিদের উপর শতকরা ২৫ টাকা দর বেশী দিয়ে খরিদ করে নিয়ে গিয়ে তিনগুণ দামে বিক্রি করেছিল। যদি এই বিভাগে একজন অভিজ্ঞ ব্যবসায়ী প্রতিনিধি থাকতেন, তবে এই তিনগুণ লাভ তাঁদেরই হত।

কাঁসার উপর লতা, পাতা, ফুল, পৌরাণিক ছবি প্রভৃতি এন্থ্রেভ বা খোদাই করা ডিসগুলি ইংরেজ মহিলারা বিশেষ আগ্রহের সঙ্গে কিনেছিলেন। কমলে কামিনী, মানভঞ্জন, কালীদমন, শ্রীকৃষ্ণের যমুনাবিহার প্রভৃতির ছবি খোদাই ডিসগুলির উপরেই ক্রেতাদের ঘোঁক বেশী পড়েছিল এবং তাঁরা এই সকল পৌরাণিক ছবিগুলির

অর্থ শুনবার জন্য আমার কাছে আসতেন। কাঁসার জিনিষ ব্যতীত মোরাদাবাদের পিতলের গেলাস, বাটী, ডিস্ প্রভৃতি জিনিষগুলি খুব আদরের সঙ্গে বিক্রি হয়েছিল।

বুটিশ এম্পায়ার একজিবিশনে আমাদের দেশীয় জিনিসের প্রতি ইংরেজদের যেরূপ আগ্রহ দেখলাম, তাতে আমার মনে হয়, লগুন সহরে আমাদের দেশের শিল্পীদের পক্ষ থেকে একটি বড় দোকানের সৃষ্টি হতে পারে এবং তদ্বারা ভবিষ্যতের জন্য এই দেশীয় শিল্পজাত দ্রব্যের একটা বিশেষ পসার বিলাতে হতে পারে। এই সমস্ত কার্য নিজেদেরই করতে হয়, ইংরেজ এজেন্ট দ্বারা এ সকল ভালভাবে চলে না।

বুটিশ এম্পায়ার একজিবিশনে ইণ্ডিয়া প্যাভিলিয়ন অর্থাৎ ভারতীয় প্রদর্শনী-মণ্ডপটিকে ভারতের প্রদেশ অনুযায়ী ভিন্ন ভিন্ন কোর্টে বিভক্ত করা হয়েছিল। বাংলার জিনিষ বেঙ্গল কোর্টে রক্ষিত হয়েছিল। উক্ত কোর্টে যদি ভালরূপ ব্যবসা-জ্ঞানসম্পন্ন কর্মচারী বেশী সংখ্যায় নিযুক্ত করা হত, তা হলে বাংলার প্রদর্শকগণের প্রদর্শিত শিল্প বিলাতে একটা পাকাপোক্ত স্থায়ী ভিত্তি স্থাপনে সমর্থ হত —এটা আমার দৃঢ় বিশ্বাস।

বিদেশে ভারতের বাইরে আমাদের দেশীয় শিল্পজাত দ্রব্যাদি চালাতে হলে আমাদের শিক্ষিতগণের মধ্য থেকে কার্যক্ষম ও অভিজ্ঞ লোক নিযুক্ত করে উৎকৃষ্টতর দ্রব্যাদি প্রস্তুত করতে হবে এবং বিভিন্ন দেশের প্রদর্শনী প্রভৃতির সাহায্যে গ্রাহক আকর্ষণ করতে হবে। এই সমস্ত বিষয়ে আমাদের দেশীয় শিল্পী মহাজনগণের মনোযোগ অত্যন্ত কম দেখে সময়ে সময়ে আমি আমাদের দেশের শিল্প বাণিজ্যের ভবিষ্যৎ উন্নতি সম্বন্ধে অত্যন্ত সন্দেহান্বিত হয়ে পড়ি।

বিদেশ-বাণিজ্য সম্বন্ধে আমি আমার দেশীয় শিল্পী মহোদয়গণকে বিশেষ মনোযোগ দিতে অনুরোধ করছি। আমাদের নিত্য নৈমিত্তিক ব্যবহারের জন্ত যতটা বিদেশী মাল আমাদের ব্যবহার করতে হয়, অন্ততঃ যদি সেই টাকার মাল আমরা বিদেশে পাঠিয়ে বিক্রি করতে না পারি—তা হলে আমাদের দেশের ধনবল যে ক্রমশঃ ক্ষীণ হয়ে আসবে, তা সহজেই বোঝা যায়।

ষষ্ঠ অধ্যায়

[স্কটলণ্ড]

এডিনবরা যাত্রা

কলকাতা থেকে আসবার সময় জাহাজে রেভারেণ্ড ডাঃ রবার্ট মরিসন নামক একজন স্কটলণ্ডবাসী ইংরেজের সঙ্গে আমার পরিচয় হয়। লণ্ডনে পৌঁছে তিনি সপরিবারে এডিনবরায় তাঁদের বাড়ীতে যান, আমি লণ্ডনে থেকে চাই।

একদিন ডাক্তার মরিসন লণ্ডনে এম্পায়ার একজিভিশন দেখতে এসে আমাদের ষ্টলে আমার সঙ্গে দেখা করলেন এবং একজিভিশন শেষ হবার পর আমি যেন এডিনবরা গিয়ে তাঁর বাড়ীতে হুঁসপ্তাহ থেকে আসি এর জন্ত আমাকে নিমন্ত্রণ করে গেলেন।

অক্টোবরের শেষ ভাগে একজিভিশন শেষ হল। নবেম্বরের প্রথম তিন সপ্তাহ আমি লণ্ডন সহরের নানা দর্শনীয় বিষয়গুলির অধিকাংশ দেখে নিয়েছি। এমন সময় মরিসন সাহেবের আহ্বান-পত্র পেয়ে আমি ২৪শে নবেম্বর (১৯২৪) তারিখে ট্রেনে স্কটলণ্ডের রাজধানী এডিনবরা রওনা হলাম। লণ্ডন থেকে এডিনবরা রেলপথে চারশো মাইল উত্তরে। ভাড়া তৃতীয় শ্রেণীতে আড়াই পাউণ্ড অর্থাৎ সাড়ে সাঁইত্রিশ টাকা।

লণ্ডনের মধ্যবর্তী বিরাট ইউষ্টন্ স্টেশন থেকে সকালে দশ টায় ট্রেনে উঠলাম। পথে সুহর, পল্লী, পাহাড়, ক্ষেত্র, নদীর সৌন্দর্য প্রত্যেকটি এক একটি নূতন উপভোগ্য দৃশ্য দেখা গেল। লিভরপুর্

থেকে মাঞ্চেষ্টর পর্যন্ত প্রকাণ্ড কৃত্রিম ক্যানেল, ট্রেনে ক্যানেল পার হবার সময় তার মধ্যে জাহাজ চলতে দেখলাম। এই পথেই আমাদের ভারতবর্ষের যত তুলা জাহাজ বোঝাই হয়ে মাঞ্চেষ্টরে যায়, এবং তা দিয়ে বস্ত্র তৈরী হয়ে ভারতে আসে। ল্যান্সাসায়ার অঞ্চলের মধ্য দিয়ে যখন ট্রেন চলল, তখন চারদিকে অনেক কাপড়ের কল আমাদের নয়নপথে পড়ছিল। এই ল্যান্সাসায়ার অঞ্চলটিই এ দেশের মধ্যে জনতায় ও কলকারখানায় সমধিক সমৃদ্ধি সম্পন্ন।

বিকাল তিনটায় ট্রেন ইংলণ্ড অতিক্রম করে ক্রমে উত্তরাভিমুখে চলে স্কটলণ্ডের সীমানায় পৌঁছল। স্কটলণ্ড দেশ পাহাড় পর্বতে পূর্ণ। উত্তরাভিমুখে চলতে চলতে ক্রমেই অধিকতর শীত বোধ করছিলাম। চারিদিকই ছোট পাহাড়ে ভরা, পাহাড়গুলি প্রায়ই ঘাসে ঢাকা, তার উপর গরু, ভেড়া চরাবার স্থান। নীচের জমিগুলি খুব বড় বড় খণ্ড খণ্ড পাথরের তিন চার ফুট উঁচু করে বেড়ায় ঘেরা, তার মধ্যে নানাবিধ শস্তের চাষ। আবার কোনটিতে শূকর, কোনটিতে মুরগী পালনের ব্যবস্থা। মুরগীর জমিতে তাদের বসবাসের জন্ত রেলের মালগাড়ীর আকারে ছ-একখানা করে ঘর তৈরী করে দেওয়া হয়েছে। নূতন দৃশ্যের মধ্যে চলতে চলতে পাঁচটায় সন্ধ্যার অন্ধকারে চারিদিক ঘিরে গেল।

স্কট্ পরিবারে কয়েক দিন

রাত্রি ৮টায় ট্রেন এডিনবরার মধ্যবর্তী রমণীয় গ্রিন্সেস ষ্ট্রীট স্টেশনটিতে পৌঁছল। দেখলাম মরিসন সাহেব একেবারে আমার গাড়ীর দরজায়ই হাজির। আমার ব্যাগটি তিনি কিছুতেই আমাকে

নিতে দিলেন না—নিজে হাতে বহন করে আমাকে নিয়ে ট্রামে চাপলেন। দু'মাইল ট্রামে চলে আমরা 33, Craiglea Drive ঠিকানায় তাঁদের বাড়ীতে পৌঁছলাম।

বাড়ীর ছেলেরা ভারতীয় নূতন অতিথির দর্শন আশায় উৎসুক হয়ে অপেক্ষা করছিল। মরিসন সাহেবের স্ত্রী আমাকে আপ্যায়িত করে ছেলেদের সঙ্গে পরিচয় করিয়ে দিলেন। দেখলাম, তাঁদের মস্ত বড় চারতারা পাথরের তৈরী বাড়ী। সকলের উপর তলায় পরিষ্কার পরিচ্ছন্ন একটি বড় কামরায় আমার থাকবার স্থান হ'ল। রাত্রির আহা়ারান্তে মিসেস মরিসন আমাকে নিয়ে আমার ঘরে আবশ্যক দ্রব্যাদি দেখিয়ে দিলেন। বাংলা অগ্রহায়ণ মাস, এতেই ভয়ানক শীত আরম্ভ হয়েছে। মিসেস মরিসন শয্যা মধ্যে গরম জলের রবার ব্যাগ ব্যবহারের বন্দোবস্ত করে দিলেন। এই রকম গরম জলের রবার ব্যাগ বিছানার মধ্যে রাখবার সার্থকতা জিজ্ঞাসা করায় তিনি হেসে আমাকে বললেন, “এটা ব্যবহার না করলে আপনার শরীরের উত্তাপটুকু ঐ শীতল বিছানায় হরণ করে নিয়ে আপনাকে হিম করে ফেলবে।” মিসেস্ মরিসন আবশ্যক উপদেশাদি দিয়ে রাত্রির জ্ঞত বিদায় নিলেন। বাস্তবিক ঐ গরম ব্যাগ বিছানার মধ্যে রাখবার জ্ঞত দেখা গেল, বিছানা বেশ গরম হয়েছে। রাত্রিতে বেশ আরামে নিদ্রা গেলাম।

ডাক্তার রবার্ট মরিসনের পরিবারে বর্তমানে তিনটি ছোট ছেলে মাত্র। বড় ছেলে Maxwell—দশ বছরের, মধ্যম Ian—সাত বছরের, ছোটটি Archi—চার বছরের। এরা সকালে হাত মুখ ধুয়েই আমার সঙ্গে গল্প করতে এল, ছোট ছেলে আর্চি পূর্বেই জাহাজে আমাকে জানত। তিন ভাইয়ে মিলে তাদের ঘরের নূতন

নতুন দ্রব্যসম্ভার এনে আমাদের দেখিয়ে গৃহমধ্যে বাজার করে তুলল। তারপর ঘরের বিভিন্ন কামরায় নিয়ে গিয়ে অনেক দেখাল। তাদের একটা ঘড়িতে ঘণ্টা বাজবার সময়ে ঘড়ির যন্ত্র মধ্য থেকে একটা কৃত্রিম কালো কোকিল এসে কুহু কুহু করে যখন ঘড়িতে যতটা বাজে ততটা ডাক দিয়ে আবার ঘড়ির মধ্যে গিয়ে লুকোয়। অত্যন্ত দেওয়ালের খুবরীতে স্থানীয় ছোট একখানি ঘর আছে, তার ছোট্ট দু'টি দরজা—বৃষ্টি হবার পাঁচ-সাত ঘণ্টা আগেই একটী ছাতা মাথায় পুরুষ-পুতুল একটা দরজা হ'তে বার হয়ে আসে। আবার যখন রোদ হবে, তার আগে থেকেও অপর এক দরজা দিয়ে একটা বেশভূষায় সজ্জিত মেয়েপুতুল বাইরে আসে। এ আর কিছুই নয়, একটা ব্যারোমিটার বা বায়ুমান যন্ত্র—কলের সংযোগে এইমত ক্রিয়ালীল আপনা আপনিই হয়। একটা ছোট কপিকল আছে, হ্যাণ্ডেল ঘুরিয়ে ছোট ছোট জিনিসপত্র নীচের তল থেকে চোঁতল পর্য্যন্ত যে কোন তলে দরকার মত তোলাপাড়া করা যায়। বালক তিনটা এইমত আমাদের নানারকম চিত্তাকর্ষক বিষয় দেখিয়ে সকালটা কাটিয়ে দিল।

মিঃ মরিসন এডিনবরায় এসে ডাক্তারী একটা বিশেষ বিভাগের বিষয় অধ্যয়নার্থ কলেজে ভর্তি হয়েছিলেন, আমার আগমন উপলক্ষে এক সপ্তাহের ছুটি নিয়েছেন। প্রথম দিনেই প্রাতর্ভোজনের পর তিনি আমাদের সহরের এক প্রান্তে একটা রমণীয় পাহাড়ের উপর বেড়াতে নিয়ে গেলেন। সেখান থেকে এডিনবরা সহরের সৌন্দর্য্য পরম রমণীয় দেখায়। এডিনবরা সহরটা এতই স্থানীয় যে প্রাচীন গ্রীসের এথেন্স নগরের সঙ্গে এর উপমা দেওয়া হয়—তাই এদেশটি উত্তর এথেন্স (Athens of the North) বলে বহুকাল থেকে কথিত হয়ে আসছে।

সেদিন আকাশ পরিষ্কার ছিল, পাহাড়ের উপর থেকে সহরের বহুদূরের দৃশ্য আমরা দেখতে পেলাম। প্রিন্সেস স্ট্রীট, ইউনিভার্সিটি, ক্যাসেল, আর্টগ্যালারী, স্কট মেমোরিয়াল, অবজার্ভেটরী প্রভৃতি সহরের প্রধান প্রধান দর্শনীয় বিষয়গুলির সঙ্গে দূর থেকেই কিঞ্চিৎ পরিচিত হলাম। তারপর আমরা পাহাড়ের নানাস্থানে ঘুরে Golf খেলা দেখলাম। গল্ফ খেলাটি যে স্কটলণ্ডেই সৃষ্টি হয়ে সারা সভ্যদেশে ছড়িয়ে পড়েছে তার ইতিহাস শুনলাম।

পরে আমরা একটি পাহাড়ের উপর একটি জলাশয়ে ঐ-দেশীয় নানাপ্রকার মৃণাল, শৈবাল ও ক্ষুদ্র মৎস্য কীটাদি দেখলাম। খরগোসের গর্ভ দেখা গেল—এদেশের পাহাড় গুলিতে বহু খরগোস বাস করে, লোকে বন্দুক দিয়ে শিকার করে, কিন্তু এই পাহাড়ের খরগোস ধরবার নিয়ম নাই, এরা পাহাড়ের শোভা বর্দ্ধন করে।

চলতে চলতে আমরা মাঝে মাঝে বিশ্রাম করছিলাম, কিন্তু বেশীক্ষণ বিশ্রাম করিবার উপায় নাই, পাহাড়ের উপর শীতল বাতাসে ভয়ানক শীত ধরে—পরিশ্রমের সঙ্গে হাঁটলে শীতে কষ্ট দিতে পারে না। পাহাড়ে ভ্রমণে অনভ্যস্ততা বশতঃ আমি পরিশ্রম ও শীতে ক্লান্ত হছিলাম বটে কিন্তু এতই আনন্দ পাছিলাম যে, কষ্টকে কষ্ট বলে মনেই হচ্ছিল না।

অনেকটা দেখবার পর আমরা পাহাড়ের নীচে নেমে এসে জমি চাষ করা দেখলাম। কলের লাজল ঘোড়ায় টানছিল—দেখলাম লাজলের ফাল খুব বড়, কোদালের মত চেপ্টা, আর ফালের মাথা থেকে খানিকটা ছেড়ে এসে একটু বাকানো, তার জগ্ন ফালের মাথায় মাটি ফেটে গিয়ে উর্নে পড়ছে। জমিগুলি এক ফুট গভীর খোঁড়া হয়ে উপরের মাটি নিচে আর নীচের মাটি উপরে ওলট

পালট হয়ে যাচ্ছে। ক্রমাগত চার ঘণ্টা ভ্রমণের পর বারটায় আমরা বাড়ীতে ফিরলাম।

এদিন বিকালে আমরা সহরের শ্রেষ্ঠ অংশগুলি দেখলাম। প্রকাণ্ড প্রকাণ্ড বাড়ী পাথরের তৈরী, অতি পরিষ্কার পরিচ্ছন্ন। রাস্তায় কোনখানে একটু আবর্জনা নাই, লোকে কোন পরিত্যক্ত আবর্জনা, ফলের খোসা প্রভৃতি রাস্তায় ফেলে না, ছেঁড়া কাগজটুকু পর্যন্তও না; আবর্জনা ফেলবার পাত্রেই ওসব ফেলে। ট্রামে ব্যবহৃত পরিত্যক্ত টিকিটগুলি ট্রাম পরিত্যাগের সময় ট্রামের গায়ে একটা বাক্সে ফেলে যায়, কখনও রাস্তায় ফেলে রাস্তা আবর্জনা করে না। এতে রাস্তার ঝাড়ুদারের কাজ কমান হ'ল আর টিকিটের কাগজ গুলি ট্রামকোম্পানীর লাভ হ'ল। এডিনবরার লোকগুলি এমনই হিসিয়ার যে মুখের থুথু, কাসি প্রভৃতি পথে ফেলে না, ড্রেনে ফেলে।

এডিনবরা নানাবিধ জ্ঞানচর্চার স্থান, স্ত্রী-পুরুষ সমস্ত লোকেই শিক্ষিত। শিল্প বাণিজ্যে কিন্তু গ্লাসগো সহরের কাছে এই এডিনবরাকে পরাজয় স্বীকার করতে হয়েছে।

কো-অপারেটিভ্ ব্যাঙ্ক


কো-অপারেটিভ্ সোসাইটীর পরিচালিত একটা দোকান দেখে আশ্চর্যান্বিত হলাম। প্রকাণ্ড জিতল বাড়ীতে বিরাট কারবার। গৃহস্থের আবশ্যক সমুদয় দ্রব্য পৃথক পৃথক বিভাগে সাজান রয়েছে। এই রকম খাত, পোষাক, পুস্তক, টেননারী, গৃহস্থালীর আসবাব, খেলনা প্রভৃতি প্রায় পঁচিশ খ্রিশ রকম বিভাগ রয়েছে। এক এক বিভাগে স্ত্রী-পুরুষে তিন চারজন করে কর্মচারী কাজ করছে। শুনলাম, সতর হাজার গৃহস্থ এই কো-অপারেটিভের দোকানের

মেম্বর। এদের প্রত্যেকের টাকাকড়ি এখানকার ব্যাঙ্ক বিভাগে জমা থাকে, তার দ্বারাই এই কারবারটি চলছে, এঁরা অধিকাংশ দ্রব্য এই দোকান থেকে কেনেন। আবশ্যক দ্রব্য এখানে পেলে আর অপর স্থানে খরিদ করেন না। জিনিষ কিনতে নগদ টাকা দিতে হয় না, হিসাবে খরচ লেখা হয়। অপর সাধারণেও এই দোকানে গ্ৰাহ্য দামে জিনিষ কিনতে পারেন, কিন্তু মেম্বরগণ কমিশন পেয়ে থাকেন, সাধারণে তা পান না। এই বিরাট দোকানটিকে প্রত্যেক মেম্বর নিজের দোকান বলে মনে করেন, এর সংস্কেট ব্যাঙ্কটিকে নিজের ধনাগার মনে করেন। সহরের ভিন্ন ভিন্ন স্থানে আবার এর শাখা কার্যালয় ঠিক এই ভাবেই পরিচালিত হচ্ছে। এই কারবারটিতে কো-অপারেটিভ অর্থাৎ সম্মিলিত শক্তির উপযুক্ত ব্যবহার দেখে বড়ই আনন্দ পেলাম।


সন্ধ্যায় আমাদের ফিরবার সময় মিঃ মরিসন আমার নিকট জানতে চাইলেন—ফিরবার দুটি পথ আছে, একটা ঐশ্বর্য্যপূর্ণ আর একটা নিতান্ত গরীবদের বাসভবন পূর্ণ,—এর কোন্ পথে যেতে আমার ইচ্ছা। আমি গরীবদের পথ মনোনীত করায় সেই পথেই ফিরলাম। পথে নানাবিধ পুরানো জিনিষের দোকান, স্ট্রট্‌কী মাছ, কিল্ক, সামুক-গুগলী প্রভৃতির দোকান দেখলাম। গরীব গৃহস্থদের ঘরগুলিও ছোট বা নোংরা নয়, তবে এক কামরায় একাধিক লোককে কষ্টে বাস করতে হয় বলে মিঃ মরিসন দুঃখ প্রকাশ করলেন।

আতিথেয়তা

এইরূপে পর পর তিনটি দিন সকাল বিকাল মিঃ মরিসন আমাকে সঙ্গে নিয়ে এডিনবরার দর্শনীয় স্থানগুলি দেখালেন।



Forth Bridgeএর বিভিন্ন দৃশ্য—স্ট্রল্ড, —১১৩ পৃষ্ঠা



পৃথিবীর মধ্যে জাহাজ প্রস্তুতের সর্বাপেক্ষা বৃহৎ কারখানা

ক্যাসেলের উপর এবং সার ওয়ান্টার স্কটের স্মৃতি-মন্দিরের অত্যুচ্চ চূড়ার উপর নিয়েও সহরের সৌন্দর্য্য দেখাতে ছাড়লেন না।

ধাতুশিল্প সম্বন্ধীয় কারখানা কিছু দেখবার জন্ত মরিসন সাহেবকে বলায় তিনি সহরের এক প্রান্তে একটা পিতলের ঢালাই কারখানায় আমাকে নিয়ে গেলেন। কারখানার অধ্যক্ষ আমাদের সঙ্গে করে আগ্রহের সঙ্গে সমুদয় দেখালেন। আমরা ইলেকট্রিক সম্বন্ধীয় নানাপ্রকার ছোট বড় যন্ত্র পিতল গালিয়ে বালির ছাঁচে প্রস্তুত করতে দেখলাম। সেগুলি পরিষ্কার করবার জন্ত নানাপ্রকার উন্নত যন্ত্রের ব্যবহার দেখে কিঞ্চিৎ অভিজ্ঞতা লাভ করলাম। অধ্যক্ষ মহাশয়ের নিকট জানলাম, গ্লাসগো এবং বার্মিংহাম গেলে ধাতুশিল্প সম্বন্ধীয় বহু বহু আবশ্যক বিষয় জানতে পারব। সেগুলির অনেক ঠিকানা ইণ্ডাস্ট্রিয়াল গাইড বই দেখে এখানে সংগ্রহ করলাম।

আমাকে এই সকল স্থান দেখাবার জন্ত ট্রাম ভাড়া প্রভৃতি সমস্তই মিঃ মরিসন নিজে দিতেন, আমাকে দিতে দিতেন না। সন্ধ্যার পর প্রায় দিনই কোন না কোন সভা সমিতিতে নিয়ে যেতেন; রবিবারে এডিনবরা একেবারে কোলাহলশূন্য, সমস্ত দোকানপাট বন্ধ, খাবারের দোকানটি পর্য্যন্ত বন্ধ থাকে, সমস্ত লোকেই নিয়মিতরূপে গির্জায় যায়। ঐ দিন বাকী সময়টা কেহ ঘরে বসে ধর্ম্মালোচনা করে, কেহ সহরের বাইরে বেড়াতে যায়।

একদিন আমি সহরের বাইরে সাত মাইল দূরে ফার্থ অব্ ফোর্থএর বিখ্যাত পোল দেখে এলাম। পোলটি প্রায় পৌনে দুই মাইল দীর্ঘ। উপর দিয়ে কয়েকটি রেল লাইন গিয়েছে। পোলটি এতই উচ্চ যে, নীচে দিয়ে যে-কোন বড় জাহাজ মাস্তুলদি সহ অনায়াসে যাতায়াত করে। এটি Firth of Forthএর Queensferry

নামক স্থানে অবস্থিত। বিশালায়তন এই পোলটি এবং এর গঠনের গুরুত্ব দেখে আমি চমৎকৃত হ'য়েছিলাম। এডিনবরার নিকটবর্তী লিথ সহর Firth of Forth অর্থাৎ ফোর্থ নদীর মোহনায় অবস্থিত, নদীতীরে বড় বড় ডকগুলি জাহাজে পূর্ণ রয়েছে।

একদিন আমি এডিনবরার ভারতীয় ছাত্রাবাসে গিয়ে তাঁদের সঙ্গে বড়ই আনন্দে কাটলাম। তাঁদের অনেকে লগুনে একজিবিশন দেখতে গিয়েছিলেন, সেই উপলক্ষে আমার সঙ্গে পরিচয় ছিল। এখানকার বিশ্ববিদ্যালয় অতি বিখ্যাত।

আর একদিন মরিসন সাহেবের তিন ছেলেকে সঙ্গে নিয়ে ফোর্থ নদীর মোহনায় বেড়াতে গেলাম। আমরা এডিনবরা ও লিথ সহর অতিক্রম করে ক্রমাগত ফোর্থের তীর দিয়ে ট্রামে বহুদূর গিয়ে সমুদ্র তীরে নামলাম। একটা ছোট জাহাজ মেরামতের ডকের ভিতর গিয়ে তার অনেক কাজকর্ম দেখলাম। ছেলে তিনটি এ-জাহাজ ও-জাহাজ ছোটোছুটি করে বেড়াতে লাগল। একটা লবণ তৈরীর কারখানা দেখলাম। পরে একটা ছোট দোকানে ছেলেদের নিয়ে কিছু খাবার খেয়ে নির্জন সমুদ্র তটে গিয়ে উপস্থিত হলাম। সেখানে গিয়ে আমাদের আনন্দের সীমা রইল না। বড় বড় ঢেউ-গুলি তীরে এসে পাথুরে জমিতে গড়িয়ে পড়ছে। উপরে বিস্তীর্ণ বালির চড়া। ছেলেরা ভিজে বালি ও প্রচুর পাথর-টুকরা পেয়ে অল্প সময় মধ্যে সুন্দর সুন্দর খেলনা, ঘর বাড়ী তৈরী করে তাদের বাল্য-শিক্ষার অদ্ভুত কৌশল দেখিয়ে আমাদের মুগ্ধ করল। নির্জন স্থান, আমিও তাদের সঙ্গে বালক সাজতে লজ্জাবোধ করলাম না। বিলাতে ছেলে-বুড়োয় খেলার প্রচলন আছে। সেই সুপ্রশস্ত ভিজে বালির চড়ার উপর আমরা বালি খুঁড়ে মোটা অক্ষরে কত কথা

লিখে রাখলাম। ছোট ছেলে আর্চি বড় ছরন্ত, সে জুতা, জামা কাদা-মাখা করে তুলল।

এইরূপ নানা আনন্দ ভোগের পর আমরা ১১টার ট্রামে রওনা হয়ে ১২টায় বাড়ী এলাম।

মিঃ মরিসনের আড়ম্বরশূন্য সংসারটিকে আমি সর্বদা প্রীতি মাখা দেখতাম। তিনটি ছোট ছেলে নিয়ে মিসেস মরিসন সর্বদা সংসারের কাজে লিপ্ত থাকতেন। খুব সাদাসিদে পরিষ্কার পরিচ্ছন্ন গৃহ সজ্জা, অতি সাধারণ স্বাস্থ্যকর খাদ্য, সাধারণ পোষাক পরিচ্ছদ, কোন আড়ম্বর নাই, কোন অপচয় নাই, কোন অপব্যয় নাই। একটি ঝি এসে কয়েকটি নির্দিষ্ট কাজ সম্পন্ন করে চলে যায়। বাজার করা, ঘর পরিষ্কার করা ইত্যাদি যে সকল কাজ আমাদের দেশে চাকর দ্বারা না করালে অসম্মানের বলে গণ্য হয়—মিসেস মরিসন সেগুলি নিজ হাতে করেন। আমি তাঁদের অতিথি ছিলাম, আমার প্রতি তাঁদের সর্বদা দৃষ্টি ছিল। গেঞ্জি প্রভৃতি দু'তিন দিন অন্তর কাচা আবশ্যক, মিসেস মরিসন আমার সেগুলি নিজে কেচে পরিষ্কার করে দিতেন। আমার জন্ত কত নূতন রকম খাবার তৈরী করে খাইয়ে স্কটলণ্ডের অতিথিসেবার নিদর্শন দেখাতেন। স্কটলণ্ডের ওটের তৈরী রুটা ও নানাপ্রকার পিষ্টক অতি উপাদেয় খাদ্য; ওট আমাদের দেশের ঘব বা য়ইএর মত একপ্রকার শস্য।

ছেলেদের নৈতিক চরিত্রের প্রতি পিতামাতা সর্বদা যেভাবে দৃষ্টি রাখতেন, সে সকল আমাদের শিখবার বিষয়। ছেলেরা কোন রকম একটু ভুল করলে বা অসভ্যতা করলে, তা মধুর ভাষায় বুঝিয়ে সংশোধন করে দিতে দেখতাম। বিকালে স্থল হতে এসে ছেলেরা আনন্দের সঙ্গে ছুটোছুটি করে ঘর অস্থির করে তুলত—

এতে কিন্তু তাদের পিতামাতা একটুও বাধা দিতেন না। একদিন আমি মিসেস্ মরিসনকে বললাম “আমাদের দেশে ছেলেদের একটু অস্থিরপনা দেখলে বাপ মা বড় তিরস্কার করেন, মারধর করেন; আপনারা এদের দৌরাখ্য নীরবে সহ করেন দেখে আমার বড় আনন্দ হয়।” তিনি বললেন “এদের এই রকম ছোটোছুটি করতে না দিলে এরা মারা পড়ে—অর্থাৎ এদের স্বাস্থ্য নষ্ট হয়।”

একদিন দেখলাম, ছোট ছেলেটি মধ্যমটিকে লাঠি দিয়ে ভয়ানক প্রহার করল, মার খেয়ে ছেলেটি চীৎকার করে কাঁদতেই তাদের মা উপর থেকে এসে বিচারের জ্ঞাত দু’জনকেই উপরে নিয়ে গেলেন। পরে এক সময় আমি মিসেস্ মরিসনকে জিজ্ঞাসা করলাম “বিচারে আদালত কি শাস্তি দিলেন?” তিনি হেসে বললেন “আর্চিকে বললাম—শনিবারে তোমাকে যে পেনিটি দেওয়া হয়, পুনরায় এমন অজ্ঞায় করলে আর তা দেওয়া হবে না।” কি সুন্দর শাস্তির ব্যবস্থা! শুধু এইটুকু শাস্তির লজ্জা পেয়েই ছেলেটির মুখ শুকিয়ে গিয়েছিল।

তিনটি ছেলেকে আমি কিছু উপহার (Present) দেবার জ্ঞাত একদিন মিসেস্ মরিসনের কাছে অনুমতি চাইতেই তিনি বললেন “এমন সামান্য কিছু দিবেন, যেন তারা কোন দামী জিনিষের প্রলোভনে না পড়ে; আর সচরাচর যেন তেমন জিনিষ দিতে আমাদের সাধ্য হয়।” এই রূপে ছেলেদের বিলাস-বর্জন শিক্ষা দিবার জ্ঞাতও বাপ-মায়ের কত সতর্কতা।

এই পরিবারে আমি নিত্য নূতন আনন্দ ভোগ করতাম। অতিথির আনন্দ বর্ধনের জ্ঞাত এদের নানারূপ ব্যবস্থা দেখেছি। আমি স্কটল্যান্ডের আতিথেয়তার কথা কখনও ভুলতে পারব না।

দুই সপ্তাহকাল এখানে এরূপ আনন্দে কাটিয়ে আমি গ্লাসগো রওনা হলাম। মিঃ মরিসন আমাকে ষ্টেসনে পৌঁছে দিয়ে বিদায় নিলেন।

গ্লাসগো সহর

এডিনবরা থেকে সকালে ৮ টার এক্সপ্রেস ট্রেনে আমি গ্লাসগো রওনা হ'লাম। গুনলাম, এডিনবরায় যেমন পরিষ্কার শুকনো হওয়ায় কাটিয়ে গেলাম, গ্লাসগোতে তেমন হবে না—সেখানে অনবরত ঝিমঝিমে বৃষ্টিতে খুব বিরক্তি বোধ হবে। শুনে খুবই আশ্চর্য্য বোধ হল যে, মাত্র তিন ঘণ্টা রেল পথের পারেই এত পরিবর্তন!

ট্রেন চলবার খানিকটা পরে এডিনবরা সহরের সীমা অতিক্রম করেই দু'ধারে ছোট ছোট পাহাড়ের শ্রেণীর মাঝ দিয়ে ট্রেন চলল। তারপর ক্রমে কুয়াসা দেখা দিল। গাড়ীর দু'ধারই খুব বড় বড় পুরু কাঁচের আবরণে ঢাকা, সেই কাঁচের বেড়ার ভিতর দিক কুয়াসায় আচ্ছন্ন হয়ে কাঁচের স্বচ্ছতা নষ্ট করে একেবারে ঘোলা করে দিল; বাইরের দিকে কিন্তু বেশী কুয়াসা লেগে জল হয়ে ঝরছিল। আমি মাঝে মাঝে কাঁচের খানিকটা জায়গা রুমালে মুছে স্বচ্ছ করে নিয়ে বাইরের দৃশ্য দেখছিলাম। কুয়াসায় বেশী কিছু দেখা গেল না, তবু নিকটের পাহাড়গুলির বিভিন্ন দৃশ্য দেখে খুবই নতনত্ব উপভোগ করছিলাম।

ট্রেন মাত্র তিন চারটা ষ্টেসনে থ'রে, বেলা ১১টায় গ্লাসগো সহরের মাঝখানে সেন্ট্রাল ষ্টেসন নামক বিরাট ষ্টেসনটিতে পৌঁছল। ষ্টেসনের বাইরে গিয়ে দেখি—ঝিম ঝিমে বৃষ্টি; তার মধ্যেই রাস্তায় জনতার

অবিরাম গতি। ট্রাম ও বাসের বিচ্ছেদ-শূন্য পর পর গতির মধ্যে রাস্তা পার হওয়াই দুষ্কর। সহরের আয়তন কিরূপ, কোন দিকে কি দেখবার আছে, সহরের কোনখানে এসে পড়েছি, কোথায় গিয়ে বাসা নেব, কিছুই ঠিক নাই। তারপর এক নতুন বুদ্ধি ক'রলাম, বুকষ্টলে গিয়ে গ্লাসগো সহরের একখানা মানচিত্র কিনলাম। মানচিত্রে দেখলাম, এই সেন্ট্রাল ষ্টেশনটি সহরের কেন্দ্রস্থানেই বটে। পথ-ঘাট বোঝবার আর ভাবনা রইল না। একটি পুলিশের কাছে সন্ধান নিয়ে একটি হোটেলে গিয়ে উঠলাম। হোটেল ওয়ালা নিজের হোটেলে স্থানাভাবের জন্ত আমাকে পৃথক একটি হোটেলের ঠিকানা ছাপান একখানি কার্ড দিয়ে সেখানে যেতে পরামর্শ দিল। কার্ডের লিখিত হোটেলে গিয়ে উঠলাম; দেখলাম, মাত্র ৫১৭ জন লোক ভদ্রভাবে থাকবার যোগ্য ছোট হোটেলটি। হোটেলের কর্ত্রী একষ্ট্রী বুদ্ধা, নাম মিস্ ম্যাকলেড্। তিনি আমাকে অভ্যর্থনা করে একটি পরিচারিকা মেয়েকে আমার তত্ত্বাবধানের ভার দিলেন।

রাজধানী এবং উচ্চশিক্ষা সম্বন্ধীয় স্থান হিসাবে স্কটলণ্ডে এডিনবরা সহরের খুব খ্যাতি থাকলেও এই গ্লাসগো সহরটি স্কটলণ্ডের সর্বাপেক্ষা সমৃদ্ধিসম্পন্ন সহর। শিল্পে, বাণিজ্যে, বিশেষতঃ জাহাজ নির্মাণের বহু ডকের জন্ত গ্লাসগো খুবই বিখ্যাত। আমি এক সপ্তাহ কাল এখানে থেকে এই সকল বিষয় দেখার মনন করে প্রথম দিনই গ্লাসগোর বিখ্যাত আর্ট গ্যালারীটি দেখলাম। সহরের ঘন সন্নিবদ্ধ স্থানের বাইরে উন্মুক্ত প্রান্তরের উপর সুরম্য বৃহদায়তন অট্টালিকায় এই আর্ট গ্যালারী। এটি শুধু আর্ট গ্যালারী নয়—মিউজিয়ামও বটে। জগতের অভিনব দৃশ্যাবলী দেখবার পক্ষে এত বড় সংগ্রহ লগুনের কোন মিউজিয়ামেও দেখি নাই। গ্রীস ও ইতালীর বিখ্যাত ভাস্কর-শিল্প

এবং বিখ্যাত চিত্র-শিল্পগুলির অবিকল অঙ্কন করণ করে এই স্থানে রক্ষিত হয়েছে। আমাদের বাংলাদেশের কৃষ্ণনগরের প্রস্তুত বাংলার বহু দৃশ্য-বলী একস্থানে সজ্জিত দেখে বড়ই আনন্দ পেলাম। বাংলার বহু প্রকারের মৎসের মডেলগুলি এখানে খুবই চিত্তাকর্ষক দৃশ্য হয়ে রয়েছে। জাহাজ প্রস্তুতের সমৃদ্ধ ব্যাপার আরম্ভ থেকে শেষ পর্যন্ত নানাপ্রকার মডেল ও ফটোর ছবি দ্বারা সুন্দররূপে বোঝান হয়েছে।

পর দিনে লোহার ও ইস্পাতের পাত, করোগেট চাদর প্রস্তুতের একটি কারখানা দেখতে গেলাম। সহরের উত্তর প্রান্তে খুব বড় কয়েকটি কারখানা আছে, তার মধ্যে সব চেয়ে বড়টিতে গিয়ে কারখানার কাজকর্ম দেখবার জন্যে ম্যানেজার সাহেবকে জানালাম। তিনি একটু ইতস্ততঃ করে বললেন—“আপনারা ভারতীয় লোক, আমাদের কাজকর্ম দেখে শিখে যাবেন এতে আপনাদের লাভ, আমাদের ক্ষতি; আপনিই বুঝুন, আমরা কেমন করে এ সব আপনাদের দেখাতে পারি?” আমি বললাম “এই যে আপনাদের দেশে ব্রিটিশ এম্পায়ার একজিভিশনটি হয়েছে—পৃথিবীর বহু দেশের শিল্প কৌশল সেখানে দেখাবার ব্যবস্থা করেছেন, ঐ ব্যবস্থাটাকে তবে আমরা কি বলব যে, আপনারা অগ্রায় কার্য করছেন?”—বলেই আমি ব্রিটিশ এম্পায়ার একজিভিশনের আমার ষ্টাফ পাশখানা দেখালাম এবং বললাম “আমি সেখানকার কার্য পরিচালন সম্বন্ধীয় একজন এবং সেখানে আমার একটি ষ্টলও ছিল।” তখন ম্যানেজার সাহেব আমার প্রতি একটু বিশেষ শ্রদ্ধার ভাব দেখালেন এবং একজন সুদক্ষ শিল্পীকে ডাকিয়ে এনে তাকে আমার সঙ্গে দিয়ে সমগ্র কারখানাটির কার্যপ্রণালী দেখাবার ব্যবস্থা করে দিলেন। প্রথমে লোহা ও ইস্পাত আগুনে গালান ও ঢালাই দেখলাম; তারপর রোলিং মেশিনের মধ্যে পিষিয়ে পাত প্রস্তুত। তার প্রত্যেক কার্যই এক একটি

বিরাট ব্যাপার। প্রায় দুইঘণ্টা সময় মধ্যে সমস্ত কারখানাটির কাজকর্ম দেখা শেষ করে বাসায় ফিরলাম। ফিরবার পথে বিস্তীর্ণ ঢালু পাহাড়ের গায়ে সমাধিক্ষেত্র (cemetery) দেখলাম। পাহাড়ের উপরে গিয়ে দু'একটি সমাধি-প্রস্তরের, দু'একটি মর্ম্মর মূর্তির শিল্পনৈপুণ্য দেখে অনেকটা সময় কাটান গেল। রমণীয় স্থান—রমণীয় কীর্তি।

পরদিন গ্লাসগোর ডক সমূহ এবং খুব বড় দুইটি জাহাজ প্রস্তুতের কারখানার কাজ দেখলাম। এক একটি কারখানায় চার পাঁচ হাজার লোকে কাজ করে এবং একখানি জাহাজ তৈরী আরম্ভ ক'রে প্রায় ছয় মাস মধ্যে শেষ করে। এক একটি কারখানা বাড়ীর লোকজন এবং দ্রব্যসামগ্রী দেখে এক একটি ছোট খাটো পৃথক সহর বলে মনে হয়।

হোটেলওয়ালী

আমার থাকবার হোটেলটিতে কোন অসুবিধাই ছিল না, তবে কেবলমাত্র ঘরের ভাড়া আর সকালের জল খাবারের জন্তই গৃহকর্ত্রীকে দৈনিক সাত শিলিং প্রায় (পাঁচ টাকা) দিতে হত। কিন্তু আমি অপেক্ষাকৃত কম ভাড়ায় স্থান পাবার জন্ত অল্প হোটেলেরে যাওয়া মনস্থ করে হোটেলের কর্ত্রী মিস্ ম্যাক্লয়েডকে জানালাম যে, আমি কালই চলে যেতে চাই। তিনি বললেন কেন “মিষ্টার নন্দী, আপনি ত গ্লাসগোতে আরও বেশী দিন থাকবেন বলেছিলেন?” আমি বললাম “ঘর ভাড়া এত বেশী দিয়ে উঠতে পারছি না।” তিনি আমাকে বললেন “আপনার কাছ থেকে আমি ঘরভাড়া চাই না, আপনি যে কয়দিন থাকবেন অমনিই থাকুন।” আমি বললাম “যাতে আপনার ক্ষতি না হয় এমন কিছু সামান্য নিলেই আমি খুসী হই।” তারপর

তিনি বললেন “আমার আপনার জন্ম দৈনিক তিন শিলিং মাত্র খরচ হয়, আপনি তবে তাই দিবেন।” আমি সন্তুষ্টচিত্তে স্বীকার করলাম।

মিস্ ম্যাকলয়েড একজন ধর্মপ্রাণ বিদুষী মহিলা। খৃষ্টান সমাজে শনিবার-বাদী (সেভেন্থ ডে ম্যাডভান্টিষ্ট্‌স্) বলে এক সম্প্রদায় আছে, ইনি সেই সম্প্রদায়ের লোক।

তিনি মাঝে মাঝে আমাকে খৃষ্টীয় বিশ্রাম-বার হিসাবে রবিবারের পরিবর্তে শনিবার পালনের মাহাত্ম্য বোঝাতে বিশেষ চেষ্টা করতেন। তাঁর রবিবার শনিবারের পার্থক্যকে আমি মনে স্থান দিতাম না বটে, কিন্তু তাঁর ধর্মালোচনার প্রতি ঐকান্তিকতা দেখে তাঁকে শ্রদ্ধা করতাম। মাঝে মাঝে তিনি আমাকে তাঁদের ধর্মসভায় নিয়ে যেতেন, দেখতাম, তিনি ঐ সম্প্রদায়ের একজন বিশেষ লোক। একদিন একজন চিন্তাশীল রেভারেণ্ডকে (পাদ্রী) নিমন্ত্রণ করে এনে আমার সঙ্গে আলাপ পরিচয় করবার বন্দোবস্ত করলেন। সেদিন আমরা দু’জনই নিমন্ত্রিত অতিথি হয়েছিলাম। রেভারেণ্ড মহাশয়ের সহিত আলাপ পরিচয়ে তাঁর গভীর ধর্মসাধনার পরিচয় পেলাম বটে, কিন্তু উপসংহারে সেই শনিবার—শনিবার। যা’হোক স্কটলণ্ডের একটা ক্ষুদ্র হোটেলে বাসের মধ্য দিয়ে এই রকমের উপভোগ ভালই লেগেছিল। একটা হোটেলওয়ালীর মধ্যে এতখানি উচ্চ অন্তঃকরণের পরিচয় পেয়ে আমি দেশবাসীকে অন্তরে ধন্যবাদ দিয়েছিলাম।

হোটেলের পরিচারিকাটিও উৎকৃষ্ট কর্মীর সংসর্গে থেকে হোটেলে বাসকারীদের ভগিনী স্থানীয় বলে গণ্য হবার অধিকার লাভ করেছে। আমার স্রুবিধা অস্রুবিধাগুলির উপর তার এমনই দৃষ্টি দেখেছি যে, তা যেন হোটেলের নিয়ামাহুযায়ী লোকসেবার উপরও বেশী কিছু; তার মধ্যে যেন ভক্তি ভালবাসা প্রীতি ফুটে উঠতো।

গ্রাসগোর বিবরণ

গ্রাসগোতে আমি সাত দিন মাত্র ছিলাম। এই সময় মধ্যে তথাকার প্রধান প্রধান দর্শনযোগ্য স্থানগুলি দেখলাম। ক্লাইড্-নদীর উভয় তীরে গ্রাসগো সহর। নদীতে কোনখানে পোল, কোনখানে স্কেল, কোনখানে ফেরী জাহাজে পারাপারের ব্যবস্থা। এই সকল পথেই লোকজন, গাড়ী ঘোড়া প্রভৃতি অনায়াসে যাতায়াত করে। ফেরী জাহাজে গাড়ী ঘোড়া পারাপারের কোন অসুবিধাই নাই। সহরের একপ্রান্তে একটি পর্বতাকার উচ্চভূমিকে গ্রাসগো সহরের অন্তর্ভুক্ত করে নেওয়া হচ্ছে। তার উপর দিয়ে রাস্তা পথ প্রভৃতি পত্তন আরম্ভ হয়েছে দেখলাম। সেই পাহাড়ে জমির উপর এমন প্রবল বাতাস যে দু'বার আমাকে আমার মাথার টুপি়র পিছু পিছু দৌড়াতে হয়েছিল। যেমন বাতাস তেমনি আবার কনকনে শীত। গ্রাসগো সহর খুবই অসমতল পাহাড়ে জমির উপর স্থাপিত। একটি আশ্চর্য ক্যানেল বা খাল দেখা গেল, কোনখানে জমির-গভীর নীচে দিয়ে, কোনখানে সমতল ক্ষেত্র দিয়ে, কোনখানে ঘর বাড়ীর নীচে দিয়ে, কোনখানে বা ঘরবাড়ীর উপর দিয়ে গিয়েছে। এই খালের ভিতর দিয়ে কয়লা, বালী, কাঠ, ইট, পাথর প্রভৃতি জিনিষ বোঝাই করা সড় গঠনের এক প্রকার নৌকা যাতায়াত করে।

ভারতীয় কতকগুলি রেশমী কাপড়ের ফেরীওয়ালারা গ্রাসগোর একটা বাড়ীতে অবস্থান করে, তারা ভারতের গুজরাট ও সিন্ধু প্রদেশের লোক। আমি একদিন তাদের কাজকর্ম দেখতে তাদের বাসায় গিয়েছিলাম। তারা ইংরাজী ভাষায় কোন প্রকারে কথা

ব্যক্ত করে বটে কিন্তু বিশেষ লেখা পড়া জানে না। দেখলাম, তারা ভারতীয় জিনিষ বলে নকল জার্মানী রেশমের কাপড় ফেরী করে; ঐ সকল জিনিষ তারা জার্মানী থেকে নিজেরাই আনে। একই স্কটলণ্ডের মধ্যে গ্লাসগো এবং এডিনবরা সহর দুইটির মধ্যে কে ছোট কে বড় এই নিয়ে পরস্পরের মধ্যে বেশ একটু দ্বন্দ্ব আছে। এডিনবরা বলেন, তিনি জ্ঞানে বড়; গ্লাসগো বলেন, তিনি ঐশ্বর্য ও শক্তিতে বড়—লক্ষ্মী সরস্বতীর এই বিবাদ সারা জগতেই আছে। ইংলণ্ডের চেয়ে স্কটলণ্ডের লোকগুলি বেশী বলিষ্ঠ ও কর্মঠ।

গ্লাসগোতে তিনটি থিয়েটার হলের অভিনয় দেখলাম। মেয়েদের নাচ অতি আশ্চর্য। অধিকাংশ অভিনয়ের মধ্যেই নারী ও পুরুষের শারীরিক বলের যথেষ্ট পরিচয় পাওয়া গেল। অধিকাংশ অভিনয়েই সার্কাস ধরণের ব্যায়াম কৌশল এবং ম্যাজিক বা যাদুবিদ্যা সম্বন্ধীয় কৌশল দ্বারা দর্শকগণকে চমৎকৃত করা হয়।

এই ডিসেম্বর সকালে একটি ঢালাই পিতলের কারখানা দেখতে গেলাম। দেখলাম, সেখানে Wireless (বেতার-বার্তা যন্ত্র) সম্বন্ধীয় দ্রব্যাদি প্রস্তুত হচ্ছে। সেখানকার ম্যানেজার সমস্ত রাজকর্ম যন্ত্রের সহিত আমাকে দেখালেন। তাঁর কাছে জানালাম যে, বার্মিংহামে গেলে এ সম্বন্ধে আরও বেশী রকম যন্ত্রপাতি প্রস্তুত দেখতে পাব। গ্লাসগো সহরে লোহা এবং ষ্টিলের কাজই বেশী। আমি ষ্টিলের পাত তৈরী দেখবার জন্ত কয়েকটি বড় বড় ফ্যাক্টরীর ঠিকানা এখানকার ম্যানেজারের কাছ থেকে নিলাম। ফিরবার পথে আর একটা Canal বা খাল দেখলাম। এটিকে একেবারে বরাবর সহরের উপর দিয়ে নেওয়া হয়েছে। সহরের বাড়ী, ঘর, রেল, ট্রাম প্রভৃতি সবই এই খালের নীচে পড়ে রয়েছে। গ্লাসগো

খুব পাহাড়ে' উঁচু-নীচু স্থানময় সहर। এ জন্ত খালটিকে সমতল জমির অভাবে একেবারে সহরের উপর দিয়ে নেওয়া হয়েছে।

৬ই ডিসেম্বর সারাদিন সहर দেখলাম। গ্লাসগো সহরের মাঝখান দিয়ে ক্লাইড্ (Clyde) নদী গিয়েছে। দু'ধারে সহরের জমকালো শোভা; যতদূর যাই ক্রমেই দেখবার আকাজ্জা বাড়ে। নদীর উপর দিয়ে তিনটা পোল গিয়েছে, কিন্তু সমুদ্র থেকে সহরের যে পর্য্যন্ত জাহাজ এসে থাকে, সে পর্য্যন্ত নদীর উপর কোন পোল করা হয় নাই। নদীর এপার ওপার দিয়ে কয়েকটা সুড়ঙ্গ করা হয়েছে। লোকজন, ঘোড়ার গাড়ী, মোটর গাড়ী সমস্ত Liftএ করে নীচের সুড়ঙ্গপথে নামান হয়। সেখান থেকে নদীর নীচে দিয়ে পার হয়ে অপর পারে গিয়ে Liftএর সাহায্যে উপরে উঠে। খানিকদূরে একটা থেয়াঘাট দেখলাম, সেখানে জাহাজের উপর করে লোকজন, গাড়ীঘোড়া পারাপার হচ্ছে। এর সমস্ত কাজই ইঞ্জিনের সাহায্যে হয়। লণ্ডনের মত গ্লাসগো সহরেও Underground Railway অর্থাৎ মাটির নীচে চোঙ্গের ভিতরের রাস্তা দিয়ে ট্রেনে লোকজন সহরের নানাস্থানে যাতায়াত করে।

৭ই ডিসেম্বর—আজ রবিবার। স্কটলণ্ডের লোকজন রবিবারে সংসারের কাজ মোটেই করে না। দু'বেলা গির্জায় যায়, কেউ বা সহরের বাইরে ভ্রমণে বের হয়। আমি সারাদিন একটা লাইব্রেরীতে বসে গ্লাসগো সম্বন্ধে আমার অনেক জ্ঞাতব্য বিষয় পড়লাম। সন্ধ্যার পর হোটেলের কর্মী Miss Macleodএর অনুরোধে তাঁর সঙ্গে একটা গির্জায় গিয়ে উপাসনাদি দেখা গেল। এরপর আরও তিনটি পর্য্যন্ত গ্লাসগো সহরের নানা দ্রষ্টব্য বিষয় দেখলাম।

গ্লাসগোতে জানা গেল—তাঁত, চরকা প্রভৃতি গৃহশিল্প দেখতে

হলে আয়লণ্ডের পল্লীগ্রাম দেখা দরকার। তাই আমি আয়লণ্ডের শিল্পপ্রধান সর্বশ্রেষ্ঠ বন্দর বেলফাষ্ট যাবার জন্ত প্রস্তুত হলাম। যাবার সময় মিস্ ম্যাকলয়েড্ আমাকে বেলফাটে থাকবার জন্ত তাঁর এক মহিলা বন্ধুকে অনুরোধ করে পত্র দিয়ে জানালেন, যেন আমার জন্ত তিনি স্থানের ব্যবস্থা এবং আবশ্যক সাহায্যাদি করেন। বিদায় নেবার সময় মিস্ ম্যাকলয়েডের মুখে যে ব্যাকুলতা দেখলাম, কি ভাবে আমাকে বিদেশে সাবধানে চলতে হবে, সে সম্বন্ধে যে ভাবে পরামর্শাদি দিলেন, তার মধ্যে তাঁর হৃদয়ের মাতৃহৃৎ ফুটে উঠেছিল। গ্রাসগোর প্রসঙ্গে একটা হোটেলওয়ালীকে আমি এত উচ্চ স্থান দিলাম, আশা করি আমার প্রিয় পাঠকপাঠিকাগণ এর কোন কৈফিয়ৎ নেবেন না।

১০ই ডিসেম্বর রাত্রি ৮টায় আমি গ্রাসগো থেকে জাহাজে বেলফাটে রওনা হ'লাম। Miss Macleodএর মধুর স্নেহের স্মৃতি আমার হৃদয়ে গভীরভাবে অঙ্কিত রইল।

রাত্রি ৯টায় বেলফাষ্টের জন্ত জাহাজ ছাড়ল। অগ্রশস্ত Clyde নদীর মধ্য দিয়ে অতি ধীরে ধীরে জাহাজ চলল। তীরে দু'ধারে বৈদ্যুতিক আলোকের প্রখর জ্যোতিতে সহরের দৃশ্য অতি মনোরম দেখাচ্ছিল। Clyde নদীর মোহানা পর্য্যন্ত প্রায় তিন মাইল পথ নদীর দু'ধারে কেবল জাহাজ প্রস্তুতের কারখানায় পূর্ণ। বাইরে খুবই ঠাণ্ডা, তথাপি নদীর মোহনা পর্য্যন্ত আমি বাইরে থেকে জাহাজ প্রস্তুতের কারখানাগুলি দেখলাম; পরে ভিতরে গিয়ে যাত্রীদের সঙ্গে আলাপাদি আরম্ভ করলাম। আমরা তৃতীয় শ্রেণীর যাত্রী হলেও জাহাজে আমাদের কোন অসুবিধা হয় নি। একটি বর্ষীয়সী মেয়ে নানারকম আমোদজনক গল্প করে আমাদের যাত্রীমহল বেশ আনন্দময় রাখছিল। বিছানায় শুয়ে গল্প শুনতে শুনতে রাত্রি ১টার পর ঘুমিয়ে পড়লাম।

সপ্তম অধ্যায়

[আয়লণ্ড]

বেলফাষ্ট

১১ই ডিসেম্বর ভোর ৭টায় আয়লণ্ডের উত্তর প্রান্তবর্তী বেলফাষ্ট সহরে এসে জাহাজ ভিড়ল। চারিদিক একেবারে কুয়াসায় ঢাকা ছিল; ৮টায় ফর্শা হল। আমি জাহাজ থেকে নেমে ট্রামে করে Miss Macleodএর বন্ধুর বাসায় উপস্থিত হ'লাম।

বেলফাষ্ট অঞ্চলটা আয়লণ্ডের গৃহশিল্পের দেশ। বিশেষতঃ শূতা প্রস্তুত ও তাঁতের কাপড় বোনার জন্য এ দেশের বিশেষ খ্যাতি আছে। সকালে পৌছেই এ সম্বন্ধে কিছু খবর নিলাম। জানলাম, সহরে কলের কাজই বেশী, পল্লীতে মেয়েরা অনেক রকম হাতের কাজ করে।

এ দিন প্রথমে আমি এখানকার শগের তৈরী তোয়ালে প্রভৃতি বোনার মিল দেখতে গেলাম। এই সম্বন্ধীয় কাজে এটাই নাকি পৃথিবীর মধ্যে সব চেয়ে বড় মিল। সহজেই কারখানার মধ্যে প্রবেশের অনুমতি পেলাম। এখানকার আফিসের ভিজিটর-বুকে আমেরিকা, জাপান, অষ্ট্রেলিয়া, নিউজিল্যান্ড প্রভৃতি জগতের সর্বস্থানের ভিজিটরদের স্বাক্ষর রয়েছে দেখলাম। একটা ভারতীয় নামও দেখা গেল, কিন্তু কোন বাঙ্গালীর নাম পেলাম না। এখানে বাঙ্গালী ভিজিটর বোধ হয় আমিই প্রথম। ম্যানেজার একটা

লোককে আমার সঙ্গে দিলেন। ভিতরে গিয়ে দেখলাম, বহু স্ত্রী-পুরুষ কলে কাজ করছে; শণ জিনিষটা তুলা ও পাটের মাঝামাঝি রকমের খুব শক্ত জিনিস। উহা আমাদের দেশে জেলেদের জাল প্রস্তুতে যথেষ্ট ব্যবহৃত হয়।

এখানে কার্যকারীদের মধ্যে মেয়েরা সপ্তাহে ১৫ টাকা থেকে ৫০ টাকা এবং পুরুষেরা সপ্তাহে ২০ টাকা থেকে ৩০ টাকা পর্যন্ত বেতন পায়। প্রত্যেক লোকেরই পোষাক বেশ পরিচ্ছন্ন। আমাদের দেশে কলের কাজের লোকের হৃদ্বশা অতি ভয়ানক; কিন্তু এখানে এদের অবস্থা দেখে সাধারণ লোকের চেয়ে বিশেষ নিম্নশ্রেণীর মনে করতে পারা যায় না। বস্তুতঃ এদেশে কাজের ছোট-বড়র মান-অপমান বিশেষ নাই; সবাই পরিষ্কার পরিচ্ছন্ন ভাবে খুবই দ্রুত গতিতে কাজ করছে। পরিশ্রমের কাজ আর অপরিষ্কার জিনিস পরিষ্কার করার কাজ পুরুষেরা করে; মেয়েরা সহজ পরিশ্রমে নৈপুণ্যের কাজগুলি করে। পনের বৎসরের কম বয়সের লোক এদেশে কাজ করে না। মেয়ে হোক, পুরুষ হোক, পূর্ণ চৌদ্দ বৎসর বয়স অর্থাৎ পনের বছরে পা দেওয়া পর্যন্ত দেশের নিয়মানুসারে সকলকেই স্কুলে পড়তে হয়; এর পর আপন আপন কাজে যোগ দেয়। এই সমস্ত কারখানার কাজকর্ম অতি সহজ; এ জন্য বহু সংখ্যক দরিদ্র ছাত্রছাত্রী স্কুল ছাড়বার পরই এই সব কারখানায় যোগ দেয়। সুদক্ষ মেয়েরা এখানে Embroidery অর্থাৎ কাপড়ের উপর নুতন দিয়ে লতা-ফুল কাটা প্রভৃতি কাজ করে। এদের বেতন সপ্তাহে চল্লিশ পঞ্চাশ টাকা।

স্থানভেদে আর্থিক মহিলা বিভাগ

১২ই ডিসেম্বর সকালে আমি এখানকার Salvation Armyর মহিলা বিভাগের শিল্পাশ্রম দেখতে মনস্থ করে সহরস্থ এদের আপিসে আবেদন জানালাম। এই আপিসটি হতে মহিলাদের আশ্রম দুই মাইল দূরে। আপিসের ম্যানেজার আমাকে একখানি Introduction letter দিলেন এবং মহিলা বিভাগের তত্ত্বাবধায়িকাকে টেলিফোন করে জানালেন যে, কলকাতার মাতৃমন্দির নামক মেয়েদের মাসিক-পত্রিকার সম্পাদক আমাদের মহিলা বিভাগ পরিদর্শন করতে যাচ্ছেন। ট্রাম গাড়ীতে আধ ঘণ্টার মধ্যে সেখানে পৌছলাম, সেখানকার মহিলা-সুপারিন্টেন্ডেন্ট আমাকে যে ভাবে সম্মানের সাহিত্য অভ্যর্থনা করলেন, আমি অতটা আশা করি নাই। একটু বিশ্রাম ও আলাপাতির পর তিনি নিজেকে একে একে প্রত্যেক ঘরে আমাকে সঙ্গে নিয়ে কোন্ ঘরে কি কি কাজ হয় তা' সব দেখালেন। অতি পরিষ্কার পরিচ্ছন্ন ঘরগুলি, শীতের দেশ তাই প্রত্যেক ঘরেই গরম ষ্টীমের চোঙ্গ ফিট করা।

প্রথমেই আমি সন্তান-পালন শিক্ষার ঘর দেখতে গেলাম। বিলাতে সন্তান প্রসব বেশীর ভাগই হাসপাতালে বা এই শ্রেণীর আশ্রমে হয়ে থাকে। দেখলাম, সন্তপ্রসূত থেকে এক বছরের পর্য্যন্ত অনুমান ত্রিশটি সন্তান পৃথক পৃথক পালকে রয়েছে—প্রসূতি কেহই এ ঘরে নাই। দু'টি মাত্র জীলোক এই সন্তানগুলির তত্ত্বাবধান করছে। সবগুলি শিশুই সুস্থকায়—বেশ আনন্দে হাত পা নেড়ে খেলা করছে। এদের মায়েরা পৃথক স্থানে কার্যে নিযুক্ত আছে।

তারপর মহিলা-সুপারিন্টেন্ডেন্ট আমাকে আশ্রমের রন্ধনশালায় নিয়ে সেখানকার রন্ধনপ্রণালীর বিশেষত্ব দেখালেন। এই রন্ধন-শালাটি

কেবলমাত্র আহারের ব্যবস্থার জ্ঞান নয়, এখানে রন্ধন বিদ্যা শিক্ষা দিবার ব্যবস্থাও অনেক প্রকার আছে দেখা গেল। বিলাতের রন্ধন-কার্য্য গ্যাসস্টোভে সম্পন্ন হয়, এজ্ঞান রান্নায় পরিমাণ মত উত্তাপ ব্যবহারের চমৎকার ব্যবস্থা রয়েছে। রন্ধনশালার পরিষ্কার পরিচ্ছন্নতা দেখে আমি তাঁদের প্রশংসা করতে লেডি সুপারিন্টেণ্ডেন্ট বললেন—“পরিষ্কার পরিচ্ছন্নতার সঙ্গে সম্পন্ন করাই রন্ধন কার্য্যের প্রধান গুণ। এ সব এখানে শিক্ষা দেওয়া হয়।” বিলাতের রন্ধনকার্য্যে বাটনা বাটার বালাই নাই; বাল, হলুদ, মসলা এসব বিশেষ কিছু ব্যবহার হয় না। হাত দিয়ে কোন জিনিষ ধরবার আবশ্যক হয় না—বিভিন্ন রকমের হাতা, চামচ প্রভৃতির সাহায্যে সব কাজ হয়; এজ্ঞান রন্ধনকালে হাত পরিষ্কার পরিচ্ছন্ন থাকে।

কাপড় ধোয়ার ঘরে গিয়ে দেখলাম, দু'টী মেয়ে কাপড় ধোলাই করছে। এই আশ্রমের ছোট বড় সব কাজই আশ্রমের মেয়েরা করে। কাপড় ধোলাই শিক্ষা করা বিলাতের মেয়েদের খুব বড় একটা শিক্ষার বিষয়। এই বিদ্যা মেয়েদের শেখাবার জ্ঞান নানারকম ব্যবস্থা আছে। সংধারণ বা গরীব গৃহস্থেরা যে প্রণালীতে আপন আপন ঘরে কাপড় ধোয় সেইমত ব্যবস্থাই এখানে রয়েছে। একটা পাত্রে কয়েক ঘণ্টা পূর্বে সাবানযুক্ত গরম জলে কাপড় ভিজিয়ে রেখে, পরে একটা হ্যাণ্ডেল ঘুরালে সেই জল ও কাপড় পূর্ণ পাত্রটী এমন ভাবে ঘুরতে থাকে, যাতে পাত্রের ভিতরের কাপড়গুলি জলের সঙ্গে ওলট পালট হতে থাকে। পাঁচ সাত মিনিট এইমত ঘুরালেই কাপড়ের ময়লা ছেড়ে যায়, পরে বড় রকমের চিমটা দিয়ে অল্প পরিষ্কার জলপূর্ণ পাত্রে তুলে ধুয়ে লয়। কাপড়ের জল নিংড়াবার জ্ঞান কাঠের রোলার আছে, তার মধ্যে কাপড়ের এক প্রান্ত দিয়ে হাতল ঘুরালে আপনা আপনিই সমস্ত কাপড় ঐ

রোলারের মধ্য দিয়ে পিষে গিয়ে সমস্ত জল নিংড়িয়ে ফেলে। বিলাতে প্রায় সর্বদাই ঝিমি ঝিমি বর্ষা হয়, রোদ কচিং দেখা যায়; কাপড় শুকাবার বড় অসুবিধা হলেও অসুবিধা বলতে কোন কিছু এরা রাখে নাই—কাপড় শুকনা করবার জন্ত একটা খুব ছোট গরম ঘর আছে। লোহার নলের ভিতর দিয়ে গরম ষ্টিম প্রবাহিত হয়ে ঐ ছোট ঘরখানি খুব গরম রাখে; ঐ ঘরের মধ্যে কাপড়গুলি রেখে আধ ঘণ্টা কাল দরজা বন্ধ রাখলেই কাপড় শুকিয়ে যায়। তারপর খুব ছোট সুন্দর ইস্তিরী দিয়ে সমস্ত কাপড় ইস্তিরী করা হয়। রঙ্গিন কাপড় অপেক্ষা সাদা কাপড় ধোলাই শক্ত কাজ। নানা রকম লেস্ যুক্ত কাপড় ইস্তিরী করা খুবই কঠিন। এসব এই আশ্রমে শিক্ষা দেওয়া হয়। মহিলা-সুপারিন্টেন্ডেন্ট কয়েকখানা লেস্ ও লতা ফুলওয়ানা কাপড় ইস্তিরী করে দেখাতে আদেশ করায় মেয়েরা সেসব সুন্দর ভাবে করে দেখান। তারপর আমরা একটা প্রকাণ্ড ‘হল’এর মধ্যে প্রবেশ করলাম। এইটি আশ্রমের শিল্পশিক্ষার ঘর। ৬০।৭০টি মেয়ে নিপুণ হয়ে নানা রকম সেলাইয়ের কাজ করছে। আমরা ঘরে প্রবেশ করবামাত্র মেয়েরা সম্মুখে উঠে দাঁড়িয়ে আমাদের প্রতি শ্রদ্ধা জ্ঞাপন করল।

সম্ভবতঃ এরা আমাদের কাজ দেখাবার জন্ত আগে থেকেই প্রস্তুত হয়ে ছিল। দেখলাম, নানা রকম জামা তৈরী, ষ্টিকিং বোনা হচ্ছে, অতি সুন্দর Embroidery কাজও হচ্ছে। সূতা, পশম ও রেশমের অনেক নূতন নূতন কাজ এখানে দেখা গেল। তার কোনটা কিসে ব্যবহৃত হয় তা জিজ্ঞাসা করে জেনে নিলাম। এই ধরনের উলের কাজ ও এম্ব্রয়ডারী আমাদের দেশের শিক্ষিতা মেয়েদের কিছু কিছু করতে দেখেছি। কিন্তু আমাদের দেশে এগুলি বিশেষ কোন কাজে লাগে না। এই সব কাজ দেখে বুঝলাম, বিলাতের আবশ্যক

যেসব জিনিষ এরা করেছে—তারই একটা অঙ্ক অমুকরণ আমাদের দেশের শিক্ষিতা মেয়েরা মেম শিক্ষয়িত্রীদের কাছ থেকে পেয়েছে। এই সব অমুকরণ দেখে আমার মনে হয়, ইউনিভার্সিটির বিত্ৰাই হোক আর যে কোন বিত্ৰাই হোক, আমরা যা ইংরেজদের কাছ থেকে শিখি, সে সব আমাদের দেশের কাজে খুব কমই লাগে; আমরা তাদের অমুকরণ করি মাত্র। সেই শিক্ষার একটু অদল বদল করে আমাদের দেশের কাজের উপযোগী করে নেবার শক্তিটুকু আমাদের থাকা চাই - এটা আমাদের দেশের পক্ষে খুবই ভাববার কথা।

এখানকার মেয়েদের এই সব কাজ করবার প্রণালী অর্থাৎ হাতে কাজ করা একে একে অনেকক্ষণ দেখলাম। মহিলা সুপারিন্টেণ্ডেন্ট আমাকে ছোট ছোট কয়েকটা চিত্রের নমুনা উপহার দিলেন। এখানকার মেয়েদের কার্যপ্রণালী দেখে আমি বড়ই সন্তুষ্ট ছলাম।

প্রায় দুই ঘণ্টা পর্যন্ত মহিলা-সুপারিন্টেণ্ডেন্ট আমাকে সমস্ত কাজের ঘরগুলিতে নিয়ে প্রত্যেক ঘরের কার্যপ্রণালী বিশেষভাবে দেখালেন। এই দুই ঘণ্টা সময়ের মধ্যেই আমি তাঁর কার্যকুশলতা দেখে মনে মনে তাঁকে অশেষ ধন্যবাদ দিলাম। পরে যথাযোগ্য ধন্যবাদ দিয়ে তাঁর নিকট বিদায় নিলাম।

১৩ই ডিসেম্বর সকালে কয়েকটা দোকানে গিয়ে পল্লীর মেয়েদের হাতের তৈরী অনেক রকম বস্ত্র শিল্প দেখলাম।

আইরিশ বালকদের সঙ্গে

বিকাল তিনটায় নদীর তীর ধরে ট্রামে সমুদ্রের দিকে চললাম। সহর থেকে পাঁচ মাইল দূরে ট্রামের শেষ সীমানায় নেমে পল্লীগ্রাম দেখতে গেলাম। নদীর মোহনায় সমুদ্রতীরে বড়ই মনোরম পল্লী

দেখতে পেলাম। একস্থানে ৪০।৫০টি বালক বালিকা দেখলাম, তারা স্কুলের ছুটির পর খেলা করছিল, আমার বড়ই ইচ্ছা হল কাছে গিয়ে তাদের খেলা দেখতে—তাদের সঙ্গে কথাবার্তা কইতে। আমি তাদের খুবই নিকটে গেলাম।

বিদেশী নূতন রকম মানুষ দেখে তারা খুবই বিস্ময়ের সঙ্গে আমার পানে চাইল—বড় ছেলে মেয়েদের মধ্যে দু'একটি একটু এগিয়ে আমার দিকে এল। আমি প্রথমেই তাদের বললাম “তোমাদের সঙ্গে কথা কইতে চাই, আমার ইংরেজী কথা তোমরা বুঝতে পার কি?” তারা বলল “হাঁ পারি।” তখন তাদের সঙ্গে একটু কথাবার্তা বলতেই সব ছেলে মেয়ে খেলা ছেড়ে আমার কাছে এল ; পরে তাদের বাড়ী থেকে বয়স্ক স্ত্রী-পুরুষেরাও এল। আমি ছেলেদের উপযোগী অনেক রকম ভারতীয় সংবাদ তাদের শুনলাম, তাদের কাছেও অনেক শুনলাম।

বাস্তবিকই আমি সব যায়গায় ছোট ছেলে মেয়েদের সঙ্গে গল্প করে বড় আনন্দ পাই। সন্ধ্যা হয়ে এল, তবু ছেলে মেয়েরা আমাকে ছাড়ে না—প্রশ্নের পর প্রশ্ন করে ভারতীয় কথা শুনতে থাকল। আকাজ্ঞা তাদের মিটল না, তাই আর একদিন আমাকে আসতে হবে মিলে অনুরোধ করল। আমি আগামী পরশু বিকাল বেলা আবার আসবার প্রতিশ্রুতি দিয়ে তাদের কাছে বিদায় নিলাম। সকলে মিলে ট্রাম পর্য্যন্ত এসে আমাকে ট্রামে তুলে দিয়ে ‘Good-buy’ ‘Good-buy’ বলে হাত নাড়া দিয়ে বিদায় দিল। ট্রাম ছাড়বার পরও অনেক ক্ষণ তাদের হাত-নাড়ার সঙ্গে সায় দিতে হয়েছিল।

নির্দিষ্ট দিনে পুনরায় আমি তাদের কাছে গিয়েছিলাম, এ দিন তারা আরও ছেলেমেয়ে ডেকে এনে সংখ্যায় বৃদ্ধি হয়ে ৭০।৭৫টি হয়েছিল। কিছুক্ষণ কথাবার্তার পর তাদের গান শুনতে চাইলাম, তারা ছেলে

মেয়ে এক শ্রেণীবদ্ধ হয়ে চমৎকার গান করল, গানটি ছিল আমাদের দেশের "বিষ্টি পড়ে টাপুর টুপুর নদী এল বান"এর মত। ছেলে মেয়ে মিলে এমন জোরে এমন স্ফুর্তিতে একতালে হাত-পা নাচিয়ে গান করতে দেখে বাস্তবিকই আমি চমৎকৃত হয়েছিলাম।

তারপর তাদের পাল্লায় পড়ে আমাকেও একটা বাংলা গান গাইতে হয়েছিল—আমার গানের অদ্ভুত ভাষা আর স্বর শুনে তারা খুবই হো হো করে হেসেছিল। সে হো হো করা উপহাসের নয়,—নৃতনত্বের আনন্দের। আইরিশ বালকবালিকাদের সঙ্গে এ দিন যে মধুর ভাব হয়েছিল তা জীবনে ভোলবার নয়।

আইরিশ থিয়েটার

সন্ধ্যার পর সহরের এম্পায়ার থিয়েটার নামক একটা প্রসিদ্ধ থিয়েটার দেখলাম। লগুন ও প্লাসগোতে যেমন থিয়েটার দেখেছি, তা অপেক্ষা এখানে একটু কম জমকালো হলেও বড় মধুর লেগেছিল। অভিনয়ে এক ধোবার মূখ্যমী দেখে হেসে আর বাঁচি নে—বুদ্ধিমতী কণ্ঠকুশলা স্ত্রীর গুণে তার জীবনযাত্রা নির্বাহ হয়। ব্যাধ-বালিকার সঙ্গীতের তালে তালে দর্শকগণের প্রতি ফুলের তীর নিক্ষেপ অতি আশ্চর্য শিক্ষার পরিচায়ক। তোলার গান, মাতালের সার্কাস প্রভৃতি কয়েকটি অভিনয় বড় ভাল লেগেছিল। আমি থিয়েটারের বিশেষ পক্ষপাতী নই—কিন্তু বিদেশের নানা ভাবের ভিতর দিয়ে নানা বিষয় শিক্ষা লাভের জগুই বিদেশী থিয়েটারগুলিও আগ্রহের সঙ্গে দেখতাম। বিলাতের থিয়েটারগুলি ছা'তিন ঘণ্টার মধ্যেই অভিনয় শেষ করে। প্রত্যেক থিয়েটারই সন্ধ্যার পর আরম্ভ করে দু'বার অভিনয় করে। এ দিন সন্ধ্যা ৫টায় আরম্ভ হয়ে ৭।০টায় শেষ হল।

ধর্মভাব

খিয়েটার দেখে খানিকটা পথ এসে রাস্তার একটা প্রশস্ত ত্রিমোহনায় দেখলাম, ধর্ম প্রচারকেরা বক্তৃতা করছে ; খানিকটা দাঁড়িয়ে শুনলাম। এখানে এদিন প্রচারকেরা প্রত্যেকে আপন জীবনে ভগবানের বিশেষ অমুগ্রহ বা প্রত্যক্ষ করেছে, সেইগুলিই প্রাণের আবেগে বলছিল। স্ত্রী-পুরুষ ৪৫ জনের নিজ নিজ জীবনের পাপপুণ্যের কাহিনী শুনলাম। একটা মেয়ে উপাসনা করল,—সজল নেত্রে দীর্ঘ সময় বাপী উপাসনা। বেশ বোকা গেল, ভগবানের দেওয়া একটুকু আলোর সন্ধান সে পেয়েছে।

প্রচার-সভা ভঙ্গের পর এদের কর্তৃপক্ষীয় একটা যুবক আমার সঙ্গে আলাপ করলেন, বাস্তবিক আমিও তাঁদের সঙ্গে একটু কথাবার্তা কহিতে আশা করছিলাম। যুবকটি পরদিন রবিবারের উপাসনা-সভায় যোগ দিতে আমাকে অমরোধ করলে আমি সানন্দে স্বীকৃত হলাম।

১৪ই ডিসেম্বর রবিবার সকালে আহারাদি শেষ করে ১১টার তাদের উপাসনা-মন্দিরে গেলাম। প্রধান ধর্মোপদেষ্টার উপদেশ ও প্রার্থনাদি শুনলাম, তারপর উপস্থিত সভ্যমণ্ডলীর ভিতরের কয়েকজনে উপাসনা করলেন। প্রত্যেক উপাসনার মধ্যেই এঁদের গভীর ভগবদ্ভক্তির পরিচয় পেলাম। ইংলণ্ড এবং স্কটলণ্ডবাসীদের চেয়ে আয়র্লণ্ডবাসীরাই বেশী ভগবৎপরায়ণ বলে মনে হয়।

পরে এঁদের সোমবারের রাত্রির একটা বিশেষ অধিবেশনে যোগ দিয়েও বড় আনন্দ পেয়েছিলাম। বক্তৃতা, পাঠ, প্রার্থনা, গান সবই ভাল লাগল। গানগুলি উপস্থিত ব্যক্তিবর্গ স্ত্রীপুরুষ সবাই মিলে গাইল। এদিন একটি গান ছিল নূতন, এটি এমন ভাবে গাওয়া হ'ল

যে, সে গান সকলেরই স্তরলয়ের সঙ্গে শেখা হ'য়ে গেল। বিলাতের সভা হ'ক গির্জা হ'ক বা থিয়েটার হ'ক দু-একটি গান এমন ভাবে গাওয়া হয় যে, শ্রোতৃবর্গ সকলেই গুণ-গুণ করে গানের সঙ্গে যোগ দেয়। এই রকম অবস্থায়, আমি যে সঙ্গীত-রসে বঞ্চিত মানুষ, আমার প্রাণেও আনন্দের ফল বইত।

পল্লীর তাঁত বোনা

১৬ই ডিসেম্বর মঙ্গলবার। এদিন সকালের আহাঙ্গাদি শেষ করেই আমি পল্লীগ্রামের তাঁতে কাপড় বোনা দেখবার জন্ত ট্রেনে বেলফাষ্ট থেকে ৩০ মাইল দূরে Lurgan নামক স্থানে গেলাম। ট্রেনে চলতে পথে আইরিশ পল্লীর সৌন্দর্য্য দেখে বড় আনন্দ পেলাম। এদের সমস্ত দেশগুলিই উঁচু নীচু পাহাড়ে পূর্ণ। এক ঘণ্টার মধ্যেই Lurgan পৌছলাম। এটা নিতান্ত পাড়ার নগর। পরিষ্কার পরিচ্ছন্ন একটি ছোট সহর। বেলফাষ্টের একটি ভদ্রলোক আমাকে Lurgan-এর Mrs. Weir নামী একটি মহিলার বাড়ীর ঠিকানা দিয়ে দিয়েছিলেন। বেলা দেড় প্রহরের সময় আমি তাঁর বাড়ীতে (17, James Street) উঠলাম। Mrs. Wier বৃদ্ধা।

প্রথমতঃ তিনি আমাকে দেখে একটু খতমত খেয়ে গেলেন, পরে পরিচিত লোকের চিঠি আমার হাতে পেয়ে আমাকে খুবই যত্নের সঙ্গে গ্রহণ করলেন। তিনি রান্না করছিলেন। এসব দেশে শীত কালে প্রতি ঘরেই সর্বদা আগুন জ্বালান থাকে, দেখলাম—মহিলার পৃথক রান্নাঘর নাই, এই সদর ঘরের আগুনেই রান্না করছেন। তখন লোহার বোয়ানায় শিকলে ঝুলিয়ে ঐ আগুনের উপর কতকগুলি আলু সিদ্ধ হ'চ্ছিল। আমি খানিকটা পথ হেঁটে এসেছি, পায়ে বড়

শীত বোধ করছিলাম তাই ঐ আঙনের কাছে পা রাখলাম। বৃদ্ধা তখন পৃথক গ্যাসের উত্তুন জেলে রান্না আরম্ভ করলেন আর এই কয়লার আঙনে আমার গা পা গরম করতে বললেন। এই পল্লীকুটির খানির প্রত্যেক জিনিষটা আমার কাছে নূতন লাগছিল। আমার ভাব গতিক দেখে বৃদ্ধা আমাকে বলেই ফেললেন “আপনি সবই নূতন রকম দেখছেন,—নয় কি?” এই বলে বৃদ্ধা তাঁর গৃহস্থালীর কাজ-কর্ম খুঁটিনাটি সব আমাকে আনন্দের সঙ্গে দেখালেন।

একটু দূরে ঠক্ ঠক্ শব্দ শুনছিলাম, কিসের শব্দ জিজ্ঞাসা করায় বৃদ্ধা বললেন “আপনি যা দেখতে এসেছেন সেই তাঁত বোনা হচ্ছে।” তখন বৃদ্ধা আমাকে তাঁর বয়ন কার্যালয়ে সঙ্গে নিয়ে গিয়ে যারা কাজ করছে তাদের সঙ্গে পরিচয় করিয়ে দিলেন। আমি খুবই আগ্রহের সঙ্গে তাঁত বোনা দেখতে মন দিলাম। শণের (linen) সূতায় খুব বড় টেবিল ক্লথ বোনা হচ্ছিল। প্রকাণ্ড বড় তাঁত—কোন মেশিনে Powerএর ব্যবহার নাই, সমস্তই হাতে পায়ে কাজ হচ্ছে। সেই আমাদের দেশের তাঁতীদের মতই ঠক্ ঠকি তাঁত, কিন্তু অনেক উন্নত রকমের পরিবর্তন দেখলাম। কাপড়ের উপর সাদা সূতায় চমৎকার লতা ফুল ঐ সঙ্গেই বোনা হয়ে যাচ্ছে। তার বিশেষ বর্ণন এখানে করবার স্থান হবে না। আমি একটি সাধারণ তাঁত পায়ে চালাতে চেষ্টা করলাম কিন্তু সেটা আমাদের দেশের তাঁত অপেক্ষা অনেক বড়, তাই পায়ের শক্তিতে কূল পেলাম না।

বৃদ্ধার স্বামী বাহিরের কি কাজে গিয়েছিলেন, মধ্যাহ্নে এলেন। আরও একটি যুবক (পল্লীগ্রামের Unemployeeদের তদন্তকারী সরকারী কর্মচারী) এসে উপস্থিত হ'লেন। বৃদ্ধা আহারের টেবিল সাজিয়ে আমাকে সমেত তিনজনকে আহারের জগ্ন ডাকলেন।

আমি একটু 'জ্যা উ' করতেই তিনি জানালেন, আমার জন্তেও রান্না হয়েছে। আমার মধ্যাহ্নের আহার এঁদের বাড়ীতে হবে, কি, বাইরের খাবারের দোকানে হবে তার জন্ত কোন ভাবনা না থাকায় পল্লীগ্রামের আতিথেয়তার মাত্রা বুঝবার একটু ঔৎসুক্য ছিল। তিনজনে নানা গল্পে সল্লে আহার হ'ল। বৃদ্ধা পরিবেশন করলেন। দেখলাম তিনি আমার আহারের বন্দোবস্ত ত করেছেনই, অধিকন্তু আমরা দেশে কি খেতে ভালবাসি তার খবর নিয়ে বাজার থেকে চাউল আনিয়ে পায়সের (Pudding) ব্যবস্থাও এরই মধ্যে করেছেন। এঁদের কাছে জানলাম, এই Lurganএ বয়ন ও শেলাইএর নানা প্রকারের কারখানা আছে। সেগুলির খবর নিলাম।

বিকালে বৃদ্ধার কাছ থেকে বিদায় নিয়ে পথ চলতে পথে অনেক গুলি মেয়ের সঙ্গে দেখা হল, তারা কারখানায় কাজ করতে যাচ্ছে। বাড়ীতে তারা নানা রকম সূচের কাজ আর লেস্ বোনার কাজ করেছে, সেগুলি কারখানায় নিয়ে চলেছে। আমি ঐ সব দেখতে চাওয়ায় পথেই তারা অনেক রকমের কাজ আমাকে দেখাল। তাদের কাছে জানলাম—এ অঞ্চলে অনেক মেয়েই এই সব শিল্পকর্ম করে। তারপর আরও কয়েকটি কারখানার কাজ দেখে পথে কয়েকটি বড় বড় linen সূতার কারখানা দেখা গেল। তারপর ট্রেনে বেলফাষ্ট ফিরলাম এবং ঐ রাত্রিতেই জাহাজে লিভারপুল রওনা হলাম।

বেলফাষ্ট উত্তর আয়ল'গের শিল্প-বাণিজ্যের কেন্দ্রস্থল। এখানে জাহাজ তৈরীর কয়েকটি বিরাট কারখানা আছে, এত বড় কারখানা সমগ্র পৃথিবীতে আর নাই। জাহাজে ব্যবহারার্থ দড়ি, কাছি প্রস্তুতেরও খুব বড় বড় কারখানা এখানে আছে। এই সকল কারখানায় বহু দরিদ্র

বি কাজ করে জীবন ধারণ করে। এখান হ'তে উত্তর

আমেরিকার নিউইয়র্ক পর্য্যন্ত জাহাজ যাতায়াতের কয়েকটি বড় বড় লাইন আছে, তৃতীয় শ্রেণীর ভাড়া আহালাদি সহ ১৮ পাউণ্ড মাত্র।

গরীবের দেশ

সমগ্র আয়র্লণ্ড দেশটাই অপেক্ষাকৃত গরীবের দেশ। ইংলণ্ড ও স্কটলণ্ডের মত বড় বড় কল কারখানা এখানে কমই আছে। এখানকার বহু পল্লীবাসী গৃহশিল্প দ্বারা জীবিকার্জন করে থাকে। বহু পরিবারের মেয়েরা সূচীশিল্প দ্বারা অর্থ উপার্জন করে। লেস, তোয়ালে, টেবিল ক্লথ, খাবারের ঢাকনা প্রভৃতি কয়েকটি জিনিষ মহাজনেরা অর্ডার দিয়ে মেয়েদের দ্বারা তৈরী করিয়ে বিদেশে চালান দেয়। হাতের কাজ ব'লে আমেরিকা প্রভৃতি ধনী দেশে সেগুলি উচ্চমূল্যে বিক্রি হয়। আয়র্লণ্ডের লোকগুলি গরীব হলেও একটু ধর্মপরায়ণ; এই দারিদ্র্যের মধ্যেই তাদের বেশ একটা শাস্তি আছে।

বেলফাষ্টে কয়েকদিন স্মাল্ভেশন আর্মির একটা হোষ্টেলে ছিলাম। এখানকার স্মাল্ভেশন আর্মির এই হোষ্টেলটি খুব বড়। স্মাল্ভেশন আর্মির কাজ প্রধানতঃ গরীব দুঃখীদের নিয়ে, তাই এদের হোষ্টেলগুলিতে গরীবেরাই বেশীর ভাগ স্থান পায়। যে লোকের চাকরী নাই, যে লোক সামান্য পেন্সন্ পায়, কিংবা যার হাতে পরসাকড়ির নিতান্ত অভাব বা যে উপার্জনে অক্ষম—এই রকম লোক স্মাল্ভেশন আর্মির হোষ্টেলে স্থান পায়। আমার খরচ বাঁচানো খুব আবশ্যক না থাকলেও গরীবদের অবস্থাটা উপভোগ করবার জন্যই তাদের হোষ্টেলে স্থান নিয়েছিলাম। ইংলণ্ড কি স্কটলণ্ডে গরীব হোষ্টেলই হোক না কেন, রাত্রির শোবার দৈনিক ভাড়া

তিন শিলিংয়ের অর্থাৎ দু'টাকার কমে হয় না, আর সমস্ত দিনের আহাৰাদি সমেত দৈনিক আট দশ শিলিংয়ের কমে চলে না। কিন্তু বেনফাষ্টের এই স্কাৰ্ভেশন আশ্রিত হোষ্টেলে মাত্র দু'পেনিতেও শোয়ার ব্যবস্থা আছে। আহাৰাদি সমেত দৈনিক দু'তিন শিলিং খরচেও কেও কেও চালায়। বিলাতে হোটেল খরচ সাধারণতঃ এক বেলা তিন শিলিং বা দু টাকা কিন্তু এই স্কাৰ্ভেশন আশ্রিত হোটেলে মাত্র ছ' আনাতেও একবেলা মোটামুটি খেতে দেখেছি। এক আনার পরিজ বা যব সিদ্ধ, এক আনার আলু সিদ্ধ, দুই আনার ভাজা মাছ, এক আনার মিষ্ট ডুমুর, আর এক আনার চা এই ছ'আনাতেই এক রকম খাওয়া হয়। অনেক রকম আমোদ উৎসবও গরীবদের কম খরচে দেখবার ব্যবস্থা আছে। সৰ্বশ্রেষ্ঠ থিয়েটারে মাত্র আট আনা দামের শ্রেণীতে গরীবদের সঙ্গে বসে দেখে প্রচুর আনন্দ উপভোগ করেছি। অনেক গরীব মেয়েদের দেখেছি কঞ্চল গায় দিয়ে শীত কাটায়; আবার কঞ্চলের এক পাশে কোলের ছেলে মুড়ে সেই কঞ্চলটি আবার ফিরিয়ে সৰ্ব্বদা জড়িয়ে উপরের কোণটি সেপ্টিপিনে এঁটে দেয়। এতে ছেলে কোলে করে দু'হাত ছেড়ে দিয়েও বেড়াবার বা কাজকৰ্ম্ম করবার বেশ সুবিধা হয়।

আয়ল'ও প্রচুর পরিমাণে গোল আলু ও নানারকম কপি জন্মে। কোন কোন স্থানে ভেড়ার চাষ আছে। এখানে অনেক ডেয়ারী ফার্ম আছে; তা' থেকে উৎকৃষ্ট গোদুগ্ধ সহরে সরবরাহ হয় এবং প্রচুর পরিমাণে মাখন তৈরী হয়।

সহর থেকে দূরে কয়েকটি পল্লীতে গিয়ে দেখেছি, অতি কম খরচে ছোট ছোট গৃহস্থ সুখে স্বচ্ছন্দে বাস করছে। তাদের ঘর-বাড়ী,

পোষাক পরিচ্ছদ একটুও অপরিষ্কার নয়। জেলেদের বাড়ী-ঘর, মুচীদের বাড়ী-ঘর, এ সব খুব ছোট ছোট হলেও অতি পরিষ্কার পরিচ্ছন্ন। অর্থের দায়ে এদের সারাদিন পরিশ্রম করতে হয় কিন্তু দেখলাম মনে শান্তি আছে। আয়লণ্ডের গরীবদের দেখে শিখলাম— দারিদ্র্য মানুষকে বেশী অসুখী করতে পারে না, অজ্ঞতাই মানুষের দুঃখের কারণ।

আয়লণ্ডের উত্তর প্রান্তে আটলান্টিক মহাসাগর তীরে ভ্রমণ করতে করতে অনেক বার মনে হত, পৃথিবীর এক প্রান্তে এসে পড়েছি।

অষ্টম অধ্যায়

[শিল্পবাণিজ্যের দেশ]

লিভারপুল

১৭ই ডিসেম্বর বুধবার রাত্রি ৯টায় জাহাজে বেলফাষ্ট থেকে রওনা হয়ে সকাল ৮টায় লিভারপুল পৌঁছলাম। ১০ নং নর্থ ষ্ট্রীটে, চিঠি দিয়ে ঠিক করা হোটেলে বাসা নিলাম। দেখলাম, কলকাতার চিঠি লগুন থেকে ফেরত হয়ে হোটেলে মজুত রয়েছে। এখন আমি নতুন সহর ঘুরতে একটু পাকা হয়েছি, গাইড্ বই সঙ্গে নিয়ে নানা স্থান দেখলাম। মিউজিয়ামটি অত্যন্ত সহরের মত, তবে আর্টগ্যালারীতে বড় সুন্দর সুন্দর ছবি দেখা গেল। আর্টগ্যালারীর সম্মুখে ঘরের দুই পাশে জগৎ বিখ্যাত চিত্র-শিল্পিদ্বয় র‍্যাফেল ও ম্যাগেলোর মর্ম্মরমূর্ত্তি রয়েছে। এখানকার অত্যন্ত দৃশ্যের মধ্যে মার্সি নদীর তীরটি বিশেষ উল্লেখযোগ্য।

এই লিভারপুল বন্দরটি সারা জগতের বাণিজ্যের আমদানী-রপ্তানীর প্রধান কেন্দ্র, সুতরাং জাহাজী ব্যাপার যে এখানে কি রকম বিশাল, তা ভাবলেও বিশ্বয়ে অবিভূত হতে হয়। সমুদ্রের নিকটে মার্সি নদীর মোহনায় লিভারপুল। মার্সি নদীর পশ্চিম পারে লিভারপুল আর পূর্ব পারে বার্কেনহেড্ বন্দর। এখানে নদীটি এক মাইলের উপর প্রশস্ত। নদীর দুই ধারে ক্রমাগত ৮ মাইল পর্যন্ত ছিয়ানব্বইটি ডক রয়েছে। সমুদ্রের দিকে আরও বিরাট আয়োজনে দুটি ডক তৈরী হচ্ছে দেখা গেল। এত বড় জাহাজের ডকের শ্রেণী পৃথিবীতে আর

নাই। ৭ ছোট ছোট জাহাজগুলি অনবরত এপার-ওপার খেয়া দিচ্ছে। এই খেয়া-পারের জাহাজগুলিও সংখ্যায় ৩০ খানার কম নয়। আর যতদূর দৃষ্টি চলে, কেবল জাহাজের শ্রেণী। সমুদ্রের মোহনায় গিয়ে দেখলাম, নানা দিক থেকে জাহাজ আসছে যাচ্ছে।

লিভারপুল থেকে এই সুপ্রশস্ত নদীর নীচে দিয়ে হুড়ঙ্গ-পথে রেল গিয়েছে। আমি কখনও কখনও নীচে হুড়ঙ্গ-পথে ট্রেনে নদীর অপর পারে গিয়ে বার্কেনহেড্‌ সহর দেখতাম। বার্কেনহেডের পাহাড় বড় সুন্দর। লিভারপুলে নদীর তীরে আর একটি আশ্চর্য্য বিষয় দেখবার আছে—ক্রমাগত ৮।১০ মাইল পথ ৯৬টি ডকের পাশ দিয়ে রেল গিয়েছে। একে ওভারহেড্‌ রেলওয়ে বলে। বিশ হাত উপর দিয়ে লোহার থামের উপর বরাবর রেলপথ। এই ট্রেনে উঠে ডকগুলি দেখতে ও নদীতীর ভ্রমণ করতে বড়ই আনন্দ হয়। আমি দুই দিন এই ট্রেনে চড়ে সমস্ত দেখেছি। নদীর অপর পারে তিন মাইল দূরে পোর্ট-সান্লাইট অর্থাৎ সুবিখ্যাত সান্লাইট সাবানের বন্দর।

সান্লাইট সোপ ফ্যাক্টরী

১৯শে ডিসেম্বর শুক্রবার মধ্যাহ্নে আমি জাহাজে পার হয়ে সান্লাইট বন্দরে সাবানের কারখানা দেখতে গেলাম। জাহাজ-ঘাটে নেমে মোটরবাসে চড়ে খানিকটা গিয়ে সান্লাইট বন্দরে তাদের প্রধান আপিসে উঠলাম। নানা স্থানের বিদেশীরা এসে এই জগদ্বিখ্যাত সাবানের কারখানাটি দেখে থাকেন। দেখবার জন্তু কোম্পানী থেকে গাইড্‌ম্যান অর্থাৎ প্রদর্শক নিযুক্ত আছে। ম্যানেজার ভিজিট-বইতে আমার নাম ঠিকানা স্বাক্ষর করিয়ে নিয়ে একজন প্রদর্শককে আমার সঙ্গে দিলেন। এদের কার্যক্ষেত্রের ভিন্ন ভিন্ন স্থানের চিত্র সম্বলিত একখানি মনোহর

পুস্তকও উপহার পেলাম। ভিতরে গিয়ে যা দেখলাম, এই বিদেশ ভ্রমণের মধ্যে এটি একটি দেখবার মত বড় বিষয়।

প্রথমে আমরা সাবান জাল দেওয়ার ঘরে গেলাম, প্রকাণ্ড প্রকাণ্ড লোহার চৌবাচ্চায় সাবান জাল হয়ে এক একটি নালা দিয়ে অগ্নি ঘরে গিয়ে শীতল হচ্ছে। কয়েক শত স্ত্রী-পুরুষে সেগুলি কলে দিয়ে লম্বা সাবানের ছড় তৈরী করে রাখছে। আর একটি পরিষ্কার পরিচ্ছন্ন ঘরে প্রায় দুই হাজার স্ত্রীলোক সেইগুলিকে কলের ডাইসে সাবান তৈরী করে বাস্ত্রে প্যাক করেছে। এ সবই চমৎকার কলে হচ্ছে। চার হাজার পুরুষ আর ছয় হাজার স্ত্রীলোক এই কারখানায় কাজ করে। পরিশ্রমের কাজগুলি প্রায়ই পুরুষেরা আর পরিষ্কার পরিচ্ছন্ন সহজ কাজগুলি স্ত্রীলোকেরা করেছে। বাস্ত্র তৈরীর কারখানা ও ছাপাখানা অতি বিরাট। শুনলাম, এ রকম দ্রুত কাজের উৎকৃষ্ট ছাপাখানা পৃথিবীতে কমই আছে। এরূপ বিরাট কারখানা এটাই প্রথম দেখলাম।

এই কারখানায় এবং এই কারখানার কাজ সম্বন্ধে বাইরে এত অধিক লোক কাজ করে যে, এই কোম্পানিকে এর জগুই একটি বন্দর তৈরী করতে হয়েছে। কেবল এই সান্লাইট সাবানের কাজ ভিন্ন এখানে আর কিছু হয় না। যারা এখানে কাজ করে, তাদের বাসের জগু সুন্দর সুন্দর বাড়ী তৈরী হয়েছে। তাদের জগু হাট, বাজার, হোটেল, রেলস্টেশন, মোটরবাস লাইন, ডাকঘর প্রভৃতি নূতন ভাবে তৈরী হয়েছে। ইংরেজ জাতি আমোদ ছাড়া থাকে না, এজন্য তাদের খেলার নানা রকম বড় স্থান,—থিয়েটার, বায়স্কোপ প্রভৃতিও স্থাপন করা হয়েছে। একটি চমৎকার আর্টগ্যালারীও এখানে স্থান পেয়েছে; মাত্র এখানেই এর শেষ নয়, পৃথিবীর নানা স্থানে এই কোম্পানি সান্লাইট

সাবানের কারখানা খুলেছে। আমেরিকার নিউইয়র্কে এদের কারখানা এখনকার কারখানার চেয়েও বড়। তবে এইটিই এদের আদি স্থান।

পৃথিবীর নানা স্থানের দর্শকেরা এই সান্লাইট সাবানের কারখানাটি দেখতে আসেন। দর্শকদের দেখবার জ্ঞাত এই কোম্পানি এতই সুন্দর বন্দোবস্ত করেছেন যে, এমন বন্দোবস্ত আর কোথাও দেখি নাই। কারখানার ঘরগুলিতে নীচের হাজার হাজার লোকে কাজ করছে, আর উপর দিয়ে দর্শকদের দেখাবার জ্ঞাত রাস্তা করে দেওয়া হয়েছে। এতে অল্প সময় মধ্যে বহুদূরের কাজ দেখবার সুবিধা হয়েছে। সেই পথগুলির নাম রাখা হয়েছে—“ভিজিটরস্ ব্রুট্” অর্থাৎ দর্শকদের পথ। একটা পরিষ্কার পরিচ্ছন্ন ঘরে সুগন্ধি সাবান ও ডাক্তারদের ব্যবহারের জ্ঞাত নানারূপ মূল্যবান সাবান তৈরী হচ্ছে, এগুলি সব মেয়েরাই করছে। এগুলি হাত মেসিনে প্রেস করে তৈরী হচ্ছে। কারণ জিজ্ঞাসায় জানলাম, হাতের মেসিনে যেমন ভাল পরিষ্কার পরিচ্ছন্ন কাজ হয়, কলের মেসিনে তেমন হয় না।

আমার সঙ্গে গাইড্ যুবকটি প্রত্যেক বিষয় আমাকে বুঝিয়ে দিচ্ছিলেন। উপরে এক স্থানে নিয়ে সমস্ত সান্লাইট বন্দরটি দেখালেন। দেখলাম, তিন মাইল দীর্ঘ প্রস্থ এই সান্লাইট বন্দরটি কেবল এদের কাজেই খাটছে। মাত্র কারখানাটি দেখতে আমাদের পাঁচ ঘণ্টা সময় লাগল, অনেক রাত্রি হয়েছিল বলে আটগ্যালারী প্রভৃতি দ্রষ্টব্যগুলি দেখা হল না। রাত্রি ৯টায় সান্লাইট কোম্পানির মোটরবাসে ফিরে এলাম।

লিভারপুল সহর ছেড়ে দূরে একদিন নির্জন পাহাড়ে অঞ্চল ও তল্লিকটবর্তী পল্লীবাসীদের বাস দেখতে গিয়েছিলাম। সেদিন রবিবার, অনেক লোক বেড়াতে বের হয়েছিল।

পাহাড়ে' পল্লীর একটি উচ্চস্থানে উইণ্ড্‌ মিল অর্থাৎ একটি বায়ু-চালিত কল দেখলাম। উচ্চ স্তম্ভ করে তার গায়ে প্রকাণ্ড চারখানা পাখা লাগান হয়েছে, যে দিক থেকে বাতাস আসে সেই দিকে পাখার মুখ ফিরিয়ে দিলে পাখা বাতাস পেয়ে ঘুরতে থাকে, তার শক্তিতেই কল চলে। এই কল এক শতাব্দী পূর্বে ব্যবহৃত হত, ষ্টিম ইঞ্জিনের ব্যবহারের বৃদ্ধির সঙ্গে সঙ্গে এর ব্যবহার হ্রাস পায়। এগুলি সাধারণতঃ জমিতে জল দিবার জন্ত এবং গৃহস্থদের গম পেষণ করবার জন্ত ব্যবহৃত হত।

দেখলাম, উইণ্ড্‌ মিলটা পুরাতন অকেজা অবস্থায় পড়ে রয়েছে। এখন এটা কেবল একটি দৃশ্য মাত্র।

আমার মনে হয়, এই মত কল আমাদের দেশে প্রচলিত হওয়া উচিত। জমিতে জল দিবার পক্ষে এরূপ কল বড়ই উপযোগী। অত্যাশ্চর্য্য অনেক কাজ এই কলে করা যেতে পারে।

বহুকাল থেকে আমাদের ঢেকিতে ধানভানা, ঘানিতে তেল প্রস্তুত করা হয়ে আসছে; বর্তমানে বিলাত থেকে নানা রকম কল আমদানি হচ্ছে, আমাদের দেশের পক্ষে এটা খুবই আশঙ্কার কথা এই যে, পাছে ঐ সব কলের বহুল প্রচলন হয়ে দেশের লোকের যা-কিছু একটু কাজকর্ম ছিল তাও বন্ধ করে দেয়। তাই আমার মনে হয়, উইণ্ড্‌মিলে দেশের লোকের যে পরিশ্রমের লাঘব হবে, তাতে বিশেষ কোন খরচের কারণ নাই; বরং নানা দিকেই সুবিধা।

ম্যাফেটার

২২শে ডিসেম্বর সোমবার—এ দিন সকালে আমি লিভারপুল থেকে ট্রেনে রওনা হয়ে ম্যাফেটার সহরে এলাম। একটি হোটেলে

উঠে আহাঙ্গাদি শেষ করে জিনিষ পত্র হোটেলে রেখে সহরে বেড়াতে বের হলাম। আমার বার্মিংহামের প্রতিই মন টানছিল, এজন্য ম্যাঞ্চেষ্টার সহরটি এক দিনের মধ্যে দেখে শেষ করতে মনস্থ করলাম।

ম্যাঞ্চেষ্টার কাপড় তৈরীর জন্য বিখ্যাত। প্রথমে সহরের একখানা গাইডবুক কিনে নিয়ে দেখলাম যে, কোন স্থানে কি বিশেষ দেখবার জিনিষ আছে। পরে তার মধ্য থেকে ক্যানাল ডক্, পিকাডিলি, মিউজিয়াম, আর্টগ্যালারি ও একটি থিয়েটার এক দিনের মধ্যে দেখবার প্রোগ্রাম তৈরী করলাম। সমস্ত পথেই ট্রাম ও মোটরবাস্ রয়েছে, চলতে ফিরতে মোটেই অসুবিধা নাই। আর গাইডবুকের বন্দোবস্তের গুণে কাউকে কিছু জিজ্ঞাসা করবারও বিশেষ দরকার হয় না।

ট্রামে চার মাইল দূরে গিয়ে ক্যানাল ডক্টি দেখলাম। লিভারপুল থেকে খুব প্রশস্ত প্রায় আশি মাইল পথ থাল কেটে ম্যাঞ্চেষ্টার পর্যন্ত আনা হয়েছে। এই পথে ম্যাঞ্চেষ্টারে জাহাজ আসে। এই সব জাহাজেই আমাদের দেশের তুলা ওদেশে যায়, আবার কাপড় তৈরী হয়ে আমাদের দেশে আসে। সহরের রাস্তায় অনেক মোটর লরীতে তুলার গাঁট বোঝাই চলতে দেখলাম। জাহাজ থেকেও তুলা নামছে। আমি প্রায় এক মাইল পর্যন্ত জাহাজপূর্ণ ডক দেখে ফিরলাম। কতদূর পর্যন্ত এই ভাবে খালের ডকে জাহাজ সাজান রয়েছে জানবার সুযোগ হয় নাই।

সন্ধ্যার পূর্বেই আর্টগ্যালারিতে গেলাম; এখানে আর্টগ্যালারি এবং মিউজিয়াম একই সঙ্গে। সমস্ত আর্টগ্যালারি ও মিউজিয়াম দেখা শেষ হলে পিকাডিলিতে গেলাম। এটি সহরের কেন্দ্রস্থলে অবস্থিত এবং প্রায় সমস্ত বড় বড় দ্রষ্টব্যগুলিই এইখানে। লণ্ডনের

পিকাডিলি লগুনের মধ্যে সব চেয়ে জমকালো, এই ম্যাঞ্চেস্টারেও পিকাডিলিই সবচেয়ে বেশী সৌন্দর্যময়। আমি স্থানীয় লোকের কাছে জিজ্ঞাসা করে একটি ভাল থিয়েটারে প্রবেশ করলাম। লিভার-পুলে দু'দিন থিয়েটার দেখেছি, এই ম্যাঞ্চেস্টারেও এক দিন দেখলাম কিন্তু পূর্বের অগ্রান্য স্থানে যে সব আশ্চর্য দৃশ্য দেখেছি তা অপেক্ষা অনেক নূতন দেখা গেল। থিয়েটারগুলিতে রবিবার ভিন্ন আর সব দিনই অভিনয় হয়।

বার্মিংহাম

২৫শে ডিসেম্বর (১৯২৪) তারিখে ম্যাঞ্চেস্টার থেকে বার্মিংহামে এলাম। সমস্ত বড় বড় সহরে খৃষ্টীয় যুবক সমিতি (Y. M. C. A.) এবং স্কাল্‌ভেশন আর্মির হোটেল আছে। খৃষ্টীয় যুবক সমিতিগুলি একটু অবস্থাপন্ন ধরনের লোকদের জন্ত। সেসব হোটেলে থাকতে দৈনিক ১২ শিলিং (প্রায় ২ টাকা) থাকা আর খাওয়াতেই খরচ হয়। স্কাল্‌ভেশন আর্মির হোটেলগুলিতে বিছানার জন্য দৈনিক এক শিলিং এবং খাওয়ার জন্য ছয় সাত শিলিং এই এক রকম চলে। আমি স্কাল্‌ভেশন আর্মির হোটেলেই ছিলাম। বড়দিনের এবং নূতন বৎসরের উৎসব এই হোটেলেই দেখলাম। বড়দিনে বেশ সাজগোছ ও আহারাদির ঘট। গীর্জায় এবং অনেক গৃহস্থ পরিবারে এই সময় খুঁটির জন্মোৎসব উপলক্ষে সভা সমিতি ও ধর্ম্মাচরণ হয়। আমি স্কাল্‌ভেশন আর্মির হোটেলে বড়দিনের উৎসব করলাম। আহারের খুব ধুমধাম ছিল, সাধারণের জন্য যে সব আহারের ডিস্ সাজান হয়েছিল, আমার জন্য তা অপেক্ষা একটু পৃথক বন্দোবস্ত

কর্তৃপক্ষেরা করেছিলেন, আমি খাওয়া সম্বন্ধে একটু বাছবিচার করি তা এঁরা আগেই জেনে নিয়েছিলেন।

বৎসরের শেষ দিনে স্ট্রাল্ভেশন আশ্মির যে সভা হয়েছিল, আমি সে সভায় মানবাত্মার ক্রমোন্নতি সম্বন্ধে একটি ছোট বক্তৃতা দিয়েছিলাম। যদিও বিষয়টি গুরুতর, তথাপি মনের ভাব প্রকাশ করতে কোনখানে বাধা পাই নাই, বেশ প্রাণের সঙ্গে বলতে পেরেছিলাম। আমার পরবর্তী দুই জন বক্তার মুখে আমার বক্তৃতার উচ্চ সমালোচনা শুনে বুঝলাম, আমার বলা শ্রোতাগণের ভাল লেগেছিল। আমার বলায় একটু বৈষ্ণবীয় গন্ধ ছিল, কাজেই এঁদের কাছে একটু নূতন লেগেছিল। আমি এই কথাটিই পরিষ্কার করে বলেছিলাম যে, ভগবানের প্রাকৃত (Natural) শক্তির সহায়তায় মানুষ বোনমতে জীবন কাটাতে পারে মাত্র কিন্তু আত্মার উন্নতি তাতে হয় না—আত্মার উন্নতির জন্য তাঁর অলৌকিক শক্তি (Miracle) অনুভব করা চাই। এ সম্বন্ধে নিজ জীবনে যতটুকু অনুভব করেছি, তারও কয়েকটি ঘটনা বলেছিলাম। বর্ষ শেষের সভায় আমার এ প্রসঙ্গের অর্থ এই যে, সারা বৎসরে কতটুকু আত্মার উন্নতি হয়েছে, তার খতেন করতে হবে এবং এই আত্মার উন্নতি যতটুকু হয়েছে সেইটুকুই মাত্র তার এ বৎসরের ‘ফল’, আর যত কাজ-কর্ম সবই বাজে জমা-খরচ।

বিলাত-ফেরতাদের মুখে শুনতাম, বিলাতে ধর্মকর্ম মোটেই নাই, কিন্তু আমি যত লোকের সঙ্গে আলাপ পরিচয় করেছি, তার মধ্যে অনেককেই ধর্মপরায়ণ দেখেছি।

বার্মিংহামে আমাদের কার্য

শিল্প এবং ইঞ্জিনিয়ারিং কারখানাই বার্মিংহামের বিশেষত্ব। এত বড় শিল্পের সহর ইংরেজ রাজত্বে আর নাই। সম্ভবতঃ সমস্ত পৃথিবীর মধ্যে এটাই কলকারখানার গুরুত্বে শ্রেষ্ঠ। আমি বার্মিংহাম সহরের বাইরে ট্রামে বা মোটরবাসে কখন কখন ৭।৮ মাইল দূরে গিয়েছি। কিন্তু যে দিকেই যাই, যত দূরেই যাই কেবল বড় বড় কারখানা দেখতে পেয়েছি। বার্মিংহামের ৩০।৪০ মাইল দূর পর্যন্ত চারদিকে এই রকম বড় বড় কলকারখানায় পূর্ণ।

ইঞ্জিনিয়ারিং সম্বন্ধীয় কারখানাগুলির এক একটা যে কি বিশাল তা' আমাদের ক্ষুদ্র মস্তিষ্কে কিছুই ধারণা করা সম্ভব হয় না। এরা পৃথিবীর নানাস্থানে গিয়ে রেলপথ গড়ে, পোল গড়ে; মোটরকার ও নানারকম কলকজা গ'ড়ে সারা জগতে চালায়। এই মত ভিন্ন ভিন্ন ধরনের কাজের জন্য ভিন্ন ভিন্ন ধরনের, ভিন্ন ভিন্ন রকমের কারখানা এখানে রয়েছে।

এই বার্মিংহামই আমার বিলাত আসা বেশী সার্থক করেছে। এখানে কারখানায় প্রবেশ করে কাজকর্ম দেখেছি। খুব বড় একটা পিতলের কারখানায় পিতল ও তামার পাত এবং তার প্রস্তুত করার সমস্ত কার্য দেখেছি। এই পিতলের পাত ও তার প্রস্তুতের কারখানা আমাদের দেশে করতে আমার অনেক দিন থেকেই ইচ্ছা, এই জন্য এই কারখানার কাজ অতি তন্ন তন্ন করে দেখেছি। মনে হয়, দেশে যৌথ কারবার করে এই পিতলের কারখানা স্থাপন করতে পারলে বিশেষ সুবিধা হতে পারে। ইচ্ছা রইল, হবে কি না জানি না। আমাদের জুয়েলারী কারখানা সম্বন্ধে অনেক

কাজ এখানে সম্পন্ন করলাম। এখানকার পৃথিবী বিখ্যাত পালিশের কল ও পালিশের মসলা প্রস্তুতকারক ডব্লিউ, ক্যানিং কোম্পানির সঙ্গে আমাদের আগে থেকেই কারবার রয়েছে, কয়েক বৎসর পূর্বে এদের কাছ থেকে আমরা পালিশের কল কিনে নিয়েছিলাম। বর্তমানে আমরা এদেরই পালিশের কল ও মসলা ব্যবহার করি। এদের সঙ্গে দেখা করে খুবই আনন্দ পেলাম এবং এদের কাছ থেকে ইলেক্ট্রো প্লেটের কাজ শিখলাম। ইলেক্ট্রো প্লেটিং সম্বন্ধীয় অনেক মূল্যবান সরঞ্জামও এদের কাছ থেকে কিনে এনেছি।

আর একটি বড় কারখানা হতে বার শত টাকার ছোট ছোট জুয়েলারী মেশিন প্রভৃতি কিনে এনেছি। এর সাহায্যে মেয়েরা ঘরে বসেই অনেক ছোট ছোট অলঙ্কার তৈরী করতে পারবেন। আমাদের জুয়েলারী কারখানার মহিলা বিভাগে এই সব হাণ্ড-মেশিনের দ্বারা অনেক সুবিধা হবে। আর আর অনেক কাজ যা দেখে এসেছি, তার কিছু কিছু সম্বন্ধে ক্রমে ভাল করে বুঝে সুঝে পরে অর্ডার করব ঠিক করলাম। আমাদের সোনার শাঁখার উৎকর্ষ সম্বন্ধেও বার্মিংহামে অনেক সাহায্য পেয়েছি।

লণ্ডনে এবং আর আর বড় সহরগুলিতে আমি জুয়েলারী দোকানের অলঙ্কারগুলি খুব মনোযোগের সঙ্গে দেখেছি, আধুনিক ধরণের যত রকম ব্রেসলেট বিলাতে এ পর্য্যন্ত হয়েছে, আমাদের প্রস্তুত প্লেন শাঁখা, চুড়ী প্রভৃতি যে সেগুলির সমান আসন পেতে পারে, এ কথা আমি নিঃসঙ্কোচে বলতে পারি। অল্প সোনার হস্তাভরণ প্রস্তুতের পদ্ধতি আমরা যা করেছি, এ রকম পদ্ধতি বিলাতে এখনও হয় নাই।

বার্মিংহাম জুয়েলারী কাজের অতি প্রধান স্থান, এত বড় বড়

জুয়েলারী কারবার লগুনে নাই। আমি বার্মিংহামের অনেকের ভাল ভাল কাজ কর্ম দেখলাম। রোল্ড্ গোল্ড্ এবং ইলেক্ট্রো প্লেটিং সোনার অলঙ্কারগুলি সবই মেশিনে প্রস্তুত হয়। এরও কিছু কিছু এখানে শেখা গেল।

তামা ও পিতলের কারখানা

উইলিয়ম কুপার এণ্ড্ গুড্ কোম্পানীর তামা পিতলের কারখানা বার্মিংহামের একটি অতি পুরাতন বৃহৎ প্রতিষ্ঠান। প্রায় শতাধিক বৎসরের পূর্বে ইহা স্থাপিত হয়েছিল এবং এর খ্যাতি এক্ষণে দেশ বিদেশে সুবিদ্যুত ভাবে ব্যাপ্ত।

২ই জানুয়ারী (১৯২৫) সকালের আহা়াদি সম্পন্ন করে বেলা ১১টায় ঐ কোম্পানির কারখানার আপিসের দরজায় রিং করুলে একটি মেয়ে এসে দাঁড়াল। আমি তা'কে বললাম “ম্যানেজারের সঙ্গে দেখা করতে চাই।” মেয়েটি বল্ল “ম্যানেজার একঘণ্টা পরে আসবেন, আপনার কি দরকার? আমার দ্বারা কোন সাহায্য হতে পারে কিনা জানতে চাই।” আমি বললাম “আমি কারখানার কাজকর্ম দেখতে এসেছি।”

সে আমার কার্ড চাইল এবং আমি উহা দিলে সে একঘণ্টা পরে আমাকে আসতে ব'লে তখনকার মত বিদায় করল।

যথা সময়ে আমি পুনরায় কারখানার আপিসে গেলে ঐ মেয়েটি আবার আমাকে জানাল, ছ'টার সময় বড় ডিরেক্টর আসবেন, তাঁর আদেশের অপেক্ষা করতে হবে। বাইরের ঠাণ্ডা হাওয়ায় হেঁটে এসে আমার বড় শীত ধ'রেছিল; আমি কাছেই একটা Radiator পেয়ে সেখানে গিয়ে গা গরম করে নিলাম। মেয়েটি আমাকে

একটা নির্জন কামরায় বসতে দিয়ে কয়েকখানা দৈনিক খবরের কাগজ আমার টেবিলে দিয়ে গেল।

ডিরেক্টর সাহেব এলে একটি সাহেব আমাকে ডিরেক্টরের কাছে নিয়ে গেল। সেখানে ম্যানেজার এবং আর কয়েকজন লোক উপস্থিত ছিলেন, ডিরেক্টর সাহেব আমার মোটামুটি পরিচয় নিয়েই সসন্মানে বসতে দিলেন এবং তিনি ভারতে গিয়েছিলেন, বোম্বাই ও কলকাতায় তাঁর এজেন্ট আছে, সেসব জানানেন।

তারপর আমি কেন এই কারখানা দেখতে চাই, সে সম্বন্ধে বহু প্রশ্ন জিজ্ঞাসা ক'রলেন। আমি কি ব্যবসায়ী এবং আমার সেই ব্যবসায় সম্বন্ধে বার্ষিক্যহাফে কি কি উৎকর্ষ লাভ ক'রলাম, সে সকলেরও বিশেষ ক'রে খবর নিলেন। আমি সবই সোজাসুজি উত্তর ক'রলাম। এই সমস্ত কলকারখানা দেখে আমাদের দেশীয় সংবাদপত্রে প্রকাশ ক'রুব, সে কথাও জানালাম। ডিরেক্টর সাহেবটি অতি উচ্চ অভ্যর্থনায় লোক, তিনি আমার প্রতি বিশেষ সন্তুষ্টি হ'য়েছেন বুঝলাম। একটি উচ্চশিক্ষিত যুবককে ডাকিয়ে এনে আমার সঙ্গে দিয়ে আমাকে সমস্ত কার্য দেখাবার জন্য তাকে উপদেশ দিয়ে দিলেন।

বেলা ৩টার সময় আমরা এই কারখানা বাড়ীর ভিতরে প্রবেশ ক'রলাম। আমরা একেবারে কাজের প্রথম আরম্ভ থেকে, পরপর কার্য-প্রণালী দেখুব এইরূপ স্থির ক'রলাম। সর্বপ্রথমে একটা বৃহৎ গুদাম ঘরে গিয়ে দেখলাম, তামা ও দস্তার ইট (Ingot) সাজানো র'য়েছে। অল্প একটা ঘরে ভিন্ন ভিন্ন কারখানার বাতিল চাদরের ছাঁট র'য়েছে; পাশে একটা ছোট ঘরে ঐ ছাঁটগুলি কলে প্রেস করে খুব অঁটা পিণ্ড তৈরী করা হ'চ্ছে। পরবর্তী ঘরে ঐ পিণ্ডগুলির সঙ্গে আবশ্যক

মত তামা ও দস্তা ওজন করে পৃথক পাত্রে রাখা হচ্ছে, প্রতি পাত্রে সাড়ে তিন মণ পরিমাণ মিশ্রিত তামা দস্তা রাখা হচ্ছে দেখলাম। ঐ পাত্রগুলি এক একটা ছোট চার-চাকার গাড়ীর উপর আঁটা। দেখলাম যে, ঐ পিতল পূর্ণ পাত্রগুলি জাল-ঘরে টেনে আনা হচ্ছে।

পরে আমরা জাল-ঘরে ঢুকলাম। মাটির নীচেয় চৌকো গর্তের ভিতর কয়লার আগুন রয়েছে। বড় মুচিতে একটি পাত্রের সমস্ত পিতলগুলি পূর্ণ করে ঐ মাটির নীচে আগুনে মুচিগুলি সাজিয়ে তার উপর কয়লা ঢাকা দিয়ে উপরে লোহার চাকায় জমি ঢেকে রাখা হয়েছে। অনেক আগে যেগুলি রাখা হয়েছে, সেইগুলি গলে গিয়ে তরল হবার নির্দিষ্ট সময় ঠিক করা আছে। যথাসময় জালের মুখের ঢাকা খুলে বেড় সাঁড়াসীতে মুচি ধরে কপিকলের শিকলির সঙ্গে সাঁড়াসীর গোড়া আটকিয়ে টেনে ঐ গলিতে পিতল পূর্ণ মুচি তোলা হচ্ছে। পূর্বে থেকেই লোহার ছাঁচ সাজান রয়েছে দেখলাম। একটি মুচির সমুদয় পিতল দু'টা ছাঁচে ঢালা হ'ল। জানলাম যে, ঐ গলিত তরল পিতল এগার শত ডিগ্রি পর্যন্ত উত্তপ্ত করা হয়।

কারখানার জাল-ঘরে যে পিতল ঢালাই করতে দেখলাম, সেগুলি তখন চার ফিট দীর্ঘ, দেড় ফুট প্রস্থ এবং দুই ইঞ্চি পুরু ঢালাই হয়েছিল; পরে ঐগুলি ছেনি দ্বারা দাগ কেটে প্রতিখানা দু'ভাগে ভাগ করে সাজিয়ে রাখা হ'চ্ছিল।

এর পর আমরা Rolling machine এ প্রেস করার ঘরে ঢুকলাম। এই ঘরটি অতি বৃহদায়তন। বিভিন্ন রকম পাতের জন্য অনেকগুলি —অল্পমান ২০।২৫টি রোলিং মেশিনে কাজ হচ্ছে এবং ভিন্ন ভিন্ন স্থানে ভিন্ন ভিন্ন সাইজের পিতলের ঢালাই Ingot সাজান রয়েছে

এবং প্রেস করা হ'চ্ছে দেখলাম। এই কারখানায় কেবল মাত্র সাধারণ কাজের উপযোগী পাত ও তার তৈরী হয়। তারের জন্ত ২"×২" ইঞ্চ মোটা এবং দৈর্ঘ্যে ৮।১০ ফিট রড প্রস্তুত করা হয় এবং প্রথমে চৌকো তারের রোলারে প্রেস ক'রে ক্রমে সরু করা হয়, তারপর তার-টানা কলে আবশ্যক মত তার প্রস্তুত হয়। দুই তিনবার প্রেস করার পর একবার পোড়ান হয়। পোড়ান কাজটিও অতি বিরাট ব্যাপার। খোলা রেলগাড়ীর মত একটা ফ্লাট গাড়ীতে পোড়াবার জিনিষগুলি সাজিয়ে সেই গাড়ীখানি এর উপরের ডালাটা সমেত কলের সাহায্যে আগুনের মধ্যে দেওয়া হয়। এইসব কাজের প্রত্যেকটিই অতি বিরাট ব্যাপার, সবিস্তারে বর্ণন করা দুঃসাধ্য। কলকাতার উত্তরে ইছাপুর গান্ধী ফ্যাক্টরীতে ইহা,র কিছু কিছু কাজ হয়।

আমরা তারপর পাত ও তার প্রস্তুতের সমস্ত ব্যাপারগুলিই দেখলাম। পাতলা পিতলের পাতগুলি খুব চমৎকার পালিশ হ'য়ে প্রস্তুত হয়। তার প্রস্তুত জন্ত প্রথমে রোলারে সরু ক'রে নিয়ে পরে ঝাঁতায় যেমন আমাদের দেশের স্বর্ণকারেরা তার তৈরী করে, তেমন ভাবেই তৈরী হয় কিন্তু সমস্তই কলের সাহায্যে অতি দ্রুত সম্পন্ন হয়। এ দেশের সবই অদ্ভুত। এই কারখানাটির নীচে দিয়ে একটা ক্ষুদ্র নদীর মত খুব খরশ্রোতে জল চ'লছে দেখলাম। এই রূপ নীচে দিয়ে নদী চ'লতে অনেক বড় বড় সহরে দেখেছি। এই সমস্ত নদীতে মাল বোঝাই নৌকা ঘোড়ার দ্বারা গুণ টেনে নেওয়া হয়। উপরে বাড়ী, ঘর, রেল, ট্রাম ইত্যাদিতে এমনই আঁটা যে কচিং কোনখানে উপর থেকে নদীর চিহ্ন দেখা যায় মাত্র।

এর পর আমরা তারঝালাই করা অর্থাৎ দু'টি তারের মুখ একত্র জোড়া দিবার ঘরে গেলাম। একটি কলে দু'টি তারের মুখ একত্র

ক'রে আর একটা কল টিপলেই একটা আওয়াজ হ'য়ে তারের দুই মুখ ইলেকট্রিকের আঙুনে লাল হ'য়ে জুড়ে যায়, পানের আবশ্যক হয় না। এখানে একটা খুব পুরাতন বড় কয়লার ইঞ্জিন আছে, আমরা সেই ইঞ্জিনের সমস্ত কল দেখলাম। এই কারখানার বড় বড় রোলারগুলি ষ্টিম ইঞ্জিনের সাহায্যে চালান হয়, আর অল্প শক্তি সাপেক্ষ কাজগুলি ইলেকট্রিক powerএর সাহায্যে করা হয়।

এর পর আমরা Laboratory ঘরে প্রবেশ ক'রলাম। দোতলার উপর অতি পরিষ্কার ঘরে Laboratoryটি অবস্থিত। এখানে পিতল পরীক্ষা করা হয়। কোন্ পিতলে কতটুকু তামা, কতটুকু দস্তা আছে এইখানে তা নির্ণয় করা হয়। এই কাজটি খুব শক্ত নয়, তবে একটু শিক্ষার দরকার। পিতলের কিছু গুঁড়া নিয়ে নাইট্রিক অ্যাসিডের সাহায্যে দস্তার পরিমাণ নির্ণয় করা হয়। পিতলের পোড়া ও প্রেসে আঘাত করার জন্ত যে নরম ও শক্তের পার্থক্য হয়, তা নির্ণয় ক'রবারও একটা কল আছে। কলের সাহায্যে পিতলের পাতের খানিকটা অংশ চাপ দিয়ে উচু করে তোলা হয়, যখন সেই স্থানটির পিতল কেটে যায় তখন কলে একটা শব্দ হয় আর সেই পরিমাণ বলের স্থানে যত point নম্বর থাকে, তাই তার শক্ত নরমের পরিমাণ ধরা হয়।

ডিরেক্টর সাহেব যে লোকটিকে আমার সঙ্গে দিয়েছিলেন, তিনি এই Laboratoryর একজন কার্য্যকারক, তিনি সকল বিষয়ই আমাকে বেশ ভাল ক'রে বুঝিয়ে দিলেন।

সমস্ত কারখানার কাঙ্গক্ষম হাতে তোলা-পাড়া ক'রে দেখতে আমার হাত খুব ময়লা হয়েছিল, আমরা Laboratory ঘরে সাবান-জলে হাত পরিষ্কার ক'রে ধুয়ে বিশ্রাম ক'রলাম।

তারপর পুনরায় আপিস ঘরে গিয়ে ম্যানেজার সাহেবের সঙ্গে দেখা

করে তাঁকে ধন্যবাদ জানালাম। ডিরেক্টর তখন উপস্থিত ছিলেন না। ম্যানেজার সাহেব আমাকে চা দিয়ে আপ্যায়িত করলেন। পিতলের শিল্প বাণিজ্য সম্বন্ধে অনেক কথাও তাঁর সঙ্গে হ'ল। পুরা আড়াই ঘণ্টা কারখানার কাজ দেখে সাড়ে পাঁচটার সময় বিদায় নিলাম।

সন্ধ্যার পর এখানকার রয়াল থিয়েটারে অভিনয় দেখলাম। লণ্ডনে এবং স্কটলণ্ড ও আয়ারলণ্ডের বড় বড় সহরে অনেক ভাল ভাল থিয়েটার দেখেছি। স্কটলণ্ডের নাচ অতি আশ্চর্য্য, কিন্তু এই বার্মিংহামের থিয়েটারের বিশেষত্ব এই যে, বৈজ্ঞানিক শিল্পের সাহায্যে এমনই আশ্চর্য্য কৌশল দেখান হয় যে, অধিকাংশ দৃশ্যগুলিই যাদুকরের অলৌকিক কৌশলের মত মনে হয়। বার্মিংহাম শিল্প বিজ্ঞানের কেন্দ্র, তাই এখানকার থিয়েটারেও শিল্প বিজ্ঞানের চরমোৎকর্ষ দেখান হয়। বার্মিংহাম আমার বড় ভাল লেগেছে।

ল্যাঙ্কাশায়ার

ম্যাঞ্চেষ্টার একটি শ্রেষ্ঠ শিল্প সম্বন্ধীয় নগর। তুলার কাপড় সরবরাহ কার্যে এই সহরটি সমগ্র পৃথিবীতে শ্রেষ্ঠ স্থান অধিকার করেছে। এটি ল্যাঙ্কাশায়ার নামক জেলায় অবস্থিত। কিন্তু ল্যাঙ্কাশায়ার, চেসায়ার, ডার্বিসায়ার প্রভৃতি কয়েকটি জেলা নিয়েই এই ম্যাঞ্চেষ্টারের কল কারখানার প্রভাব। মাত্র এই অঞ্চলটুকু নিয়েই ইংলণ্ডের তিন ভাগের এক ভাগের উপর অর্থাৎ প্রায় দু'কোটি লোক বাস করে। এদের অধিকাংশই শিল্পক্ষেত্রে জীবিকা নির্বাহ করে থাকে। ল্যাঙ্কাশায়ার অঞ্চলটি বার মাসই কুয়াসায় ভরা থাকে, আর ঝিমঝিমে বৃষ্টি হয়। এই রকম হাওয়া-বৃষ্টি যুক্ত দেশ তুলার সূত্র তৈরী করবার পক্ষে সুবিধাজনক অর্থাৎ বাতাসে জল থাকলে সূতার পাক আঁটে ভাল। এইরকম বৃষ্টি কুয়াসা

সত্বেও যতদূর দৃষ্টি চলে, ততদূরই কেবল কলকারখানায় পূর্ণ দেখা যায়।

বাস্মিংহাম সহরটি অতি প্রকাণ্ড। শিল্প ও ইঞ্জিনিয়ারিং কার্য বিষয়ে এটা পৃথিবীর মধ্যে সর্বশ্রেষ্ঠ। ছেলেদের ভূগোল শিক্ষার মানচিত্রে আমরা কেম্ব্রিজ, অক্সফোর্ড প্রভৃতি কয়েকটি স্থান বড় বড় অক্ষরে অঙ্কিত দেখতে পাই; কিন্তু বিলাতে বাস্মিংহাম, ম্যাঞ্চেষ্টার, লিভারপুল, সেফিল্ড, গ্লাসগো, বেলফাষ্ট প্রভৃতি শিল্প-বাণিজ্যের স্থানগুলিই বড় বড় অক্ষরে অঙ্কিত। আমাদের দেশে শিক্ষা বলতে বি-এ, এম্-এ ডিগ্রী নেওয়া বোঝায়। বিলাতের বড় শিক্ষার বিষয়—বাণিজ্যতত্ত্ব, শিল্প, নৌবিজ্ঞা, খনিতত্ত্ব, কৃষি, পশুপালন, মৎস্য-ব্যবসায় প্রভৃতি, অর্থাৎ কেবল ভাত-কাপড়ের চিন্তা নিয়েই এদের শিক্ষাপদ্ধতি অস্থাপিত হয়।

আমার এই কথাগুলো হয়ত আমাদের দেশের উচ্চ শিক্ষিত লোকদের মোটেই ভাল লাগবে না কিন্তু তথাপি আমি বলব, আমাদের দেশে যে শিক্ষার ধারা চলছে, তা জীবন ধারণের উপযোগী কোন কার্যকরী শিক্ষাই নয়; এমন কি, সায়েন্স, ইঞ্জিনিয়ারিং, ল প্রভৃতি যে সব উচ্চ শিক্ষা—এগুলিও কার্যকরী শিক্ষার নামে একটা বিলাতী অলুকের মাত্র।

বিলাতে চাষবাসের জমি কম, আবশ্যক খাত দেশে জন্মান সম্ভব হয় না, তাই আবার কেউ কেউ ছোট্টো নানা দেশে। নানা দেশ থেকে কাঁচা মাল এনে ব্যবহার্য দ্রব্য তৈরী করে দশগুণ, বিশগুণ, শতগুণ দামে বিদেশে বিক্রী করে অর্থ সংগ্রহ করে। এদের দেশের শিক্ষাদীক্ষা সমস্তই এই সব শিল্প-বাণিজ্য নিয়ে। চারদিকে সমুদ্রে ঘেরা দেশ, এর সমুদ্র-তীরবর্তী নগরগুলি বাণিজ্যপ্রধান আর ভিতরের নগরগুলি শিল্পপ্রধান। শিল্প-বাণিজ্যের মধ্য দিয়েই ইংরেজ গোটা পৃথিবীটাকে ভোগ করছে।

নবম অধ্যায়

[ওরিয়েন্ট লাইনের জাহাজে]

লগুন পরিত্যাগ

বার্মিংহামে বড়দিনের উৎসব দেখছি, এমন সময় দেশ থেকে কনিষ্ঠ সহোদরের চিঠি পেলাম—দেশে ফেরা আবশ্যক। বাস্তবিকই প্রায় একটি বৎসর স্বদূর বিদেশে কাটাচ্ছি, এদিকে যতই আনন্দে থাকি না কেন, যতই অভিজ্ঞতা লাভ করি না কেন—দেশে চারিদিকে ছড়ান কাজ করবার ও আর-আর নানা দিকে আমার অভাবে অনেক ক্ষতি হচ্ছিল।

তখন আমেরিকায় ফিলাডেল্ফিয়া প্রদর্শনীর আয়োজন চলছিল, তাতে শিল্প-বিভাগের কিছু সাহায্যের জন্ত আমার ডাক পড়েছিল, এবং পৃথক ভাবে আমাদের জুয়েলারী ষ্টল করবার জন্তও নিমন্ত্রণ হয়েছিল। কিন্তু দেশে যাওয়ার আবশ্যকতা উপলব্ধি করে আমেরিকায় যাওয়া ক্ষান্ত দিলাম।

দেশে ফিরতে হবে; লগুনে অনেক কাজকর্ম বাকী ছিল, অনেক দেখাশুনাও বাকী ছিল, তাই লগুনে ফিরলাম এবং তিন সপ্তাহের মধ্যে লগুনের কাজকর্ম শেষ করবার বন্দোবস্ত করলাম। আমি আসবার সময় সিটি লাইনে (city line) এসেছিলাম, এবার নূতন পথে আরও কিছু দেখে শুনে ফিরতে হবে—তাই ওরিয়েন্ট লাইনের জাহাজে একটু

ঘুরে যাওয়া মনস্থ করলাম। ওরিয়েন্ট লাইনের যে জাহাজ লণ্ডন থেকে দক্ষিণ ইয়োরোপপথে অষ্ট্রেলিয়া যায়, সেই জাহাজে কলম্বো পর্য্যন্তের জন্ত একখানি তৃতীয় শ্রেণীর টিকিট কিনলাম—দাম ২৮ পাউণ্ড মাত্র ; অর্থাৎ প্রায় চারি শত টাকা। তার পর কলম্বো থেকে ট্রেনে সিংহলের মধ্য দিয়ে গিয়ে জাহাজে পার হয়ে দক্ষিণ ভারতীয় রেলপথে মাদ্রাজ হয়ে কলকাতা যাওয়া যাবে।

লণ্ডন, সোনার লণ্ডন, ইন্দ্রপুরীতুচ্ছকারী লণ্ডন ! সহজে মন তোমাকে ফেলে যেতে চায় না। মাত্র আর তিনটি সপ্তাহ তোমাকে দেখতে পাব ; আবার যে এ জীবনে তোমাকে দেখতে আসব, সে আশা বৃথা কল্পনা মাত্র—ভেবে বড় দুঃখ হচ্ছিল। দেখা শুনাও কত বাকী থেকে গেল—কোন্টা রেখে কোন্টা দেখি, কোন্টা ফেলে কোন্টা কিনি। ভেবেছিলাম, একবার দূরে দরিদ্র পল্লীতে গিয়ে কৃষকদের সঙ্গে দু'চার সপ্তাহ বাস করে বিলাতের কৃষকজীবন ভোগ করে দেখব, সেটা আর ঘটল না—পরদিনই বাইরে বিশ পঁচিশ মাইল দূরে মোটর-বাসে গিয়ে কিংষ্টন অঞ্চলের কয়েকটি কৃষক-পল্লী এক দিনের মধ্যে ঘুরে দেখে এলাম মাত্র। দেখলাম—বিশ-পঁচিশ ঘর কৃষক এক-একটি পল্লী করে প্রান্তর মধ্যে বাস করছে,—ছোট ছোট বাড়ী, ছোট ছোট ঘর। কলের লাজল আর ঘোড়া আছে, এ ছাড়া গরু, ভেড়া, ছাগল, মুরগী আমাদের দেশেরই মত। ঘর বাড়ী মোটেই নোংরা নয়।

লণ্ডনের বাকী দেখাশুনাগুলি দিনের পর দিন দ্রুত শেষ করলাম। ওয়েল্লী পার্কে গিয়ে একজিবিশনের বাড়ীগুলি একদিন দেখে এলাম। দেখলাম যেখানে ছয়টি মাস পর্য্যন্ত কাটিয়েছি, দৈনিক তিন লক্ষ করে লোকের সমাগম দেখেছি, সেই স্থানের প্রকাণ্ড অট্টালিকাগুলি জনশূন্য হয়ে পড়ে রয়েছে—তিন-চার মাইল বেষ্টনীর অন্তর্গত সমস্ত

প্রদর্শনী ক্ষেত্রটি একেবারে ফাঁকা ধূ ধূ করছে। প্রদর্শনীর কয়েকটি মনোরম দৃশ্যের ফটো নিলাম।

প্রায় একটি বৎসর লগুনে বাস করে দেশী-বিদেশী যে সকল বন্ধু লাভ করেছিলাম, দু'চার দিনের মধ্যেই তাঁদের কাছে বিদায় নিয়ে এলাম—দু'একজন ইংরেজের সঙ্গে এতই ঘনিষ্ঠতা হয়েছিল যে, বিদায় নেবার সময় জীবনে আর দেখা হবার আশা নাই—এই কথাটা স্মরণ করে প্রাণ অত্যন্ত ব্যথিত হয়েছিল।

১ই ফেব্রুয়ারী (১৯২৫) বেলা ৯টায় টিলবেরী ডক থেকে আমাদের জাহাজ ছাড়বে। এ সময় আমি লগুনের পূর্বপ্রান্তে “লিভারপুল-ষ্ট্রীট হোষ্টেল”টিতে বাস করছিলাম। এদিন প্রত্যুষে জিনিষপত্র ঠিক করে টিলবেরী যাত্রার জন্য Fenchurch ষ্টেশনে এসে ট্রেনে চাপলাম। এটি মাত্র আমাদেরই জাহাজের যাত্রীর জন্য স্পেশাল ট্রেন। আমার পার্শ্বে একটি যাত্রী আমাকে জিজ্ঞাসা করলেন “আপনি কোথাকার যাত্রী?” আমি বললাম “ভারতবর্ষের যাত্রী, কলম্বো নামব।” তিনি বললেন “তবে তো বাড়ীর কাছে।” তাঁকে জিজ্ঞাসা করে জানলাম, তিনি সপরিবারে অষ্ট্রেলিয়া চলেছেন। আমার একুশ দিনের পথ, তাঁর পথ চল্লিশ দিনের। সকাল সাড়ে সাতটায় ট্রেনটি ছেড়ে আটটায় বিশ মাইল এসে টিলবেরী ডকে আমাদের জাহাজের কাছে থরল, তারপর মাত্র আধঘণ্টার মধ্যে স্মৃষ্ণলার সঙ্গে আড়াই হাজার যাত্রী জাহাজে তোলা হল। যাত্রীদের মালপত্র সমস্ত জাহাজ কোম্পানীর তত্ত্বাবধানে ক্রেণে করে, পৃথকভাবে তোলা হ'য়েছিল। প্রত্যেক যাত্রী কেবিন নম্বরের কার্ডখানি হাতে করে যার যার সিটে (seat) গিয়ে হাজির হল। আমার সিট ছিল ১২৫১ নম্বরের। দেখলাম, একটি কেবিনে তিনজন লোক জুটেছি আমরা—একজন সিংহলী, একজন

চীন দেশীয় আর আমি বাঙ্গালী। আমাদের কেবিনের চারটি সিটের
অপর একটি খালি ছিল।

জাহাজখানির নাম “Oronsay.” এই সিটি-লাইনের কয়েকখানি
জাহাজের মধ্যে যে দু’খানি সব চেয়ে বড়, তারই একখানা এই।
অপর খানির নাম “Orama”। এই দু’খানি জাহাজ একই গঠনে
একই সময়ে গ্লাসগোতে প্রস্তুত হয়। একই লাইনের একই প্রকৃতির
এই দু’খানিকে লোকে ‘হুই বোন’ বলে থাকে। এত বড় জাহাজ
আমাদের কলকাতার দিকে দেখা যায় না—দীর্ঘে ছয় শত আটান্ন
ফিট। প্রত্যেক খানিতে বিশ হাজার টন অর্থাৎ পাঁচ লক্ষ ষাট
হাজার মণ মাল ধরে। খুব বড় দু’খানির একখানি ব’লে আমি
আগে থেকেই এই Oronsay জাহাজখানিতে যাত্রা করা মনোনীত
করেছিলাম। দেখলাম, আড়াই হাজার অষ্টেলিয়া-যাত্রী ইংরেজে
জাহাজখানি পূর্ণ হয়েছে।

টিলবেরী ডক থেকে জাহাজখানি ছাড়তেই মনে একটা বিশেষ রকম
শূন্যতা অনুভব করলাম। জাহাজ টেম্‌সের দু’ধারের সৌন্দর্যের মধ্য
দিয়ে সুাগর অভিমুখে চলতে আরম্ভ করল, আমার নয়ন, মন কিন্তু
লগুনের পানে চেয়ে রইল। বেলা ১২টার জাহাজ সমুদ্রে এল।
দেখলাম, পঞ্চাশ মাইল পর্যন্ত টেম্‌সের দু’ধারে কলকারখানা প্রভৃতিতে
ভরপুর।

সন্ধ্যার কিছু পূর্বে আমরা ডোভরু বন্দরের নিকট দিয়ে চললাম,
কিছু দূরে যেতেই সন্ধ্যায় ডোভরু বন্দর আলোকমালায় উজ্জ্বল হয়ে
উঠল। শেষ রাত্রিতে পোর্টস্মাউথে জাহাজ ধরেছিল।

বিস্কে উপসাগর

পরদিন বিস্কে উপসাগরে পড়লাম। জাহাজের একটি কক্ষচারী এসে আমাদের কেবিনের দরজায় একটি নম্বরযুক্ত লেবেল এঁটে দিয়ে গেল। তাতে লেখা আছে—বিপদের ঘণ্টা পড়লে ডেকের উপরে এই নম্বরের লাইফ-বোটের নিকট গিয়ে হাজির হবে। একটু পরেই আমাদের ডেকের উপরে সেই স্থানে নিয়ে প্রত্যেকের গলায় এক একটি Life-Belt বেঁধে দেওয়া হল এবং তা বাঁধবার কায়দাও শিখিয়ে দেওয়া হল। এই রকম বিশ-পঁচিশ জন করে যাত্রী এক একখানা লাইফ-বোটের নিকট দাঁড় করিয়ে মিনিট পনের পরে ছুটি। সে অতি বিস্ত্রী ব্যাপার। ক্যান্ডিসে মোড়া দু'খানা হালকা কাঠের টুকরা পিঠের দুই দিকে ফিতে দিয়ে বাঁধা—এই হল Life-Belt পরা।

বিস্কে উপসাগরে সর্বদাই পাগলা ঢেউ। সকল যাত্রীই বিস্কে উপসাগরে জাহাজের দোলানীতে কাতর হয়ে পড়েছিল। সারাদিন পর্য্যন্ত কমিবেশী ভাবে এই ঢেউয়ের দোলানী ভোগ করলাম। এর মধ্যে পাঁচ বার বমি হয়েছিল। সেদিন কিছুই খেতে রুচি হয় নি। তার পর দুই দিন পোর্টুগালের ধার দিয়ে জাহাজ চলেছিল কিন্তু তীরে জমির পাড় ব্যতীত আর বিশেষ কিছু দেখি নি। পোর্টুগালের রাজধানী লিস্বন সহর প্রায় সমুদ্রেরই তীরে অবস্থিত, কিন্তু সে স্থান রাত্রিতে কি দিনে অতিক্রম করলাম তাও বুঝি নি। জাহাজে পঁচিশ শত যাত্রী ছিল, এর দুই হাজারের উপর তৃতীয় শ্রেণীর। দ্বিতীয় শ্রেণী নাই, বাকী শ'পাচেক প্রথম শ্রেণীর। অধিকাংশই অষ্ট্রেলিয়া-যাত্রী ইংরেজ।

আমাদের জাহাজ কুয়াসার দেশ ছেড়ে পোটু গাল ও স্পেনের কাছ পর্যন্ত
পরিষ্কার মধুর রৌদ্রের দেশে এসে পড়তেই সমস্ত প্যাসেঞ্জার আমরা
কেবিন ছেড়ে ডেকের উপর যার যার চেয়ার নিয়ে এলাম। তখন
থেকে আমাদের সারা দিন ডেকের উপরেই আমোদ আহ্লাদে কাটতে
থাকল। পুরুষরা অনেকেই বই নিয়ে, মেয়েরা কেউ বা বই, কেউ
সেলাইএর কাজ নিয়ে মগ্ন থাকতেন। ছেলে মেয়েগুলি আনন্দে
সারাদিন ডেকের উপরেই নানা রকম খেলা করত।

জিব্রাল্টার (স্পেন)


১১ই ফেব্রুয়ারী তারিখে সকাল ৮টায় জাহাজ জিব্রাল্টার বন্দরে
এসে ধরল। জিব্রাল্টার স্পেনরাজ্যের অন্তর্গত ইংরেজাধিকৃত সামরিক
বন্দর। পোতাশ্রয়টি পরম রমণীয়। প্রায় তিন দিকই পাহাড়ে ঘেরা,
উপরে বন্দর ক্রমে উঠু হয়ে পাহাড়ের কটিদেশ পর্যন্ত উঠেছে—তার পর
ভূর্গ। পোতাশ্রয়টি অনেক জাহাজে পূর্ণ, তার মধ্যে দু'খানি বড় যুদ্ধ-
জাহাজ দেখা গেল। বহুদূর বিস্তৃত কত কি আপিস সমুদ্রের ধার দিয়ে
রয়েছে।

বেলা ৮টার প্রাতর্ভোজনের পর জাহাজের যাত্রী আমরা প্রায়
সকলেই সহর দেখতে ভীরে নামলাম। নেমেই আমি প্রথমে সহরের
সদর রাস্তার বড় বড় দোকানগুলি দেখলাম। আগের রাতে জাহাজের
দোলানীতে আমার ঘড়িটির কাচ ভেঙে গিয়েছিল। যাবার সময় একটি
দোকানে সেটি মেরামতে দিলাম, এক ঘণ্টার মধ্যেই দিতে হবে জানিয়ে
গেলাম। চার্জ করল এক শিলিং। দেখে শুনে ফিরবার পথে ঘড়িটি
নিলাম। দেখলাম, ইউরোপের নানা জাতীয় লোকের দোকানপসার
এখানে রয়েছে। ভারতীয় একটি বিরাট দোকান দেখে বড়ই আনন্দ

অনুভব করলাম। স্বত্বাধিকারী বোম্বাই প্রদেশী হিন্দু। তাঁর সঙ্গে আলাপ পরিচয় বেশ চলল। ভারতীয় রেশম, মহীশূরের চন্দন কাঠের দ্রব্য, কাশীর ও মোরাদাবাদের পিতলের খেলনা ও বাসন, হস্তী-দন্তের ও কাল কাঠের খেলনা, নানা প্রকারের মালা প্রভৃতিতে দোকানখানি সুসজ্জিত। কয়েকজন ইউরোপীয় মহিলা জিনিসপত্র বিক্রি করছে। স্বত্বাধিকারী আমাকে চা খেতে অনুরোধ করায় আমি চা বিশেষ খাই না জানাতেই গরম দুধ ও ওখানকার লঘু খাবার কিছু আমাকে খাওয়ালেন। বিদেশে ভারতবাসীর এত বড় কাজ-কারবার দেখে আমি বড়ই আনন্দ অনুভব করলাম। জিভ্রান্টারে আরও কয়েকখানি ভারতবাসীর দোকান আছে। এখানে ভারতীয় লোকসংখ্যা ষাট জন মাত্র। এর বেশী ভারতীয় এখানে থাকতে স্থানীয় গবর্নমেন্ট মঞ্জুর করেন না।

তার পর পাহাড়ের উপর খানিকটা উঠে চারদিকের দৃশ্য দেখলাম। স্পেন রাজ্য—তবুও কথাবার্তা কইতে বিশেষ অসুবিধা নাই—কারণ অনেকেই ইংরেজী জানে। পাহাড়ের উপরেই বিখ্যাত দুর্গ, আমি দুর্গের দ্বার পর্যন্ত গিয়ে দেখে এলাম। দুর্গের উপরে পাহাড়ের গায়ে সারি সারি কামান সাজান রয়েছে। অনেকক্ষণ পর্যন্ত পূর্ব-দক্ষিণে ভূমধ্যসাগর এবং পশ্চিম-উত্তরে জিভ্রান্টারের চতুঃপার্শ্ববর্তী প্রাকৃতিক সৌন্দর্য দেখে নয়ন মন তৃপ্ত করলাম। বহু দিন পরে চক্চকে সূর্য্য-কিরণ পেয়ে বেশ নূতন লাগল। উপর থেকে হারবারের মধ্যস্থ জাহাজ সমূহ বড়ই সুন্দর দেখাচ্ছিল। আমাদের জাহাজখানিই ছিল সবচেয়ে বড়। পশ্চিমে অনতিদূরে Algeciras বন্দর দেখা যাচ্ছিল; এইখান থেকে ইউরোপের নানা দেশে রেল গিয়েছে।

পাহাড় থেকে খানিকটা নেমেই পথে আমাদের জাহাজের ইংরেজ সহযাত্রী অনেককে পাহাড়ে উঠতে দেখলাম। খানিকটা নেমে সহরে



জিব্রাল্টার বন্দর (স্পেন)।

গাফাডেব উপর ইংরেজের দুর্গ — ১৬৩ পৃষ্ঠা



অষ্ট্রেলিয়ার চাষ— ১৬২ পৃষ্ঠা

প্রবেশ করতেই ছাঁটি স্থলের মেয়েকে সঙ্গী পেলাম। তারা উপরে বেড়াতে এসেছিল। জানলাম, জিব্রান্টার ইংরেজাধিকৃত হলেও স্পেনীয়েরা স্থলে ইংরেজী শেখে না, স্পেনীয় ভাষাই মাত্র শেখে। তাদের একটি সামান্য ইংরেজী জানে, তাই তার সঙ্গেই কথাবার্তা চলল। দেখলাম, প্রায় ইংরেজের মতই তারা অসকোচে আমার সঙ্গে আলাপ করল এবং পাহাড়ের আরও দু'একটা অংশ আমাদের দেখাল।

ফিরবার পথে জিব্রান্টার বাজার দেখলাম। বাজারে অনেক প্রকার শাক তরকারী দেখা গেল, ইংলণ্ডে এমন টাটকা শাক তরকারী দেখা যায় নাই। স্পেনের মিঠেকুমড়া খুব বড় আর সুমিষ্ট। আমি দোকানদারদের কাছ থেকে খুব বড় কুমড়ার বীজ কতকগুলি কাগজে মুড়ে নিলাম।

জাহাজে ফিরতে পথে অনেক ছবির দোকান দেখলাম। স্থানীয় দৃশ্যের কার্ড কয়েকখানি কিনলাম। কয়েকটি মিশর দেশীয় লোক রাস্তায় পাথরের মালা, দূরবীক্ষণ যন্ত্র প্রভৃতি অনেক রকম জিনিস বিক্রয় করছিল; সাহেবেরা কেউ কেউ দূরবীক্ষণ কিনলেন। মিশরীয় ঐ লোকগুলি খুবই ঠগ, বেশী দাম চায় কিন্তু অতি কমে বিক্রি করে।

বিকাল ৪টায় জাহাজ জিব্রান্টার থেকে ছেড়ে ভূমধ্যসাগরের মধ্যে প্রবেশ করল। ক্রমে দূরে যেতে পাহাড়ের উপরকার দুর্গটিকে সীমান্তপথে দূর্জয় প্রহরীর গায় দণ্ডায়মান রয়েছে বলে মনে হচ্ছিল। সন্ধ্যার অন্ধকারের সঙ্গে সঙ্গে জাহাজ ভূমধ্যসাগরের মধ্য দিয়ে পূর্বাভিমুখে চলল—ডাইনে আফ্রিকা মহাদেশ, বামে স্পেন রাজ্য।


টুলন (ফ্রান্স)

ইভিজা, মিজকা, মিনকা দ্বীপগুলি দক্ষিণে রেখে পরদিন আমরা ফরাসী রাজ্যের টুলন বন্দরে এলাম। টুলনটিও ফরাসী রাজ্যের সামরিক বন্দর। বড় বড় যুদ্ধ-জাহাজ সজ্জিত রয়েছে, তিনখানা সব্‌মেরিন-জাহাজ জলের মধ্য দিয়ে অতি দ্রুত যেতে দেখলাম। সব্‌মেরিনের উপরিভাগ সামান্য মাত্র দৃষ্ট হয়, জল ভেদ করে প্রচণ্ড বেগে চলতে থাকে।

টুলন বন্দর জাহাজ নির্মাণ, মৎস্য ব্যবসায়, লেস প্রস্তুত, মণ্ড প্রস্তুতের জন্য বিখ্যাত। বেলা ৯টায় বন্দর দেখতে বের হলাম। একা একা চলছি, যাকে যা জিজ্ঞাসা করি সকলেই মাথা নেড়ে কেবলমাত্র একটি “না” প্রকাশ করে, আর কোন উত্তর দিতে পারে না—অর্থাৎ একজনও ইংরেজী জানে না—সকলেই ফরাসী ভাষা বলে। ব্যাঙ্কে যাওয়া আবশ্যিক ছিল, আমার লেটার অব ক্রেডিট (Letter of Credit) এর হিসাব থেকে কিছু টাকা তুলতে হবে। ব্যাঙ্কের লেটার অব ক্রেডিট নিয়ম হয়ত অনেকে জানেন না। ব্যাঙ্কের হিসাব থেকে কিছু টাকা খরচ লিখে নিয়ে লেটার অব ক্রেডিট খাতায় জমা দিতে হয়। ব্যাঙ্কে হিসাব না থাকলেও টাকা জমা দিয়ে লেটার অব ক্রেডিট কেনা চলে। বড় বড় ব্যাঙ্কগুলির সঙ্গে পৃথিবীর প্রায় বড় বড় যায়গার ব্যাঙ্কের যোগাযোগ থাকে। ঐ লেটার অব ক্রেডিটে খরচ লিখে নানা দেশের ঐ সকল ব্যাঙ্ক থেকে টাকা লওয়া যায়। আমি ব্যাঙ্কে যাবার জন্তে একটি পুলিশকে জিজ্ঞাসা করায় যখন সে কিছুই বুঝল না, তখন টুলনের সেই ব্যাঙ্কটির নাম লিখে দেখালাম, তখন পুলিশ আমাকে একটি ট্রামে তুলে দিল। ট্রামের কণ্ডাক্টরকে সেই ব্যাঙ্কে যাবার নাম করে একটা টিকিট দিবার জন্য একটি ছ-পেনী হাতে দিলাম কিন্তু বিলাতী টাকা



আকাশে জেপলীন, সাগরে সবমেরিন
টুলন বন্দর, ফ্রান্স— ১৩৬ পৃষ্ঠা



ওখানে চলে না, তাই কণ্ঠের কিছু না নিয়েই আমাকে নির্দিষ্ট স্থানে নিয়ে নামিয়ে দিল।

ট্রাম থেকে নেমে কোন্‌দিকে যাব কিছুই বুঝি না, একটু হেঁটে গিয়ে একটা চৌমাথায় এগিয়ে দেখলাম, একটি যুবতী নানা রকমের লোজেঞ্জস নিয়ে বিক্রির জন্ত রাস্তার উপর সুন্দর একখানি দোকান সাজিয়ে বসে আছে। তার জিনিসের টেবিলের একপাশেই একখানি কাগজের বোর্ডে নোটিশ দিয়েছে—“English spoken” অর্থাৎ ইংরেজীতে কথা কইতে পারি। দেখেই হেসে তাকে বললাম—“তুমি ত ইংরাজী কইতে পার দেখছি।” সেও হেসে বলল—“হাঁ, আমি একটু ইংরাজী জানি।” জানলাম, ইংলণ্ডে তার মাতুলালয়। তখন তার কাছ থেকে টুলনের প্রধান প্রধান দেখবার বিষয় জেনে নিলাম, আর আমার ব্যাকের স্থান নির্ণয় করে নিলাম। ব্যাক্কে গিয়ে এক পাউণ্ড চাইতেই তারা এক পাউণ্ড মূল্যের ফরাসী মুদ্রা দিল। একশত “সেন্টিম” এ (centim) এক “ফ্রাঙ্ক” (frank), পঁচিশ ফ্রাঙ্কে এক পাউণ্ড হয়। আমি সেই English spokenএর কাছে পুনরায় ফিরে এসে দেশে নেবার জন্ত নানারকমের লোজেঞ্জস ও চক্লেট কিনলাম। তারপর সহরের উত্তর প্রান্তে গিয়ে একটা পাহাড়ের গায়ে কতকটা উঠে সারা সহরটির সৌন্দর্য্য দেখলাম। একটা বড় স্থলের টিফিনের ছুটিতে অনেকগুলি ছেলে বাইরে আসতেই তাদের সঙ্গে ফরাসী দেশ সম্বন্ধে অনেক কথা জেনে নিলাম। তারা আমাকে পেয়ে খুব কৌতূহলের সঙ্গে ভারতের সম্বন্ধে অনেক কথা জিজ্ঞাসা করে নিয়েছিল। টুলনের বড় থিয়েটার-বাড়ীটি দেখলাম—বাইরেও চমৎকার সাজানো। বড় বড় চৌমাথায় মেয়ে বৃক্ষগোলালী পথিক লোকের জুতা বৃক্ষ করছে—সে আয়োজন অতি গুরুতর। বড় টেবিলের

উপর চেয়ার, সেই চেয়ারে বসে টেবিলের উপর পা রেখে লোকে জুতা সাফ করাচ্ছে, আর বুরুষকারিণী মহিলা নীচেয় চেয়ারে বসে টেবিলের উপর স্থাপিত পা দুখানি ধরে বুরুষ দিয়ে জুতা সাফ করে দিচ্ছেন ! অর্থাৎ চেয়ারে বসে টেবিলে কাজ করা হচ্ছে ।

মাদাগাস্কারী ভাই

পথে ছ'টো কালো যুবক দেখলাম, বুঝলাম ইয়োরোপীয় নয়—
পরিচয়ে জানলাম, ফ্রান্সের অধিকৃত মাদাগাস্কার দ্বীপের অধিবাসী
ফরাসী পুলিশ। মাদাগাস্কার পূর্ব-আফ্রিকার একটি দ্বীপ। তাদের
সঙ্গে পরিচয় করতেই তারা আমার পরম আত্মীয় হয়ে দাঁড়াল। তারা
আধা ইংরাজীতে আমাকে জানাল যে তারা হিন্দু, আর আমিও হিন্দু,
কাজেই তারা আমার জাতি-ভাই। ছ'একটা ফরাসী লোককেও ধরে
শুনাল যে, দেখে আমাদের জাত ভাই দেখে, এরা হিন্দু আর আমরাও
হিন্দু। তারা আমাকে খুবই আদর করে সহর ঘুরিয়ে দেখাতে ইচ্ছা
প্রকাশ করল, আর খুব ভাল জায়গায় নিয়ে আমাকে উপস্থিত করবে,
তাতে আমার অনেক আনন্দ হবে ইত্যাদি জানাল। তাদের “অতি
ভক্তি” আমার কাছে “চোরের লক্ষণ” বলেই মনে হল। আমি তাদের
কাছ থেকে অব্যাহতি পাবার জন্তে আমাকে কিছু খাবার কিনে
খেতে হবে বলে ফিরলাম। তারা ছ'জনেও আমার সঙ্গে সঙ্গে এল।
একটা সুসজ্জিত খাণ্ড দ্রব্যের দোকানে তারা আমাকে নিয়ে গেল।
বহু প্রকারের নূতন খাণ্ড দ্রব্য দেখে কোন্টা রেখে কোন্টা কিনব
ভেবে আমি একেবারে ‘বীশ বনে ডোম কানা’ হয়ে গেলাম।
পরে সুন্দর অয়েল-পেপারে মোড়া ভিতরে খাণ্ড দ্রব্যের সবুজ আভা

স্বচ্ছ কাগজের ভিতর দিয়ে দেখা স্বেচ্ছ দেখে সেই জিনিসটা ছয় আনার তুল্য ফরাসী মুদ্রা দিয়ে কিনলাম। তারপর সেই মাদাগাস্কারী জ্ঞাতি-ভাইরা আমাকে একটা মদের দোকানে নিয়ে যেতে চাইল—তখন বুঝলাম আমি তাদের কতখানি জ্ঞাতি-ভাই। সম্ভবতঃ তারা আমাকে আরও বেশী রকমের কুস্থানে নিয়ে যাবার মতলব করছিল। যা হোক, আমি সেইখানেই তাদের কাছ থেকে বিদায় নিলাম। নূতন বিদেশী ষাট্রী পেয়ে ঠকাবার চেষ্টা ইংলণ্ডে, স্কটলণ্ডে, আয়ারলণ্ডে কখনও দেখিনি।

রকমারী

তারপর আমার নূতন রকমের খাচরব্যটার কাগজের মোড়ক খুলে দেখলাম, সবুজ পাতায় জড়ানো কাঁচা মাছের ডিম একজোড়া। নূতন জিনিসটি কিনে একেবারে ফেলে দিতে মন সহজে রাজী হইল না, তাই পকেটে রেখে দিলাম। পরে এক চৌমাথার মোড়ে দেখলাম, একটি দোকানে চেষ্টনার্ট নামে কাঁঠাল বীজের মত একপ্রকার জিনিস বালিতে ভেজে বিক্রি করছে; আমি সেই দোকানদারটাকে বললাম—“আমায় এই ডিম জোড়াটি তোমার ঐ বালিতে ভেজে দেবে?” সে তাতে অস্বীকার জানাল। কেনই বা সে আমার এই অভ্যর্থনাচিত অতুরোধ রক্ষা করবে?

সন্ধ্যার আগেই জাহাজের দিকে ফিরলাম—সমুদ্রের দিকে হারবারে এসেই দেখলাম, তীরভূমি অতি সুন্দররূপে বাঁধা। তীরে একটি ফরাসী বীরের স্মৃতিস্তম্ভ প্রস্তর মূর্তি সাগরমুখী হ’য়ে দণ্ডায়মান রয়েছে। পরে সারি সারি রেষ্টুরেন্ট হারবারের কূলে মনোহর ভাবে সজ্জিত রয়েছে দেখলাম। বহু পরিমাণ কর্কের খণ্ড খণ্ড শ্রেণীবদ্ধ গাছ তীরে

সাজান রয়েছে। সন্ধ্যায় জাহাজের নিকটে এসে আমার ফরাসী মুদ্রাগুলির ছ'চারটি নমুনা রেখে বাকিগুলি মণি-চেঞ্জারের নিকট থেকে ইংরাজী মুদ্রায় বদলি করে নিলাম। সামান্য কিছু কমিশন নিল।

আমাদের জাহাজে উঠবার থেয়া নৌকাখানির জন্ত আধঘণ্টা কাল অপেক্ষা করতে হয়েছিল, এই অবকাশে একটি যুবতী নানারকম কেক বিস্কুট নিয়ে আমাদের কাছে বিক্রি করতে এল। এ সময় আমাদের জাহাজের অনেক যাত্রীই পারঘাটে এসে উপস্থিত হয়েছিল। মেয়েটির আধা ইংরাজী রসিকতার চোটেই অনেকে তার কেক বিস্কুট কিনতে বাধ্য হ'ল। আমি যে নীরস মানুষ, আমিও সে রসে একটু দ্রবীভূত হয়ে তার বিস্কুট কিনেছিলাম। সন্ধ্যার অন্ধকারে আমরা জাহাজে পৌছলাম। সেদিনকার রকমারী কথার আর একটু বাকি রাখি কেন?—সেই কাঁচা মাছের ডিম জোড়াটির কথা। জাহাজে থাবার জিনিসের অভাব নাই, তবু মনের ঔৎসুক্য রইল, সেই ডিম জোড়াটির স্বাদ গ্রহণের জন্ত। জাহাজে যাত্রীদের নিজের রান্নার কোন ব্যবস্থা নাই, আগুন জালবারও হুকুম নাই। তখন স্নানের ঘরে গিয়ে কুমালে ঐ ডিম মুড়ে বাষ্পযুক্ত প্রবল গরম জলের কলের মুখে বেঁধে কল খুলে দিলাম। পনের মিনিট মধ্যেই সুসিদ্ধ হয়ে গেল, অধিকন্তু সেই লোনা ডিমের তীব্র লবণ ধুয়ে গিয়ে একটু মধুর হল। ডিম থেয়ে দেখলাম, আমাদের দেশের মাছের ডিমের মত স্বাস্থ্য নয়; যা হোক খাওয়া গেল।

সেই রাতেই জাহাজ ছেড়ে দিল।

নেপল্‌স্‌

ফ্রান্সের টুলন সহর থেকে ১৩ই ফেব্রুয়ারী জাহাজ ছেড়ে ১৫ই তারিখে ভোরে আমরা ইটালীর কাছে এসেছি। সম্মুখে প্রায় বিশ মাইল দূরে থেকে বিখ্যাত আগ্নেয় পর্বত বিষুবিয়সের গগন-বিস্তারিত ধূমোদগারণ দেখা গেল। জাহাজ ক্রমে এগুতেই সূর্য্যোদয়ের সঙ্গে সঙ্গে সমগ্র বিষুবিয়স পর্বত ও তার পাদমূলে রমণীয় নেপল্‌স্‌ বন্দরটি ফুটে উঠলো। ক্রমে আমরা ছোট উপসাগরটির মধ্যে প্রবেশ করলাম। এটি আট-দশ মাইল পরিধি বেষ্টিত ভূমধ্যসাগরের অংশ। এই বৃহদায়তন জলাশয়টির তিন দিক বেঠন করে এই নেপল্‌স্‌ বন্দর। এই ঘন সন্নিবন্ধ সহরের বেঠননী আবাস ক্রমে পর্বতের গায়ে উর্দ্ধগামী হয়েছে। সকলের শেষে বিরাট বিষুবিয়সের শীর্ষদেশ আকাশ ছেয়ে ঝেঁত ও ধূসর বর্ণের ধূম উদগীরণ করছে। পাঠক একবার ক্ষণকাল এ দৃশ্যটি চিন্তা করুন। জাহাজ ক্রমে তীরে আসতে সবই স্পষ্ট হয়ে উঠলো। সকাল ৯টায় প্রাতর্ভোজন শেষ করতেই জাহাজ তীরে বাঁধা হল।


সকাল ১০টায় নেপল্‌স্‌ সহর দেখতে বের হলাম। বিদেশে একা বেড়াতে আমি ভালবাসি; কারণ আমার রকমারি দেখাশুনার দৌরাশ্রের ভাগী হবার মত লোক মেলে না। আমি যে রাস্তাটি ধরে চললাম, সেটি অতি প্রশস্ত আর সেইটাই সহরে প্রবেশের মুখপাত। প্রথমে সহর দেখানো পাণ্ডাদের, তারপর ঘোড়ার গাড়ীওয়ালাদের দৌরাশ্রের হাত কোনমতে কাটিয়ে এসে পড়লাম রাস্তার ছ'ধারের ফেরিওয়ালাদের দৌরাশ্রের মধ্যে। নেপল্‌স্‌ নানা দেশের ষাট্রীর জাহাজ ধরে, কাজেই রাস্তার ছ'ধার দিয়ে ফেরিওয়ালার সংখ্যা খুবই

বেশী। বিক্রির জিনিসের মধ্যে সুন্দর সুন্দর ছবি, ছুরি, পুতুল, খেলনা, ময়দার তৈরী দেশের বিভিন্ন রকমের খাবার—এই সবই বেশী। আমার সহর দেখতেই মন, তাই কোন জিনিসই না কিনে বরাবর সুপ্রশস্ত বহুল জনাকীর্ণ রাস্তাটি ধরেই চললাম।

একটি সুন্দরী, মুখখানি তার কমনীয় বালিকার মত, আমার অতি নিকটে এসে জানাল—একবার তার গৃহস্থানিতে পদার্পণ করতে হবে। আমি প্রথমে কিছুই বুঝলাম না; আবার সে বলল “ঐ-যে আমার গৃহস্থানি দেখা যাচ্ছে—চলুন আমার বাড়ীতে।” আমি বললাম—“কেন?” সে বলল “একটু আনন্দ দান করতে চাই আপনাকে, আমি নাচগান করব, আপনি দেখে খুসী হবেন।” সে আধা ইংরাজীতে কথা বলছিল কিন্তু তার সরলতা আর অমায়িকতার কোন বৈলক্ষণ্য বুঝতে পারিনি। আমাদের দেশে আমরা যাকে গণিকা বলি, এ তাদের মতই একজন। আমি তার প্রস্তাব প্রত্যাখ্যান করতেই সে বলল “কেন যাবেন না?” আমি বললাম—“আমি তোমার এ সকল প্রস্তাব ঘণা করি; আমি তোমায় আমার ভগ্নীর মতই দেখতে চাই।” সে বলল—“ঐ! ভগ্নীর মতই দেখবেন—আসুন।” নিকটেই একটা ইটালীয় পুলিশ দাঁড়িয়ে নিশ্চিন্ত মনে আমাদের এ রঙ্গ দেখছিল, সে কাউকে কিছু বলবার প্রয়োজন মনে করল না। সুন্দরী কথা কহিতে কহিতে একেবারে আপন প্রিয়জনের মত আমার কাঁধের উপর তার সুকোমল হাতখানি দিয়ে দাঁড়াল। আমি যেমন নূতনস্বপ্নীয়, তাতে তার এই নূতন রকমের আকর্ষণের একটা সঙ্গত সীমা পর্য্যন্ত উপভোগ করছিলাম বটে, কিন্তু পরক্ষণেই মনে হল, সম্পূর্ণ অপরিচিত দেশে, বিশেষতঃ একটা অসতী মেয়ের সঙ্গে এতটা ভাল নয়। তখনই ছুটে পালিয়ে গন্তব্যপথাভিমুখে চললাম।



নেপলস্ বন্দর
দূরে বিধুবিঘ্নস অবিরত ধুম উল্লসীর্ণ করিতেছে —১৭১ পৃষ্ঠ




ইটালীর শীতলগণ মৎস্য ধরিতেছে —৬০

খুব আঁটা সহরের মধ্যে এসে পড়েছি, কোথায় যাব কিছু ঠিক হচ্ছে না, লোককে জিজ্ঞাসা করেও কোন ফল নাই, কারণ তারা কথা বোঝে না। নিকটেই দেখলাম ম'ছ তরকারীর বাজার, তখন বাজার প্রায় ভেঙ্গে গেছে। অনেক সন্ধানের পরে এক জেলে দোকানদারকে পেলাম—অতি ভাঙ্গা ইংরাজী জানা। তাকে দিয়ে সহরের প্রধান প্রধান দেখবার জিনিষগুলো বুঝে নিলাম। প্রথমেই ডাকঘরের খবর নিয়ে চিঠি দিতে গেলাম। একটা সতর আঠার বছরের যুবক এসে আমায় পরিষ্কার ইংরাজীতে জিজ্ঞাসা করল—“আপনি বিদেশী বোধ হয়?” তাকে পেয়ে প্রাণভরে কথা বলে নিলাম। সে আমার সঙ্গে ডাকঘরে গেল এবং ইটালীয় ষ্ট্যাম্প কিনে চিঠিগুলো পোষ্ট করে দিল। জাহাজ-ঘাটা থেকে ইটালীয় টাকা পয়সা কিনে এনেছি। ডাকঘরের কাজ শেষ করে দিয়েও সে আমার সঙ্গে চলল। পরিচয়ে জানলাম, আমেরিকার ক্যানাডায় তার বাড়ী, চিত্রবিজ্ঞা শিখবার জন্তে এদেশে এসে একটা কলেজে ভর্তি হয়েছে। অবাচিতভাবে আমার সঙ্গে চলতে দেখে আমি তাকে বললাম “তোমার কাছে খুবই সাহায্য পাচ্ছি বটে, কিন্তু তুমি আমার কাছে কিছু পয়সা কড়ি আশা কর না ত?” সে একটা ‘না’ উত্তর দিয়েই অল্প কথা কইতে চলল। সহরের অনেক নূতন কথা আমাকে শোনাল। আমি আবার তাকে বললাম “তোমাকে কিছুই দেব না জেনো কিন্তু।” সে বলল “বিদেশী ভ্রমণকারীরা আমায় কিছু কিছু দিয়ে থাকে; আপনাকে সহরের অনেক স্থান দেখাব, আপনি কি কিছুই দেবেন না?” আমি বললাম “না কিছুই দেব না।” সে হঠাৎ বিদায় নিয়ে পরে আবার বলল “একটু মদের দোকানে যাবেন কি?” আমি বললাম “না।” সে যখন আমার কাছে টাকা পয়সা কিছুই পেল না, তখন

অন্ততঃ পক্ষে বোধ হয় একটু মদ খাওয়ার ভাগী হতে আশা করছিল সে আধঘণ্টা কাল একটা বিদেশী লোকের বেগার দিয়ে কিছু না পেয়েও খুসি হয়ে বিদায় নিল দেখে আমি তাকে অন্তরের সহিত ধন্যবাদ দিলাম।

তারপর আমি সহরের পশ্চিম প্রান্তে সমুদ্রের নিকট একটি প্রস্তর মূর্তির বেদীতে বসে বিশ্রামের সঙ্গে দূরে পর্বতমালা সমাকীর্ণ রমণীয় প্রদেশের প্রাকৃতিক সৌন্দর্য উপভোগ করছিলাম, একটি বেঁটে লোক এসে আমায় বলল “এখানে বসে রয়েছ কেন?” আমি বললাম “সহর দেখে এসে বিশ্রাম করছি।” সে সহরের দু’একটা নূতন কথা বলতে গিয়ে স্থানীয় কুৎসিৎ প্রলোভনের গল্প তুলল। সহজেই বুঝলাম, সে এই সম্বন্ধে একটি পাক দালাল। এই দালালটির সে-সব কথা আমি কাউকে শোনাতে পারব না। ভাবলাম, এই নেপলস্ কী বিশ্রী সহর! তারপর একটা নামজাদা খাবারের দোকানে গিয়ে মধ্যাহ্নিক ক্রিয়াটা সম্পন্ন করলাম। ইটালীর ময়দার প্রস্তুত নানা প্রকার খাদ্য খুবই প্রসিদ্ধ। আমি হোটেলের কর্তাকে জানালাম,—তোমাদের বিশেষ বিশেষ খাবারের জিনিসগুলোরও কিছু কিছু আমায় দাও। তারা কয়েক প্রকার পিষ্টক আমায় খেতে দিল। দেখলাম, বিলাতি কেকের চেয়ে এগুলি আমাদের মুখ-রুচির অনুকূল। হোটেলওয়াল ভাল ইংরাজি না জানলেও এমনি একটু বিশেষ দৃষ্টি নিয়ে আমাকে খাওয়াল, যাতে কোন অসুবিধা ত হলই না বরং খেয়ে বেশ তৃপ্তি হল। খাওয়ায় খরচ হল প্রায় তিন টাকা।

তারপর এখানকার প্রধান প্রধান দেখবার বিষয় কিছু কিছু দেখলাম। এস, কালো থিয়েটার পৃথিবীর মধ্যে একটি নাম করা রঙ্গালয়। এর অভ্যন্তরটি অতি বিশালয়তন ও মনোরম। রোম



অগদ্বিখাত এস, কার্লে' থিয়েটারের অভ্যন্তর, নেপলস — ১৭৪ পৃষ্ঠা



ইটালীর নাচ — ১৮২ পৃষ্ঠা

ষ্ট্রীটটি সবচেয়ে জমকালো রাস্তা। এখানকার টাউনহল, মিউজিয়াম, প্রধান বিচারালয় প্রভৃতি দেখলাম। সহরটি খুবই আমোদ প্রমোদে পরিপূর্ণ, তা এই একটি দিন ঘুরে দেখেই বোঝা গেল।

বিষুবিস ও পম্পী*

৩রা জুন (১৯২৫) সকাল ৭টায় ইটালীদেশের নেপলস্ (Naples) বন্দরে আমাদের জাহাজ ভিড়ল। যাত্রীরা সব পূর্ব হতেই সহর দেখবার জন্য প্রস্তুত ছিল। ৮টার সময় প্রাতঃভোজন শেষ করে আমরা প্রায় নয় শত যাত্রী সহর দেখবার জন্য জাহাজ থেকে নামলাম। যাত্রীদের অনেকের সঙ্গে ছোট ছেলেমেয়ে ছিল, তারা খুবই স্ফুর্তির সহিত নামতে লাগল। যাত্রীদের মধ্যে কেউ সহর, কেউ নেপলসের মিউজিয়াম, কেউ বিষুবিস আগ্নেয়গিরির উপরিভাগ, কেউ বা ভূগর্ভোখিত পম্পী (Pompie) সহর দেখতে মনস্থ করেছিল।


পূর্বদিকে বিষুবিস আগ্নেয়গিরির শীর্ষদেশ হতে অনর্গল স্বেত ও ধূসর বর্ণের ধূমরাশি নির্গত হয়ে মেঘের মত চলে যেতে দেখছিলাম। শুনলাম, কোন কোন সময় বিষুবিসের শিখরদেশ দিয়ে প্রজ্জ্বলিত অগ্নিশিখা বের হয়ে পর্বতোপরিস্থিত নীলাকাশ অগ্নিবর্ণ করে তোলে। এই বিরাট আগ্নেয়গিরিই একদিন বহু ধনজনপূর্ণ সমৃদ্ধিশালী পম্পী সহরটিকে ধ্বংস করে দিয়েছিল—সহস্র সহস্র নরনারীর জীবন,

* আমি পম্পী নগরে যাই নাই। আমার কনিষ্ঠ সহোদর শ্রীমান অতুলচন্দ্র পরবর্তী বৎসর বিলাত যাত্রাকালে উহা দেখিয়াছে। বিষুবিস ও পম্পী, পম্পীর কথা ও পম্পীর ধ্বংসাবশেষ—এই তিনটি অংশ তাহারই লিখিত। উপযোগীতার হিসাবে ; এখানে সন্নিবিষ্ট হইল। —এছকার।


মূল্যবান রত্নরাজি এবং বহু পরিশ্রম-কৃত ইটালীর অমর কীর্তিসমূহ লুপ্ত করে দিয়েছিল।

আমরা তিনজন বাংলাদেশের যাত্রী ইংলণ্ডে চলছি। তিন জনই হিন্দু। অপর দুইজন—ডাঃ ধীরেন্দ্রনাথ ব্যানার্জী, কলিকাতা; আর হরেন্দ্রনাথ দাস, ঢাকা। আমরা তিনজনেই পম্পী দেখতে মনস্থ করেছিলাম। বোম্বাই, পাঞ্জাব, মধ্যপ্রদেশ প্রভৃতি স্থানের আরও আট-নয় জন ভারতীয় যাত্রী ছিলেন, তাঁরা সকলেই বড়লোকের ছেলে, কাজেই পম্পী সহর দেখবার জন্য তাঁরা জাহাজ ভিড়বার এক দিন পূর্বেই টমাস কুক (Thomas Cook) কোম্পানীর তত্ত্বাবধানে Wireless যোগে বন্দোবস্ত করেছিলেন। টমাস কুক উপযুক্ত অর্থ নিয়ে মোটর গাড়ী, গাইড (পাণ্ডা), মধ্যাহ্ন-ভোজন ও চা প্রভৃতির ব্যবস্থা করে থাকেন। ধীরেনবাবু ও হরেনবাবু এই কোম্পানীর তত্ত্ব পম্পী দেখবার ইচ্ছা প্রকাশ করতে আমি অমত প্রকাশ করে তাঁদের বুঝিয়ে দিলাম যে, কোন নূতন স্থান দেখতে হলে নিজেদের তত্ত্ব দেখাশুনাই ভাল, তাতে আনন্দও প্রচুর হয় এবং নিজেদের অভিজ্ঞতাও অনেক বেড়ে যায়, এটা আমি দাদার কাছে শিখে ভালরূপেই হৃদয়ঙ্গম করেছি। এতে তাঁরা সন্তুষ্ট হলেন। আমরা নিজেদের তত্ত্বই সহর দেখব স্থির করে জাহাজ হতে নামলাম। কলকাতা হতে ৪৫২০ মাইল এসে এই ইউরোপখণ্ডে প্রথম পদার্পণ করলাম।

জাহাজ-ঘাটেই কয়েকটি টাকা পয়সা বদল করবার আপিস (Exchange Office) আছে। দেশ হতে যে নোট ও টাকা নিয়ে গিয়েছিলাম, কলকাতায় জাহাজে উঠবার সময় সেগুলি বদল করে ইংলণ্ডদেশের পাউণ্ড, শিলিং, পেনী করে নিয়েছিলাম। ইটালীদেশে মুদ্রার আবশ্যকে এখান হতে ১০ শিলিংয়ের বদল নিলাম।



স্বংসীভূত পল্লী নগরী—দূরে বিদ্যুৎগিরি —১৮৩ পৃষ্ঠা।



হিসাবমত ১০ শিলিংএ ইটালীয় মুদ্রা ৬০ লেরা (Lera) স্থলে ৫৫ লেরা পেলাম। ৫ লেরা তারা লাভ করল। এক একটি লেরা আমাদের দেশের আধুলীর মত, নিকেলে তৈরী। ৫ লেরার নোটগুলি প্রায় এক টাকার নোটের মত। তিন জনেই কিছু কিছু ইংলিশমুদ্রার পরিবর্তে ইটালীয় মুদ্রা নিয়ে রাস্তায় বের হলাম। ক্ষণকালের মধ্যেই কয়েকটি গাইড্‌ জুটল। প্রত্যেকেই বলতে লাগল—“আমি খুব কম ব্যয়ে আপনাদিগকে ভাল করে সব দেখিয়ে শুনিয়ে আনব।” এতে বেশ একটু গোলমাল হয়ে উঠেছিল, তখনই একজন সশস্ত্র ইটালীয় পুলিশ আমাদের নিকট এসে ভদ্রভাবে ইংরাজী ভাষায় বলল—“আপনারা অনুগ্রহ করে এখানে গোলমাল করবেন না, রাস্তায় গিয়ে আবশ্যকীয় কথাবার্তা বলুন।” আমাদের পূর্বে হতেই ঠিক ছিল যে, আপাততঃ কোন গাইডের সাহায্য নেব না; কারণ আমি দাদার মুখে এই সকল দেশে বিদেশীদের অনেক লাঞ্ছনার বিবরণ ইতিপূর্বে শুনেছিলাম। পথে কয়েকটি ভদ্রলোকের নিকট পম্পী যাবার পথ এবং আমাদের আবশ্যকীয় অনেক বিষয় জিজ্ঞাসা করে নিলাম। ইটালীর শিক্ষিত লোকদের মধ্যে কেউ কেউ সামান্য ইংরাজী জ্ঞান, তাই কোনমতে কথাবার্তা চলে। শুনলাম, পম্পী যাবার ট্রেন ধরবার স্টেশন প্রায় এক মাইল দূরে। জাহাজ হতে নামবার সময় সিঁড়ির সম্মুখে খুব বড় বড় অক্ষরে লেখা দেখে এসেছি—“যাত্রীগণকে বিকাল ষটার মধ্যে জাহাজে ফিরবার জন্ত বিশেষভাবে জানান যাচ্ছে। অগ্রথায় জাহাজ ফেল করলে কোম্পানী দায়ী নয়।” কাজেই সময় আমাদের খুব সংক্ষেপ। অল্প সময়ে স্টেশনে পৌঁছবার জন্য একথানা ফিটন গাড়ী ১০ লেরা ভাড়া ঠিক করলাম। এখানকার গাড়োয়ানেরা বেশ পরিষ্কার পরিচ্ছন্ন, পোষাক-পরিচ্ছদও তাদের বেশ ফিটকাট।

বেলা ১০টার সময় ষ্টেশনে পৌছলাম। ১১টার সময় ট্রেন ছাড়বে। এই এক ঘণ্টা সময় বৃথা বসে না থেকে নিকটবর্তী স্থান দেখতে বের হলাম। ষ্টেশনের নিকটেই ইটালীদেশ স্বাধীন অনেক ছবি ও নানা বিষয়ের রাশি রাশি বই কিনতে পাওয়া যায়। আমরা কয়েকখানি বই কিনলাম। রাস্তায় কর্মশীল লোকজন অনবরত দ্রুত-পদক্ষেপে যাতায়াত করছে। অনেকে আমাদের কৃষ্ণবর্ণ চেহারার পানে বেশ একটু স্থিরদৃষ্টিতে তাকাতে লাগল। রাস্তার দু'ধারে আমাদের কলকাতার মতই বড় বড় বাড়ী—কতক পাথরের, কতক বা ইটের। পাহাড়ের উপর সহর, কাজেই রাস্তাগুলি পাথরের; কলকাতার মত সোজা রাস্তা নয়। দোকানগুলি বেশ সুন্দর সাজান, পরিষ্কার পরিচ্ছন্ন। এদেশের লোকের গায়ের রং ফর্সা, কিঞ্চিৎ রক্তাভ। চুল, জু, চোখের তারা সাহেবদের মত ধূসর বর্ণের নয়, অনেকটা আমাদের বাঙ্গালীর মতই কালো। মেয়েরা এখানকার রাস্তাঘাটে অবাধে গতিবিধি করে। তিন-চারটে করে মেয়ে চামড়ার ব্যাগের ভিতর পুস্তকাদি নিয়ে গলায় ঝুলিয়ে দ্রুতপদে বিছালয়ে চলছে দেখলাম। অন্যান্য কর্মশীলা মেয়েরাও বেশ সচ্ছল গতিতে আপন আপন কাজে যাতায়াত করছে। মেয়েদের পোষাক পরিচ্ছন্ন মোটেই এলোমেলো নয়, বেশ আঁটসাঁট। আমি ইতিপূর্বে কখনও স্বাধীন দেশ দেখি নাই; স্বাধীন দেশের বালক-বালিকা, যুবক-যুবতী, বৃদ্ধ-বৃদ্ধার মুক্ত প্রাণের পরিচয় কখন পাই নাই; শিশুকাল হতে তারা যে কিরূপ স্বাধীন চিন্তার ভিতর দিয়ে বড় হতে থাকে, তাও কখন অনুভব করি নাই। তাই এই ইটালীবাসীদের কাজকর্ম, গতিবিধি সবই আমার কাছে বড় নূতন রকমেরই লাগছিল।

দেখতে দেখতে একঘণ্টা কেটে গেল। যথাসময়ে ষ্টেশনে গিয়ে

প্রতিজনে ৮ লেরা ১০ সেন্ট দিয়ে এক একখানি যাতায়াতের টিকিট কিনলাম ; ২০।২২ ফিট নিম্নগামী সিঁড়ি দিয়ে প্লাটফরমে পৌঁছেতেই ট্রেন এসে পড়ল। আমরা ট্রেনে চেপে পম্পী অভিমুখে যাত্রা করলাম। তখন বেশ একটু গরম বোধ হচ্ছিল, ইউরোপ শীতের দেশ হলেও শীতের তুলনায় ইটালীটাই একটু গরম। জ্যৈষ্ঠ মাস, তাই মাঝে মাঝে বাতাস এসে বেশ আরাম দিচ্ছিল। এদেশের গাড়ীগুলি যদিও আমাদের দেশের Broad Gauge-এর গাড়ীর অপেক্ষা একটু ছোট, তবু আমাদের দেশের মত চাপাচাপি করে বসতে হয় না, এবং তৃতীয় শ্রেণীর গাড়ীগুলি আমাদের দেশের তৃতীয় শ্রেণীর গাড়ী অপেক্ষা অনেক ভাল। ট্রেন ছাড়বার ৩৪ মিনিট পরেই প্রত্যেক কামরায় বৈদ্যুতিক আলো জ্বালা হল এবং অল্প পরেই গাড়ীখানি একটি অন্ধকার সুড়ঙ্গের (Tunnel) মধ্যে প্রবেশ করে খানিকটা গিয়ে পুনরায় মুক্ত জায়গায় বের হল। খানিক দূর যাবার পর একটি বন্ধস্থানে গিয়ে গাড়ীখানি খুব বেকে চলল। এখানি বৈদ্যুতিক এঞ্জিনের ট্রেন। কলকাতার ট্রাম লাইনের মত উপরে বৈদ্যুতিক তারের সঙ্গে গাড়ীর সংযোগ আছে, নীচের লাইন ঠিক ট্রেনের লাইনেরই মত।

গাড়ীতে পথের দুই ধারের মনোরম দৃশ্যাবলী দেখে বড়ই আনন্দ অনুভব করতে লাগলাম। ক্রমাগত দ্বিতল-ত্রিতল অট্টালিকাশ্রেণী—সব গুলিই সুন্দর সুন্দর ফুলভরা লতাপাতা ও গাছ দিয়ে সাজানো। প্রাচীর, গৃহ সবই পাথরে তৈরী। কিছুদূর গিয়ে পথের দুইধারে সতেজ শাক-সব্জির ক্ষেত, আর বাগানের শ্রেণী দেখলাম; এই সব ক্ষেত ও বাগানে এক ভুট্টা গাছ ব্যতীত আর কোন গাছই চিনলাম না। মেয়েরা আর্টসাঁট পোষাক পরে এই সব ক্ষেত ও বাগানে কাজ করছে। নিকটবর্তী বৃক্ষতলে তাদের ছোট ছেলেমেয়েরা খেলা

করছে; কেউ কেউ বা ধবধবে সাদা বিছানায় ঘুমিয়ে রয়েছে। বাগানের কাজকর্ম করতে মেয়েদেরই বেশী দেখলাম, পুরুষ কচিং কোন স্থানে দেখা গেল। পাহাড়ী পথ—ট্রেন খুব এঁকে বেঁকে চলতে লাগল। মাঝে মাঝে পাহাড়ের ফাঁকে কখন সমুদ্র, কখন নেপলস্ সहर, কখনও সধুম বিষুবীয়স-শৃঙ্গ দেখা যাচ্ছিল। যখন পাহাড়ের গা দিয়ে ট্রেন চলছিল তখন পাহাড়ের গভীর নিম্নদেশ দেখে প্রাণে একটা আতঙ্ক হচ্ছিল, পাছে ট্রেনখানা গড়িয়ে পড়ে। এই দেখি বিষুবীয়স বাম দিকে, পরক্ষণেই দেখা গেল ডান দিকে। এইরূপ প্রাকৃতিক সৌন্দর্য্য দেখতে দেখতে একঘণ্টা পঁচিশ মিনিটে আমরা পম্পী স্টেশনে পৌঁছলাম। নেপলস্ হতে পম্পী ১৫ মাইল দূরে। পাহাড়ে' উচু-নীচু আঁকাবাঁকা পথ বলে এই ১৫ মাইল পথ আসতেই এত সময় কেটে গেল।

পম্পীর কথা

পম্পী স্টেশনটি বেশ পরিষ্কার পরিচ্ছন্ন। বহু যাত্রী এই স্টেশনে নামল, অধিকাংশই আমাদের জাহাজের সহযাত্রী। একজন গাইড আমাদের সঙ্গ ধরল, লোকটি বড় সাদাসিঁদে; আমাদের অল্প সময় মধ্যে অনেক দেখে নিতে হবে, তাই এবার তাকে নিয়ে একখানা ফিটন গাড়ীতে উঠলাম।

প্রথমে একটি নবনির্মিত সহরের প্রশস্ত পথ দিয়ে খানিক গিয়ে একটি গির্জার নিকট আমাদের গাড়ী থামল। বাইরে থেকে গির্জাটির বিশেষ কিছুই বোঝা গেল না—একটি প্রকাণ্ড সাদাসিঁদে বাড়ী বা একটি বিরাট ব্লাডীর ঢাকনার মত দেখা গেল। দরজায় দুইজন বন্ধু-পাহারাওয়াল। ভিতরে প্রবেশ করলাম, প্রবেশ করে যা দেখলাম

তা এখনো আমার নিকট স্বপ্নের মতই বোধ হয়। পূর্বের শুনেছিলাম, ভাস্কর্য, চিত্র ও স্থপতিবিদ্যায় ইটালীই জগতের মধ্যে শ্রেষ্ঠত্ব লাভ করেছে, এখন তা স্বচক্ষে দেখে নয়ন মন চরিতার্থ করলাম। গির্জাটি প্রায় ৪০ বৎসর পূর্বের নিৰ্মিত হয়েছে—কিন্তু দেখে মনে হয় সত্ত্ব প্রস্তুত। নিখুঁত শ্বেত পাথরে নানাবিধ মনোরম কারুকার্য ও মূর্তি খোদিত করে গির্জাটি প্রস্তুত হয়েছে। প্রস্তর-প্রাচীরের উজ্জ্বল আভাষ ভিতরটি ঝকঝক করছিল।

আমরা চারিদিক দেখে ভিতরের দিকে একটু অগ্রসর হলাম। দেখলাম প্রায় ৪০।৫০ জন নরনারী মাথা নীচু করে নীরবে প্রার্থনা করছেন। ভিতরে প্রবেশ করবার অবোধ আদেশ আছে। ভিতরে গিয়ে সম্মুখে বেদীর উপর মাতৃকোড়ে শিশু খ্রীষ্টমূর্তি—শরীর দিয়ে যেন আলোক-ছটা বের হচ্ছে। মূর্তিটি অনেকগুলি মণিমাণিক্য দ্বারা সজ্জিত। ঐ সকল মণিমাণিক্যের মূল্য প্রায় সাড়ে চার কোটি টাকা। আমি যদিও একজন জুয়েলার হিসাবে ছ'একখানা দামী পাথর দেখেছি, তথাপি ঐ সকল রত্নরাজির গুরুত্ব নিজ অভিজ্ঞতার ফলে বুঝতে একটুও দাবী করতে পারি না; গাইড্ আমাদিগকে কিছু কিছু বুঝিয়ে দিল। বড় বড় মুক্তায় গাঁথা একগাছা মালা ব্যতীত বিশেষ কিছুই চিনলাম না। মুখ্যদেবতার খানিকক্ষণ দেখে আমরা অগ্র একটা ঘরে প্রবেশ করলাম। এখানেও একটি খ্রীষ্ট মূর্তি রয়েছে। কয়েকটি স্ত্রীপুরুষকে করযোড়ে উপাসনায় নিযুক্ত দেখলাম; তাঁদের ছ'একজনের চোখে জল ঝরছিল।

তারপর আমরা আর একটি প্রকাণ্ড ঘরে প্রবেশ করলাম। তার মধ্যস্থলেও শ্বেত প্রস্তর নিৰ্মিত একটি ক্রুশবিদ্ধ খ্রীষ্টমূর্তি—রক্তাক্ত দেহ। আমি কোন দিনই যীশুখ্রীষ্টের ভক্ত নই, তথাপি এই মূর্তিটি দেখে

কেন যে আমার চোখ ছল ছল করছিল তা জানি না। ধ্বংসে সাদা পোষাক-পরা একটি শাস্ত্রমূর্তি স্ত্রীলোক স্থিরভাবে উপবেশন করে কতকগুলি ফুল নিয়ে হিন্দুদের দেবপূজার স্থায় শুদ্ধান্তঃকরণে এক একটি করে ফুল ঐষ্টের পদতলে প্রদান করছিলেন। আমরা অবাক হয়ে তাঁর পূজা দেখছিলাম। ফুল দেওয়া শেষ করে তিনি হিন্দুদেরই মত ভক্তিভরে একটি প্রণাম করলেন। আমিও কেন যেন মনে মনে ঐষ্টের চরণোদ্দেশে অন্তরের প্রণতি জ্ঞাপন করলাম।

এর পর আমরা অপর একটি কক্ষে প্রবেশ করলাম। সে ঘরটির মধ্যে ধর্মসম্বন্ধীয় রাশি রাশি পুস্তক, কতক বিক্রয়ের জন্ত, কতক বা বিতরণের জন্ত সজ্জিত রয়েছে। এই ঘরে আমাদের নাম ধাম লিখে দিতে হল। একজন মুহূর্তাধী ধর্মপ্রাণ বৃদ্ধ কয়েকখানি ধর্ম-পুস্তক, নিকেলের ঐষ্টমূর্তি, হুন্দর তিনখানি লকেট এবং ঐষ্টের কতকগুলি ছোট ছোট ছবি আমাদের দেবার জন্ত এনে জিজ্ঞাসা করলেন—“আপনারা কি রোম্যান ক্যাথলিক?” আমরা বললাম “না, আমরা ভারতীয় হিন্দু।” উত্তর শুনে বৃদ্ধ একটু বিষমভাবে মাটির দিকে তাকিয়ে রইলেন। আমাদের গাইড্ (পাণ্ডা) আমাদেরকে জিজ্ঞাসা করল—“আপনারা ধর্মমন্দিরকে বিশ্বাস করেন?” আমরা বললাম—“বিশ্বাস করি।” কথাটি শুনিবামাত্র বৃদ্ধ খুব আনন্দে মুখ তুললেন এবং আমাদের বই, লকেট ও ছবি দিয়ে অল্পনয় বিনয় সহকারে অভ্যর্থনা করলেন।

সময় সংক্ষেপ বলে এখানেই আমাদের গির্জা দর্শন শেষ করতে হল। অতঃপর আমরা পুনরায় সেই গাড়ীতে পম্পী অভিমুখে রওনা হলাম। তখন মনে মনে ভাবতে লাগলাম, ঘোড়শোপচারে বিশ্বকর্মা ঠাকুরের পূজা করি আমরা, কিন্তু ঠাকুরের কৃপা ভোগ করছে এই

সব দেশের লোক। অল্পক্ষণের ভিতরই পম্পী সহরের সামুদ্রিক দ্বারে (Marine Gate) উপস্থিত হলাম। সহরে প্রবেশ করার জন্য আমাদের ছয় লেরা (বার আনা) দিয়ে টিকিট করতে হল।

পম্পীর ধ্বংসাবশেষ

বহুকাল পূর্বে এই পম্পী সহর একটি সুবৃহৎ নগর ছিল, তখনকার আমলে ইউরোপে যতগুলি প্রধান স্থান ছিল তন্মধ্যে এই পম্পী একটি বৃহৎ ও পুরাতন নগর। বন্দরটির একদিকে সমুদ্র ও অপর দিকে ১০।১২ মাইল দূরে বিসুবিয়স পর্বত। ব্যবসা-বাণিজ্য, ধন-জন, শিল্প, সৌন্দর্য্য, বিদ্যালয়, শিক্ষালয় প্রভৃতির গৌরবে এবং নৃত্যগীতাদি আমোদ প্রমোদে এদেশ সর্বদা ভরপুর থাকত। তখন কেউ ভাবতেও পারে নি যে, এই সুবৃহৎ সহরটি একদিন ধনে প্রাণে সর্বসম্মত ধ্বংস হয়ে যাবে, চিরুটি পর্য্যন্ত লুপ্তপ্রায় হয়ে যাবে।

খ্রীষ্টের মৃত্যুর ৭২ বৎসর পরে, অকস্মাৎ বিসুবিয়স-শিখর হতে ভীষণ ভাবে ধূম, অগ্নি, নানাবিধ গলিত ধাতু নির্গত হওয়ায় অতি অল্প সময় মধ্যে ঐ পর্বতের পাশের বহু দূর ব্যাপী স্থান একপভাবে চাপা পড়ে যে, বড় বড় অট্টালিকা ও বৃক্ষাদি প্রভৃতির চিহ্ন পর্য্যন্ত লুপ্ত হয়ে যায়। এত অল্প সময়ের মধ্যে ঐ স্থান চাপা পড়েছিল যে বহু স্ত্রীপুরুষ বালকবালিকা জীবজন্তু একসঙ্গে ভূগর্ভে প্রোথিত হয়ে যায়। পরে ঐ সকল স্থান ক্রমে ক্রমে বৃক্ষাদিপূর্ণ স্বাভাবিক স্থানের মত হয়ে যায়।

পম্পী ধ্বংস হবার পর শতাব্দীর পর শতাব্দী চলে যায়, ক্রমে ঐ সহরের অবস্থান প্রভৃতির বিষয় লোকে বিস্মৃত হতে থাকে এবং ক্রমে

একেবারে ভুলে যায়। এইরূপে ১৬ শত বৎসর পরে বারবণের রাজা ৩য় চার্লস প্রাচীন তত্ত্ববিদগণের সাহায্যে এবং উৎসাহে সেই বিস্তীর্ণ স্থান সমূহ থেকে সন্ধান করে পম্পী নগরটির স্থান নির্দেশ করে ১৭৫৫ খ্রীষ্টাব্দে কার্য আরম্ভ করেন এবং অনেক নীচে প্রাচীন সহর পম্পীর নিদর্শন দেখতে পান।

তারপর বহু বর্ষ ধরে বহু লোক বহু অর্থ ব্যয়ে সহরটি খুঁড়ে বার করায় প্রায় ৪ হাজার বৎসর আগেকার কীর্তিসমূহ বর্তমানে মানবগণের দৃষ্টিগোচর হচ্ছে। পূর্বে রোমানদের সহর নির্মাণ কার্য কিরূপ ছিল তা এই সহরটি দেখলে অনেকটা অনুমান করা যায়।

এই ভূগর্ভোখিত সহরে প্রবেশ করে যা যা দেখলাম নিম্নে তার কিছু কিছু উল্লেখ করছি। মেরিণো মেট নামক সহরের প্রধান দ্বার দিয়ে প্রবেশ করেই প্রথমে নজরে পড়ে—

(১) মিউজিয়ম;—এই মিউজিয়মে সেই পূর্বকালের পম্পী সহরের গৃহ-ব্যবহার্য্য জিনিস, পোষাক পরিচ্ছদ ও ধ্বংসীভূত মানবের কঙ্কালরাশি অতি যত্নে সাজান আছে।

(২) Amphi Theatre;—কুড়িহাজার দর্শক বসবার উপযুক্ত করে গোলাকারে প্রস্তুত। এই স্থানে পূর্বে বজ্র সিংহ ব্যাঘ্র প্রভৃতি জন্তুদের সঙ্গে এ দেশের শক্তিমান অস্ত্র-কৌড়িকদের যুদ্ধ দেখান হত।

(৩) School of Gladiators;—অস্ত্র বিদ্যালয় ও সৈন্যাগার। এটি একটি বিরাট অট্টালিকা। এর ভেতরে প্রাচীন যুগের অস্ত্রশস্ত্র এবং নরকঙ্কাল সজ্জিত রয়েছে।

(৪) টেম্পল অফ ফরচুন;—(Temple of Fortune) মারকাস টুলিয়াস কর্তৃক প্রতিষ্ঠিত। পূর্বের সময় এখানে খুব আমোদ প্রমোদ হত।

(৫) টেম্পল অফ্ ভেনাস;—(Temple of Venus) এই মন্দিরটি ঈশ্বরের প্রেরিত দূত ভেনাসের নামে উৎসর্গীকৃত। বর্তমানে অনেকগুলি ভগ্নস্বাস্থ্য যুবক এখানে নানাবিধ ব্যায়াম চর্চা করে।

(৬) টেম্পল অফ্ জুপিটার;—(Temple of Jupiter) রোমানদিগের অতি প্রাচীন মন্দির। এখানে জুপিটার, মিনার্তা ও জুলিয়াস—এই তিনজন স্বর্গীয় দেবীর প্রতিমূর্তি পাওয়া গিয়েছিল।

(৭) ব্যাসিলিকা;—(Basilica) প্রাচীন মনোরম মন্দির।

(৮) ট্রাজিক থিয়েটার;—(Tragic Theatre) পাঁচ হাজার লোক বসবার উপযুক্ত স্থান সমেত একটি থিয়েটার-বাড়ী। গ্রীষ্মকালে কৃত্রিম উপায়ে বৃষ্টি দ্বারা বাড়ীটিকে ঠাণ্ডা করে দর্শকদের আরামের ব্যবস্থা করা হত।

(৯) হাউস অফ্ দি প্রেয়াস;—সুন্দর সুন্দর চিত্র, ব্রোঞ্জের ও স্বেত প্রস্তরের মূল্যবান মূর্তি দ্বারা সজ্জিত। এই বাড়ীটি সর্কাপেক্সা ভাল অবস্থায় পাওয়া গিয়েছে। দেখলে বিগত যুগের পম্পীর অবস্থা অনেকটা উপলব্ধি করা যায়।

ঋংসীভূত অট্টালিকাগুলির অধিকাংশই প্রস্তরে প্রস্তুত। অধিকাংশ বাড়ীর ছাদই নষ্ট হয়ে গিয়েছে। রাস্তাগুলিও প্রস্তরে প্রস্তুত, বেশী প্রশস্ত নহে। ফুটপাথগুলি কলকাতার ফুটপাথের অপেক্ষা অনেক উঁচু। রাস্তার দু'ধারে জল রাখবার পাথরের ট্যাক এবং স্নানের জগ্গ সরকারী স্নানাগার। অনেক স্থানে ঔষধের দোকান, মদের দোকান এবং মদ তৈরী করার ভাঁটাগুলির চিহ্ন রয়েছে। সহরের সর্বস্থান হতেই বিষুবিস্-শৃঙ্গ দেখতে পাওয়া যাচ্ছিল।

অপরূহ ৩৯০ টার সময় দেখাভাড়া শেষ করে পাণ্ডার প্রাপ্য দিয়ে ট্রেন ধরবার জগ্গ আবার স্টেশনে যাত্রা করলাম। স্টেশনের পথে একজন

লোক পম্পীর স্থিতিচিহ্ন স্বরূপ গলিত ধাতু (Lava) সংলগ্ন একখণ্ড লৌহ আমাদের নিকট বিক্রয় করল, আমরা সামান্য মূল্য দিয়ে তা ক্রয় করলাম। অল্পকাল পরেই আমরা ট্রেন ধরে পুনরায় নেপলস্ অভিমুখে রওনা হইলাম। নেপলসে পৌঁছে আমাদের ইচ্ছা হল হেঁটে একটু সহরটি দেখে যাব। একটি বড় রাস্তা ধরে চলতে লাগলাম। পথে এক বৃদ্ধার দোকান হতে একটি নগিবাগ ও একটি লোহার তালি কিনলাম। রাস্তার দু'ধারে খাবারের দোকান প্রচুর। 'ম্যাকরনি' (ময়দায় প্রস্তুত) ইটালীর একটি প্রধান খাদ্য। ফলমূলও এখানে যথেষ্ট মেলে। অনেক হোটেলের সাইনবোর্ড রাস্তার ফুটপাথের উপর ঝোলান, তার পিছনে একটি ঘণ্টা ঠং ঠং করে বেজে লোকের দৃষ্টি আকর্ষণ করছে। নেপলস্ সহরে বিদেশী লোক দেখলে অসংখ্য আমোদ-প্রমোদের জন্ত প্রলুব্ধ করবার অনেক লোক আছে। আমাদেরও একবার এরূপ কয়েকটি লোকের পাল্লায় পড়তে হয়েছিল; তাদের সে চেষ্টা অবশ্য বিফল হয়েছিল।


ইয়োরোপ বিদায়

১৫ই ফেব্রুয়ারী সারা দিনটা নেপলস্ বন্দর ঘুরে ঘুরে যে-সব ভাল-মন্দ দেখেছি সে-সব আমি ইতিপূর্বে (বিষুবীয়স্ ও পম্পী প্রবন্ধের পূর্বে) বর্ণন করেছি। সন্ধ্যার পূর্বে জাহাজের দিকে ফিরলাম। ফিরবার পথে কতকগুলি দেশীয় বিস্কুট আর স্থানীয় দৃশ্যের সুন্দর সুন্দর ছবি কিনলাম। চিত্র-শিল্পে আর স্থাপত্য বিদ্যায় ইটালী প্রাচীন কাল থেকেই পৃথিবীতে সর্ব প্রধান স্থান অধিকার করে রয়েছে। সন্ধ্যার আগেই জাহাজ-ঘাটে ফিরলাম। সমুদ্রের ধারে

বিনামূল্যে প্রদর্শিত হয়



‘ম্যাকগ্রি’ নামক ভয়দার খাত প্রস্তুত করণ, ইটালী — ১৭৪



আমাদের জাহাজ-ঘাটার আস্তে ভুলক্রমে দূরে সমুদ্র তীরে গিয়ে উঠলাম। যখন ঘড়ি দেখে জানলাম, আমাদের জাহাজ-ঘাট এখনও অনেক দূরে আছে অথচ একঘণ্টা পরেই জাহাজ ছাড়বে, তখন প্রাণটা বড় চিন্তাকুল হয়ে পড়ল। সমুদ্রের তীরে তীরে দ্রুত চললাম, খানিকটা এসে ঘোড়াগাড়ীর আড্ডা দেখতে পেলাম। আমাদের জাহাজ-ঘাটার নাম ধরে তাদের কাছে দূরত্ব জিজ্ঞাসা করায় তারা বলল,—আমাদের গাড়ীতে এস পৌঁছিয়ে দেবো। কিন্তু পুনরায় দূরত্ব জিজ্ঞাসা করতেও ঐ কথাই বলল। আমি বরাবর দ্রুত ছুটে এসে জাহাজ ধরলাম—দেখলাম, জাহাজে সিঁড়ি তোলাবার বন্দোবস্ত হচ্ছে। জাহাজে উঠতেই ১৫ মিনিট পরে জাহাজ ছেড়ে দিল; তখন সন্ধ্যা হয়েছে।

জাহাজখানি একটু দূরে আসতেই ঘন অন্ধকারের মধ্যে পাহাড়ের গায়ে নেপল্‌স্‌ সহরের আলোকরাজি একটি একটি নক্ষত্রের পর্বতমালা হয়ে ফুটে উঠলো। জাহাজের যত যাত্রী সবই আমরা ডেকের উপর দাঁড়িয়ে সেই আলোকের স্তূপ দেখছিলাম। ক্রমে ভূমধ্যসাগরের গভীর জলরাশির মধ্যে এসে পড়লাম। চারিদিকে অনন্তব্যাপী অন্ধকার, দূরে সেই আলোকের পর্বত মালাটি অনেকক্ষণ পর্যন্ত আমাদের প্রাণের আনন্দ রাশিকে জাগিয়ে রেখে ধীরে ধীরে দৃষ্টির অন্তরালে চলে গেল। আজ ইয়োরোপের স্থলভাগ থেকে বিদায় নিলাম।

এরপর আমরা ক্রমাগত তিনটি দিন ভূমধ্যসাগরের মধ্য দিয়ে চললাম; আজ দুই সপ্তাহ জাহাজে উঠেছি, একের পর আর একটি করে নতুন সহর, নতুন দৃশ্য আমাদের মনকে এমনই অভিভূত করে রেখেছে যে, দেশের দিকে চলেছি বলে মনেই হচ্ছিল না—যেন

সমুদ্র-পথে দেশ ভ্রমণই করছি। নেপল্‌স্ থেকে ইটালীর কমলালেবু এক ঝুড়ি কিনেছিলাম। রোজ বিকালে ডেকের উপর বসে কমলালেবু খেতাম আর যাত্রীদের কাছে দেশবিদেশের গল্প শুনতাম।

এইবার আমরা ভূমধ্যসাগরের পূর্ব অংশ দিয়ে চলেছি। পার্শ্ববর্তী কাণ্ডিয়া, রোডস্, সাইপ্রাস (কুপ্র) দ্বীপগুলি এবং ইটালি, গ্রীস, ডামাস্‌কাস্, প্যালেষ্টাইন প্রভৃতি অঞ্চলগুলি আমরা বাঁয়ে রেখে ক্রমাগত দক্ষিণ-পূর্বাভিমুখে চলছিলাম। ভূমধ্যসাগরের এই অংশ দিয়ে চলবার পথে কটা দিন জাহাজে সেন্টপল্‌সের ধর্মপ্রচার যাত্রা স্মরণ করিয়ে দিচ্ছিল। এই অঞ্চলেই তিনি অতি দুঃখ কষ্টে কাটিয়ে সেই সেকালের নৌকার মত জাহাজে চড়ে খুঁটের বান্ধা প্রচার করেছিলেন। তাঁর তিনবারের প্রচার যাত্রার বিবরণ মাহুঘের কর্তব্যের আকাঙ্ক্ষাকে প্রবুদ্ধ করে তোলে। আমরা ইয়েুরোপ ছেড়ে এশিয়া ভূখণ্ডের কাছে এসে পড়েছি।

এর পরে আমরা পোর্ট-সৈয়দে এলাম। সেই সেবার যাত্রাকালে কত ভয়ে ভয়ে পোর্ট-সৈয়দে নেমেছিলাম, আর এখানকার ঠগদের হাতে কতই না নাকাল হয়েছিলাম কিন্তু এবার পোর্ট-সৈয়দে নামতে সে ভয় একটুও মনে এল না।

প্রত্যাবর্তন

এর পর আমরা সেই আসবার বেলার পথ স্নয়েজখাল, লোহিত সাগর হয়ে ভারত মহাসাগরে পড়লাম। এবার এডেন দেখা গেল না কিন্তু ডাইনে আফ্রিকার সোমালী উপকূলভাগ দূর থেকে কিছু কিছু দেখা গেল। এরপর আরব সাগর বাঁয়ে রেখে আমরা ভারত

মহাসাগর দিয়ে কলম্বোর দিকে চললাম। এইবার গরম দেশে এসে পড়া গেল। প্রকাণ্ড বড় জাহাজখানি, প্রায় সমস্ত দিনই আমরা এ সময় ডেকের উপর খেলাধুলা, আমোদ প্রমোদে কাটাতাম। প্রতিদিনই সন্ধ্যার পরে ডেকের উপর নাচের ধুম লেগে যেত। ৫০।৬০ টি ইটালী ও গ্রীস দেশীয় স্ত্রী-পুরুষ অষ্ট্রেলিয়া-বাত্রী নেপল্‌স্‌ থেকে উঠেছে। তাদের একটি পুরুষ একটি স্ত্রীলোক আর বারো বছরের একটি মেয়ে মাত্র ইংরাজী জানে। এই তিন জনের সঙ্গে কথা বলে আমি ইটালী ও গ্রীসের নানা বিষয় শুনতাম। আমাদের কেবিনে ৪টি সিট ছিল, তার একটিতে চীনে, একটিতে ইংরেজ আর একটি এল এক ইটালীয়ান। এই শেযোক্তটির সঙ্গে কথা কইতে কেবল হাত মুখ নেড়ে প্রকাশ করা ছাড়া আর উপায় ছিল না। ইংরাজী সে একটুও বুঝত না।

ইটালীর নাচ বড়ই নূতন রকমের। ইংরেজের থিয়েটারের নাচে রকমারি আছে বটে, কিন্তু সাধারণতঃ নাচঘরের নাচ তাদের বড়ই একঘেয়ে ধরণের। কিন্তু ইটালীর নাচ সর্বত্রই নূতনত্বে পরিপূর্ণ। জাহাজে কোন কোন দিন ইটালীয়দের নাচ হত, সেদিন বিরাট ডেকটি দর্শকে পরিপূর্ণ হয়ে যেত। জাহাজে বিভিন্ন রকমের কনসার্ট, বিভিন্ন রকমের বায়স্কোপ প্রভৃতিও এক একদিন হত। বায়স্কোপে অষ্ট্রেলিয়ার চিত্রাবলীই বেশী দেখতাম।

পূর্বেই বলেছি, জাহাজখানি অষ্ট্রেলিয়ায় চলেছে। অষ্ট্রেলিয়ার অধিকাংশ অধিবাসীই ইংরেজ। এদের অনেকের সঙ্গেই বড় প্রীতি জন্মেছিল। সারাদিন অষ্ট্রেলিয়ার নূতন নূতন কথা শুনতাম। ইংলণ্ড থেকে অষ্ট্রেলিয়া যেতে যতটা পথ, ভারতবর্ষ থেকে অষ্ট্রেলিয়া যেতে তার তিন ভাগের এক ভাগেরও কম পথ। অষ্ট্রেলিয়ার লোক-

সংখ্যা সমগ্র গ্রেট ব্রিটনের লোক সংখ্যার আটভাগের একভাগ, কিন্তু অষ্ট্রেলিয়া দেশ গ্রেট ব্রিটনের ২৪ গুণ বড়। এই যে আমাদের বাড়ীর নিকট এত বড় অষ্ট্রেলিয়া দেশটি, এর বিশেষ কোন সংবাদই আমরা রাখি না। অষ্ট্রেলিয়ার সম্যক বিবরণ আমাদের জানা একান্ত কর্তব্য।

২৮শে ফেব্রুয়ারী তারিখে সকালে আমাদের জাহাজ কলকাতা পৌঁছল। আমি সকালের আহার শেষ করে কলকাতা নেমে জাহাজখানি হতে বিদায় নিলাম। কলকাতাতে আমি আট দিন ছিলাম এবং ঐ কয়েক দিনই কোন না কোন একটি বিশেষ বিষয় দেখতাম। এরপর সিংহলের মাঝ দিয়ে বরাবর ট্রেনে এসে তালাইমানার নামক স্থানে নেমে জাহাজে পার হয়ে একটি বৎসর পরে ভারতবর্ষে পদার্পণ করলাম। ভারতভূমিতে পদার্পণ করতেই সে কী আনন্দ!

এরপর ট্রেনে এক একটি দিন রামেশ্বর, মাদুরা, ত্রিচিনাপলী, শ্রীরঙ্গপত্তন, তাজোর প্রভৃতি স্থানগুলিতে নেমে ভারত-গৌরব দাক্ষিণাত্যের বিখ্যাত মন্দিরগুলি দর্শন করলাম। পুণ্যতোয়া কাবেরী নদীতে স্নান করে অনেক দিন পরে স্নানের পবিত্রতা অনুভব করলাম। এরপর তিনটি দিন মাদ্রাজে ছিলাম। তারপর ১১ই মার্চ তারিখে কলকাতা পৌঁছলাম। একটি সপ্তাহ কলকাতায় অনেক জরুরী কাজে ব্যস্ত ছিলাম। এর মধ্যে একদিন বন্ধুবান্ধবদের অভ্যর্থনার মধ্যে বিলাতের কথা শুনিয়েছিলাম। অবশেষে ২০শে মার্চ (১৯২৫) তারিখে যশোহর জেলাস্থ আমার চিরপ্রিয় বাসভবন বাটাজোড় গ্রামে উপস্থিত হলাম।

এদিন গ্রামে যুবক ছেলেদের আনন্দ-উৎসবের ও সভাসমিতির মধ্যে বিপুল অভ্যর্থনার কথা বাদ দিয়ে একটি কথা আমার মনে বড় হয়ে জেগে আছে—গ্রামের পথে যাত্রাকালে গ্রামের ছোটবড়

মা-লক্ষ্মীরা স্থানে স্থানে পথের ধারে দাঁড়িয়ে উল্লুধ্বনি ও শঙ্খধ্বনি করে আমার মঙ্গল কামনা করেছিলেন, মাথায় ধানদুর্বা দিয়ে আমাকে আশীর্বাদ করেছিলেন। মা-লক্ষ্মীদের আশীর্বাদ মস্তকে নিয়েই জীবনপথে চলেছি।

আমার বিলাতভ্রমণ এখানেই শেষ হল। জানিনা, জীবনের যাত্রাপথে আর কতকাল ভ্রমণ করতে হবে। শ্রীভগবানের নিকট আমার এই প্রার্থনা—যেন সম্মুখের বাকি পথটুকু ভালয় ভালয় কাটাতে পারি।

এই ভ্রমণ বৃত্তান্তের মধ্যে অনেক কথা বলবার সুযোগ হয়নি, অথচ সেগুলি না বললে ভ্রমণকাহিনী পূর্ণ হয় না; দ্বিতীয় খণ্ডে, সেগুলি প্রকাশ করা গেল।

দ্বিতীয় খণ্ড ।

দশম অধ্যায়

[আমার অভিজ্ঞতা]

দৈনন্দিন জীবন

আমি বিলাতের পল্লীগ্রামের সাধারণ গৃহস্থ-জীবনে যে-সব কাজকর্ম দেখেছি, তার কিছু কিছু এখানে বলব ।

বিলাতে গৃহিণীরা সাধারণতঃ সকাল ৬ টায় ঘুম থেকে উঠে ৮ টার ভিতর প্রাতঃকালের সামান্য খাবার প্রস্তুত করে। ছেলে-মেয়ে এবং পুরুষেরা ৭ টায় উঠে হাত-মুখ ধুয়ে ৮ টা থেকে ৯ টার ভিতর পরিবারস্থ সকলে একত্র হয়ে এক টেবিলে প্রাতর্ভোজন সম্পন্ন করে। কি সহরে, কি পল্লীগ্রামে সব জায়গাতেই এদের কাজের সময়গুলি ঠিক-ঠাক বাধাবাদি আছে। গৃহিণী ঠিক ৮ টায় আহার তৈরী করে টেবিলে সাজিয়ে রেখেই ছোট একটি ঘণ্টায় টুন্-টুন্ করে শব্দ করে, তৎক্ষণাৎ যে যেখানে যে কাজেই থাকুক, এসে খাবার টেবিলে যার যার নির্দিষ্ট স্থানে বসে। সকালের খাবার—

সাধারণতঃ পরিজ (Porridge) অর্থাৎ ওট সিদ্ধ এক ছটাক আন্দাজ সামান্য দুধ ও চিনি মিশ্রিত করে খায়, সামান্য রুটি মাখন ও এক পেয়লা চা-ও ঐ সঙ্গে খায় । একটু অবস্থাপন্ন ঘরে তার সঙ্গে আধ-সিদ্ধ ডিম, একটি Bacon অর্থাৎ লবণ মিশ্রিত শুষ্ক শূকর মাংস আধভাজা করে তার পাতলা দু-এক টুকরা খায় । সকালকার সেই খাওয়াটি যেমন সামান্য রকম হয়, তাকে আমাদের দেশে আমরা সিকিপেট খাওয়া বলতে পারি । খাবার সময় সকলেই কাঁটা চামচ ব্যবহার করে, এতে খাবার জিনিষ হাতে ঠোঁটে মোটেই লাগে না । ছোট মেয়েদের খাবার সময় বুকের উপর গলার সঙ্গে ছোট একটা রুমাল বেঁধে দেওয়া হয়, সামান্য খাওয়াপড়লে সেই রুমালের উপর দিয়েই পড়ে, গায়ের জামা কাপড়ে লাগতে পারে না । ১৫ মিনিট মধ্যেই সকলে এক সঙ্গে এই আহার শেষ করে, পরে যে যার কাজে যায় ।

৯টার পর পুরুষেরা কাজে যায়, ছেলেমেয়েরা স্কুলে যায় । গৃহিণীরা এঁটো বাসনগুলি জলের টবে ফেলে ভিজিয়ে খাবার টেবিলের কাপড় ঝেড়ে পরিষ্কার করে রেখে নিজের কাজে যায় । আর আর সকলে দৈনিক খবরের কাগজ পড়ার কাজটি সকালের আহারের পূর্বেই শেষ করে ফেলে, গৃহিণীরা প্রায়ই কাগজ পড়বার সময় পান না । তাঁরা ৯টা থেকে ১১টা পর্যন্ত গৃহস্থালীর মূলতবী কাজ, অর্থাৎ জামা কাপড় সেলাই বা পরিষ্কার করা, ঘর পরিষ্কার করা প্রভৃতি কাজে নিযুক্ত থাকেন, এর মাঝে একটু সময় করে খবরের কাগজাদি দেখেন ।

গৃহিণীরা ঠিক ১২টা থেকে ১টার মধ্যে মধ্যাহ্নের রান্না শেষ করে ঠিক ১টায় আবার আহারের ঘণ্টা দেন । এর আগেই বেখানকার যে এসে বাড়ীতে হাজির থাকে, খাবারের ঘণ্টা পড়লেই আবার যার যার স্থানে ঠিক হয়ে আহারে বসে । গৃহিণীরা কিছু খাবার প্রত্যেক ডিনে

পরিবেশন করেন, পরবর্তী খাবারের জিনিসগুলি টেবিলের মাঝখানে রাখেন। মধ্যাহ্নের আহার সাধারণতঃ প্রথমে সুপ অর্থাৎ সামান্য মাংস যুক্ত হাড় সিদ্ধ অথবা ডাল তরকারীর বোল। পরে পাঁউরুটির সঙ্গে আলু, কপি, মটরগুটি প্রভৃতি কোন একটা সিদ্ধ তরকারী, কিছু সিদ্ধ মাংস বা ভাজা মাছ। তার পরে একটু মিষ্টান্ন—চাল বা ময়দার সঙ্গে সামান্য দুধ চিনি মিশ্রিত করে তৈরী করা। সকলের শেষে কিছু ফল ও কিছু বাদাম খাওয়ার রীতি আছে।

সাধারণ গৃহস্থের এই মধ্যাহ্নের ভোজনটির নাম dinner অর্থাৎ দিবসের প্রধান ভোজন। বাদের মধ্যাহ্নে আফিস করতে হয় বা বাহিরে কাটাতে হয় তাদের dinner হয় রাত্রি ৮টায়। dinner সাধারণতঃ আধ ঘণ্টা সময়ের মধ্যে সম্পন্ন হয়, আর বারো আনা রকম পেট ভরা খাওয়া হয়। আমাদের দেশে যেমন বোল আনা পেট পুরে খায়, বিলাতে তেমন কখনও কেউ খায় না। ভাল ভাল নিমন্ত্রণেও ঠিক রোজকার বাধাবাধি পরিমাণে খাওয়ার মতই খায়; খাওয়া দ্রব্যগুলি প্রস্তুতে স্বাস্থ্যের দিকে যতটা লক্ষ্য রাখা হয়—স্বাদের দিকে বোধ হয় ততটা লক্ষ্য রাখা না। মসলাদির ব্যবহার এরা মোটেই করে না, তবে খাবার সময় লবণ, গোল মরিচ গুঁড়া, সরিষার গুঁড়া, ভিনিগার প্রভৃতি অতি সামান্য মিশ্রিত করে খায়। আহারের বস্তু জীলোকদিগকে আগে পরিবেশন ক'রে তারপর পুরুষদের পরিবেশন করা হয় এবং জীলোকেরা খাওয়া শেষ করে না উঠলে পুরুষের উঠা রীতি-বিরুদ্ধ।

ছোট ছেলেমেয়েদের স্কুল সকালে ৯টা থেকে ১২টা; পরে তারা বাড়ী এসে মধ্যাহ্নের আহার সম্পন্ন করে ও খানিকটা ঘরে বসে খেলাধুলা করে, তারপরে ২টা থেকে ৪টা পর্য্যন্ত ২ ঘণ্টা আবার স্কুলে গিয়ে পড়াশুনা করে আসে।

বিকাল ৫টার সকলে জলযোগ করে। এ সময় চা, কেক, বিস্কুট প্রভৃতি খাওয়ার ব্যবস্থা। বিকাল ৫টার পর স্ত্রী, পুরুষ, বালক, বালিকা প্রায় সকলেই একটু বাইরে বেড়াতে বা পরিশ্রমের খেলা করতে বের হয়। ছেলে মেয়ে থেকে বুড়ো বুড়ী পর্য্যন্ত সকলেই একটু পরিশ্রমজনক খেলাধুলা করে বেশ আনন্দে কাটায়। সহরে সর্বত্রই চমৎকার খেলবার পার্ক আছে, গ্রীষ্মকালে এই সব পার্কের স্থানে স্থানে নানারকম লতা, পাতা, ফলে অতি মনোরম শোভা ধারণ করে। গ্রীষ্মকালে পার্কগুলি লোকে লোকারণ্য হয়। প্রত্যেক পার্কই অতি সুন্দর সাজানো এবং বেশ পরিষ্কার পরিচ্ছন্ন।

রাত্রি ৮টার আহারের বন্দোবস্ত প্রায় মধ্যাহ্নের মতই, তবে সংক্ষিপ্ত। গরীবেরা চাল, যব বা ওট মিশ্রিত সিদ্ধ খায়; এর সঙ্গে সামান্য ছুন ঝাল ব্যবহার করে। যারা একটু ভাল বন্দোবস্তে খায়, তাদের প্রত্যেক বারের খাবারের সময়ই টেবিলে জ্যাম, জেলী (আচার বা চাটনী), ভিনিগার প্রভৃতি সাজানো থাকে, ইচ্ছামত কখন কখন ব্যবহার করে।

বিলাতের বড় লোকদের আহারের বন্দোবস্ত ঠিক এই মতই। তবে কেক, বিস্কুট প্রভৃতি জিনিষ-পত্র ও কোর্টায় পোরা নানারকম খাণ্ড কিছু কিছু এর সঙ্গে খায়।

রাত্রির আহারের পর ছেলেমেয়েরা ঘণ্টাখানেক পড়াশুনা করে। বড় মেয়েরা কখন কখন পিয়ানোর সঙ্গে সঙ্গীতাদি করে। ছোট বড় প্রায় সকল ঘরেই এক-একটা পিয়ানো আছে। সাধারণ গৃহস্থের ঘরের পিয়ানোর একটার দাম কমি-বেশী এক হাজার টাকা।

ছেলে মেয়েরা রাত্রি ১০টায় এবং বয়স্কেরা ১১টায় নিদ্রা বায়। শয়নাগারে ঘাবার সময় কোন কোন স্থানে ছেলেমেয়েরা পিতামাতার

মুখ চুষন করে। প্রত্যেকের পৃথক অপ্রশস্ত লোহার খাটে বিছানা। প্রহৃত্তি শিশুকে পর্য্যন্ত পৃথক খাটে পৃথক বিছানায় রাখে। ছোট ছেলেরা কচিং এক বিছানায় দু'জন শয়ন করে। শীতের ছ'মাস রাত্রিতে অধিকাংশ ঘরেই আঙুন জ্বালা থাকে; ঘরের মেঝের দেওয়ালের গায়ে আঙুনের জল স্বতন্ত্র রকমের স্থান প্রস্তুত আছে। ঋতুলগ্নে খুব বেশী শীত, সেখানে শীতের দিনে বিছানার মধ্যে গরম জলের বোতল বা ব্যাগ ব্যবহার করে। ঋতুলগ্নে শীতকালে কোন গৃহস্থ ৭টায়, কোন গৃহস্থ বা ৮টায় ঘুম থেকে ওঠে।

পারিবারিক নীতি-নীতি

সহরে ঘর গরম রাখবার জল জলের ষ্টিম, গ্যাস বা ইলেক্ট্রিক তাপের বহু রকম ব্যবহার আছে। রান্না গ্যাস বা ইলেক্ট্রিক ষ্টোভে সম্পন্ন হয়। পল্লীগ্রামে কয়লার আঙুনের ব্যবহারই বেশী, কোথাও গ্যাসের বন্দোবস্ত আছে। আম্বলগুণের পল্লীগ্রামে দেখেছি—সাধারণ অবস্থার গৃহস্থেরা ঘরের উত্তাপের জল যে কয়লার আঙুন ব্যবহার করে, সেই আঙুনের উপরেই রান্নার অনেক কাজ সম্পন্ন করে।

সকল বাড়ীতেই সর্বদা গরম জলের বন্দোবস্ত থাকে। বাসন ধোয়া, কাপড় ধোয়া সবই মেয়েরা গরম জলে সম্পন্ন করে। খাবার পরেই এঁটো বাসনগুলি ঠাণ্ডা জলের টবে ভিজিয়ে রাখে, তারপর সময় মত একটা হাতল দিয়ে জলের ভিতর বাসনগুলি তোলপাড় করে চিমটা দিয়ে তুলে পরিষ্কার গরম জলের পাত্রের মধ্যে দু'তিন মিনিট রেখে দেয়। পরে তুলে নিষে তোয়ালে দিয়ে জল মুছে আঙুনের উত্তাপের উপর বাসন রাখবার যে লোহার সিকের রেক আছে, সেখানে রেখে

দেয়। খাবার বাসনগুলি সবই এনামেল মাটির তৈরী। তাই খুব সহজেই পরিষ্কার হয়।

প্রায় সকল গৃহস্থ ঘরেই কাপড় কাচা কল আছে। কাপড় পরিষ্কারের জন্য বিশেষ জল ঘাঁটাঘাঁটির দরকার হয় না। কাপড়গুলি আগের দিন স্কার-জলে একটা পাত্রে ভিজিয়ে রাখে, সেই পাত্রটি এমন ভাবে তৈরী যে, একটা হাতল ঘুরালেই জল ও কাপড় এক সঙ্গে পাত্রের ভিতর তোলপাড় হতে থাকে। ৫।৭ মিনিট হাতল ঘুরাবার পর কাপড়গুলি অথ একটি পরিষ্কার জলপাত্রে ফেলে ধুয়ে তোলে। অনেক ঘরেই কাপড় নিংড়াবার কাঠের রোলার আছে। ঘুরালেই ছ'টো বেলুনের চাপে প্রায় সমস্ত জল বারে বায়। আমরা যে ভাবে, জোরে আঘাত ক'রে কাপড় কাচি, আর জোরে মুষড়ে নিংড়াই, তাতে কাপড়ের পরমাণু শীঘ্রই ক্ষয় হয়। কিন্তু এই সব উপায়ে কাচায় কাপড় দীর্ঘকাল টেকে।

'বিনাভের লোকেরা সাধারণতঃ সপ্তাহে একবার, কেউ বা ছ' সপ্তাহে একবার মাত্র স্নান করে। স্নান করা মানে সাবান দিয়ে গা মাখা পরিষ্কার করা। গরম জল ভিন্ন স্নানের উপায় নাই, আবদ্ধ ঘরের মধ্যে লম্বা টিমের ভিতর গরম জলে স্নান করে। শীতের দেশ বলেই রোজ রোজ স্নান করা পছন্দ করে না।

বিনাভের সম্ভান পালন পদ্ধতি বাস্তবিকই আমাদের শিখবার বিষয়। আমি মাত্র একটি কথা এখানে উল্লেখ করব। একটি বৎসর পর্যন্ত নানা স্থানের ইংরেজদের সঙ্গে বাস করেছি। রোজ রোজ কত ছেলেমেয়ে মায়ের তত্ত্বাবধানে দেখেছি। এর মধ্যে কোন মাকে ছেলেমেয়েদের মারতে বা কোন বেশী শাস্তি দিতে দেখি নাই- গায়ে হাত তুলতেও দেখি নাই। একটা দিন মাত্র একটি শিশুকে তার

মা ঠোনা মেয়েছিল। দেখেছিলাম, শিশুটি কঁদে ফেলেছিল। ছেলে-মেয়ে না-মারার দেশে হঠাৎ সেদিন মারতে দেখে আমার প্রাণে বেদনা লেগেছিল। ছেলেপিলেকে এরা মোটেই মারধর করে না, আনন্দের সঙ্গে শিক্ষা দেয়। ছেলেমেয়েরা সারাদিন ছুটাছুটি করে, কেউ হুরগুপনাও করে, কিন্তু মারামারি বা ঝগড়া করে না। ঝগড়া-ঝাঁটি বিশেষ দেখি নাই।

প্রত্যেক ছেলেমেয়েকে ১৪ বৎসর বয়স পর্যন্ত স্কুলে লেখাপড়া শিখান হয়, একথা পূর্বে আরও বলেছি। স্কুলে বিভাগশিক্ষা দিবার জন্ত নানাপ্রকার আয়োজনক উপায় আছে, শিশুরা কিওয়ার্গাটেন পদ্ধতিতে খেলার সঙ্গে নানারকম শিক্ষা পায়। তারপর তাদিগকে ম্যাজিক লর্ঠন, বায়স্কোপ প্রভৃতি দেখান ও নানাস্থানে ভ্রমণ দ্বারা প্রচুর শিক্ষা দেওয়া হয়। শিখাবার জন্ত ছেলেমেয়েদিগকে বেশী কিছু কঠিন পরিশ্রম করতে হয় না।

আমাদের দেশে যেমন সকলেই উচ্চশিক্ষা লাভের জন্ত ব্যস্ত, বিলাতে তেমন নয়; অধিকাংশ ছেলেমেয়ে মোটামুটি শিক্ষা শেষ করেই কোন একটা কাজে যোগ দেয় এবং ক্রমে সেই কাজের উন্নতির জন্তই জীবনব্যাপী সাধনা করে। তারপর কাজের অবকাশের ভিতরে জ্ঞানলাভের চেষ্টায় সারা জীবনই নানা প্রকার গ্রন্থাদি পাঠ করে। দৈনিক সংবাদপত্র পড়া সকলের চাই-ই। জ্ঞানী, অজ্ঞানী, ধনী, নির্ধন, কৃষক, মজুর, স্ত্রী-পুরুষ সকলেই সংবাদপত্র পাঠ করে, দেশের যখনকার যে ঘটনা, তার খবর রাখে।

পল্লীর লোকের ধর্মজীবন দেখে আমি বড়ই আনন্দলাভ করেছি। সহরের লোকে রবিবারে কেউ গির্জায় যায়, কেউ বা বাইরে বেড়াতে যায় কিন্তু পল্লীতে প্রায় সকলেই রবিবারে গির্জায় যায়। ছোট বড়

নব পল্লীতেই একটি করে সুন্দর গির্জাঘর আছে। রবিবার ভিন্ন অগ্ন্যাগ্নি বিশেষ দিনেও নানারকম সভাসমিতি হয়। ছোট ছেলেমেয়েরা রবিবারে সান্‌ডে-স্কুলে যায়। সেদিন কেবল তাদের ধর্মসম্বন্ধে নানা-প্রকার সহজ বিষয় শিক্ষা দেওয়া হয়। ধর্মচর্চার কথা বাদ দিলেও সততা, ভদ্রতা, লোকসেবা, দেশসেবা প্রভৃতি বিষয়গুলিও সান্‌ডে-স্কুলের শিক্ষার অন্তর্গত।

বিশ্বকবি রবীন্দ্রনাথ একস্থানে তাঁর বিলাতভ্রমণ বিবরণে লিখেছেন—“এদেশের লোকেরা আমাকে এতই মূর্খ মনে করে যে, কটোগ্রাফের বিবরণটাও আমাকে বুঝিয়ে দেয়।” আমি বলি, ওটা তাদের মাহুকে শিখাবার একটা ঝাঁক। কোন আফিসের কাজে, ব্যবসায়ের কাজে যখন যেখানে গিয়েছি, সেখানেই নির্বিশেষে কার্য সম্পন্ন হয়েছে—তারা পরিষ্কার বুঝিয়ে দিয়েছে বলে।

সাধারণ অবস্থা

বিলাতে সকলেই কাজের লোক; বসে থাকা লোক বা আমাদের দেশের মত তাস-দাবা খেলা করা লোক সেখানে বড় একটা দেখি নাই। ধনীর ছেলে সেও কাজ করে, গরীবের ছেলে সেও কাজ করে। ভিক্ষুক নাই বলিলেই চলে। আমি যা হু’একটা ভিক্ষুক দেখেছি তা এই মত—

Charring Crossএ বহু লোকের সমাবেশ হয়। সেখানে দেখলাম একটি অন্ধ ভিক্ষা করছে, তার গলায় একটা বোর্ডে লেখা “BLIND” ;

একদিন রাস্তার ধারে দেখলাম, কল ঘুরিয়ে একজন বাজনা বাজাচ্ছে

—মুখে কোন কথাটি নেই, লোকে পয়সা দিচ্ছে ; বুঝলাম সে একজন ভিক্ষুক ।

টেম্‌সের ধারে প্রশস্ত রাস্তার এক পার্শ্বে দেখলাম, একটি লোক নানা রংয়ের খড়ি দিয়ে ফুটপাথের উপর অতি চমৎকার ছবি আঁকছে । ‘হাতে কাজ নাই’, ‘কাজ চাই’, ‘ভিক্ষা চাই’ ইত্যাদি মাঝে মাঝে লিখে রেখেছে । এতে তার ভিক্ষা করা হচ্ছে, আর এই কাজ দেখে হয়ত কেউ তাকে কাজে নেবে । এই রকম পাঁচ সাতটি ছাড়া নিছক ভিক্ষুক বিশেষ দেখিনি ।

মেয়ে পুরুষ কাজকর্মের রাস্তা ঘাটে সব জায়গাতেই সমান । আমাদের দেশের মেয়েদের মত মেয়েলী সঙ্কেচ ভাব ওদেশের মেয়েদের নাই । মেয়েদের সঙ্গে চলফেরা কথাবার্তা করতে একটুও মেয়ে মানুষ বলে বোধ হয় না—যেন পুরুষের সঙ্গেই কথা বলছি । মেয়ে পুরুষ সকলেই কাজকর্ম করে কলের মত দ্রুত । আমরা বায়স্কোপের ছবিতে যেমন দেখি ঠিক তেমনই দ্রুত কাজকর্ম এদের । আর হাত পা চলার একটুও বে-দিশে নাই, সবই যেন প্রাক্টিস করে শেখা ।

বৃটনবাসীদের গতিবিধির ভিতর দিয়ে এই শিক্ষাই আমাকে জাগিয়ে তুলেছে যে, কেমন করে আপন দেশকে, আপন সমাজকে ভালবাসতে হয় । ও দেশের বহু লোক আমাকে জিজ্ঞাসা করেছিল—“ইংলণ্ড আপনার ভাল লাগছে ত ? এদেশের লোকদের কাছে আপনি ভাল ব্যবহার পাচ্ছেন ত ?” আমি অন্তরের সহিত উত্তর করতাম—“সবই ভাল দেখছি, সকলের কাছেই ভাল ব্যবহার পাচ্ছি ।”

ঐ যে সারাজগতের নানাদেশে রাজ্যবিস্তার করেছে ওরা, ও কেবল নিজ দেশকে পুষ্ট করবার জন্ত । আপন জাতির উন্নতির জন্ত ওরা

অসংখ্য রকম বিধান করেছে। বেশীর ভাগ লোকেই আপন উপার্জিত ধনসম্পদ সাধারণের কল্যাণকর এক একটা বিশেষ কার্যে দান করে। এই দানের পরিমাণ এতই বেশী যে, দেশের গরীব দুঃখীরা এই দানের উপর নির্ভর করেই মানুষ হয়ে ওঠে। গরীবেরা দেশের দান পেয়ে আপন দূরবস্থা কাটিয়ে পরে আপন উপার্জিত অর্থ আবার অল্প গরীব দুঃখীদের জন্য দানের একটা ব্যবস্থা করে।

বিগত মহাযুদ্ধের পর ইংলণ্ডের ধনসম্পদ অনেক হ্রাস পেয়েছে বটে, তথাপি এমন একটা লোক ওখানে দেখা যায় না, যার পরিধানে মলিন বস্ত্র, এমন লোক দেখা যায় না, যে খেতে পায় না, এমন লোক দেখা যায় না, যার অর্থাভাবে চিকিৎসার ব্যাঘাত হচ্ছে। প্রত্যেকেই যেন সমপরিমাণ সুখী। ধনীদের ছেলেমেয়েদের লেখাপড়া শিক্ষা দিবার যে ব্যবস্থা আছে—গরীবদের ছেলেমেয়েদের জন্য তার কোন অংশেই মন্দ ব্যবস্থা নয়। রাস্তা ঘাটে ধনী নির্ধনের সমান অধিকার। ‘ছোট লোক’ কথাটির ব্যবহার ওখানে একেবারেই নাই।

কৃষক, শ্রমিক, শিল্পী, ব্যবসায়ী প্রভৃতিদের সহিত কলেজের প্রফেসর বা উচ্চতর রাজকর্মচারীদের সম্মানের বিশেষ কোন পার্থক্য নাই; কর্মের ছোট বড় নাই। যারা রাস্তা পরিষ্কার করে, যারা ধোবা নাগিতের কাজ করে, যারা রাস্তায় লোকের জুতা সাক করে দেয়, তাদের কাজও কোন অসম্মানের বলে গণ্য নয়। এই সম-সম্বন্ধের ফলেই ওরা দেশের মানুষকে শ্রদ্ধা করতে শিখেছে। ওদের এই স্বজাতি প্রীতিকে আমি অন্তরের সহিত শ্রদ্ধা করি।

ইংলণ্ডবাসীদিগকে আমি সারা দিনই কাজ করতে দেখেছি, খুব বেশীর ভাগই পরিশ্রমের কাজ। ছোট ছোট ছেলেমেয়েগুলি সারা দিনই ছুটোছুটি করে, ছেলেমেয়েরা পথে মা-বাপের সঙ্গে চলতে চলতে রাস্তার

পাশের রেলিং ধরে লাফিয়ে লাফিয়ে চলে। এরা এত বেশী ছুটোছুটি করে যে, আমাদের দেশে হ'লে আমরা এদেরই অসভ্য ছেলে বলে তিরস্কার করি। বেশী বয়সের ছেলেমেয়েরাও সর্বত্রই খুব ছুটোছুটি ক'রে বেড়ায়। সর্বদাই এরা প্রকল্লচিত্ত। বয়স্কেরা প্রায় প্রত্যেকেই শ্রমজনিত খেলা করে—এই জ্ঞাপুরুষনির্কিশেষে মুক্ত বায়ুতে খেলা করাই এদের মতে স্বাস্থ্যবান হবার সর্বোৎকৃষ্ট উপায়। সহরের মাঝে মাঝে যেসব বড় বড় পার্ক আছে, তার এক একটা পার্ক এতই বড় আর এমন বৃক্ষাদি পূর্ণ যে, সেখানে ঢুকলে সহরে আছি বলে মনেই হয় না। প্রত্যেক পার্কেই খেলা করবার নানা রকম ব্যবস্থা আছে। অনেক পার্কে আঁকাবাঁকা সুদীর্ঘ খাল কাটা আর তার দু'ধারে বনজঙ্গল তৈরী করা, বিকালে বহু সংখ্যক লোক এই খালের ভিতরে ছোট ছোট নৌকা বেয়ে বেড়ায়, সে দৃশ্য বড়ই সুন্দর। সহরের বাইরেও বেড়াবার খেলা করবার অনেক ব্যবস্থা আছে। রেল কোম্পানী খুব কম খরচে এদের যাতায়াতের নিয়মিত ব্যবস্থা করেছে।

আমি পূর্বে যে বাড়ীতে বাস করতাম সে বাড়ীর গৃহিণী অত্যন্ত মোটা, তিনি সারা দিন হাঁপাতে হাঁপাতে পরিশ্রম-জনিত কাজ করতেন, এক তিলও তাঁর ছুটোছুটির বিরাম ছিল না। যে ছুটি বয়স্কা কুমারী একজিবিশনে আমাদের ষ্টলে কাজ করত, তাদের যখন একটু পরিশ্রমের কাজ দিতাম তখন দেখতাম, হাতে কাজ পেলে তাদের সমস্ত আনন্দে কাটে। ইংরেজের যেমন শারীরিক বল যথেষ্ট, তেমনি নৈতিক বলও যথেষ্ট। আমি এদের প্রত্যেক গতিবিধির ভিতর দিয়েই কিছু কিছু শিক্ষা লাভ করেছি। কেউই শ্রম-বিমুখ নয়, বড় বড় জিনিষপত্র পূর্ণ ব্যাগ প্রত্যেকেই নিজে বহন করে। আশ্চর্যের বিষয় এই যে, ওদেশে আমাদের দেশের মত মুটে দেখি-নি। জ্ঞাপুরুষ নির্কিশেষে হাটবাজার

করে আপন আপন জিনিষপত্র নিজেরাই অতি পরিষ্কার পরিচ্ছন্ন ভাবে নিয়ে পথে চলা ফেরা করে। মেয়েরা অনেকেই বড় বড় ঝুড়িতে বাজার সওদা কাঁকে নিয়ে চলে, ঝুড়ির ফিতে বা হাতল কাঁধে দিয়ে ঝুড়ি কাঁকে ঝুলিয়ে নেয়। ঝুড়ি বা ব্যাগগুলিও অতি সুন্দর, তাতে সওদা এমনভাবে রাখে যে, মনে হয় বহু চিন্তা করে ঝুড়িতে ঐ জিনিষ-গুলি সুন্দর করে সাজান হয়েছে। এদের এই কর্মকুশলতার গতিবিধি দেখে কণ্ঠের প্রতি ভক্তি হত।

সময় ওদেশের লোকের কাছে বড় মূল্যবান। সময় আবার কেমন করে মূল্যবান হয় এটা আমাদের ধারণা করাই কঠিন। কিন্তু প্রত্যেক জিনিষের যেমন মূল্য ধার্য আছে—সময়ও এদের তেমনই। শুধু সহরে কেন, আমার মনে হয়, এদের কোন পল্লীতেও এমন লোক নাই যে, এক তিল সময় বুঝা নষ্ট করে। কাজের সময় কাজ, খেলার সময় খেলা, গল্পের সময় গল্প করা—এর কোনটাতেই সময়ের অপব্যবহার এরা করে না। আমাদের দেশে অনেকে ঘড়ি ব্যবহার করেন পোষাকী ধরনের, কিন্তু এদের প্রত্যেকেই সময়ের সদ্যবহারের জ্ঞানই ঘড়ি ব্যবহার করে। আমাদের দেশে একাল পর্য্যন্ত ঘড়ি প্রস্তুত হয় নি কেন? এর মূলে চিন্তা করলে এই উত্তর পাওয়া যায় যে, সময়ের মূল্য না জানলে ঘড়ির অভাব-বোধ জাগবে কেন? ঘড়ি তৈরী অতি শক্ত কাজ, পোষাকের জ্ঞান যে ঘড়ির ব্যবহার তাতে কি আর অত শক্তি প্রয়োগ চলে? ঠিক-ঠাক সময়মত কাজগুলি সম্পন্ন করার জ্ঞান এদের যে কত সুবিধা হয় তা আর বলে শেষ করা যায় না। এরা কাজকর্মে সময়ের ব্যতিক্রম মোটেই করে না।

বিলাতে রাস্তাঘাট ঘরবাড়ী সবই অতি পরিষ্কার। সকলেই নিজের কাজ নিজে করে; ঝি চাকর ওদেশে দরকার হয় না। ছ'একটা বিলাসী

বড়লোকের বাড়ীতে আবশ্যক মত কাজের জন্ত লোক নিযুক্ত আছে বটে কিন্তু অতি কম। আমাদের দেশে কাজ মাত্রকেই লোকে অপমানজনক মনে করে, এজন্ত অধিকাংশ কাজ চাকর দ্বারা করায়, ওদের কাজের মান-অপমানের বালাই নাই, তাই প্রত্যেক কাজটি সংসারের লোকে নিজে হাতে করে। বাড়ীর ঘর লেপা-পৌছা, পাইথানা পরিষ্কার করা—কোন কাজেই অত্নের সাহায্যের অপেক্ষা করে না। প্রত্যেক ধনী দরিদ্র গৃহস্থের ঘরের মেঝে সর্বত্র গালিচা বা রং করা শক্ত কাপড়ে মোড়া, রান্নাঘর পাইথানাঘর পর্যন্ত রঙিন কাগজে মোড়া, সব অতি পরিষ্কার পরিচ্ছন্ন। ভুলক্রমেও কখন কেউ দেয়ালে বা মেঝের থুথু ফেলে না, এক টুকরা কাগজ পর্যন্ত যেখানে-সেখানে ফেলে না, এর জন্ত পৃথক পাত্র নির্দিষ্ট আছে। দিনের বেলায় পাইথানায় প্রস্রাব করে কিন্তু রাত্রির জন্ত খাটের নিচে পাত্র থাকে। জিনিষপত্র সহজে পচে না বা দুর্গন্ধ হয় না। কোন পাইথানায় কখনও কোন দুর্গন্ধ অনুভূত হয় না, সরকারী পাইথানাগুলিতেও কখন কোন দুর্গন্ধ পাই নাই। খাণ্ডদ্রব্য-গুলিও অনেকক্ষণ পর্যন্ত টাটকা থাকে, এটা ওদেশের হাওয়ার গুণ। খাণ্ডদ্রব্য পেটে গিয়ে কখনও অপাক উৎপাদন করে না, পেটে গিয়ে হজম হবার আগে পচলেই বদহজম হয়, ওদেশে তেমন প্রায়ই দেখা যায় না, সবই বেশ পরিপাক হয়।

ওখানকার খাণ্ডদ্রব্যের বেশীর ভাগই বিদেশ থেকে আমদানী হয়। কানাডা, অষ্ট্রেলিয়া প্রভৃতি দেশ থেকে বেশীর ভাগ খাণ্ড মাংস, মাখন, ফল শস্তাদি চালান আসে। জাহাজে আসতে অনেক সময় লাগে কিন্তু আশ্চর্য্য এই যে, এই দীর্ঘ সময়ের মধ্যে মাখন, মাংস, ফল প্রভৃতি দ্রব্য জাহাজে আনবার বন্দোবস্তের গুণে ঠিক টাটকার মতই এসে পৌঁছে। অষ্ট্রেলিয়ার আঙ্গুর, আপেল, মিসর প্যালেষ্টাইনের কমলা, আফ্রিকার

বড় বড় কলা, সেই সেই দেশ থেকে আমদানী করা, ইংলণ্ডে বসে একেবারে সত্ত গাছ থেকে তুলে খাওয়ার মত টাটকা খেয়েছি। লণ্ডন থেকে পৃথিবীর প্রায় সর্বস্থানের খাদ্য দ্রব্যই ভোগ করতে সুযোগ পেয়েছি।

বিলাতে রন্ধনপ্রণালী যদিও বহুপ্রকার প্রচলিত আছে তথাপি বেশীর ভাগ জিনিষই সিদ্ধ ও ভাজা-পোড়া খায়। পোড়ান ব্যাপারটি আমাদের দেশের মত আঙুরের ভিতর দিয়ে পোড়ান নয়, এক রকম পাত্র আছে, তার ভিতর জিনিস রেখে পাত্রটি উত্তাপপূর্ণ উত্তনের মধ্যে রাখলেই অল্প সময় মধ্যেই সেকা হয়, এতে জিনিষের মৌলিক স্বাদ বৃদ্ধি পায়। নানা জিনিষ মিশ্রিত রান্না এরা বিশেষ পছন্দ করে না, সমস্তই পৃথকভাবে সিদ্ধ করে। আমার মনে হয়, এর মধ্যে একটি বৈজ্ঞানিক যুক্তি আছে, খাদ্যদ্রব্যকে যত স্বাভাবিক ভাবে রক্ষা ক'রে খাওয়া সম্ভব হয়, ততটই সেই দ্রব্যের প্রকৃত গুণ বেশী পরিমাণে পাওয়া যায়। বড় বড় নামকরা হোটেলগুলিতেও এই ধরনের সহজ রান্না প্রচলিত।

ওদেশে যখন নিজে রান্না করে খেতাম, তখন আমার বেশী তৃপ্তি হত। আমাদের দেশের মত চাল, আলু, মটর, মসুর ডাল, ফুলকপি, বাঁধাকপি, মাছ, মাংস, দুধ সবই কিনতে পেতাম। বিলাতে আমার শরীর আট সের বৃদ্ধি পেয়েছিল। আমার শোনা ছিল যে, বিলাতে গেলে স্বহস্তে পাক করে খাওয়া অসম্ভব। কিন্তু আমার রান্না করে খেতে একটুও অসুবিধা হ'ত না। ভারতীয় ছাত্রেরা বিলাতে ইংরেজদের তত্ত্বাবধানে থেকে আমাদের অনভ্যন্ত আহার্য খেয়ে অজস্র অর্থব্যয় করেন, তা দেখে আমার মনে বড় কষ্ট হত। আমি লণ্ডনে তাঁদের নিজেদের একটি ছাত্রাবাস করতে অস্বরোধ করতাম।

ওদেশের প্রত্যেক সহরগুলির মিউনিসিপ্যালিটি সারা জগতের

মানুষকে ডাকছে—আমার নগরটি দেখে যাও, এখানে এসে হুঁদশ দিন থাক, আর আমার দেশের কিছু কিছু জিনিস কিনে নিয়ে যাও। বিদেশী লোক এসে যাতে কোন অসুবিধা ভোগ না করে, স্থানীয়েরা তার ব্যবস্থা করে।

কেমন করে ইংরেজ পৃথিবীটাকে ভোগ করছে তাবলে বিশ্বমাপন হতে হয়। ক্যানাডা অস্ট্রেলিয়া এদের শস্তক্ষেত্র, আফ্রিকা এদের ফলের বাগান, নিউজিল্যান্ড গো-শালা, ভারতবর্ষ ধনভাণ্ডার, ঐশ্বর্যভাণ্ডার, নিজ দেশ গ্রেট-ব্রিটন শিক্ষা ও শিল্পাগার, আর সারাজগত বাণিজ্য ক্ষেত্র।

মোটের উপর দেখলাম—কেমন করে সারা জগতে রাজ্য বিস্তার করে প্রভুত্ব করতে হয়, কেমন করে সারা জগতের শিল্প বাণিজ্য আপন অধিকারে আনতে হয়, কেমন করে সারা জগতের উপভোগ্য ভোগ করিতে হয়। আমি বিশ্বাস করি, আমার বিলাত-ভ্রমণ আমাকে অনেক দিচ্ছে।

একাদশ অধ্যায়

[লোকচরিত্র]

লগুনে একদিন পথে চলতে হঠাৎ দেখলাম, মণিব্যাগ হারিয়েছি, ধরচের পয়সা নাই—এক মাইল দূরে ব্যাঙ্কে গিয়ে ধরচের টাকা আনতে যাব, অথচ আধ ঘণ্টার পরেই ব্যাঙ্ক বন্ধ হবে। ট্রামে যাবার পেনিটি পর্যন্ত পকেটে নাই—তাই মনে হল, আজ পথের লোকের কাছে একটি পেনি চাইতে হবে। তারপর মনে একটা ঔৎসুক্য এল যে, এই পেনিটা চাওয়া যার-তার কাছে চাইব না, এই চাওয়া উপলক্ষে দেশটাকেও বুঝতে হবে। তাই খুব গরীব পোষাক পরা একটা চোদ্দ বছরের মেয়েকে পথে দাঁড়িয়ে বৃষ্টিতে ভিজতে দেখে তারই কাছে বললাম, ট্রামে যাবার পয়সা নাই, আমাকে একটা পেনি দেবে? বলতেই দেখলাম, ছুটি অর্ধপেনি আমার হাতে দিল। বোধ হয় আধ পেনি দুটি মাত্রই তার সম্বল ছিল, সে আমাকে কোন কথা জিজ্ঞাসা করল না, আমার মুখের দিকেও চাইল না—পেনি দুটি দিয়েই পূর্ববৎ দাঁড়িয়ে রইল। আমাদের দেশে এমন অপ্রত্যাশিত দান চাইতে হলে দাতার নিকট কিছু না কিছু কৈফিয়ৎ দিতে হত।

*

বুটীশ এম্পায়ার একজিবিশনে আমাদের ষ্টলে একটা কারুকার্য-পূর্ণ ‘কাস্টেট’ ছিল, তার দাম লেখা ছিল বাইশ পাউণ্ড। একজন আমেরিকান সেটা কিনবার ইচ্ছা করে বললেন—এটা আমাকে বিশ

পাউণ্ডে দিতে পারবেন কি ? বিলাতে দরদস্তুরের রীতি নাই, আমরাও কখন নির্দ্ধারিত দামের চেয়ে কমে বিক্রি করতাম না। লোকটী কম দাম বুঝায় আমি আশ্চর্য্যান্বিত হয়ে জিজ্ঞাসা করলাম, আপনি কম দাম

কেন ? তিনি বললেন, এখানকার জিনিষ আমেরিকায় নিতে

পাউণ্ডের বেশী দাম হলে কাষ্টম ডিউটী আর পাঁচ পাউণ্ড অতিরিক্ত দিতে হয়, তাই বাইশ আর পাঁচ সাতাশ পাউণ্ড জিনিসটির দাম পড়ে। কিন্তু ঐ জিনিসের জন্ত অত খরচ করতে পারি না, কুড়ি পাউণ্ডে পেলে আর কোন খরচ অতিরিক্ত বইতে হয় না। তাঁর এই কথা শুনে আমি যে উত্তর করলাম তা বলতে এখন লজ্জা হচ্ছে ; আমি বললাম, আপনি যদি বাইশ পাউণ্ডে জিনিসটি আমার কাছে ক্রয় করেন তবে আপনার কাষ্টম ডিউটী বাঁচাবার জন্তে আমি বিশ পাউণ্ডের একটি রসিদ আপনাকে দিতে পারি। আমার এই প্রবঞ্চনার প্রস্তাব শুনে লোকটী আর আমার সঙ্গে কথা কইলেন না। ধীরে ধীরে যে ভাবে তিনি প্রস্থান করলেন, তাতে বেশ বুঝলাম, দেশকে কীকি দিতে পরামর্শ দেয়—এমন লোকের কাছে জিনিস কিনতে তিনি অত্যন্ত স্খুণ্ণ বোধ করেন।

একদিন তের বছরের একটি বালিকাকে জিজ্ঞাসা করলাম—বাই-বেলের কোন বাক্যটি তোমার সব চেয়ে ভাল লাগে ? বালিকা উত্তর করল—“যাও, পৃথিবীর এক প্রান্ত থেকে অপর প্রান্ত পর্য্যন্ত এই নাম (খুষ্টের স্মরণার্থ) প্রচার কর।” বালিকার মুখে তেজপূর্ণ ভাবায় এই বাক্যটি বলতে শুনে আমি অবাক হ’লাম, ভাবলাম—এমন প্রাণ না হলে কি আর পৃথিবীর এক প্রান্ত হতে অপর প্রান্ত পর্য্যন্ত খুষ্টধর্মের এত প্রসার।

বালিকাটিকে আমি তার আর একটি মনোনীত বাক্য বাইবেল থেকে বলতে বলায় সে উত্তর করল—“সাইমন তুমি কি আমার ভালবাস ? সাইমন বলিল—হাঁ প্রভু, আপনি সবই জানেন, আমি আপনাকে ভালবাসি। প্রভু বলিলেন—তবে আমার মেঘপাল (প্রিয় শিষ্যগণ) চরাও।” তার এই শাস্ত্রীয় বচনটি বলবার সময় আমি আবার তার অন্তরের ধর্মভাব মুখে ফুটেছে দেখে আশ্চর্য্য বোধ করলাম।

*

একদিন ট্রেনে খুব ভিড় হয়েছে, অনেক লোক গাড়ীতে দাঁড়িয়েই চলছে। ওদেশে ট্রেনে প্রায় সকলেই বই বা খবরের কাগজ কিছু-না-কিছু পড়তে থাকে। একটি লোক অপরের ঘাড়ের উপর খবরের কাগজ রেখে পড়ছে আর লোকটি পাঠকের সুবিধার জন্য ঘাড় নত করে রয়েছে, অথচ এদের হৃ'জনের মধ্যে পরিচয় নাই। দেশবাসী সকলের মধ্যে কি সুন্দর একাত্মবোধ !

*

পূর্ণ এক বৎসরের মধ্যে মাত্র দু'টি ছেলে হৃ'জায়গায় দেখেছি, পথে চলতে তাদের পায়ে জুতা ছিল না। তাদের প্রত্যেককেই জিজ্ঞাসা করে জেনেছিলাম—জুতা কিনবার পয়সার অভাব। এই দৈন্যকে তারা প্রকারান্তরে চাক্তে চেষ্টা করে নাই। এইখানেই পেলাম তাদের মনের বলের পরিচয়।

*

একজিবিশনে আমাদের ষ্টলে একটি ১৫ বছরের মেয়ে কিছুদিন কাজ

করেছিল, নাম তার ভায়োলেট, বড় ভাল স্বভাব। একদিন বেঙ্গল কোর্টের একটি বাঙালী যুবক চা খাবার ঘরে তাকে একাকী পেয়ে হঠাৎ তার মুখচুসনে অগ্রসর হয়েছিল। সে আমার ষ্টলে তার চেয়ে বড় যে মেয়েটি কাজ করত তার কাছে ব্যাপারটা প্রকাশ করতেই বড় মেয়েটি বেঙ্গল কোর্টের প্রধান মেয়ে-কর্মচারীর কাছে কথাটা দিল। সঙ্গে সঙ্গে বেঙ্গল কোর্টের এসিষ্ট্যান্ট কমিশনারের নিকট কথাটা অভিযোগ রূপে উপস্থিত হল। সেই দিন বিকালেই বিচার হয়ে যুবকটির চাকরী গেল। পরদিন যুবকটি মর্ম্মাহত হৃদয়ে আমাদের ষ্টলে এসে আমাদের জ্ঞানাল ঘে, সে ভায়োলেটের সঙ্গে দেখা করতে চায়। আমি তাকে তিরস্কার করে জ্ঞানালম, আমি ভায়োলেটের সঙ্গে তোমায় দেখা করতে দেব না। ভায়োলেট ষ্টলের ভিতরে ছিল, পে এসে আমাদের বলল, যুবকটি কি বলে? আমি বললাম, তোমার তাতে প্রয়োজন নাই, পোড়ার-মুখো তোমার সঙ্গে আবার কথা কইতে চায়! ভায়োলেট বলল—আমি যদি জানতাম, ওর চাকরী যাবে, তবে কথাটা আর প্রকাশ করতাম না, বাহ'ক, ও কি বলে আমি শুনতে চাই। আমি বাধা দেওয়া সত্ত্বেও সে যুবকটির কাছে গেল। যুবকটি বলল—আমি আমার চাকরী এবং যশঃ দুই-ই হারালাম, তুমি যদি আমার জন্তে এসিষ্ট্যান্ট কমিশনারের নিকট একটু অহরোধ কর তবে আমি পুনরায় চাকরী পাবার জন্তে দরখাস্ত করতে পারি। ভায়োলেট তখনই ছুটে গিয়ে এসিষ্ট্যান্ট কমিশনারের নিকট যুবকটির দোষ ক্ষমা করতে অহরোধ করে তার চাকরী বহাল করে দিল। অপরাধীর প্রতি কি আশ্চর্য ব্যবহার! কি ক্ষমা! কি উদারতা!

*

একদিন একটি দোকানে তাদের কারখানায় নুতন ধরণের তৈরী

চুল-ঢাকা জাল বিলি হচ্ছিল। শত শত মেয়ে পুরুষ ঐ জিনিস পাবার জন্তে তাদের দোকানের সামনের প্রসারিত ক্ষেত্রে ভিড় করল। দোকানের মালিক নিকটে বা দূরে থাকে লক্ষ্য করে ফিতে ছুঁড়ে দিচ্ছিল, কেবল সে-ই মাত্র হাত তুলে ফিতে ধরছিল, আর ফিতে পাওয়া মাত্রই সে (আর কাঁকি দিয়ে পুনরায় পাবার আশায় না থেকে) চলে যাচ্ছিল। আশ্চর্য্য এই যে, বহু বহু লোকের মধ্যে অল্প সংখ্যক লোকের ভাগ্যেই ফিতে মিলেছিল কিন্তু এর জন্তে ছড়োছড়ি নাই, নীরব নিশ্চল হয়ে দর্শকগণ ফিতে পাবার আশায় দাঁড়িয়ে ছিল। এক একজনের হাতে ফিতে পড়তেই তার পার্শ্ববর্তী দশ-পনেরো জনে হেসে আনন্দ প্রকাশ করছিল।—আমার মনে পড়ছিল আমাদের দেশের কথা, সভাক্ষেত্রে প্রোগ্রাম বিলির সময়েও লোকদের ধৈর্য্যের অভাবে সভাক্ষেত্র কি রকম গুণ্ডগোলময় হয়ে উঠে।

আয়লণ্ডের বেলফাস্ট সহরের একটি চোঁ-মোহনার মুক্ত প্রান্তরে কতকগুলি লোক ধর্ম্মপ্রচার করছিল, প্রচারের ধারা দেখলাম এই মত যে, প্রত্যেক বক্তা নিজ জীবনের অপরাধের কথা উল্লেখ করে যেভাবে তা থেকে মুক্ত হয়ে ভগবানের অনুগ্রহে আনন্দ-রাজ্যে এসে পড়েছে, প্রাণ-স্পর্শী ভাষায় তারই সাক্ষ্য দিচ্ছিল। একটি যুবতীকে দেখলাম, নিজের পূর্ব জীবনের অপরাধের মুক্তির জন্ত আনন্দ প্রকাশ করে, এবং তার শ্রায় অপরাধীদের দোষ মুক্তির জন্ত উর্দ্ধের দিকে চেয়ে, ভগবানের নিকট প্রার্থনা করছিল। সে দৃশ্য দেখে আমার মনে হচ্ছিল—একেবারে উর্দ্ধের দেবতার সঙ্গে যেন তার প্রাণের ভাব-সূত্রের যোগ হয়ে গেছে, যেন ভগবানের সঙ্গে তার প্রাণের ভাবের আদান প্রদান চলছে। আমি

বলতে চাই না যে, এমন ভক্তিমতী নারী আমাদের দেশে নাই, তবে প্রকাশ্য ক্ষেত্রে এমন উপাসনা বড়ই শক্তির পরিচায়ক।

*

আমি এক সময়ে এক গৃহস্থ পরিবারের সঙ্গে থেকে নিজে রান্না করে খেতাম। ঐ পরিবারের সকলের কাছেই আমার বলা ছিল—আমার গতিবিধির মধ্যে যা কিছু রীতিবিরুদ্ধ দেখবে, তা আমাকে জানাবে। একদিন একটি সাত বছরের ছেলে আমার খাবার সময়ে আমার একটু ত্রুটি দেখেছে যে, মাছের সঙ্গে ভাত মিশিয়ে খাচ্ছি। তখন সে আমাকে উপদেশ দিল—আগে মাছটি খাও, তারপর চিনি মিশিয়ে ভাতগুলি খাও। বোধ হয় চিনি ও ছুখে পায়সের মত করে চাউলের যে পুডিং করা হয় তাই সে জানে, ভাত জানে না। তাই ভাতের সঙ্গে চিনি মিশিয়ে খাবার উপদেশ। উপদেশটি যাই হোক, কিন্তু অতটুকু বালক-উপদেষ্টা মহাশয়ের উপদেশ দানের চেষ্টাটাই আমার কাছে বড় হয়ে ফুটে উঠেছিল।

*

একদিন ঐ পরিবারের একস্থানি চীনা মাটির ডিসু আমার রান্নাঘরে ভেঙ্গে ফেলেছিলাম। আমি যখন এই সংবাদটি গৃহকর্ত্রীকে জানিয়ে একটু দুঃখ প্রকাশ করলাম, তখন গৃহকর্ত্রী হেসে বললেন—ডিস্থানি ভেঙ্গে আপনি কেঁদে ফেলেন নাই তো? ঘটনাটা বিশেষ না হলেও অমাব্যিকতার কথা বটে।

*

ছ'টি ছেলে রাস্তায় মারামারি করছিল, রাস্তায় লোক সব দাঁড়িয়ে

দেখছিল। যতক্ষণ তাদের ধস্তাধস্তি চলছিল ততক্ষণ কোন পথিকই তাদের এই কাণ্ডে বাধা দেয় নাই, কিন্তু যখন একটি ছেলেকে পরাস্ত করে অপরাট তার উপর বিষম মারপিট আরম্ভ করল, তখন পথিকেরা দু'জনকে তুলে পৃথক করে দিল। আশ্চর্য্য এই, দুটি ছেলেই পরস্পর নীরবে মুখের দিকে তাকিয়ে তাদের মনের স্ফোভ মিটিয়ে দু'জনেই “গুডবাই” বলে বিদায় নিয়ে চলে গেল। ঠিক এমনই ঘটনা আর একদিন দুটি মাতালের মধ্যে দেখেছিলাম, তেমনই বিদায়ের বেলায় “গুডবাই।” দেখলাম, ঝগড়া হ'ক, মারামারি হ'ক তবুও সারা দেশ যেন ভাই ভাই।

*

লগুনে একটি ছাপাখানায় এক হাজার কাগজ ছাপার একটি অর্ডার দিয়ে একখানা চেক দিয়ে দাম শোধ করে পাঠিয়েছিলাম। ছাপা ওয়ালারা ডাকে নির্দিষ্ট সময়ে আমার লগুনের বাসায় ছাপান কাগজ পাঠিয়ে দিয়েছে। কিন্তু কার্য্য গতিকে আমি তখন গ্লাসগোতে থাকায় সেগুলি গ্লাসগোতে আমার নিকট পৌঁছল। আমি দেখলাম, একটা অক্ষর বানান ভুল হয়েছে। গ্লাসগো হোটেলের বি-মেয়েটি এই বিষয়টি দেখেই আমাকে বলল, আপনি সেই ছাপাখানায় জানালেই তারা নুতন করে আপনাকে আবার ছাপিয়ে দেবে, তার জন্তে আপনাকে ছাপা খরচ, কাগজের দাম বা ডাক খরচ কিছুই দিতে হবে না। আমি ছাপাখানায় চিঠি দিয়ে জানাতেই ঠিক সময়ে আমার কাছে নুতন আর এক হাজার সংশোধিত ছাপান কাগজ এসে হাজির হয়েছিল। ছাপাখানার সততাটাই এখানে বড় কথা নয়—তার চেয়ে বড় কথা এই যে, একটি হোটেলের ষিও নিঃসন্দেহে জানে যে, তাদের দেশের ব্যবসায়ীরা কখনও গ্রাহককে ঠকায় না, বা গ্রাহকের মনে অসন্তুষ্টি থাকতে দেয় না।

লিপটন্ কোম্পানি কতকগুলি মেয়ের হাতে-মুখে কালো রং মাখিয়ে সিংহলী মেয়ে সাজিয়ে তাদের দিয়ে চায়ের বিজ্ঞাপন প্রচার করছিল। সিংহলী ধরণের নূতন রকমের পিতলের তৈরি ঘটিতে পাতা চা পূর্ণ করে মাত্র পাত্রের দাম এক শিলিং নিয়ে চা দিচ্ছিল। তারা গ্রাহকের সামনে চা পূর্ণ পাত্রটি ধরে কেবলমাত্র ‘শিলিং’ ‘শিলিং’ রব করছিল—অর্থাৎ তারা যেন সত্যি সিংহলী মেয়ে—আর ইংরাজী কথা কইতে জানে না, তাই আর কোন কথা বলতে পারছে না। ভারি মজার চায়ের বিজ্ঞাপনটি! তাদের চমৎকার সিংহলী অমুকরণ দেখে খুবই গ্রাহকের ভিড় হয়েছিল। আমি মেয়েগুলিকে তামাসা করে বললাম—তোমরা সিংহলের চা বাগানের বেশ মেয়েকুলী সেজেছ বটে—কিন্তু এর চেয়ে আরও ভাল অমুকরণ হবে যদি পায়ের জুতা মোজা খুলে ফেলে দিয়ে পায়ে কালী মাখতে পার। তারা হেসে পড়ল। আমার জানা ছিল, তারা উলঙ্গপ্রায় হয়ে নাচতে পারে, তবু পায়ের জুতা মোজা খুলতে পারে না।

*

একদিন ট্রেনে চলছি, পথে একদল স্কুলের ছোট মেয়ে ট্রেনে উঠল। ওখানে তৃতীয় শ্রেণীতেও প্রত্যেক জনের জন্ত এক একটি পৃথক বসবার স্থান। মেয়েগুলি ট্রেনে উঠেই খালি সিটগুলি অধিকার করে বসল, কিন্তু যখন দেখল, দশ বারোটি মেয়ে স্থান না পেয়ে দাঁড়িয়ে আছে, তখন তারা সকলেই উঠে দাঁড়াল। তারপর অপরিচিত প্যাসেঞ্জারেরা ছোট মেয়েদিগের এক একটিকে টেনে নিয়ে কোলে বসাল, তারপর খালি সিটগুলিতে আর সব মেয়েরা বসল। মেয়েদের মধ্যে একাঙ্গবোধ আর প্যাসেঞ্জারদের কর্তব্যজ্ঞান দুই-ই উল্লেখযোগ্য!

*

একজীবিশনে আইল অব ম্যান নামক দ্বীপে ভিজিটর অর্থাৎ দর্শক আমদানী করবার উদ্দেশ্যে সেখানকার মনোরম দৃশ্য সম্বলিত উৎকৃষ্ট কয়েক প্রকার ছবি বিতরণের জন্ত এক স্থানে সাজিয়ে রাখা হয়েছিল। সেখানে বিলি করবার জন্ত কোন লোক রাখা হয় নাই, কেবল লেখা ছিল—“প্রত্যেক ছবির এক একখানা করিয়া মাত্র লইবে।” একটি ছেলে তার মায়ের সঙ্গে এসে ঐ ছবি এক একখানা করে নিয়েছে; তারপর তার পছন্দমত ছবিখানির আর একখানা নেবার জন্ত তার মায়ের কাছে আদেশ চাইতেই মা বললেন—“না, তুমি কখনই এক একখানার বেশী নিতে পার না।” ছেলেই বা কেমন সুন্দর শিক্ষা পেয়েছে যে, আর একখানা নিজ ইচ্ছায় তুলে না নিয়ে মায়ের অনুমতি চাইল; আর মা যে উপযুক্ত শিক্ষাদাত্রী মা—তার তো কথাই নাই।

*

পল্লীগ্রামের টেম্‌সের তীরে একটি মরু-উত্থানে এক পাগল বুড়ীকে দেখেছিলাম। পাগলী বাগানের একখানি বেঞ্চে তার আসবাব-পত্র চারদিকে ছড়িয়ে বেঞ্চ জুড়ে বসে আছে। ভাবলাম, বুকে দেখি বিলাতের পাগল আবার কি চরিত্রের! তার কাছে গিয়ে বললাম, তোমার সঙ্গে একটু কথা কইতে চাই। বুড়ী এপাশ ওপাশ মুখ ঘুরিয়ে বলল—“না”। তার আসবাব পত্রগুলি হচ্ছে—ছেঁড়া কাপড়, ছাকড়ার পুঁটলী, শুকনো ডালের টুকরা, ময়লা টিনের পাত্র তার সঙ্গে এক টুকরা পাউরুটি। দেখলাম, পাগলের ধারা এদেশ ওদেশ সর্বত্র একই রকমের।

*

ওদেশে কোন জন-সমাগমের প্রবেশ পথে যেখানে একটু ভিড় হয়, সেখানে কেউ ঠেলাঠেলি করে আগে যেতে চেষ্টা করে না—একের পর

আর শ্রেণীবদ্ধ হয়ে যায়। পর পর লোক এসেই শ্রেণীর পশ্চাতে দাঁড়ায়। এ রকম শ্রেণী কখন একশত হাতের উপর দীর্ঘ হতে দেখেছি। একদিন দেখলাম, একটা উৎসব-ক্ষেত্রের প্রবেশ-দ্বারে উপরের আচ্ছাদনযুক্ত স্থান ছেড়ে লোকের শ্রেণী বাইরে অনেক দূর গিয়েছে। গুড়ি গুড়ি বৃষ্টি এল তবু লোকগুলি শ্রেণী ভেঙে আচ্ছাদিত স্থানে এগিয়ে এলো না, পরে ধীরে ধীরে একে একে প্রবেশ করল। আমাদের দেশে কিন্তু এইরূপ ক্ষেত্রে সামনের লোক পিছনে ফেলে আগে চোকবার চেঁচাটাই বেশী লোক করে, আর কোন কোনখানে এত লোকের চাপাচাপি হয় যে, তাতে কারো বা সর্দিগাশ্মি হয়, তার মাঝে আবার পকেটমার পর্য্যন্ত আমদানী হয়।

লিভারপুলের একটা বহুজনপূর্ণ হোটেলে একদিন সন্ধ্যার পর দেখলাম, একটা আমেরিকান যুবক একখানি পাউরুটি মাত্র খাচ্ছে। এই হোটেলটিতে অনেক গরীব লোক খায় বটে কিন্তু এমন শুধু রুটিমাত্র কিনে খেতে কাউকে দেখি নাই। তার সঙ্গে কথাবার্তায় জানলাম, সে একখানি জাহাজে রান্নার কাজ করে। জাহাজখানা আসতে দেরী হচ্ছে, এরই মধ্যে তার খরচের টাকা ফুরিয়ে গেছে। তার সিগারেট খাওয়া অভ্যাস আছে; কিন্তু পয়সার অভাবে রান্নার সিগারেট টুকরা কুড়িয়ে তাই দিয়ে সিগারেট তৈরী করে খায়। শোবার খরচ হোটেলে দৈনিক এক শিলিংএর কমে হয় না, তার অভাবে সে গত দুই রাত্রি রান্নায় ঘুরে কাটিয়েছে। আমি বললাম, এই হোটেলে এত লোক বাস করছে, তুমি তোমার এই অভাবের কথা কাউকে বল নাই কি? সে বলল—“এদেশবাসী ইংরেজদের কাছে বলতে লজ্জা করে।” আমি সে রাত্রির

শোবার জন্ত এক শিলিংএর একটা টিকিট করে তাকে দিলাম। দু'দিন পরে তাকে আর একটি যুবকের সঙ্গে মিলে এক খানা রুটীমাত্র দু'জনে খেতে দেখে সেদিন জানলাম, সে যে নুতন বন্ধুটি পেয়েছে, তারও পয়সার অভাব, তাই দুজনেই পরস্পরের হুঃখের দরদী হয়েছে। আমি সেদিন তাদের সম্মতি নিয়ে তাদিগকে চারিটি শিলিং দিলাম। তারা আমার ঠিকানা চাইল, আমি বললাম, এটা ধার দেওয়া নয়—শোধ করবার জন্তে ঠিকানার প্রয়োজন হবে না। এই যে বিদেশে এসে এত অর্থাতাবের মধ্যে পড়েছে তবু এদের কারও প্রাণে একটুও ভাবনা চিন্তার লক্ষণ দেখলাম না; বিদেশে এসে এদের মত মানুষ দেখে আমারও মনের বল এটু বেড়ে গেল।

*

ওদেশে বাইরের সরকারী পাইখানা ব্যবহার করতে একটি পেনি (আনা) দিতে হয়। একটি পাইখানা ব্যবহারের পর মেথরকে পেনিটি দিতেই সে বলল, এ পাইখানাটি এখান থেকে উঠে যাবে তাই পয়সা নেবার হুকুম নেই। তবে যদি আমার নিজকে দান করেন তবে নিতে পারি। আমি বললাম, তোমাকে দান করতে চাই না। তখন সে তার স্বাভাবিক প্রফুল্লতার সঙ্গেই পেনিটি আমাকে ফিরিয়ে দিল। দেখলাম—পেনিটি নিজে নিতে তার কোন অসুবিধাই ছিল না তথাপি কর্তব্য বোধে সে ফিরিয়ে দিল।

*

কয়েকটি লোককে নিয়ে একটি Group ফটো তুলবার মনন করে তাদিগকে বলেছিলাম—তোমরা মাত্র এক শিলিং করে দিলেই প্রত্যেকে একখানি করে ফটো পাবে। ঐ ফটোর জন্তে কিছু বেশী খরচ হয়েছিল

বলে পরে তাদিগকে বলেছিলাম, প্রত্যেকে দুই শিলিং করে দিলে ঠিক হয়। তখন তাদের মধ্যের একটি বালিকা আমাকে বলল, “বুটেনের ভূমিতে দাঁড়িয়ে তুমি একমুখে দুই কথা বলতে পারবে না।” আমি লজ্জিত হয়ে আমার কথাটা ফিরিয়ে নিলাম।

আয়লণ্ডে একটা গরীব পরিবারের সঙ্গে একটু ঘনিষ্ঠতা হয়েছিল, য়িহী একদিন বলেছিলেন—“আমরা যে গরীব হয়ে জন্মগ্রহণ করেছি, এইটাই আমাদের আনন্দের হয়েছে—খুঁট গরীবদিগকেই বেশী ভাল-বাসেন।” দরিদ্রের পক্ষে উপযুক্ত শাস্তির বার্তাই বটে।

*

এডিনবরাহ একটি মিশনারী সভায় একদিনকার বিষয় ছিল “চীন-দেশে স্কটিস্ মিশনের কার্য।” একটি বৃদ্ধা ধর্ম-প্রচারিকা তাঁদের সম্প্রদায়ের তরফ থেকে চীনদেশে যে যে কার্য করেছেন, ম্যাজিক লণ্ডনের সাহায্যে তাই বক্তৃতা করে শোনাচ্ছিলেন। চীনে তাঁদের ধর্মপ্রচার কার্যের যা বর্ণনা করলেন—তাতে বাস্তবিকই তিনি অত্যন্ত প্রশংসা পাবার যোগ্য। সভাভঙ্গের অব্যবহিত পূর্বে একজন বক্তার মুখে শোনা গেল, ম্যাজিক লণ্ডনের ঐ সুন্দর ছবিগুলি সমস্তই ঐ বক্তৃতা-কারিণী মহিলার নিজ হাতের আঁকা। তাঁর বক্তৃতার মধ্যে কিন্তু তিনি তা যুগাঙ্করেও প্রকাশ করতে প্রয়াস পান নাই। মহৎ চরিত্রের পরিচয় নয় কি ?

*

দু’টি স্কুলের ছাত্রী জোড় বেঁধে থিয়েটার দেখতে এসেছে—আমারই পাশে তাদের সিটু হয়েছিল। তারা দু’জনে মজা করে থিয়েটারের

৪২-৫৭ হাসছিল, আর মাঝে মাঝে চক্লেটের বাস্ক বের করে তা থেকে চক্লেট তুলে নিয়ে খাচ্ছিল। আমি ভাবলাম, আমার মত একটি ভিন্ন আকৃতি, ভিন্ন প্রকৃতির জীব তাদেরই ধারে গম্ভীর ভাবে বসে থাকায় নিশ্চয়ই তাদের ক্ষুর্ত্তির ব্যাঘাত ঘটছে; তাদের ঐ বালিকা-সুলভ কোমল প্রাণের ক্ষুর্ত্তির পাশেই এই গম্ভীর নীরবতার মূর্ত্তি নিশ্চয়ই বিসদৃশ। তাই তাদের সঙ্গে একটু ভাবের বিনিময় করব মনে করলাম; কিন্তু কি-ই বা কইব আর কি-ই বা করব! তারপর আমার নীরব গুঞ্চ ওষ্ঠ, গুঞ্চ জিহ্বা তাদের হাতের ঐ চক্লেটের বাস্কের কথা স্মরণ করিয়ে দিতেই আমি Excuse me বলেই একখানি চক্লেট তুলে নিলাম। সঙ্গে সঙ্গেই তারা All right বলে আরও তুলে নিয়ে খেতে অহুরোধ করল। এই যে একটা ভাবের আদান প্রদান হয়ে গেল, তারপর তাদের সঙ্গে কত কথা, কত ভাব বিনিময়, কত আনন্দ। দেখলাম—এই যে কোমল প্রকৃতির ছ’টি সুন্দর স্কুলের মেয়ে আর বিদেশী কাল আদমী গম্ভীর প্রকৃতির আমি, এত যে বৈষম্য, এর মধ্যেও সাম্যের একটা ক্ষেত্র আছে।

একদিন লণ্ডনের পথে একটা পরিচিত ছুট ছেলের সঙ্গে দেখা হল—সে বাজার করতে এসেছে। আমাকে পেয়েই বলল—খুড়ো, আমাদের বাড়ীতে চল, মা তোমাকে দেখলে খুসী হবেন—বলেই সে আমার হাত ধরে টেনে নিয়ে চলল। আমি তার টানাটানির চোটেই রাজি হলাম। পথে বলছে খুড়ো, দেখ কি সুন্দর আইস ক্রীম! তাকে এক পেনির খেতে দিলাম। একটু যেতেই বলছে, দিদির জন্তে কিছু নেবে না কি? আমি আ আনার উৎকৃষ্ট এক বাস্ক খেজুর নিলাম, সে প্যাকেট খুলতে

বলল—দেখবে কেমন খেজুর ; খুলতেই একটা নিয়ে খেল। পথে যেতে যেতে আর একটা চাইল, তারপর আর একটা। তারপর বলছে খুড়ো, উপরের খাক্কা ভাঙ্গা ভাঙ্গা দেখাচ্ছে, উপরের সব কটা তুলে নিই না কেন, তাহ'লে খেয়েছি বলে টের পাওয়া যাবে না। আমি হেসে হেসে তাও তাকে নিতে দিলাম। তারপর বলছে, খুড়ো, চারটে থাকের এক থাক খেলায়, আর এক থাক খেলেও ত দিদি টের পাবে না যে ভাঙ্গা হয়েছে। আমি তার ছুঁছুঁমির দৌড় বুঝবার জন্তে তাও তাকে নিতে দিলাম। খানিকটা গিয়েই সে বলল, খুড়ো, আধা প্যাকেট খেজুর দেখে যদি দিদি সন্দেহ করে তবে আমার দোষ দেবে না ত ? আমি বললাম, তবে বল আমার দোষ দিব ? সে বলল, না খুড়ো, অত-শতম্ব কাজ নেই, সবটা খেয়ে ফেলি। আমিও বুঝলাম, যুক্তিযুক্ত কথা বটে ; বাকিটুকু পেয়ে তার স্তুতি দেখে কে ! প্যাকেটটিতে এক পাউণ্ড অর্থাৎ আধ সের খেজুর ছিল, সবটাই সে পথে মজা করে খেয়ে নিল। তারপর তার মার সঙ্গে দেখা করে এলাম। পকেটে একখানা ছোট নূতন ছুরি ছিল, তার দিদিকে সেইটা দিলাম। ছেলেটি কিন্তু আর কিছু চাইতে সাহস করল না, পাছে খেজুরের কথা উঠে। ছুঁছুঁই বটে !

বার্মিংহামের বাইরে এক পল্লীতে রবিবারে বেড়াতে গিয়েছি। ফেরবার সময় ট্রামের অপেক্ষায় অনেকক্ষণ দাঁড়িয়েছিলাম। ছুঁটি মেয়ে দেখলাম, সান্-ডে স্কুল (রবিবারের ধর্মশিক্ষার স্কুল) থেকে ফিরছে। আমার ট্রাম আসতে দেরী হচ্ছিল তাই তাদের ধর্মশিক্ষা প্রণালী সম্বন্ধে কিছু কিছু শুনছিলাম। ট্রাম আসতেই উঠলাম, পাড়া-গাঁয়ের ট্রাম, ছ' একজন লোক মাত্র ছিল। আমি একটু কাঁকা জারগায়

গিয়ে বসতেই একটি ভদ্রমহিলা ট্রামে উঠে ঠিক আমারই পাশে বসলেন। তিনি আমাকে বললেন, যেয়েদের সঙ্গে আপনার আলোচনা আমি দাঁড়িয়ে শুনছিলাম, তাতে বড় খুসী হয়েছি। তারপর তিনি আমাদের ধর্ম প্রণালী সম্বন্ধে অনেক কথা আমাকে জিজ্ঞাসা করলেন; নিজেও কিছু ধর্মকথা কইলেন। তারপর অত্যন্ত নূতন কথা এই যে, বাস্মিংহানে আমার ফিরবার টিকিট একটা নয় আনা দিয়ে আমার জুতো কিনে দিলেন, আর তাঁর নিজের জুতো নিলেন এক আনার একখনি টিকেট। আমি ধর্মপ্রাণ মহিলার দান প্রত্যাখ্যান করলাম না। আমার সঙ্গে ধর্মালোচনার একটু সুযোগ নেবার জুতোই তিনি ট্রামে চেপে-ছিলেন, তারপর ফিরে গেলেন। এইখানে একটু পল্লীর প্রাণের পরিচয় পেলাম।

*

ওদেশে ট্রামের বা বাসের পয়সা কেউ ফাঁকি দিতে চেষ্টা করে না। একদিন এক পেনির পথ এসে আমার নির্দিষ্ট স্থানে নামলাম, কিন্তু টিকিটওয়ালা তখন উপরে থাকায় পয়সা দিতে পারি নাই; হাতের পেনিটি হাতে করেই নামতে হল, কিন্তু পেনিটি আমি পকেটে ফেলতে পারলাম না, পথের একটি বালককে দিলাম। আমাদের এদেশে কিন্তু এরাপ ক্ষেত্রে পয়সাটি পকেটে ফেলতে আমাদের মনে কোন বিধা হয় না। দেশ-কাল বুঝে মনের অবস্থাও এতটুকু তফাৎ হয়।

*

বাদের কোলে শিশু ছেলে, অথচ বাড়ীতে রাখবার লোক নাই, তাদের পক্ষে কোন আমোদ উৎসব দেখতে বাওয়া প্রায়ই জোটে না। বিলাতে এর জন্ত উৎসব বা প্রদর্শনীর সঙ্গে দর্শকদের শিশু সন্তান

রাখবার অতি সুন্দর বন্দোবস্ত করা হয়। বৃটিশ এম্পায়ার একজিবিশনে দেখেছিলাম—চমৎকার একটি বাগানবাড়ী করা হয়েছিল শিশু সন্তান রাখবার জন্তে। মায়েরা তাদের সন্তান সেখানে রেখে তার জন্তে একটা নম্বর দেওয়া টিকিট নিয়ে যেত, ফিরবার সময় সেই টিকিট ফিরিয়ে দিয়ে যার যার ছেলেমেয়ে নিয়ে যেত। শিশুদের খাওয়ান দাওয়ান বাহু প্রস্রাব করানর সবই সুন্দর বন্দোবস্ত ছিল, তার জন্ত সামান্য চার ছ'আনা দিতে হত। একদিন সেই শিশু রাখবার স্থানে গিয়ে দেখলাম, তার মধ্যে চমৎকার ফুলের বাগান, নানাপ্রকার ছেলে-খেলার সরঞ্জাম। সেখানকার কার্যকারিণীরা প্রত্যেক শিশুটি নিয়ে আনন্দের সঙ্গে খেলা করছে। শিশুরা খেলা পেয়ে মা-বাপ ভুলে গেছে। কি সুন্দর ব্যবস্থা!

বার্মিংহামে স্ট্রাল্ভেন-আর্মির বার্ষিক ধর্মসভার অধিবেশনে একদিন আমাকে কিছু বলতে হয়েছিল। আমি চৈতন্যদেবের প্রচারিত বৈষ্ণব ধর্মের কয়েকটি বিষয় আলোচনা করেছিলাম—যা খ্রীষ্টধর্মাবলম্বীদের পক্ষে অস্বীকার্য অথচ নূতন। সভাপতি মহাশয় আমার বক্তৃতা সম্বন্ধে আলোচনা করতে গিয়ে বললেন, তা হবেই ত—আমাদের স্ট্রাল্ভেন আর্মির প্রতিষ্ঠাতা বুধ সাহেব ভারতে গিয়ে ধর্মপ্রচার করেছিলেন, তারই একটা সফল আমরা আমাদের এই ভারতীয় বন্ধুর নিকট থেকে প্রত্যক্ষ করলাম। কি আশ্চর্য্য! চৈতন্যদেবের প্রচারিত ধর্ম থেকে যে ভাল-টুকু পাওয়া গেল, তাকেও তাদের বুধ সাহেবের কার্যের ফল বলে ধরে নেওয়া হল। নিজেদের গণ্ডির বাইরে যে কিছু ভাল থাকতে পারে এ ধারণা তাদের অনেকেরই নাই।

লগুনে একটা ফুলের দোকানের ফটো নিচ্ছিলাম। ভাবলাম, এমন সুন্দর সাজান দোকানখানির ফটো নেবো কিন্তু এর মধ্যে একটা ছোট সুন্দর মেয়ে থাকলে বড় ভাল হ'ত ; তাই রাস্তায় যে সব স্ত্রীপুরুষ, ছেলে মেয়ে নিয়ে চলছে, তার মধ্যে উপযুক্ত মেয়ে সন্ধান করছিলাম। খানিকটা সময় পরে একটি মনোমত ছোট মেয়ে তার মার সঙ্গে যেতে দেখে তার মাকে বললাম, তোমার মেয়েটিকে ঐ ফুলের দোকানে দাঁড়াতে দেবে, দোকানটির ফটো নেব ? তখন সে মেয়েটিকে এনে তার মাথার চুল, পোষাক বেশ গোছগাছ করে ফুলের দোকানটির সামনে বেশ ভাবমত দাঁড় করিয়ে দিল। অপরিচিতের সঙ্গে এই রকম ব্যবহার আমাদের দেশে আশা করা যায় কি ?

*

রিজেন্টস পার্কের একটি অংশে বহু কাঠবিড়াল, নানা রকমের পাখী স্বাধীন ভাবে চরে বেড়ায়। তারা মানুষ দেখে ভয় করে না, কখন কখন হাত থেকে খাবার নিয়ে খায়। মাত্র কয়েকটি নোটীশ দেওয়া আছে— 'কোন জন্তুকে কেহ বিরক্ত করিও না।'—এরই বলে জীব জন্তুরা মানুষকে ভয় করে না। দেশের আইন কাছন সাধারণে কেমন মেনে চলে, তা এ থেকেই বোঝা যায়।

*

একদিন রাস্তায় একটি মেথরকে জিজ্ঞাসা করলাম—চুল কাটা বো কোথায় ? সে আমার মুখের দিকে চেয়েই বুঝল যে বিদেশী ; তখন সে তার ঝাড়ু সেখানেই ফেলে রেখে আমাকে নিয়ে তিন চার মিনিটের পথ দূরে একটা হেয়ার-কাটার শালুনে উপস্থিত করে চুল কাটার বন্দোবস্ত

করে দিয়ে আনন্দে হাসতে হাসতে বিদায় হল। মেথর কি আর মেথর !

১৯১৯ সালে ১১ই নবেম্বর বেলা এগারটার সময় গত জার্মান মহাযুদ্ধের শান্তি স্থাপন হয়। তাই প্রতি বৎসর ঠিক ঐ দিনে ঐ সময় দু' মিনিট নিস্তর থেকে ভগবানের নিকট প্রার্থনা করবার রীতি আছে। ঐ দিন দেখলাম, ঠিক লোকজন ঘরে বাইরে যে যে অবস্থায় ছিল এগারটা এগার মিনিটের সময়ে একেবারে পাথরের মত নিশ্চল হয়ে রইল। রাস্তার গাড়ী ঘোড়া, লোকজন সবই স্থির।—বুঝলাম নিয়মাহুর্ন্তিতাই এ সব দেশকে বেশী শক্তিশালী করে তুলেছে।

দু'টি ভারি জিনিস নিয়ে আমাকে ট্রেন থেকে নামতে হবে দেখে ট্রেনের একটি বারো বছরের ছেলে ধাঁ করে একটি জিনিস প্লাটফর্মে নামিয়ে দিয়ে ট্রেনে তার বায়গায় গিয়ে বসল। এমন অযাচিত সাহায্য ওদেশে খুবই প্রচলিত।

*

লণ্ডনে এক সময় যে গৃহস্থ বাড়ীতে থাকতাম, সেই বাড়ীর কর্তার মেয়ের নিকট আমাদের বাংলার পদ্মার পোলের গুরুত্ব বর্ণন করছিলাম। পোলটি তৈরীর জন্তে জগতের অনেক বড় বড় জাতিকে জানান হয়েছিল কিন্তু সমর্থ হবে না বলে কেউ এগোয় নাই—তারপর জার্মানীর। গিয়ে করে দিয়েছিল। মেয়েটি জিজ্ঞাসা করল—ইংরেজ জাতিকে বলা হয়েছিল ? আমি বললাম, হ্যাঁ হয়েছিল। শুনে মেয়েটির মুখ ভার হয়ে

গেল ; সেদিন আর অল্প দিনের মত সে হেসে খেলে গল্প করতে পারল না। দেখলাম, তের বছরের মেয়েটির প্রাণও তার জাতির মান অপমানের সঙ্গে গভীর ভাবে বাঁধা।

ঐ পরিবারের কর্তার নিকট একদিন কথাবার্তায় আফ্রিকা সম্বন্ধে একটা সামান্য বিষয় তুলেছিলাম। সেই কথাটা আমাকে ভাল করে বুঝিয়ে দেবার জন্য তাঁরা তাঁদের সেই সাধারণ পরিবার থেকে রাশি রাশি বই বের করে দু' ঘণ্টা পরিশ্রম করে নির্দিষ্ট বিষয়টি বের করে আমাকে বুঝিয়ে দিয়েছিলেন।—সামান্য বিষয়টি নিয়েও বারংবার এত অমূল্যসম্পদ, বড় বড় বিষয়ে তারা কত শক্তি সামর্থ্য প্রয়োগ করে !

*

আঙুর গ্রাউণ্ড রেলের একটা বড় ষ্টেশনে একজন সাধারণ লোককে জিজ্ঞাসা করেছিলাম—অমুক খানে যাব, কোন প্লাটফর্মের গাড়ীতে উঠতে হবে ; সে যে প্লাটফর্মের কথা বলেছিল, সেখানে গিয়ে জানলাম, সে প্লাটফর্ম নয়। তখন একজন রেল কর্মচারী আমাকে ঠিক প্লাটফর্মে পৌঁছিয়ে দিল। একটু পরেই দেখি পূর্বের সেই ব্যক্তি ব্যস্তভাবে আমাকে খুঁজে বেড়াচ্ছে, আমাকে পেয়েই বলল—আপনাকে ভুল সংবাদ দিয়েছিলাম, ক্ষমা করবেন। আপনাকে বলার পর আনার একটু সন্দেহ থাকায় ষ্টেশনে জেনে আপনাকে ঠিক সংবাদ দিতে খুঁজছি। কর্তব্যজ্ঞান এমনই থাকা চাই বটে।

দ্বাদশ অধ্যায়

[নানা কথা]

লগুনে একদিন বয়স্কাউটদের এক খেলনা প্রদর্শনী দেখতে গিয়েছিলাম। প্রদর্শনীতে ছোট ছোট নাগরদোলা, অশ্ব-চক্র ইত্যাদি ত ছিলই, অধিকন্তু ছেলেরা নানারকম ছোটখাট জিনিস বেচাকেনাও করছিল। কেউ বেচছিল বাবুই পাখীর বাসা, প্রতিটার দাম এক পেনী ; কেউ বেচছিল নানারকম সামুদ্রিক কিছুক, এর দামও ঐ রকম ; একটি ছেলে, পানামা খাল কাটবার সময় যখন তার বাপের সঙ্গে সেখানে ছিল তখন যে পাথরগুলো কুড়িয়ে এনেছিল তাই সামান্য সামান্য দামে বিক্রি করছিল। আর একটি ছেলে দেখলাম একটি ছোট গাধা এনেছে, দর্শক ছেলেরা একটু পথ সেই গাধায় চড়ে হু পেনী করে মাগুল দিচ্ছিল। বয়স্কাউটদের এই মেলাটিতে দেখলাম বেশ ব্যবসায়-বুদ্ধির পরিচয় দিয়েছে এই ছোট ছোট ছেলেরা।

*

কম খরচে সাধারণভাবে খাবার জন্ম একবার এক Salvation Armyর হোটেলে কয়েকদিন ছিলাম। সেখানে এতই লোকের ভীড় যে, শ্রেণীবদ্ধ হয়ে একের পর একে খাবারের ডিস নিয়ে নিজের আসনে এনে খাওয়ার ব্যবস্থা। এইভাবে খাবার আনতে কাউকে হস্ত বিশ-তিরিশ জন লোকের পিছনে গিয়ে দাঁড়াতে হয়, তাতে কমপক্ষে

দশ-পনের মিনিট সময় অতিবাহিত হবার পর খাবার পাওয়া যায়। একদিন এইভাবে খাবার নিয়ে বেতে বসেছি, এমন সময় এক গ্লাস গরম জলের দরকার হওয়ায় আমাকে আবার শ্রেণীর পিছনে গিয়ে দাঁড়িয়ে দশ মিনিট কাটিয়ে তবে ঐ এক গ্লাস জল আনতে হল। এক গ্লাস গরম জলের জন্য দশ মিনিট সময় অপেক্ষা করার জন্য আমি ষতটুকু বিরক্ত হয়েছিলাম, তার চেয়ে বেশী সন্তুষ্ট হয়েছিলাম দেশের এই নিয়মানুবর্তিতা দেখে।

*

বার্মিংহামে একটা হাটের মধ্যে এক কাপড়ওয়ালী এসে আমাকে জিজ্ঞাসা করলে “আপনি কি ভারতবাসী?” আমি “হাঁ” বলতেই সে বলল “আমার বাড়ীতে একটি ভারতীয় বৃদ্ধ এসে রয়েছে, সে বড় গরীব, তার কেউ নেই, আপনি যদি একবার আমার বাড়ীতে গিয়ে তাকে দেখে আসেন তবে সে খুব খুসী হবে।” আমি পরদিন সকালে যাবার জন্য সময় নির্দিষ্ট করে দিয়ে যথাসময়ে গিয়ে দেখা করলাম। দেখলাম বুড়ো প্রায় ইংরাজের মত দেখতে, তার ইংরাজী কথাও একটু বুঝলাম বটে, কিন্তু ভারতীয় ভাষায় যা বলল তা কোন্ প্রদেশের কি ভাষা কিছুই বুঝলাম না। গৃহিণীর মেয়ে আমাকে বুঝিয়ে দিল যে বয়সের আধিক্য হেতু লোকটির বুদ্ধিস্বচ্ছ একেবারে নাই বললেই চলে। আমি তাকে কিছু অর্থ সাহায্য করে ফিরে এলাম। কোথাকার লোক কিভাবে এসে পড়েছে বুঝলাম না, খুব সম্ভব ব্রীহদী হবে। বিদেশী অসহায় বৃদ্ধের উপর এই দরিদ্র পরিবারের এতটা সহানুভূতি দেখে গৃহস্থের প্রতি আমার অন্তরের শ্রদ্ধা জ্ঞাপন করলাম।

*

একদিন এক পরিবারের সঙ্গে একত্র খেতে বসেছি, একই টেবিলে সকলের খাবার ব্যবস্থা। একটি চার বছর বয়সের ছেলে তার মার কাছে মূনের পাত্রটি চাইল—“Salt mammi.” তার মা তখন তার ভাষার ক্রটি ধরে বললেন,—“বল, Please Salt mammi.” মায়েরা ছেলেদের এমনি করেই গ’ড়ে তোলে।

এক রবিবারে কোন এক বন্ধুর বাড়ী বেড়াতে গিয়েছিলাম। তার একটি তিন বছর বয়সের ছেলে একখানি বাইবেল-সংক্রান্ত ছবির বই এনে আমাকে দেখাতে আরম্ভ করল। সে পড়তে শেখে নাই, কিন্তু প্রত্যেক ছবিখানির এমন সুন্দর বর্ণন করছিল যেন সমস্ত বইখানি তার কণ্ঠস্থ। প্রত্যেক ছবির নিচেই শিশুদের উপযোগী ভাষায় ছবির আখ্যানের সবিস্তার বর্ণনা ছিল ; আমি লক্ষ্য করছিলাম যে, ঐ ছেলেটির মুখের কথাগুলি ঐ ছাপা কথাগুলির সঙ্গে ঠিক ঠিক মিলে যাচ্ছিল। শৈশব থেকেই ছেলেরা কিভাবে তৈরী হয়ে ওঠে ভেবে আমি বিস্মিত হয়ে গেলাম।

*

গ্লাসগোর এক হোটেলে একাকী আশুনি পোয়াছি এমন সময় নুতন একটি ইংরেজ আগন্তুক এল। হোটেলের পরিচারিকা তাকে আমায় কাছে বসে আশুনি পোয়াতে বলল। কিন্তু আমার সঙ্গে তার গল্পের রস তেমন জমবে না বুঝে সে সেই পরিচারিকাটিকেই তার কাছে বসতে বলল। তারপর যেসব গল্প আরম্ভ করল তা আমাদের ভারতীয় আদিবাসের সীমানার বাইরে। পরিচারিকাটি কিন্তু আগন্তুকের কথায় ভাল পুষ্টিয়ে চলছিল মাত্র। আমি হোটেলটিতে তিন দিন ছিলাম,

তাতে যতদূর জেনেছিলাম তাতে বুঝেছিলাম যে পরিচারিকাটি বেশ ভাল মানুষ। অবকাশ কালে আমি তাকে জিজ্ঞাসা করলাম—“ঐ লোকটার অমন কুৎসিৎ কথাবার্তার সঙ্গে তুমি অমন করে সাব্ব দিয়ে যাচ্ছিলে কেন?” সে হাসিমুখে বলল “কথার মধ্যে দিয়েই আমরা লোককে খুসী রাখবার চেষ্টা করি, তাতে আমাদের চরিত্রে দোষ স্পর্শ করে না।”—কথাটা শুনতে যেন কেমন লাগে, কিন্তু সত্যিই নিজ কর্তব্য-কর্মকে ওরা সকলের ওপরে স্থান দিয়েছে।

*

রাত্রির জাহাজে তৃতীয় শ্রেণীতে স্কটলও থেকে আয়ারলণ্ডে চলেছি। শেষ রাত্রে এই শ্রেণীরই কয়েকজন ইংরেজ এসে আমাদের ঘুম থেকে জাগিয়ে তুলে একটি ছেঁড়া ব্যাগ দেখিয়ে বলল “আমাদের এই ব্যাগ ছিঁড়ে কে টাকাকড়ি নিয়ে গিয়েছে—তোমাকেই একমাত্র বাইরের লোক দেখছি, টাকা নিয়ে থাক তো কিরিয়ে দাও।” শুনে আমার রাগও হল না, হুঃখও হল না। আমি আমার পকেট থেকে আমার কার্ড একখানা তাদের একজনের হাতে দিলাম। তাতে আমার নামের সঙ্গে ‘Editor—Matrimandir’ এবং Proprietor—Economic Jewellery Works’ লেখা দেখে তারা লজ্জিত হয়ে আমার কাছে বিশেষ ভাবে ক্ষমা চেয়ে বিদায় হল। আমাদের দেশ হলে প্রথম থেকেই ব্যাপারটা খুব তিক্ত হয়ে উঠত।

*

যে পরিবারটিতে দীর্ঘ দিন ছিলাম, তাদের তিন বছরের একটি ছেলেকে নিয়ে একদিন রাস্তায় বেড়াতে চলেছি। পুলিশের একটু নজর পড়ল আমাদের উপর; বিদেশী কাল লোক আমি ইংরেজ-সন্তান নিয়ে

চলেছি—আমার একটু খবর নেওয়া বোধ হয় সে দরকার মনে করেছিল। সে এসে হাসতে হাসতে ছেলোটিকে তার নাম জিজ্ঞাসা করল। তারপর জিজ্ঞাসা করল “কার সঙ্গে চলেছ?” বালকটি বলল “কাকার সঙ্গে।” পুলিশ তখন ছেলোটিকে একটু আদর করে বিদায় নিল। দেখলাম, খুব ভদ্রভাবে পুলিশ তার তদন্ত সম্পন্ন করল।

*

ওরিয়েন্ট লাইনের জাহাজে ছোট বড় সব কর্মচারীই ইংরেজ। যে আমাদের কানরা কেবিন পরিষ্কার করত, বিছানা করত তাকে একদিন জিজ্ঞাসা করেছিলাম “বেতন পাও কত?” সে জানাল “মাসিক ২৮ পাউণ্ড অর্থাৎ প্রায় ৪০০ টাকা।” অবাক হলাম, একজন ঝাড়ুদারের বেতন শুনে; কিন্তু পরে ভাবলাম কামরাঙুলিতে কত লোকের কত মূল্যবান জিনিষ রয়েছে—অনেক সময় কামরার লোকজন থাকে না—অথচ ঝাড়ুদার এসে তার কাজকর্ম করে যায়। এত দায়ীত্ব বার উপরে, তার বেতন কম হলে চলবে কেন।

দুটি যুবতী ঠেলা গাড়ীতে করে ছোট ছোট মনোহারী খেলনা বিক্রি করছিল। আমি বললাম “তোমাদের একটি ফটো নিতে চাই, একটু দাঁড়াও।” তারা স্থির হয়ে দাঁড়াল। আমি তখন পুনরায় বললাম “ওরকম নয়, ঠিক ঐ গাড়ী ঠেলে ধরে চলবার ভঙ্গিতে দাঁড়াও।” তখন তারা তাদের গাড়ী ধরে ঠিক সেই ভাবে দাঁড়াল। আমি আমার পকেট-ক্যামেরায় ফটো নিলাম। দেখলাম, রকমারীতে কারও কোন আপত্তি নাই।

একটি নুতন পরিবারের সঙ্গে সাক্ষাৎ করার জ্ঞা চিঠি দিয়ে বন্দো-
বস্ত করেছিলাম। তাঁরা তার উত্তরে জানিয়েছিলেন যে, গৃহকর্তার
মেয়ে ষ্টেশনে উপস্থিত হয়ে আমাকে তাঁদের বাড়ীতে নিয়ে যাবে।
আমাকে ষ্টেশনের Waiting roomএ বসতে তাঁরা নির্দেশ করেছিলেন।
আমি যথাসময়ে ট্রেন থেকে নেমে Waiting roomএ গৃহস্থের মেয়ে-
টিকে পেলাম না। পনের মিনিট অপেক্ষা করে আমি লোকের কাছে
জিজ্ঞাসা করে তাঁদের বাড়ীতে উপস্থিত হলাম। তারপর বুঝলাম, যে
Waiting roomএ আগন্তুকদের অপেক্ষায় বসতে হয় আমি সে ঘরে না
বসে যে ঘরে ট্রেনে যাবার অপেক্ষায় বসতে হয় সেই ঘরে বসেছিলাম
বলেই মেয়েটির সঙ্গে আমার দেখা হয় নি। মেয়েটি দশ মিনিট আমার
জ্ঞা অপেক্ষা করে এই মাত্র বাসায় ফিরে কাপড় ছাড়ছে। এখানে
আমার ভুলের জ্ঞা পরিবারের কোনই দোষ দেওয়া যায় না। তাঁরা
ঠিকমত কাজই করেছেন।

একদিন রিজেন্ট পার্কে এক গাছতলায় একটি লোক বক্তৃতা করছিল,
তার বক্তৃতার এক জায়গায় সে কোন একটি সমিতির বিরুদ্ধে কয়েকটা
কথা বলেছিল। সেই সমিতির একটি যুবতী শ্রোতাদের মধ্যে বসে ছিল।
সে তৎক্ষণাৎ বক্তাকে থামতে বলল এবং জানিয়ে দিল, কোন দলের
বিরুদ্ধে কিছু বলতে হ'লে খুব ভাল করে না জেনে বলার চেয়ে বক্তার
কিছু না বলাই ভাল ছিল। বুঝলাম, কোন দিক দিয়েই অত্যাশ্চর্য
এদের ধাত নয়।

ছুঁটি মেয়ে একটা খোলা যায়গায় ফটো তুলছিল। আমি তাদের কাছে দাঁড়িয়ে একটু দেখতেই তারা আমাকে তাদের দলের মধ্যে নেবার প্রস্তাব জানাল। আমি বিনা আপত্তিতে রাজি হ'লাম। তখন তারা আমাকে ঠিক মাঝখানে নিল। তারপর শ্রেণীবদ্ধ ভাবে গলাগলি ধরে আমাদের ফটো তোলা হ'ল। তারা ঐ ফটোর একখানি আমাকে পাঠিয়ে দিয়েছিল। বিষয়টি আমাদের দেশের হিসাবে লজ্জাকর হলেও বৈচিত্র্য হিসাবে উল্লেখ করলাম।

কিছু খদ্দের কাপড় অকেজো হয়ে পড়ে থাকায় সেগুলো দিয়ে খুব ঢিলে করে পায়ের পাতা পর্য্যন্ত ঢাকা যায় এমন একটা জামা করে নিয়েছিলাম, ঘরে ব্যবহার করতাম। একদিন একটি বাঙালী ছাত্র আমার সঙ্গে দেখা করতে এসে আমাকে সেই পোষাক-পরা দেখে খুব সাবধান করে বলল, এরকম পোষাক যেন কখনও না পরি, কারণ এরকম পোষাক পরা লজ্জার বিষয়—বিশেষতঃ এটা পরে যদি কোন কারণ বশতঃ বাড়ীর বাইরের সদর রাস্তায় দাঁড়াই তবে নিশ্চয়ই পুলিশে ধরে নিয়ে যাবে। স্থানীয় লোকদের কাছে পরে আমি এ সম্বন্ধে জিজ্ঞাসা করেছিলাম, সকলেই বলল এরকম পোষাক পরায় কোন আপত্তির কারণ থাকতে পারে না। এখানে এ বিষয়টি উল্লেখ করার কারণ এই যে, বাঙালী আমরা বিলাতে গিয়ে একেবারে সকল বিষয়ে ইংরেজদের অনুকরণ না করলে যে দোষ নয়, সেইটাই সকলকে জানিয়ে দিচ্ছি।

*

বিলাতের ভেজাল জিনিসগুলি ভেজালের দোষে ছুঁট নয়, কারণ তাতে আসল জিনিস কত থাকে আর ভেজাল জিনিসই বা কি পরিমাণে

মিশ্রিত করা হয়েছে তার হিসাব দেওয়া থাকে। সেগুলি আমাদের দেশের দুধেজল দেওয়ার মত নিছক ঠকানো ব্যাপার নয়। আবশ্যিকতার হিসাবেও অনেক সময় ভেজাল দেওয়া হয়, যেমন—মিশ্র মাখন, ক্যারেট সোনা।

একদিন ট্রেনে চলেছি, একটি বয়স্কা বালিকা এক স্টেশন থেকে ট্রেনে উঠল এবং বেঞ্চে একটি বুদ্ধার নিকট গিয়ে বসল। বেশ বোকা গেল, এরা কেউ কারো পরিচিত নয়। কিন্তু দেখলাম, বুদ্ধা বিনা বাক্যব্যয়ে বালিকাটির চুলগুলি বেশ সুন্দর করে বেঁধে দিল। দুজনের মধ্যে কোন কথা বলতে শুনলাম না। ওদেশের মেয়েদের মধ্যে এরকম ক্ষণিকের সম্বন্ধ খুব দেখা যায়—এটা বেশ মিষ্টও বটে।

*

বাস্মিংহামের মিউজিয়ামে পাথরের একটি প্রকাণ্ড বুদ্ধ মূর্তি আছে। সেটি বাংলার সুলতানগঞ্জ (বর্তমান কাটিহার) থেকে বহুকাল পূর্বে নেওয়া। যখন আমি সেটির দৈর্ঘ-প্রস্থাদির হিসাব নিচ্ছিলাম, তখন কয়েকজন ওদেশীয় দর্শক আমাকে জিজ্ঞাসা করেছিল—“এটিকে কি আপনারা দেশে নিয়ে যাবেন?” আমি মনে মনে ভাবলাম, এমন দিনও কি ভারতের ভাগ্যে হবে!

*

একদিন আমার পরিচিত কয়েকটি বাঙালী ছাত্র আর একটি বাঙালী ছাত্রকে আমার কাছে এনে দেখাল। ছাত্রটি তিন বছর আগে লণ্ডনে এসেছে, খেলাধুলায় লণ্ডনের ছেলেমহলে বেশ নাম পেয়েছে। আমি

তার সঙ্গে বাঙ্গলার কথা বলতেই সে ইংরাজিতে জানাল—সে বাঙ্গলা ভাষা ভুলে গিয়েছে। শুনে আমার দুঃখ হ'ল, ছেলোটর এই অস্বাভাবিক 'বিলাতিপনা'র উপর একটু রাগও হ'ল। আমি তখন অত্যাচ্ছন্ন ছেলেদের শুনিয়ে বললাম “বাঙ্গালীর ছেলে তিন বছরের মধ্যে বাঙ্গলা ভাষা ভুলে গিয়েছে, আশ্চর্য্য কথা ; এমন ছেলেকে খানিক উত্তম মধ্যম দিলে তবে যদি কিছু বাঙ্গলা বলতে পারে !” ছেলেদের দলের সঙ্গে সেও হেসে উঠল। তখন আমি বললাম “এই নাকি তুমি বাঙ্গলা ভাষা ভুলে গিয়েছ ?” বাস্তবিক ছাত্রমহলে এমন অনেক আছে যারা নিজ দেশীয় ধারাকে যত স্বর্ণা ক'রে—যত দূরে রেখে চলতে পারে ততই গৌরবের বিষয় মনে করে !

গ্রাসগোতে বাসকালে একটি পাঞ্জাবী ভদ্রলোকের একখানি ভাল সিন্ধের দোকান আছে সংবাদ পেয়ে দেখতে গিয়েছিলাম। দেখলাম খুব বড় না হলেও বেশ উচ্চশ্রেণীর দোকান বটে। ভদ্রলোকটি মেন বিয়ে করে দোকান ও সংসার চালাচ্ছেন। আমাকে পেয়ে খুব আনন্দ প্রকাশ করলেন এবং স্ত্রীকে ডেকে আমার সঙ্গে পরিচয় করিয়ে দিলেন। ছোট একটি মেয়ে হয়েছে, তাকেও এনে দেখাতে বলায় স্ত্রী মেয়েটিকে কোলে করে এনে দেখাল। আমি লক্ষ্য করলাম, ভদ্রলোকটি খুব আনন্দের সঙ্গে এসব করতে বললেন বটে, কিন্তু স্ত্রী যেন এই আনন্দে ষোল আনা যোগ দিতে পারল না ; কেবল শান্তভাবে স্বামীর আদেশ পালন করল মাত্র। জানি না, এ ভাবের মিলন কতখানি মধুর হয়।

একটা বড় হোটেলে বাস করছি। এমন সময় একদিন আইরিস্ ফ্রি ষ্টেটের একজন লোক এসে আমার সঙ্গে বেশ সেধে আলাপ করল। তারপর আমাকে জিজ্ঞাসা করল, রোম্যান ক্যাথলিক খৃষ্টানদের আমি মানি কি না। আমি উত্তরে জানালাম, আমি খৃষ্টকে মানি, তবে খৃষ্টানদের কাকে মানি আর কাকে মানিনে তার উত্তর দিতে পারব না। সে রোম্যান ক্যাথলিকের দেশ থেকে এসেছে প্রোটেষ্ট্যান্টদের দেশে নিজেদের ধর্ম প্রচার করতে। প্রোটেষ্ট্যান্টরা কিন্তু ইংলণ্ডে রোম্যান ক্যাথলিক মত প্রচার করতে দিতে একদম নারাজ। তাই দেখলাম লোকটি চুপি চুপি আমাকে খুব ছোট ছোট কয়েকখানি ধর্মপুস্তক দিল এবং ক্যাথলিক মতের প্রতি আমি যেন দিন দিন বেশী মন দেই তার জন্ত মাথার দিব্য দিয়ে অহরোধ জানাল। ধর্ম প্রচারের জন্ত ওদেশের লোকেরা এই রকমই চেষ্টা করে।

✽

*

বিলাতে কাপড় কাচান'র সাধারণ নিয়ম এই যে, ধোবা প্রতি সোমবারে কাপড় নেয় আর প্রতি শুক্রবারে তা দিয়ে যায়। গৃহস্থেরা সোমবার সকালে ময়লা কাপড়গুলি পুঁটলী বেঁধে, যতগুলি কাপড় তার সংখ্যা ও নাম একখানি লেবেলে লিখে ঐ পুঁটলীর গায়ে বেঁধে বাড়ীর প্রবেশ-পথের সিঁড়ির নিচেয় ফেলে রাখে; ধোবা যথাসময়ে এসে তা নিয়ে যায়। তারপর শুক্রবারে ধোবা ঐ কাপড়চোপড় সুন্দর কাগজ দিয়ে প্যাক করে কাপড়ের সংখ্যা, নাম ও গ্রাহকের নাম লিখে বাড়ীর ঠিক সেই স্থানে পুনরায় রেখে যায়। গৃহস্থের সঙ্গে ধোবার সাক্ষাৎ হয় মাসে একবার—সেই হিসাবের দিনে মাত্র। বেশ ভাল ব্যবস্থাই বটে।

আমাদের দেশে বিবাহ শ্রাদ্ধাদির নিমন্ত্রণে ভোজ্যটিই প্রধান বিষয়। নিমন্ত্রিত লোক সাধারণতঃ ভোজনের জন্তই গমন করে এবং ভোজনান্তে ফিরে আসে। ওদেশে কিন্তু এরকম পদ্ধতি নেই। ওখানে এই রকম কোন অনুষ্ঠানে প্রথমতঃ একটি সভা হয় এবং ঐ সভাতে সেই অনুষ্ঠান সম্বন্ধে বেশ খানিকটা কার্য্যকর আলোচনা হয়। তারপর সকলে একত্রে ভোজন করে। আমাদের দেশেও শ্রাদ্ধাদির নিমন্ত্রণে যদি মৃত ব্যক্তির জীবনী সম্বন্ধে খানিকটা আলোচনা হয়, বিবাহাদিতে যদি বর ও কন্যা পক্ষের পরিচয়াদি জ্ঞাপক কিছু আলোচনা হয় তবে বাস্তবিকই অনুষ্ঠান আরও বেশী কার্য্যকর হয়।

*

বাড়ীতে হোক, হোটেলে হোক, নিমন্ত্রণ হোক, ওদেশে প্রত্যেকেরই আহ্বারের উপকরণের একটা ধারা আছে। তাতে খাওয়ার সব জাতীয় উপাদান কিছু কিছু থাকবেই। এই ব্যবস্থা স্বাস্থ্যের পক্ষে বিশেষ অন্তুল সে বিষয়ে সন্দেহ নেই। আমাদের দেশে কিন্তু আমরা কখন অতি সামান্য ডাল তরকারীর সঙ্গে একরাশ ভাত খাই, কখন বা নিমন্ত্রণ বাড়ীতে মাছ, মাংস, দই, ক্ষীর, সন্দেশ, রসগোল্লা প্রভৃতি একই জাতীয় জিনিষ প্রচুর পরিমাণে খেয়ে নিই। এরকম খাওয়া স্বাস্থ্যের উপযোগী হয় না। বিলাতবাসীদের মধ্যে কুত্রাপি এ নিয়ম নাই।

*

বেকার লোকদের সাহায্যের জন্ত বিলাতে খুব সুন্দর ব্যবস্থা আছে। যে সব লোক কাজ-কর্ম ও চাকরী-বাকরী ক'রে যত বেতন পায় তার প্রতি পাউণ্ডে বেতনগ্রহীতাকে ৫ পেনী এবং বেতনদাতাকে ৭ পেনী মোট ১ শিলিং করে সরকারের নিকট পাঠাতে হয়।

ঐ অর্থটা দেশের বেকার লোকদের সাহায্যের হিসাবে জমা করা হয়। বেকারী লোক ঘরে বসে অনেক সময় সপ্তাহে পুরুষে দেড় পাউণ্ড এবং স্ত্রীলোকে এক পাউণ্ড বেতন পায়। তবে অনেক সময় গভর্ণমেন্ট এইরূপ সাহায্য প্রাপ্ত ব্যক্তিদের ইচ্ছামত কাজে লাগায়। তা হলেও এ ব্যবস্থাটা যে ভাল তা বলতেই হবে।

ওদেশে স্কুল-কলেজের ছোটবড় অধিকাংশ মেয়েই সুদৃশ্য ব্যাগের মধ্যে নিজেদের বই খাতা ইত্যাদি নিয়ে ব্যাগের লম্বা কিতে কাঁধে ঝুলিয়ে নিয়ে হেঁটে স্কুল-কলেজে যায়। হেঁটে যাওয়া বা বইএর বোঝা বয়ে নিয়ে যাওয়ায় কারো কোন সম্মানের ব্যাঘাত হয় না।

রবিবারে গির্জায় উপাসনার সঙ্গে যে সঙ্গীত গাওয়া হয় সকলেই তাতে যোগদান করে। পুরান গান হলে অনেকেরই জানা থাকে। কারো কারো জানা না থাকলে বা একদম নুতন গান হলে, সেই গানটি এমনই ভাবে তিনবার করে গাওয়া হয় যে, শেষের বারে প্রত্যেকেই ঠিক সুরে সেই গানটি নিভুল ভাবে গাইতে পারে।

একদিন রাস্তায় চলতে দেখলাম একটি হাঁসপাতালের সদর রাস্তায় গায়ে লেখা রয়েছে—“হাঁসপাতালের এক খানি নুতন ঘরের জন্ম দশ লক্ষ ইট চাই, আপনি কি তার একখানি ইট দিবেন? একখানি ইটের দাম এক পেনী।” যেখানে এইটুকু লেখা রয়েছে সেখানে চিঠি ফেলা

বাস্কের মত একটা মুখ রয়েছে, তাতেই বা কিছু দেবার ফেলে দিতে হয়। সত্যিই বেশ সুন্দর ব্যবস্থা নয় কি ?

ট্রামে, মোটরবাসে, বা ট্রেনে চলেতে পর্যাপ্ত পরিমাণ seatএর অভাব হলে মেয়েদের স্থান দেওয়ার ব্যবস্থা আগে, তারপর বৃদ্ধদের স্থান। বিদেশী লোক হিসাবে আমাকেও অনেক সময় অনেকে আপন স্থান ছেড়ে জায়গা দিয়েছে। এই গেল যাত্রীদের কথা। ট্রাম বা মোটরবাসের কণ্ডাক্টরগণও ভারি হুঁসিয়ার। ট্রাম বা মোটরবাসে উঠে যেখানে নামতে হবে সে জায়গাটা নিজের বেশ চেনা না থাকলে কণ্ডাক্টরকে বলে রাখলে তারা যথাস্থানে গাড়ী পৌঁছলেই ডেকে নামিয়ে দিয়ে থাকে ; কখন এতে ভুল করে না। আমি অনেক সময় কণ্ডাক্টরদের বলে অজানা জায়গায় নামবার ব্যবস্থা করেছি।

একজিবিশনে আমার ষ্টলের বিক্রির হিসাব মিল করে নেবার সময় একটি ছোট মেয়ে বিক্রি খাতার সঙ্গে আমার তহবিল মিল করে দিত। একদিন খাতা ও তহবিল মিল করে মেয়েটি আমাকে দিয়ে দিল। আমি ঐ বিক্রি খাতায় যোগ করে যোগফল নামিয়ে ৮ শিলিং গরমিল করলাম এবং মেয়েটিকে পুনরায় একবার খাতাখানি দেখতে দিলাম। সে খাতাখানি নিয়েই আমার লেখা 'ঠিক' নামান গুলি আগে কেটে দিল' তারপর নিজে একবার গুণে দেখে খাতাখানি আমার হাতে দিয়ে দিল। অবশ্য তার আগেকার হিসাবই নির্ভুল ছিল কিন্তু আশ্চর্য্য এই যে, তার হিসাবের উপর তার এতই বিশ্বাস যে, সে পুনরায় যোগ করবার আগেই আমার 'ঠিক' দেওয়া গুলি কেটে দিল।

ত্রয়োদশ অধ্যায়

[ব্রিটিশ এম্পায়ার একজিবিশন]

বিবরণ

১৯২৪ এবং ১৯২৫ সালে লণ্ডন নগরে এই ব্রিটিশ এম্পায়ার একজিবিশন সম্পন্ন হয়। এটি বিলাতের, এমন কি সমগ্র জগতের একটি বিশেষ বড় রকমের ঘটনা। এমন বিরাট প্রদর্শনী এর পূর্বে পৃথিবীতে আর কোথাও হয় নি। এই প্রদর্শনীটি দেখবার জগ্গেই আমি এই সমস্ত বিলাতে বাওয়া মনোনীত করেছিলাম। এতে আমাদের ইকনমিক জুয়েলারী ওয়ার্কসের যে ষ্টল হয়েছিল, তার কাজকর্মের বিবরণ পঞ্চম অধ্যায়ে দেওয়া হয়েছে।

এই প্রদর্শনীটি বসেছিল লণ্ডন সহরের উত্তর পশ্চিম প্রান্তে ওয়েস্টলী নামক রমণীয় পার্কতয় উঠানের কয়েক মাইল পরিবেষ্টিত স্থানের মধ্যে। প্রদর্শনী ক্ষেত্র এবং এর ঘর বাড়ী এমনই বিরাট আয়োজনে প্রস্তুত হয়েছিল যে, এটি লণ্ডনের উপপ্রান্তে পৃথক একটি সুশোভন নগরে পরিণত হয়ে আছে, আর পৃথিবীর শ্রেষ্ঠ প্রদর্শনীর গুরুত্বের সাক্ষ্যরূপে বরাবরই স্থায়ী হয়ে রয়ে গিয়েছে।

সকলেই জানেন, পৃথিবীর চার ভাগের এক ভাগের বেশী স্থান নিয়ে ইংরেজের রাজত্ব, এই বিশাল ভূভাগ হতে যেখানকার বা আনা সম্ভব, তা সমস্তই এখানে প্রদর্শিত হয়েছিল।

এই প্রদর্শনীর উদ্যান, রাস্তা, রক্তভবন (Stadium), প্রমোদোদ্যান (Amusement park) প্রভৃতি প্রস্তুত করিতেই এক কোটি পাউণ্ড অর্থাৎ প্রায় পনের কোটি টাকা ব্যয় হয়েছিল। ১৯২৪ সালের এপ্রিল মাস থেকে অক্টোবর—এই ছয় মাসের মধ্যেই দেশ বিদেশ থেকে কমবেশী আড়াই কোটি নরনারী এই প্রদর্শনীর দর্শকরূপে সেখানে উপস্থিত হয়েছিল। যদিও এর নাম দেওয়া হয়েছিল ‘ব্রিটিশ এম্পায়ার একজিবিশন’, তথাপি জগতের সমগ্র শিক্ষিত জাতির সহায়তায় এটিকে একটি আন্তর্জাতিক (International) একজিবিশন বললেও বলা যায়। পৃথিবীর নানা দেশ থেকে নানা জাতি তাদের দ্রব্য সামগ্রী এখানে পাঠিয়েছিল।

প্রায় পনের-ষোল বৎসর পূর্ব হতে এই প্রদর্শনীর কল্পনা আরম্ভ হয়। তারপর ১৯১৪ সালে মহাযুদ্ধ আরম্ভ হওয়ার পর পাঁচ ছয় বৎসর এর আয়োজন বন্ধ থাকে; তারপর ১৯২০ সাল থেকে পুনরায় আয়োজন করে ১৯২৪ সালের ২৩শে এপ্রিল তারিখে সত্যট পঞ্চম জর্জ কর্তৃক এর দ্বার উদ্ঘাটিত হয়।

এই প্রদর্শনীতে ব্রিটিশ রাজত্বের প্রধান প্রধান রাজ্যগুলির জন্ত পৃথক আকারের এক-একটি Pavilion বা উদ্যান সমন্বিত বিশালায়তন বাড়ী তৈরী হয়েছিল এবং সেই বাড়ীটি নিয়ে সেই সেই রাজ্যের বাবতীয় দর্শনীয় বস্তু সাজানো হয়েছিল।

ক্যানাডা, নিউফাউন্ডল্যান্ড, অস্ট্রেলিয়া, হাওয়াই, বর্ম্মা, নিউজিল্যান্ড, হংকং প্রভৃতি এক-একটি প্যাভিলিয়নে উপস্থিত হলে সত্যই মনে হত যেন সেই দেশ দিয়ে ঘুরে বেড়াচ্ছি; এই রকম সমগ্র প্রদর্শনীটি ঘুরে এলে সমস্ত পৃথিবীটা যেন ঘুরে এলাম বলে মনে হত। মোট কথা বিভিন্ন দেশের এক একটি প্যাভিলিয়নে ঐ ঐ দেশ স্বকীয় মোটমুটি

অভিজ্ঞতা লাভের ব্যবস্থা করা হয়েছিল। এ ছাড়া প্যালেস্ অব ইণ্ডাস্ট্রি, প্যালেস্ অব ইঞ্জিনিয়ারিং, প্যালেস্ অব আর্ট, অ্যামিউজমেন্ট পার্ক প্রভৃতি কতই যে ছিল, তা বর্ণনাগত।

এই সব দেখে মনে হ'ত যে সমগ্র পৃথিবীর যত রাজ্যের বা কিছু দেখবার আছে বা থাকতে পারে, তা সমস্তই দেখা হল। বলতে কি, এক বৎসর কঠোর পরিশ্রমে ভূগোল মুখস্থ করে বা না শেখা যায়, এই প্রদর্শনীর উপর একবার চোখ ফেললেই তার বেশী শেখা যেত। প্রদর্শনীর প্রত্যেক ষ্টলের সম্মুখে নানাপ্রকার দ্রষ্টব্য জিনিস সাজানো, আবার তার পাশেই বা পিছনেই কেমন করে সে সব জিনিস প্রস্তুত হয় তাই দেখানো হয়েছিল। জগতের সভ্য-অসভ্য, শিক্ষিত-অশিক্ষিত নানা জাতির অধিবাসীর পরিচয় এই প্রদর্শনীতে পাওয়া গিয়েছিল।


এই প্রদর্শনীতে ঘর-বাড়ী, দুয়ার-জানালা, বাগান রাস্তা সমস্তই এক-একটি বিরাট এবং অদ্ভুত কীর্তি। স্থাপত্যের গুরুত্বই বা কত, সে সব বাড়ীর কারুকার্যই বা কত ! কোন বাড়ী প্রাচীন গ্রীকদের বাড়ীর মত গঠিত হয়েছিল, কোনটা বা মিশরবাসীদের বাড়ীর মত তৈরী হয়েছিল ; কোনটা Gothic styleএ, কোনটা বা Byzantian ধরণের। এই প্রদর্শনীতে ইংরেজ রাজত্বের নৌবল, সেনাবল, আকাশবল (Air force) প্রভৃতি বিশেষভাবে দেখানো হয়েছিল। সমগ্র ব্রিটিশ রাজ্যের আদান-প্রদান, ব্যবসা-বাণিজ্য, শাসনপ্রণালী প্রভৃতি এখানে বুঝিয়ে দেখানো হয়েছিল। এরোপ্লেন কেমন করে তৈরী হয়, কেমন করে আকাশে ওড়ে, কেমন করে শত্রুদের ওপর বোমাগুলি নিক্ষিপ্ত হয়, তা সমস্তই দেখানো হয়েছিল। প্রদর্শনীর উপর কত এরোপ্লেন এই ভাবে দর্শকদের একই কালে ভীতি ও আনন্দের

সঞ্চার করেছিল। এরোপ্লেনে এরোপ্লেনে যুদ্ধ কেমন করছে, তাও মাথার উপরে শূণ্যে দেখানো হয়েছিল।


অনেকেই শুনে স্তম্ভিত হবেন যে, এই প্রদর্শনীর মধ্যে একজাহাজের একটি কৃত্রিম সমুদ্র গঠিত হয়েছিল। এই বিশাল জলাধারের জলরাশি কলকজার বলে এমন ভাবে আলোড়িত হত যে, দেখে মনে হত যেন সত্যসত্যই সমুদ্র সমুদ্রে দাঁড়িয়ে তার উত্তাল তরঙ্গরাশি দেখছি। সেই সমুদ্রের উপরে অনেক জলযুদ্ধও দেখানো হয়েছিল। প্রদর্শনীর আর এক স্থানে পৃথিবীর জলস্থলময় এক বিশাল চিত্র দেখানো হয়েছিল, তাতে একশো বৎসর পূর্বেরকার ইংরেজ রাজত্বের গতি দেখানো হয়েছিল। তার মধ্যে ছোট ছোট খেলনা-জাহাজের মত জাহাজগুলো আপনাআপনিই এ বন্দর হতে সে বন্দরে গতিবিধি করছিল। একমন ক'রে ক্রমে ক্রমে এই বিশাল বৃটিশ সাম্রাজ্য গঠিত হয়েছে, কেমন করে বনজঙ্গল সাফ করে সহর স্থাপিত হয়েছে—তা নানাভাবে দেখাবার ব্যবস্থা হয়েছিল। ইহা ব্যতীত দিবারাত্র কত বায়স্কোপ, ম্যাজিক লণ্ঠন বে দেখানো হত তার ইয়ত্তা নেই। অসভ্যদের সঙ্গে যুদ্ধ করে ইংরেজরা যে সব দেশ অধিকার করেছে, সেটি একেবারে বাস্তবের আকারে অভিনয় করে দেখানো হয়েছিল। কত হতাহত, কত গ্রাম ও নগর পোড়ান—সত্যমিথ্যার সাহায্যে সব সত্যের মত দেখানো হয়েছিল।

প্রতিদিন নতুন নতুন এতই বিভিন্ন রকমের বিষয় দেখান হত যে, যে যে বিষয় দেখান হবে তার দৈনিক তালিকার দাম ছিল তিন আনা করে। এই মত প্রত্যেক দিনের প্রোগ্রাম সেই দিন সকাল বেলা বিক্রি হত।

এখন আমরা প্রদর্শনীর প্রধান প্রধান অংশগুলির কিঞ্চিৎ বর্ণন
করি—



প্যালেস অব ইণ্ডাস্ট্রি
 ব্রিটিশ এম্পায়ার একজিবিশন, লণ্ডন — ১৪৬ পৃষ্ঠা



ক্যানাডা প্যাভিলিয়ন

প্যালেস অব্ ইণ্ডাস্ট্রি

সমগ্র গ্রেট ব্রিটেনের মধ্যে কোথায় কি দ্রব্য প্রস্তুত হয় তা এখানে দেখান হয়েছিল। ডাক্তারি শাস্ত্রের ও রসায়ন শাস্ত্রের বস্তুপাতি প্রভৃতি সাজাতে প্রায় ৩৭৫০০ স্কোয়ার ফুট জমি লেগেছিল। তুলা, কাপড় প্রভৃতি সাজাতে প্রায় ৩২১৮৭ স্কোয়ার ফুট জমি লেগেছিল। তুলা কেমন করে জমিতে রোপিত হয়, তুলার গাছ কেমন দেখতে, কেমন করে গাছ হতে তুলা তোলা হয়, তুলা হতে কেমন করে সূতা তৈরী হয়, সূতা হতে কেমন করে কাপড় তৈরী হয়, তা সমস্তই বিশদভাবে এখানে বোঝানো হয়েছিল। পশমজাত দ্রব্যাদি (woolen textile) সাজাতে প্রায় ১৫০০০ স্কোয়ার ফুট জমি লেগেছিল। ঘড়ি, বাত-যন্ত্র, বৈজ্ঞানিক যন্ত্র, কাগজ, খাতা, পানীয় প্রভৃতি, সিগারেট, রবর, খেলার সরঞ্জাম, কাচ, চামড়ার দ্রব্যাদি ও আসবাব পত্র, লেশ প্রভৃতি পৃথক পৃথক এক একটি বিভাগ এই ইণ্ডাস্ট্রি প্যাভিলিয়নে স্থান পেয়েছিল।


প্যালেস অব্ ইঞ্জিনিয়ারিং

এত বড় কঙ্কি টের তৈরী বাড়ী পৃথিবীর আর কোথাও নির্মিত হয়নি। এই বাড়ীখানি তৈরী করতে এক কোটি স্কোয়ার ফুট জমি লেগেছিল। এই বাড়ীর মধ্যে সত্যিকারের প্রকাণ্ড প্রকাণ্ড ইঞ্জিন ও রেলগাড়ী রেললাইনের উপর দিয়ে ভীষণ বেগে চলাফেরা করে দর্শকদের মনে আতঙ্ক ও বিস্ময়ের সঞ্চার করেছিল। এই বাড়ীর এক প্রান্ত

হতে অপর প্রান্ত পর্যন্ত অসংখ্য আসল রেল লাইন পাতা হয়েছিল। মাথার উপর দৈত্যতুল্য প্রকাণ্ড প্রকাণ্ড পাঁচটি ক্রেন (Crane) ইঞ্জিন, প্যাসেঞ্জারগাড়ী, মালগাড়ী, সমস্তই শূন্যে তুলে ধরে দর্শকদের ইঞ্জিন-সংক্রান্ত বাবতীয় ব্যাপার পুঙ্খানুপুঙ্খরূপে বুঝিয়ে দিচ্ছিল। এই বাড়ীর মধ্যে কৃত্রিম ডকের মধ্যে কেমন করে জাহাজ তৈরী হয়, কেমন করে পোল বাঁধা হয়—তা সবই বিশদভাবে বোঝানো হয়েছিল। ইলেকট্রিসিটির গুণে যা-কিছু সম্ভব-অসম্ভব হতে পারে, তা সমস্তই এখানে প্রদর্শিত হয়েছিল। ইহা ব্যতীত মোটর গাড়ী, মোটর সাইকেল প্রভৃতি কেমন করে তৈরী হয়—এসবও বুঝিয়ে দেখানো হয়েছিল।

ইণ্ডিয়া প্যাভিলিয়ন

ব্রিটিশ এম্পায়ার একজীবিশনে যতগুলি বিভিন্ন দেশ সম্পর্কীয় পৃথক পৃথক বাড়ী নির্মিত হয়েছিল, তার মধ্যে ইণ্ডিয়া প্যাভিলিয়নের বহির্ভূত সব চেয়ে সুন্দর হয়েছিল। এই বিশাল মনোরম সৌধটি খৃষ্টীয় সপ্তদশ শতাব্দীর ভারতীয় মোগল রাজত্বের স্থাপত্যের নিদর্শন নিয়ে গড়া হয়েছিল। আগরার তাজমহল, মতি মসজিদ, দিল্লীর জুম্মা মসজিদএর ভাবগুলি এই প্যাভিলিয়নটিতে প্রকটিত হয়েছিল। সাড়ে তিন একর অর্থাৎ দশ বিঘা জমির উপর এই বৃহদায়তন অট্টালিকা নির্মিত হয়েছিল। এর চতুষ্পার্শ্বের উজান-বাটি নিয়ে মোট চৌদ্দ বিঘা জমি ইণ্ডিয়া প্যাভিলিয়নের শোভাবর্দ্ধন করেছিল। এতে ব্যয় হয়েছিল



ইতিয়া পাতিনিয়ন
বুটিশ এম্পায়ার একজিভিফিকেশন, লণ্ডন — ২৩৩ পৃষ্ঠা

২৫,২০,০০০ টাকা। বাড়ীর মাঝখানে একটি জলাশয় ছিল। চার-দিকে ভারতের সাতাশটি বিভিন্ন প্রদেশের জন্ত এক-একটি পৃথক কোর্ট বা বৃহদায়তন অংশে বিভক্ত হয়েছিল। বোম্বাই, মাদ্রাজ, পাঞ্জাব, বাংলা, যুক্তরাজ্য, কাশ্মীর—এই কয়েকটি কোর্টই বিশেষ উল্লেখযোগ্য। ঐশ্বৰ্য্যের দিক দিয়ে বোম্বাই, ব্যবসা বাণিজ্য ও দোকান-পসারের দিক দিয়ে পাঞ্জাব ভাল হয়েছিল। বেঙ্গল কোর্টটি মোটের উপর তৃতীয় স্থান অধিকার করেছিল। বিহার ও উড়িষ্যা কোর্ট বাংলার নিকটেই তৈরী হয়েছিল। এতস্তিন্ন বরোদা, ত্রিবাঙ্কোর, জয়পুর, ষোধপুর, মহীশূর, ইন্দোর, বিকানীর, পাতিয়ালা প্রভৃতি স্বাধীন রাজ্যের এক-একটি ঐশ্বৰ্য্যমণ্ডিত কোর্ট নির্মিত হয়েছিল। প্রদর্শনীতে ভারতের যে সকল জিনিস গিয়েছিল, বৈদেশিক বাণিজ্য সম্বন্ধে এর বিবরণ জাত হওয়া ভারতবাসীর পক্ষে গুরুতর আবশ্যক বলে আমি মনে করি।

ভারতের খনিবিভাগ, বনবিভাগ, উৎপন্ন শস্ত, রেলওয়ে গতিবিধি, সরকারী সৈন্যবিভাগ—এর একটা পরিষ্কার বিবরণ এই একজিবিশন হতে পাওয়া গিয়েছিল। ভারতীয় কতকগুলি বিশেষ দৃশ্যের ছবি ইণ্ডিয়া প্যাভিলিয়নে স্থাপিত হয়েছিল। হিমানয়ের গৌরীশঙ্কর শৃঙ্গের মডেল, খাইবার পাশের দৃশ্য, ত্রিবাঙ্কুর এবং যুক্তরাজ্যের ভীষণ বন—অন্যদৃষ্ট হস্তী, সিংহ, ব্যাঘ্র প্রভৃতি শিকারের দৃশ্য, হরিদ্বারের কুম্ভমেলায় যাত্রী-সমাগমের, অজন্তা গুহার জগৎবিখ্যাত ভাস্কর-শিল্পের নমুনা, ভারতের ইরিগেশন বা খাল-ধনন ও জলসরবরাহের আংশিক দৃশ্য, জয়পুরের প্রস্তর-শিল্প ও কারুকার্য্যময় পিত্তল পাত্রাদি, মহীশূরের চন্দন কাঠের আশ্চর্য্য মনোহর কারুকার্য্য শোভিত দ্রব্যাদি, ত্রিবাঙ্কুরের গজ-দন্ত, কাশ্মীরের হুন্স হুচীশিল্প, ঢাকার মসলীন প্রভৃতি নানাভাবে ইণ্ডিয়া প্যাভিলিয়নের শোভাবর্দ্ধন করেছিল। ভারতীয় প্রেস-রূমে ভারতের

প্রায় ঘাবতীয় সংবাদপত্র সংগৃহীত হয়েছিল। সেখানে ভারতের পঁচালি রকম ভাষার নমুনা দেখতে পাওয়া গিয়েছিল। শিক্ষা, সমবায়, বয়েজ-স্কাউট, থিয়েটার, ভারতীয় খেলাধুলা প্রভৃতি বিষয়ক নানা দৃশ্য এই প্যাভিলিয়নে স্থান পেয়েছিল।

ইণ্ডিয়া প্যাভিলিয়নের অন্তর্গত বেঙ্গল কোর্টে আমাদের বাংলার বহুবিধ বিষয় যথা, কৃষক-পল্লী, কলকাতার ইম্প্রুভমেন্ট ট্রাস্ট, খিদিরপুর ডক, ভিক্টোরিয়া মেমোরিয়াল প্রভৃতির বড় বড় মডেল পৃথক পৃথক কামরায় সজ্জিত হয়েছিল। বাংলার কৃষিজাত সমুদয় দ্রব্যের জন্ত একটি বড় ষ্টল হয়েছিল। 'ঢাকা, মুর্শিদাবাদ, শান্তিপুর প্রভৃতি স্থানের কাপড়, তোয়ালে, রুমাল বেঙ্গল কোর্টে বিশেষ স্থান অধিকার করেছিল। সমগ্র বাংলার কাঁসা পিতলের বাসনের এংটা বড় ষ্টল হয়েছিল। ঢাকার শজ্জের কার্য ও তথাকার নবাব বাড়ীর কয়েকটি প্রাসাদের রোপ্য-নির্মিত মডেল বেঙ্গল কোর্টকে অত্যুচ্চ স্থান দিয়েছিল। কৃষ্ণনগরের মৃৎশিল্পের কার্য কৃষ্ণনগরের একজন শিল্পীকে দিয়ে খুব সুন্দরভাবে দেখানো হয়েছিল।

উপরোক্ত সমস্ত বিষয় গুলিই গভর্নমেন্টের তত্ত্বাবধানে প্রদর্শিত হয়েছিল। এতস্ত্রি পরিকৃত চামড়া, রক্ষিত খাদ্রব্য, বাংলার নানা ফারমের ঔষধ প্রভৃতি পৃথক পৃথক সেই সেই ফারম কর্তৃক বাংলা থেকে প্রেরিত হয়েছিল।

বাংলা থেকে একমাত্র আমাদের ইকনমিক জুয়েলারী ওয়ার্কসই সম্পূর্ণ নিজ তত্ত্বাবধানে পরিচালিত হয়েছিল।

ভারতের যে সমুদয় শিল্প বাণিজ্য সম্বন্ধীয় দ্রব্য গভর্নমেন্ট পক্ষ হতে ও পৃথক পৃথক প্রদর্শকগণ কর্তৃক ইণ্ডিয়া প্যাভিলিয়নে উপস্থিত করা হয়েছিল, তার একটা মোটামুটি তালিকা নিম্নে দেওয়া গেল। বৈদেশিক

বাণিজ্য সম্পর্কে এগুলি আমাদের ভারতবাসীর পক্ষে মূল্যবান জ্ঞাতব্য বিষয় ।

বঙ্গদেশ—

পরিষ্কৃত ও অপরিষ্কৃত পাট, শণ, তুলা, রেশম, রং করা তসর ও গরদ, রেশমতাজ দ্রব্য, কার্পেট, কস্মল, মাদুর, মেছে-মোড়া পুরু কাপড়, চরকা ও চরকার সূতা, লেশ ও লেশের নানাপ্রকার সাজসজ্জা, চামড়া, ট্যান্ করা চামড়া ও তৎজাত দ্রব্যাদি, স্বর্ণালঙ্কার, রৌপ্যের আসবাব ও বাসন প্রভৃতি, হস্তী-দন্তের নানাবিধ কারুকার্য, স্বর্ণমণ্ডিত হস্তী-দন্তের শাঁখা, বালা, তাগা প্রভৃতি । হস্তী-দন্তের মালা, খেলনা, মূল্যবান নানাপ্রকার মূর্তি, সেফটিপিন, লকেট, পেণ্ডেট, শঙ্খের বালা, বাত্মশঙ্খ, কিছুকের ও মহিষশৃঙ্গের নানাপ্রকার দ্রব্য, কাঁসা পিতলের নানাপ্রকার বাসন, মাটির তৈরী মডেল ও নানাপ্রকার মৃৎশিল্প, মশলা, গঁদ, রজন, ধূনা, নানাপ্রকার তৈল, শাল সেগুন প্রভৃতি কাঠ ও বনবিভাগীয় নানাপ্রকার উৎপন্ন দ্রব্য; ধান, চাউল, কলাই, সরিষা, যব প্রভৃতি নানা জাতীয় শস্য, ষাণ্ড, বহুবিধ রাসায়নিক দ্রব্য প্রভৃতি ।

বিহার ও উড়িষ্যা—

বস্ত্র ও লেশ, রেশম, চামড়া, চামড়ার তৈরী জিনিস, মহিষশৃঙ্গের নানাপ্রকার খেলনা, রূপার বাসন, কটক ও গয়ার পাথরের স্তম্ভ খোদাই কাজ, নানাজাতীয় শস্য, পাথুরে কয়লা, নানাজাতীয় আকরিক দ্রব্য, মহুয়া প্রভৃতি ।

বোম্বাই—

কৃষি, জলসেচন বিভাগ, শিল্প বিভাগ, হাইড্রো-ইলেকট্রিক পদ্ধতিতে বম্বে সহরের ধূম দূর করার প্রণালী, বম্বে আর্ট স্কুল ও ইঞ্জিনিয়ার উলেন মিলের প্রদর্শনী, বম্বে ব্যাক্-বে (Back-bay) খননের মডেল, বম্বে ডকের মডেল, ফটোগ্রাফ প্রভৃতি ।

মাদ্রাজ—

খাদ্যসম্ভার, তৈল বীজ, আঁশ (Fibres), মসলা, টিনে ভরা মৎস্য, ইক্ষুগুড়, তালের গুড়, মিষ্টান্ন, চাউল, বড় আকারের কলা, তৈল, গুচ্ছ নারিকেল, দক্ষিণ ভারতীয় মসলা ও আচার, ধাতু ও স্বাদি শস্ত, জ্যাম জেলী, নানাপ্রকার মৎস্য, তুলা, রেশম, পশম, ঘাসের মাদুর, নারিকেল কাতা, পরিষ্কৃত ও অপরিষ্কৃত চর্ম ও চর্মনির্মিত জিনিষপত্র, সাবান, রং, গন্ধদ্রব্য, রাসায়নিক দ্রব্য, এম্বারতের সরঞ্জাম প্রভৃতি ।

কাম্বোজ—

নানাবিধ শস্ত, ফল, গুচ্ছ ফল, পশু-প্রদর্শনী, বন বিভাগীয় উৎপন্ন দ্রব্য, খনিজ দ্রব্য, খাদ্যদ্রব্য, চামড়া, লোম, বস্ত্র, স্থচের কারুকার্যময় বস্ত্র, মূল্যবান প্রস্তর, মূল্যবান প্রস্তরের উপর খোদাই কাজ, জহরৎ, চিত্রকার্য প্রভৃতি ।

বরোদা—

রক্ষিত ফল, নানাবিধ তৈলবীজ, কাষ্ঠ, রেশম, উল, তুলা, স্বর্ণ ও রৌপ্যের দ্রব্য, জরির কাজ, রেশম-স্থতায় সূক্ষ্ম সূচীশিল্প, স্থতার সূক্ষ্ম

স্টীশিল, ট্যান করা চামড়া, বেতের কাজ, ইমারত প্রস্তুতের সরঞ্জাম, পিতলের জিনিস, কাঠের জিনিস, খেলনা, মৃৎপাত্র, ফটোগ্রাফ, মানচিত্র ইত্যাদি নানা দ্রব্য ।

জয়পুর—

হস্তী-দন্ত, স্বর্ণ, রৌপ্য, মার্বেল পাথর, কাঠ, কাগজ প্রস্তুতের উপাদান, জুয়েলারী, লৌহ ইম্পাত পিতল প্রভৃতির উপর এনামেল করা, মৃৎপাত্র, চিত্রশিল্প, জুতা, কস্মল ও রেশমের সূতা প্রভৃতি ।

বিকানীর—

খাণ্ড ও কৃষিজাত দ্রব্য, বনবিভাগীয় দ্রব্য, খনিজ দ্রব্য, নানাজাতীয় আকরিক প্রস্তুত, উল ও তুলাজাত দ্রব্য, এম্ব্রয়ডরী, রেশমশিল্প, রৌপ্য-শিল্প, হস্তী-দন্তের কাজ, কাঁচ ও মৃৎশিল্প, কাঠের বার্নিস, নানাবিধ পাথরের জিনিস, ধাতুদ্রব্য, পিতল, লোহা, ইম্পাত প্রভৃতি ।

মহীশূর—

নানাবিধ কৃষিজাত দ্রব্য, রক্ষিত খাণ্ড, বনবিভাগীয় ও আকরিক দ্রব্যাদি, বস্ত্র, চর্ম, চন্দন, তৈল, কালি, সাবান, পিতলের বাসন, পিতল স্বর্ণ ও রৌপ্যের কারুকার্য, চন্দনকাঠের নানাবিধ কারুকার্যময় আস-বাব, বাণ্যবস্ত্র, হস্তী ধরিবার খোঁয়াড়ের মডেল ।

ত্রিবাকোর—

রক্ষিত মৎস্য, রক্ষিত ফল, নানাবিধ মসলার গুঁড়া, মসলার আয়ক,

শাশু, বার্ণি, এরার্ট, নানাবিধ আকরিক দ্রব্য, তুলার আঁশ, কলার আঁশের কাপড়, নারিকেলের দড়ি, আঁশের ক্রশ, জুতা, রাসায়নিক দ্রব্য এবং স্নগন্ধি দ্রব্য, কাগজ, রোপ্য ও স্বর্ণের দ্রব্য, কঁাসার দ্রব্য, কাঠের ও হস্তী-দন্তের খোদাই কার্য্য।

পাঞ্জাব—

নানাবিধ কৃষিজাত দ্রব্য, তৈল, তৈলবীজ, দাইল, গাঁজা, আফিং, মসলা, খেজুর গুড়, আচার চাটনি, পণ্ডর খাত গুচ্ছ ঘাস, কৃষিকার্য্যের বস্ত্র কোদাল, কাণ্ডে, লাঙল প্রভৃতি, জলন্ধর ও হোসিয়ারপুরের কাঠের কারুকার্য্য, ডেরাগাজিখার লাক্ষার বার্নিস, হস্তী-দন্তে নির্মিত নানা প্রকার পাখী ও জীবজন্তুর মডেল, পিতলের কারুকার্য্য, রূপা ও সোনার জরি, শাল, রেশম, রং, ছবি, খেলার সরঞ্জাম প্রভৃতি।

পাতিয়ালা—

খাত, কাঠাদির আসবাব, বনবিভাগীয় দ্রব্যাদি, আকরিক দ্রব্যাদি, নানাপ্রকার প্রস্তরের নমুনা, প্রস্তর-জাত দ্রব্যের নমুনা, মৃত জীবজন্তু, বস্ত্র, স্বর্ণ, রোপ্য ও অত্যাশ্চর্য্য ধাতুর দ্রব্যাদি।

ভরতপুর—

কৃষিজাত দ্রব্য, বনবিভাগীয় দ্রব্য, রেশমী বস্ত্রাদি, মৃৎপাত্র, প্রস্তরের খোদাই, কাঠের খোদাই করা কারুকার্য্য প্রভৃতি।

কচ্ছ ও কোলাপুর—

কৃষিজাত উৎপন্ন, বস্ত্র, প্রস্তর ও মৃত্তিকা নির্মিত নানাবিধ শিল্পদ্রব্য প্রভৃতি।

ঘোষণা—

বস্ত্র, চর্ম, চর্মজাত দ্রব্যাদি, স্নগন্ধি দ্রব্য ও নানাবিধ শিল্পদ্রব্যাদি।

কাথিয়াবাড় ষ্টেট—

নানাবিধ পোষাক, হাতীর দাঁতের ছড়ি, হাতীর দাঁতের ও পাথরের মালা, কাঠের আসবাব প্রভৃতি।

ইন্দোর—

কৃষিজাত ফসল, তৈলবীজ, হুলা, খনিজ দ্রব্যাদি।

খইরপুর (সিদ্ধ)—

বস্ত্র, নানাবিধ লৌহশিল্প ও মুৎশিল্প।

অষ্ট্রেলিয়া প্যাভিলিয়ন

এই প্যাভিলিয়নটি তৈরী হয়েছিল প্রায় ষোল বিঘা জমির উপরে ত্রিশ লক্ষ টাকা ব্যয়ে। এতে সমগ্র অষ্ট্রেলিয়ার নিদর্শন দেখা গিয়েছিল। এখানে কতকগুলি অষ্ট্রেলিয়ান রেষ্টুরেন্ট বা হোটেল খোলা হয়েছিল। এই সব হোটেল অষ্ট্রেলিয়া-জাত খাদ্য দ্রব্য মাত্রই পরিবেশন করা হত। রুটি, ফলমূল, মাখন, ডিম, মাংস—সবই এখানে অষ্ট্রেলিয়া থেকে আমদানি করা হয়েছিল। অষ্ট্রেলিয়ার অনেকগুলি মেরিনো ভেড়া (Merino Sheep) প্রদর্শিত হয়েছিল। অষ্ট্রেলিয়ার

স্বর্ণধনির কাজ, সমুদ্র গর্ভ হতে মুক্তা উত্তোলন, ট্রেনে কাঠ চালান দেওয়া, ভেড়ার গা হতে কলে পশম কাটা প্রভৃতি কাজগুলির Demnostration দেওয়া হয়েছিল। অষ্ট্রেলিয়ার প্রধান ব্যবসায় গরু-ভেড়া পালন। এই প্যাভিলিয়নে কেমন করে মাখন তৈরী হয়, কেমন করে ডিম ও মাংস অবিকৃত রাখা যায়—সে সব খুব ভাল ভাবে দর্শকদের বোঝান' হয়েছিল। এখানে এমন সুন্দর সুন্দর কতকগুলি বাগান সাজানো হয়েছিল যাতে অষ্ট্রেলিয়ার গাছপালা ছাড়া অল্প কোন গাছপালা দেখতে পাওয়া যেত না, বেড়াবার সময় মনে হত যেন অষ্ট্রেলিয়া দেশের বাগানের মধ্যে বেড়াচ্ছি। এই প্যাভিলিয়নে একটি মাখনের ছোট পাহাড় তৈরী করা হয়েছিল। একটি কৃত্রিম গাভী এই প্যাভিলিয়নের একটি ষ্টলে এমনই ভাবে রাখা হয়েছিল যে, তার জাবর কাটা, লেজ নাড়া, হাসা রব করা, দর্শকদের দিকে মুখ ফিরিয়ে তাকান প্রভৃতি কৃত্রিম ক্রিয়াগুলি একেবারে সজীব গাভীর মতই দেখাচ্ছিল। এ ছাড়া বায়োস্কোপের সাহায্যে অষ্ট্রেলিয়ার কৃষি, পশু-পালন, বাণিজ্য, নগর পত্তন প্রভৃতি সম্বন্ধীয় অতি চমৎকার দৃশ্য অনবরতই দেখান হত। এই ভাবে অষ্ট্রেলিয়া প্যাভিলিয়নটি একজীবিশনের একটি প্রধান দর্শনীয় করে তোলা হয়েছিল।

নিউজিলণ্ড্ প্যাভিলিয়ন

এখানে নিউজিলণ্ড্ দ্বীপের সকল আবশ্যকীয় দ্রব্যই দেখানো হয়েছিল। এর মধ্যে নিউজিলণ্ডের মত বড় বড় বন্য বাগান তৈরী

বিলাত ভ্রমণ—২৫২

সাহিত্য পরিষৎ-কল্যাণ

কমিক সা

শ্রেণী সা



নিউজিল্যান্ডের মায়েড: কল্যাণ — ২৫৩ পৃষ্ঠা

করা হয়েছিল। কেমন করে নিউজিল্যান্ডবাসীরা মাছ ধরে ও গুচ্ছিয়ে রাখে, তা খুব ভালভাবে দেখানো হয়েছিল। বড় বড় জলাধারের মধ্যে থলু মাছ (Guard fish), রাজা মাছ (King fish) প্রভৃতি অদ্ভুত রকমের জীৱন্ত মাছ দেখানো হয়েছিল। এ-ছাড়া নিউজিল্যান্ডের পশম, চামড়া, লোম, রবর, মুরগী, হাঁস, কাঠ প্রভৃতি সকল জিনিসই এখানে প্রচুর পরিমাণে প্রদর্শিত হয়েছিল। বায়স্কোপের মধ্য দিয়ে নিউজিল্যান্ড দ্বীপের নৈসর্গিক দৃশ্য, পাহাড়, নদী, প্রান্তর ভূমি প্রভৃতি সুন্দর সুন্দর ছবি দেখানো হয়েছিল। নিউজিল্যান্ডের আদিম অধিবাসী মায়েড়িগণ (Maori) কেমন করে জীবনযাপন করে, তাদের আচার ব্যবহার কেমন, সবই দেখিয়ে বোঝান হয়েছিল। নিউজিল্যান্ডে অনেক Dairy farm আছে; দুধ মাখনের দেশ বললেও চলে। পনীর (Cheese) আর মাখন জাহাজ ভর্তি হয়ে নানা দেশে চালান দেওয়া হচ্ছে—তার একটা প্রকাণ্ড মডেল এই প্যাভিলিয়নে দেখান হয়েছিল।


ক্যানাডা প্যাভিলিয়ন

এই বাড়ীখানি দেখতে যেমন প্রকাণ্ড, গুরুত্বও তেমনি তত বেশী। প্রায় দেড় কোটি টাকা ব্যয়ে এই বিশাল বাড়ী তৈরী হয়েছিল। ক্যানাডার খনিজ পদার্থ ও অন্যান্য যাবতীয় উৎপন্ন দ্রব্যসামগ্রী এখানে সাজানো হয়েছিল। ক্যানাডিয়ান প্যাসিফিক রেল লাইন যে কি অদ্ভুত,

তা এখানে মডেল করে দেখানো হয়েছিল। সেই রেল লাইনের ট্রেনগুলি প্যাভিলিয়নের ভিতরে দেওয়ালের গা দিয়ে অনবরত যাতায়াত করছিল। মানচিত্রে সমস্ত ক্যানাডা রাজ্য অঙ্কন করে গতিশীল বৈদ্যুতিক আলোকের সাহায্যে ট্রেন চলা ও প্রত্যেক প্রধান প্রধান স্টেশনে ট্রেন থামবার ব্যবস্থা দেখানো হয়েছিল।

সাউথ্‌ আফ্রিকা প্যাভিলিয়ন

এই বাড়ীটি প্রাচীন ওলন্দাজদের বাড়ীর মত তৈরী করা হয়েছিল। এই বাড়ীর সংলগ্ন উঠানে South African চলন্ত গাড়ী তৈরী হয়েছিল, গাড়ীর মধ্যে খাবার ঘর, শোবার ঘর, বসবার ঘর—সবই ছিল। উঠানের আর একধারে একটা প্রকাণ্ড ঘেরা মাঠে অনেক উটপাখী, পাখীদের ডিম, তাদের পালকের নানা রকম কাজ—সমস্তই বিশদভাবে দেখানো হয়েছিল। বাগানে আফ্রিকার নানা গাছপালা রোপিত হয়েছিল। এ ছাড়া, আফ্রিকার পশু, পালক, ফল, ডিম, মদ, শুকনো ফল, খনিজ ধাতু প্রভৃতি প্রচুর পরিমাণে প্রদর্শিত হয়েছিল। দক্ষিণ আফ্রিকার বিখ্যাত হীরক খনির একটা নমুনাও (Model) এখানে তৈরী করা হয়েছিল; কেমন করে খনি থেকে হীরক তোলা হয়, কেমন করে কাটা হয়, সাফ করা হয়, পালিশ করা হয়, এসব সুন্দর ভাবে বোঝানো হয়েছিল। বায়স্কোপের সাহায্যেও আফ্রিকার অনেক জিনিস দর্শকদের দেখানো ও বোঝানো হয়েছিল।



সাউথ আফ্রিকা প্যাভিলিয়ন
ব্রিটিশ এম্পায়ার একজিবিশন, লণ্ডন —২৫৪ পৃষ্ঠা



সিলোন প্যাভিলিয়ন
ব্রিটিশ এম্পায়ার একজিবিশন, লণ্ডন —২৫৭ পৃষ্ঠা

নিউফাউন্ডল্যান্ড প্যাভিলিয়ন

নিউফাউন্ডল্যান্ড উত্তর আমেরিকার একটি দ্বীপ। এই প্যাভিলিয়নে নিউফাউন্ডল্যান্ডের ফলমূল, খনিজ দ্রব্য, মাছ প্রভৃতি দেখানো হয়েছিল। তা ছাড়া, শিমালের চামড়া, সিল মাছের চামড়া, ভালুক-চামড়া, অটার-চামড়া, নেকড়ে-চামড়া প্রভৃতি এখানে রাশিকৃত ভাবে সাজানো হয়েছিল। নিউফাউন্ডল্যান্ডের চামড়ার মত সুন্দর চামড়া পৃথিবীর আর কোথাও দেখতে পাওয়া যায় না, বিশেষতঃ পালিশ ও ট্যান করা সিল-চামড়াগুলো খুবই চমৎকার।

বর্মা প্যাভি

ব্রহ্মদেশের সমৃদ্ধ বৈশিষ্ট্য রক্ষা করেই বর্মা প্যাভিলিয়নটি তৈরী হয়েছিল। ব্রহ্মের প্যাগোডার আকারে অনেকগুলি বাড়ী তার মধ্যে ছিল। তার একটার মধ্যে বুদ্ধের বিরাট মূর্তি প্রতিষ্ঠিত করে বুদ্ধের উপাসনার যাবতীয় সরঞ্জাম সেখানে রক্ষিত হয়েছিল। ব্রহ্মদেশ আমাদের বাংলার সঙ্গে সংলগ্ন, চাক্রী উপলক্ষে প্রায় দুই লক্ষ বাঙ্গালী সেখানে বাস করেন, কিন্তু তথাকার শিল্প কোন সন্ধানই আমাদের কেউ রাখেন না। ব্রহ্মদেশে ব্যবসায়ী প্রদর্শনীতে ঠেল করেছিল; অন্যভাবে তৈরি এসেছিল। এর মধ্যে শিক্ষিত

ব্রহ্মদেশের শিল্পবাণিজ্য সম্বন্ধে একজিবিশনে যা যা দেখা গেল, তার কিছু কিছু এখানে উল্লেখ করব।


কৃষিজাত দ্রব্য—চাউল, তুলা, চিনে বাদাম, মটর, কলাই, বরবটি, ছুট্টা, এরোরুট, নারিকেল, নারিকেলের আঁশ, রেশম, চিনি, নানা-প্রকার মসলা, তামাক, নানাপ্রকার ফল ইত্যাদি। এর মধ্যে চাউলই প্রধান উৎপন্ন। চাউল তৈরীর জন্য আধুনিক উন্নত ধরণের অনেক ছোট কলে চাউল তৈরী করে দেখানো হয়েছিল।

বন বিভাগে বহু প্রকার কাঠের কড়ি, সেগুন এবং বাহাদুরী কাঠের নানাপ্রকার জিনিস, বর্মার বাঁশ থেকে তৈরী কাগজ ও বোর্ড, কাঠের খোদাই করা মনোহর কারুকার্য প্রভৃতি স্থান পেয়েছিল।

খনিজাত দ্রব্যের মধ্যে পাথর, কয়লা, রুবি নামক মূল্যবান লাল জুয়েলারী পাথর, জেড্ নামক হলদে রঙের জুয়েলারী পাথর প্রভৃতি এবং ভাস্কর্যের উপযোগী নানাবিধ মূল্যবান পাথর এখানে উপস্থিত করা হয়েছিল।

ব্রহ্মের মেটে তৈল, কেরোসিন তৈল, পেট্রোল প্রভৃতি বর্তমানে একটি অতি প্রধান খনিজ দ্রব্য। এই সব তৈল উত্তোলন এবং Refine করার পদ্ধতি দেখানো হয়েছিল। মোমবাতি তৈরীও এখানে দেখানো হয়েছিল।

এতদ্বিন্ন ব্রহ্মদেশের যুগ্মশিল্পজাত রেশমের দ্রব্য, হস্তিদন্তের কারুকার্য, কারুকার্য এখানে প্রদর্শিত হয়েছিল। একটা পাশেই তৈরী হয়েছিল। ব্রহ্মের করতেন।



বন্দ্রা প্যাভিলিয়ন
ব্রিটিশ এম্পায়ার একজিভিশন, লন্ডন — ২৫৫ পৃষ্ঠা



সিলোন প্যাভিলিয়ন

এটি সিংহলের অন্তর্গত কাণ্ডি নগরীর বিখ্যাত দন্ত-মন্দিরের অঙ্কুরপ করে তৈরী করে সিংহলের স্থাপত্যের নিদর্শন দেখানো হয়েছিল। প্যাভিলিয়নের দ্বারদেশেই সিংহলের রাজধানী কলম্বো হারবারের ২০ × ১৫ ফিট একখানি চিত্র রাখা হয়েছিল। সিংহলের সমুদ্র থেকে কেমন করে মুক্তা তোলা হয়, কেমন করে পাঁহাড় থেকে মূল্যবান জহরৎ তোলা হয়—সেই সকলের মডেল এখানে দেখানো হয়েছিল। সিংহলের মণিকারদের খুব বড় বড় ছুটি ষ্টল এখানে হয়েছিল, তারা জহরতের অনেক অলঙ্কার এখানকার ধনীদের কাছে বিক্রয় করে বিশেষ লাভবান হয়েছে। সিংহলের নারিকেল আঁশের তৈরী নানারকম জিনিস, নারিকেল তৈল, নারিকেল জাত নানাপ্রকার খাদ্য—এ সব বহুপ্রকার ভাগে ভাগ করে সাজানো হয়েছিল। সিংহলের বিখ্যাত রবারের কারবারের নমুনা, বিখ্যাত চাষের কারবারের নমুনা, মৎস্যের কারবারের নমুনা, কপূর ও কাষ্ঠ জাত নানাপ্রকার আসবাব, দারুচিনি প্রভৃতি এখানকার ঐশ্বর্য্য বৃদ্ধি করেছিল। Candyan Crafts Association সিংহলের পল্লী-মেয়েদের হাতের তৈরী লেশ ও সূচীশিল্পের নিদর্শন দেখিয়ে দর্শকগণকে চমৎকৃত করেছিলেন।

হংকং প্যাভি


এই প্যাভিলিয়নটিতে এলেই
পড়েছি ; সেই চীনবাসীদের কাঁই


এসে

চীনদেশের ঘরবাড়ীর নমুনা, কাঠের খোদাই কাজ, বাঁশের ও বেতের আসবাব, লিচু প্রভৃতি নানাপ্রকার রক্ষিত ফল (Preserved Fruits), সুদীর্ঘ ইক্ষুদণ্ড, নানাপ্রকার এনামেল বাসন, খেলনা পুতুল প্রভৃতি এই প্যাভিলিয়নের দ্রষ্টব্য মধ্যে স্থান পেয়েছিল। এখানে চীনেদের যে হোটেলের নিদর্শন দেখানো হয়েছিল, তাতে অনেক বিদেশী দর্শক তাদের পোকামাকড় খাওয়ার রসাস্বাদ গ্রহণ করে ধন্য হয়েছিল। অনেক-গুলি হংকংবাসী চীনে-লোক এই কাজের জ্ঞান নিযুক্ত হয়েছিল।


মান্টা প্যাভিলিয়ন

মান্টা ভূমধ্যসাগরের অন্তর্গত একটি ছোট দ্বীপ। এখানকার চামড়ার নানাবিধ দ্রব্য, কাঠের নানাবিধ দ্রব্য, পোষাক, সূচী শিল্প, অলঙ্কার, ঘড়ি প্রভৃতি এই প্যাভিলিয়নের মধ্যে স্থান পেয়েছিল। প্রাচীন রোমীয়, ফিনিসীয় অনেক ঐতিহাসিক, প্রাগৈতিহাসিক দ্রব্য এবং মডেল এই প্যাভিলিয়নের সম্পদ বৃদ্ধি করেছিল। প্রাচীনকালের একখানি টেবিল উপস্থিত করা হয়েছিল, সেটি সাতাশ রকম বিভিন্ন কাঠের ১০৫১৬ খণ্ড কাঠে তৈরী, আর তার গায়ে বিভিন্ন রকমের ধাতুর সাজসজ্জা ছিল ১১৮৪ খানা।





মাউন্ট প্যাভিলিয়ন
ব্রিটিশ এম্পায়ার একজিবিশন, লন্ডন —২৫৮ পৃষ্ঠা।



প্যালেষ্টাইন প্যাভিলিয়ন
—২৫৯ পৃষ্ঠা।

(Holy land) আখ্যা দিয়ে থাকেন । প্যালেষ্টাইনের দ্রাক্ষা, সুরা, মৃৎশিল্প, পিত্তল তাম্র রৌপ্যাদি ধাতুশিল্প এখানে দেখা গিয়েছিল ।

অন্যান্য প্যাভিলিয়ন

এতদ্বিন্ন ইংরেজ রাজত্বের যে সমুদয় প্যাভিলিয়ন এই ব্রিটিশ এম্পায়ার একজিবিশনে স্থান পেয়েছিল তার মধ্যে নিম্নলিখিতগুলি উল্লেখযোগ্য— সাউথ আফ্রিকা, ওয়েস্ট আফ্রিকা, নায়গ্রা, গোল্ডকোষ্ট, কেনিয়া, উগাণ্ডা, টাঙ্গানিকা, জাম্বিয়ার, সোমালিল্যান্ড, সুদান, রোডেসিয়া, সেন্টহেলেনা, বাহামা, ব্রিটিশ হাওয়াই, জামেকা, সেন্টলুসিয়া, সেন্ট-ভিন্সেন্ট, সিন্জাপুর, মালাক্কা, পেনাং, পেবাক, সেলাঙ্গোর, সরওয়াক, বাঙ্গুদা, ব্রিটিশ গিয়েনা, জিব্রাল্টার প্রভৃতি । প্রত্যেক প্যাভিলিয়নেই সেই সেই দেশ স্বাধীন অনেক দেখবার ও শিখবার বিষয় ছিল । এইভাবে সারা জগতের ইতিহাস, ভূগোল, শিল্প, বাণিজ্য, দেশের রীতিনীতি, নানা বিষয়ক দৃষ্টাবলী ও আশ্চর্য্য বস্তু প্রভৃতিতে একজিবিশনটি একটি পূর্ণাঙ্গের শিক্ষাক্ষেত্রে পরিণত হয়েছিল ।

এম্পায়ার স্টেডিয়াম (Stadium)

স্টেডিয়াম একটি বিরাট দৃশ্যক্ষেত্র । এত বড় দৃশ্যক্ষেত্র পৃথিবীতে আর কোথাও এ পর্য্যন্ত তৈরী হয়নি । পরিধি প্রায় অর্ধ মাইল । দর্শকদের

জন্তু চারদিকে স্তরে স্তরে ক্রম-উচ্চ আসনের বে গ্যালারী করা হয়েছিল তাতে প্রথম, দ্বিতীয়, তৃতীয় ও চতুর্থ—চার শ্রেণীতে একলক্ষ লোকের বসবার সিট ছিল। অভিনয়ের সময় এই সিটগুলি ভ'রে গিয়ে অনেক লোককে দাঁড়িয়ে দেখতে হ'ত। অভিনয়ের জন্তু মাঝখানে বিরাট ক্ষেত্র করা হয়েছিল। কখন কখন বারো হাজার সুশিক্ষিত অভিনেতা অভিনেত্রীর একত্রে অভিনয় এই ক্ষেত্রে দেখতে পেয়েছি। দশ হাজার গায়কগায়িকার মিলিত সঙ্গীত এখানে শুনতে পেয়েছি। এই সব অভিনয় দেখাবার জন্তু ক্যানাডা, অষ্ট্রেলিয়া, আর্জেন্টাইন, মেক্সিকো প্রভৃতি দেশের নানা স্থান থেকে অশ্বারোহী কুস্তিগীর প্রভৃতিও আনা হয়েছিল।

Commander Blake, Nelson প্রভৃতি বীরগণের বড় বড় নৌযুদ্ধের অভিনয়, ভারতীয় নৃপতিগণ কর্তৃক লর্ড ক্লাইভের অভ্যর্থনার অভিনয়, আফিকার অসভ্যজাতির দেশ অধিকার করিবার অভিনয়, এরোপ্লেনের যুদ্ধ, জীবজন্তুর অভিনয়, নানাবিধ বাজি পোড়ান, সৈন্যদের কুচ্কাওয়াজ প্রভৃতি এখানে বিরাট আয়োজনে দেখানো হয়েছিল। এই সমস্ত অভিনয়ের কার্যে ব্যবহারের জন্তু ভারতবর্ষ থেকে কয়েকটি বড় বড় হাতী, আরব থেকে নানাপ্রকার ঘোড়া, আফ্রিকা থেকে উট প্রভৃতি আনা হয়েছিল। উপরে এরোপ্লেনের যুদ্ধ হবার সময় কখন কখন আকাশ এমন অগ্নিময় হয়ে যেত যে, দর্শকগণ ভয়ে চীৎকার করে উঠত। কামান গোলাগুলি ছাড়বার সময় অনেক দর্শক কেঁপে উঠত। অসভ্যদের সঙ্গে যুদ্ধাদি দেখাবার জন্তু কৃত্রিম বনজঙ্গল, পাহাড় ও ঘর-বাড়ী তৈরী করা হয়েছিল। কখন কখন অসভ্যদের বাড়ীঘর পুড়িয়ে দিচ্ছে দৃশ্যক্ষেত্রে সত্যসত্যই অগ্নিময় করে তোলা হ'ত।

একদিন দেখলাম, ষ্টেডিয়াম-ক্ষেত্রে গল্পীর বয়স্কাউটদের খেলনা-

প্রদর্শনী খোলা হয়েছে। তাতে পল্লীর ছেলেমেয়েদের কৃত্রিম হাটবাজার, নাচগান, অভিনয়, নাগরদোলা, ঘোড়াকল—সবই ছিল। পল্লীর ছেলেমেয়েদের হাতের তৈরী নানাপ্রকার গৃহশিল্পজাত দ্রব্য তাতে উপস্থিত করা হয়েছিল। আর একদিন দেখলাম, প্রকাণ্ড চৌতলা একটা বাড়ী তৈরী করে তাতে আগুন ধরিয়ে দেওয়া হল, সঙ্গে সঙ্গে চারদিক থেকে ফায়ার ব্রিগেট এসে সেই বাড়ীর তেতলা চৌতলা থেকে লোকজন নামিয়ে নিরাপদ করে দিয়ে আধঘণ্টার মধ্যে সমস্ত বাড়ীটার আগুন নিভিয়ে দিল। এই উপায়ে বাড়ীতে আগুন লাগলে গৃহস্থের কর্তব্য বিশেষভাবে বুঝিয়ে দেওয়া হল।

এই রকম ষ্টেডিয়মে তিন-চার দিন ধরে এক-একটা অভিনয় হত। ষ্টেডিয়মের চারদিক থেকে নানারকমের আলো বেরিয়ে আকাশের মেঘ-গুলিকে কখন কখন লাল নীল রঙে রঙিন করে তুলত। একবারের দেখবার টিকিটের দাম ছিল শ্রেণীভেদে এক পাউণ্ড থেকে এক সিলিং পর্য্যন্ত।

অ্যামিউজ্‌মেন্ট পার্ক্

পঞ্চাশ একর অর্থাৎ প্রায় দেড়শো বিঘা জমীর উপর এই অ্যামিউজ্‌মেন্ট পার্ক্ বা প্রমোদক্ষেত্র তৈরী হয়েছিল। অ্যামিউজ্‌মেন্ট পার্কে গান, বাজনা, নাচ, কনসার্ট, খেলাধুলা অসংখ্য প্রকারের ছিল। তার মধ্যে যে একটি নাচঘর তৈরী হয়েছিল, তাতে দু'হাজার নরনারী একত্রে নাচতে পারত। অ্যামিউজ্‌মেন্ট পার্কের একটা বাড়ীর নাম

ছিল—Palace of Beauty. পৃথিবীর দশটি সর্বশ্রেষ্ঠ সুন্দরীর অল্পকরণে দশটি সুন্দরী মেয়েকে সেই-সেই ভাবে সাজিয়ে দশটি কামরায় রাখা হয়েছিল। সুন্দরী রাণী ক্লিওপেট্রা (যার জন্ম জুলিয়ন্স সিজার ও এ্যান্টনি প্রভৃতির রাষ্ট্রবিপ্লব), বিয়্যাট্রিচি (যার জন্ম মহাকবি দান্তে পাগল), জেহারাজেদ্ (পারস্যের শ্রেষ্ঠা সুন্দরী), মেরী কুইন অফ স্কটস্, এলিজাবেথ উড্-ভিল, মিসেস্ সিডন্, নেল গাডইন্, ম্যাডাম্ পম্বাডুর, হেলেন অফ ট্রয়, মিস্ ‘১৯২৪’—এই সব ঐতিহাসিক সুন্দরীদের অল্পকরণে এবং তাদেরই সাজসজ্জায় ও আসবাবে দশটি মেয়ে দশটি ঘরে স্থান পেয়েছিল। এটা একটা চূড়ান্ত দর্শনীয় হয়েছিল।

প্যালেস অফ নৈপচুন—এতে পৃথিবীর নানাজাতীয় মৎস্ত স্থান পেয়েছিল। এই গৃহে সিল মাছের আশ্চর্য খেলা, জেলেনীদের কৌশলপূর্ণ সন্তরণ প্রভৃতি সুন্দরভাবে দেখানো হ’ত। বায়স্কোপের সাহায্যে পৃথিবীর ভিন্ন ভিন্ন স্থানের মৎস্ত শিকার, সিল মাছ শিকার, তিমি শিকার, তিমির তেল তৈরী প্রভৃতি দেখান হ’ত।

Safety Racer—একটা ছোট রেলট্রেন অনেকগুলো লোক নিয়ে কৃত্রিম পাহাড়-পর্বতের ভিতর দেড় মাইল পথ অতিক্রম করে কখনো ধীর গতিতে, কখনো প্রায় জলপ্রপাতের মত উপর থেকে নীচে প’ড়ে মুহূর্তমধ্যে যথাস্থানে চলে আসত।

River Cave—নৌকার যাত্রী নিয়ে কখন অল্পত গুহার ভিতর দিয়ে, কখন উপর থেকে ভীষণ বেগে নেমে যথাস্থানে চলে আসত।

মাগরদোলা, ঘোড়া-কল, চরকী-কল প্রভৃতি বৈদ্যুতিক কলে চালিত যে কত রকম ব্যাপার ছিল—তার বর্ণনা করা দুঃসাধ্য। আর সেগুলি ছিল লোকে বা কখন দেখেনি এমনই আশ্চর্য ও বিরাট রকমে তৈরী।



পৃথিবীর দশটি শ্রেষ্ঠ সুন্দরীর একজন—
হেলেন অব ট্রয় —১৬২ পৃষ্ঠা

একজিবিশনের নানা বিষয়

একটি ছিল Never-stop Railway. এক একটি ট্রেনে দশ বার থানা গাড়ী ছিল, সারা একজিবিশনের নানা স্থান ঘুরে আসত। দশ বারটি স্টেশন ছিল, স্টেশনের কাছ দিয়ে খুব যুঁহু গতিতে চলত; এই অবকাশে লোকজন ওঠা নামা করত। এইরকম অবিরাম গতিতে কয়েকটি পৃথক পৃথক ট্রেন সারা একজিবিশনটি ঘুরে বেড়াত। এ গাড়ী চালাবার জন্ত লোকজন ছিল না—কলে আপনা-আপনিই চলত। কেবল টিকিট নেওয়া দেওয়ার জন্ত স্টেশনে লোক থাকত। এ ছাড়া একজিবিশনের ভিতরে ছোট ছোট মোটরবাস চলবারও ব্যবস্থা ছিল। একেবারে খুব বুড়োবুড়িদের দেখবার জন্ত সুন্দর ব্যবস্থা ছিল; বেতের ইজিচেয়ারে চাকা লাগান, পিছনের হাতল ধরে টেনে নিয়ে বেড়ান হত। বাহকেরা ঘণ্টা হিসাবে পারিশ্রমিক নিত।

একটি কৃত্রিম কয়লার খনি করা হয়েছিল, তার মধ্যে আধ মাইল স্ক্রুড্র কেটে কয়লা উত্তোলন প্রভৃতি বিভিন্ন প্রকারের কাজ দেখিয়ে সাধারণের কয়লা সম্পর্কিত অভিজ্ঞতা লাভের সুযোগ করে দেওয়া হয়েছিল।

একটি সভাগৃহ করা হয়েছিল, তাতে প্রতিদিনই বিভিন্ন প্রকারের সভা হ'ত। প্রত্যেক প্যাভিলিয়নের সঙ্গে একটি করে সেই দেশের খাণ্ড সম্বন্ধীয় রেপ্টুরেন্ট করা হয়েছিল।

প্রত্যেক প্যাভিলিয়নের সঙ্গে সেই দেশ সম্বন্ধীয় অভিজ্ঞতা লাভের জন্ত নানাপ্রকার বায়স্কোপের ব্যবস্থা করা হয়েছিল।

একজিবিশনের কাজকর্মের সুবিধার জন্ত বড় বড় দুটি ব্যাঙ্ক, তিনটি

পোষ্ট অফিস, বিভিন্ন লাইনের ছয়টি রেল-স্টেশন এখানে করা হয়েছিল। প্রতিদিন গড়ে তিন লক্ষ দর্শক একজিবিশন দেখতে আসত। লণ্ডন সহর থেকে অসংখ্য মোটর বাস একজিবিশনের জন্ত নতুন নতুন লাইন খুলেছিল।

এই ওয়েস্টলীর একজিবিশনটির জন্ত লণ্ডন সহর থেকে ওয়েস্টলী পর্যন্ত পাঁচ মাইল ব্যবধানটুকু পূর্ণ হ'য়ে গিয়ে লণ্ডন সহরের আয়তন বৃদ্ধি করেছে, আর এই ওয়েস্টলীর উত্থানটি পৃথক একটি সুন্দর ছোট সহরে পরিণত হ'য়ে রয়েছে। প্রদর্শনীর উদ্দেশ্য দেশের শিল্প বাণিজ্যের প্রসার করা, দেশের অন্ন সমস্যা, বেকার সমস্যার সমাধান করা—এই ব্রিটিশ এম্পায়ার একজিবিশনের সাহায্যে ইংরেজ-রাজত্বের এ সম্বন্ধে অনেক প্রসার লাভ হয়েছে।

চতুর্দশ অধ্যায়

[পত্রাবলী]

(সহধর্মিণীকে লিখিত পত্রাবলী হইতে)

৭৩, ব্রড্‌স্ট্রেরী ভিলা, কিলবর্ন

লণ্ডন

১৮ই জুন, ১৯২৪

তোমার ২৫শে মে তারিখের চিঠি ১৫ই জুন পেয়েছি। বিলাতে এসে কোন অসুবিধায়ই আমাকে পড়তে হয় নি। বর্তমানে একটি মধ্য অবস্থার গৃহস্থের বাড়ীতে আছি। এদের সঙ্গে এমনই ভাব হয়ে গেছে, বেন আমি এই পরিবারেরই একজন। লণ্ডনের রাস্তার দু'ধারে সুরম্য প্রাসাদাবলীর মাঝখান দিয়ে চলতে কতই কি নতুন নতুন দেখতে পাই; এত নিরবচ্ছিন্ন নতুনত্বের মধ্যেও প্রাণটি কিন্তু পুরাতনের জগ্‌ই ব্যাকুল হয়।

একটা বিশেষ নতুন দেখছি এই যে, এখানে ইংরেজরা আমাকে নবাগত বিদেশী বলে একটু শ্রদ্ধার চোখেই দেখে। সেদিন লায়ন সাহেব আমার কাছে এসেছিলেন, ইনি কিছুদিন আগে ঢাকা বিভাগের কমিশনার ছিলেন; দেশের কত সংবাদই জিজ্ঞাসা করলেন, কত মধুর আলাপই তাঁর সঙ্গে হল,—একেবারে বন্ধুর মত।

একদিন দেখলাম পরিষ্কার নীল আকাশের উপর একটা প্রকাণ্ড বড়

D অক্ষর ফুটে উঠল। তারপর বুঝলাম খুব উপরে ছোট একখানা এরোপ্লেন পশ্চাত-ভাগ থেকে বাষ্প বের করে চ'লতে চ'লতে লিখে যাচ্ছে। দেখতে দেখতে আকাশ জুড়ে 'DAILY MAIL' লেখা হ'য়ে গেল। বাতাসের গতি খুব যুহু ছিল, ধীরে ধীরে মেঘের অক্ষরে এই লেখাটি অনেক দূর পর্যন্ত গিয়ে আকাশেই মিশে গেল। এটা হল এখানকার 'ডেলি মেল' নামক দৈনিক সংবাদপত্রের একটা বিজ্ঞাপন মাত্র।

এখানে সব কাজেই লোকের বেশ স্ফুর্তি দেখতে পাই। শনিবার বিকালটা বড়ই আনন্দের। শুক্রবারে লোকে বেতনের টাকা পায়, শনিবারে ভাল খায়দায়; অনেকে আমোদ-উৎসব, খেলাধুলা, নাচগানে কাটায়। লোকের বেতন এখানে সপ্তাহ হিসাবে।

গত রবিবারে স্বর্গীয় কেশবচন্দ্র সেনের পুত্র নির্মলচন্দ্র সেন মহাশয়ের আহ্বানে নববিধানীয় উপাসনা দেখতে গিয়েছিলাম। নির্মলবাবু এবং একটি বৃদ্ধা বিদুষী ইংরেজ মহিলা কেশবচন্দ্রের প্রচারিত ধর্মমতের আলোচনা করলেন। আমরা ভারতীয় লোক পনের-ষোল জন ছিলাম। তার মধ্যে কুচবিহারের রাজপরিবারের মেয়েরাও ছিলেন। একটি সুন্দর বাংলা গান হ'ল, রবীন্দ্রনাথের—“কবে আমি বাহির হ'লাম তোমারি গান গেয়ে, সে-ত' আজকে নয়, আজকে নয় * *”। নিরবচ্ছিন্ন ইংরেজী ভাবের মধ্যে বাংলা গান—সে বড়ই মিষ্টি লেগেছিল। সভা ভঙ্গের পর নির্মলবাবুর স্ত্রী শ্রীযুক্তা যুগলিনী সেনের সঙ্গে এবং আর আর মেয়েদের সঙ্গে আমার পরিচয় হ'ল। আমাদের 'মাতৃমন্দির' পত্রিকার সম্পর্কে পরিচয়টা অতি সহজেই ঘনিষ্ণে উঠল। বেলা এগারটায় গিয়েছিলাম, তিনটেয় বাসায় ফিরলাম।

বিকাল পাঁচটায় এ-বাড়ীর একটি এগার বছরের ছেলের সঙ্গে

কুইন্স-পার্কে বেড়াতে বের হ'লাম। রবিবারে এখানকার পার্কগুলিতে খুব লোক হয়। আমাদের বাসার আধ মাইল দূরে এই পার্কটি, খুব বড় নয়, তবু চারদিক ঘিরে প্রায় এক মাইল। এখন গরম কাল, তাই বড় ফুলের বাহার। এদেশে ফুলের ব্যবহার একটু উন্টো ধরণের। ফুল আমাদের দেশে দেবতার পূজায় লাগে, আর এদেশে ফুল নিয়ে লোকে আনন্দ উপভোগ করে—ঘর সাজায়, কেউ বুকে পরে, মেয়েরা কেউ কেউ টুপিতে পরে। ফুল এখানে উচ্চ মূল্যে বিক্রি হয়। এজ্ঞা ফুল-ব্যবসায়ীদের পৃথক বাগান আছে। আশ্চর্য্য এই যে, পার্কের ফুলগুলি একটাও কেউ ছেঁড়ে না। বাগানটিতে একঘণ্টা বেড়াবার পর বাগানের ছেলেদের নিয়ে নানা গল্প আরম্ভ ক'রলাম। দেখতে দেখতে অনেক ছেলেমেয়ে জ'মে গেল। নতুন দেশের মানুষ পেলো এখানকার ছেলেমেয়েদের বড় আনন্দ হয়;—কথার পর কথা, জিজ্ঞাসার পর জিজ্ঞাসা। সন্ধ্যার পর বাসায় ফিরলাম। অনেক ছেলে আমাদের বাসা পর্য্যন্ত এসে তবে ফিরল। এই রকম করে প্রত্যেক রবিবারটা বিভিন্ন স্থানে বেড়াই।

আমি প্রতিদিন সন্ধ্যায় এ-বাড়ীর ছেলেমেয়েদের নিয়ে খানিকটা গল্প করি। আজকাল রামায়ণের গল্প ধারাবাহিক ভাবে শোনাচ্ছি। প্রতি দিনই সন্ধ্যার পর ছেলেমেয়েরা গল্প শোনবার জ্ঞা হাজির হয়। এতে আমার কথিত ভাষা শিখবারও সুবিধা হয়। এদের সঙ্গে গল্প করবার সময় আমার দেশের ছেলেমেয়েদের কথা বড় মনে পড়ে। বিলাতের ডাক কলকাতা থেকে প্রতি সপ্তাহে বৃহস্পতিবারে রওনা হয়, উনিশ দিনের দিন সোমবারে লঙনে পৌঁছে। সপ্তাহে সপ্তাহে তোমাদের খবর পেতে আশা করি।

বেঙ্গল কোর্ট, ইণ্ডিয়া প্যাভিলিয়ন
ব্রিটিশ এম্পায়ার একজিবিশন, ১০।৭.২৪.

ক সপ্তাহ তোমাকে চিঠি দিতে পারি নি, বড্ড কাজে লেগে গিয়েছি। এপ্রিলের মধ্যভাগে একজিবিশন আরম্ভ হয়েছে, এ পর্য্যন্ত কেবল গড়েই উঠছে। আড়াই মাস কাল আমি আমাদের ষ্টলের কাজের সঙ্গে সঙ্গে বেঙ্গল গবর্ণমেন্টের জুয়েলারী বিভাগে তত্ত্বাবধান করলাম, এতে প্রায় হাজার দেড়েক টাকা বেতনও যোগাতার পুরস্কার হিসাবে এঁরা আমাকে দিয়েছেন। এখন আমাদের নিজেরই অনেক কাজ বেড়ে গেছে, তাই সরকারী কাজটুকু ছেড়ে দিয়েছি। আরও ছ'টি মেয়েকে আমাদের ষ্টলের অলঙ্কার বিক্রির কাজে নিযুক্ত করেছি। এদের প্রত্যেককে সপ্তাহে আড়াই পাউণ্ড বেতন, আরও বাতায়াত ব্যয় দিই। প্রায় চারিশত টাকা মাসিক এদের দুজনের জন্ত আমার খরচ হয়। আমাদের ষ্টলের দৈনিক বিক্রি এখন গড়ে তিনশো টাকা। বেঙ্গল কোর্টে আমাদের ষ্টলটিই বেশী সুন্দর হয়েছে। সমগ্র ইণ্ডিয়া প্যাভিলিয়নে আমরা তৃতীয় দাঁড়িয়েছি।

একজিবিশন ক্রমেই জোর হয়ে উঠছে। আজকাল দৈনিক গড়ে তিন লক্ষ লোক একজিবিশন দেখতে আসছে। আমাদের ষ্টলের সম্মুখে অনবরত পঁচিশ থেকে একশো লোক দাঁড়িয়ে দেখে। আশ্চর্য্য এই যে, তিনভাগের দু'ভাগই স্ত্রীলোক।

বৌদিদির দুর্বা-বিষপত্রাঙ্কিত আশীর্বাদ পত্রখানি পেয়ে সুখা হয়েছে। তাঁর পত্রে জানালাম, আমার যাত্রার দিন থেকে তুমি নাকি ষট পেতে কি পুজো আরম্ভ করেছ; অনেক সময় বসে বসে কি ভাবনা কর নাকি! মঙ্গলঘট পেতেছ, ভগবানের স্মরণ করে পুজো করছ, সে

ভাল কথাই কিন্তু ভাবনা আবার কিসের ? আমি কিন্তু আপন আনন্দে আপনিই মগ্ন রয়েছি, আশা করি তুমিও ভগবানে নির্ভর করে নির্ভাবনায় থাকবে ।

একদিন সত্ৰাট পঞ্চম জর্জের স্ত্রী কুইন মেরী একজিবিশন দেখতে এসে আমাদের ষ্টলে এসেছিলেন । আমাদের কয়েকটি অলঙ্কার হাতে করে দেখলেন, প্রশংসাও করলেন । সত্ৰাট পঞ্চম জর্জ দু'দিন এক-জিবিশনে এসেছিলেন, কিন্তু আমি তাঁকে দেখি নি । কিছু দিন আগে এঁর কণ্ঠা আমাদের ষ্টলের সামনে এসে দাঁড়িয়ে দেখেছিলেন, চারদিক থেকে লোক এল তাঁকে দেখতে ; একটুকু সময় দাঁড়িয়েই তিনি চলে গেলেন । একদিন স্পেনের রাণী আমাদের কাছ থেকে আর্ম'লেট কিনে হাতে পরে গেলেন । একদিন ডেনমার্কের রাজা এসেছিলেন,— লম্বা চেঙা বলিষ্ঠ মাঝুষাটি, সাদাসিদে পোষাক ; সঙ্গে তিন-চারটি লোক মাত্র । আমাদের বেঙ্গল কোর্টে আসতেই অনেক লোক তাঁকে দেখতে এল ; আমাদের কোর্টের একটি মেয়ে সামনে পকেট-ক্যামেরা ধরতেই তিনি বললেন “ও, তুমি বুঝি ফটো নেবে ? আচ্ছা নিয়ে নাও, একটু শীঘ্র করে ।” দেখলাম রাজার কোন মান অভিমান নাই !

এপ্রিলের মধ্যভাগে একজিবিশন আরম্ভ হয়েছে, এই তিনটি মাস আমাদের ষ্টলে বিশেষ বিক্রি হয় নি । আমাদের ‘বীণাপাণি শাঁখা’ প্রভৃতি বা এনেছিলাম, তা দেখে এরা প্রশংসা করল বটে, কিন্তু হাতে গয়না পরা এরা পছন্দ করে না, তাই শাঁখার পরিবর্তে চাইল আর্ম'লেট । আর্ম'লেট কাকে বলে ? তাগার নাম এদের আর্ম'লেট । এখানকার আবশ্যক গহনার জন্ত দেশে টেলিগ্রাম করতেই আমাদের কলকাতার দোকান থেকে প্রচুর আর্ম'লেট, সেপ্টিপিন, পেম্‌ড্যান্ট, হাতীর দাঁতের মালা প্রভৃতি তৈরী হয়ে সপ্তাহে সপ্তাহে আসছে ।

হাতীর দাঁতের তৈরী অনেক রকম হাতী, রথ, নৌকা, গরুর গাড়ী এবং কালী, দুর্গা, শিব, রাধাকৃষ্ণ, বুদ্ধদেব প্রভৃতি অনেক রকম দেবদেবী এসেছে। বুদ্ধমূর্তি খুবই বিক্রি হচ্ছে। বুদ্ধদেবকে সারা জগতেই সম্মান করে।

যে দুটি মেয়ে আমাদের কাজ ক'রছে, তারা বড়ই বিশ্বস্ত। এরা জর্ডা ইমেলী প্রতি শনিবারে আমার সঙ্গে এসে আমাদের কাজের সাহায্য করে। বয়স মাত্র বারো, কিন্তু বেশ সুচতুর মেয়ে। শনিবারে ইমেলীদের স্কুল বন্ধ থাকে, এদিন একজিবিশন লোকে লোকারণ্য হয়। ইমেলী আমাকে কাকা (uncle) বলে ডাকে, তাই বেঙ্গল কোর্টের সব মেয়েরই আমি কাকা হয়ে গিয়েছি। আমাদের একটি পাথরের তাজমহলের একটি মাথা ছিল ভাঙা, তাই বিক্রি হ'চ্ছিল না; ইমেলী তার গায়ে সুন্দর করে লিখে দাম কমিয়ে নোটিশ দিল—The finest and richest building in the world reduced to 15 shillings. ইমেলীকে দিয়ে আমার খুব সাহায্য হয়।

তোমার কথাই কেবল মনে প'ড়ছে। তুমি আস্তে চেয়েছিলে—আমি আনলাম না, এলে কত সাহায্যই যে হ'ত আমার—তা বলে শেষ নেই। এত দেখাশুনোর আনন্দটাও পূর্ণতা প্রাপ্ত হত। প্রদর্শনীর ষ্টেডিয়মে যেদিন বাজি পোড়ানর competition হল, সেদিন দেখে দেখে আনন্দ আর প্রাণে ধরে না। তারপর যখন মনে হল একা-একাই দেখছি, আমার এ আনন্দের সহভাগী কেউ নেই, তখন আবার গভীর দুঃখে মন ভ'রে উঠল।

একদিন ছিল এরোপ্লেনের কৃত্রিম যুদ্ধ। সন্ধ্যাকালে চারদিক থেকে কত এরোপ্লেন এল; তাদের আকাশ জুড়ে যোরাফেরার তর্জ্জন গর্জ্জনে আকাশ বাতাস কঁপে উঠল। কখনো অতি দ্রুত, কখনো অতি ধীর,

কখনো সোজা উর্দ্ধমুখী, কখনো সোজা নিম্নমুখী, কখনো কাৎ হয়ে, কখনো চিং হয়ে—কত রকমেই এরোপ্লেনের খেলা দেখানো হল। সন্ধ্যার পর তাদের যুদ্ধ আরম্ভ হল। কী ভীষণ বোমা ছোড়ার শব্দ! বিদ্যুৎ চমকানোর মত আকাশ এক একবার আলোকময় হয়ে উঠছিল। দু'একটা এরোপ্লেনে তীব্র সার্চলাইট দেওয়া ছিল, তার আলোতে কখনো কৃত্রিম বিপক্ষীয় এরোপ্লেন, কখনো আকাশের মেঘ আলোকিত হয়ে উঠছিল। ক'একখানা এরোপ্লেনের সারা গায়, পাখায় অসংখ্য বিদ্যুৎ আলোকের বাতিতে মণ্ডিত হয়ে ফুটে উঠল। তার কোনখানা লাল, কোনখানা নীল, কোনখানা সবুজ, কোনখানা বেগুনে।

লাল এরোপ্লেনখানি বিপক্ষের প্রতি একটি বোমা নিক্ষেপ করেই আলো নিবিয়ে দিল, মুহূর্ত্ত মধ্যেই বহুদূরে গিয়ে লাল হয়ে ফুটে উঠলো। এইমত পর পর নানা প্রকার যুদ্ধ কৌশল দেখাল। ঐ যাঃ! বিপক্ষের বোমার আঘাতে একখানি এরোপ্লেন ভেঙ্গে আমাদের মাথার উপর পড়ছে, দর্শক আমরা সব ভয়ে কম্পমান; এখনি সর্কনাশ হবে—বাহবাঃ, এই যে আমাদের মাথার কাছে এসে ধাঁ করে উপরে উঠে গেল! কত কি আর লিখব।

একজি'বিশনটিতে সারা জগতের যা কিছু আশ্চর্য্য, তার অনেক দেখা হল। বিভিন্ন দেশের কত কি-ই যে দেখলাম। আমাদের দেশের আশপাশের কত কি নতুনও এই সুদূর প্রবাসে বসে দেখছি। তিব্বতের নাচ, মাদ্রাজী ভোজবাজি, লঙ্কার মণিমুক্তা তোলা—এসবও এখানে বসেই দেখা হল।

আমাদের ইণ্ডিয়া প্যাভিলিয়নের পাশেই একটা মস্ত বড় ভারতীয় ভোজনাপার হয়েছে। একদিন আমাদের ষ্টলের মেয়ে দুটিকে নিমন্ত্রণ করলাম এই হোটেলটিতে। ইমেনীও আমাদের সঙ্গে ছিল, তাকে

নিম্নে আমরা চার জন। ভারতীয় ধরণে খাওয়া হবে—সন্দেশ, রসগোল্লা, অমৃতি, গজা কত-কি সেখানকার জিনিষের তালিকায় দেখা গেল। কিন্তু আমাদের সবাকার মনোনীত হল একটু করে পোলাও আর একটু করে হরিণের মাংস, তারপরে একটু আমের মোরবা; তাই সবাই মিলে খেলায়। অনেক অমুরোধ করলাম, কিন্তু কেউ বেশী কিছু আর খেল' না। ঘরেই হোক, আর বড় বড় নিমন্ত্রণেই হোক, এরা পেটপুরে কখনো খায় না। খাবার সময় বেশ আমাদের গল্প, হাসির গল্প আপনিই এসে জোটে এদের!

আমাদের ষ্টলটি বাংলার ধরণে সাজানো হয়েছে। আবার জোস বলে যে মেয়েটিকে একখানি পার্শী সাড়ী দিয়েছি, বেশ সুন্দর। বাঙালী মেয়ের মত মানিয়েছে তাকে। তারপর বাংলার হাতী ঘোড়া রথ নৌকা দেবদেবী দিয়ে ষ্টলটি সাজানো হয়েছে; বেশ সুন্দর হয়েছে আমাদের ষ্টলটি। আরও তিনটি মাস একজিবিশন থাকবে, নভেম্বরের প্রথমে বন্ধ হবে। দেশে গিয়ে তোমাদের একজিবিশনের খবর শোনাবো।

একজিবিশন সম্বন্ধীয় ছবি, মানচিত্র, বই কিছু কিছু তোমাদিগকে পাঠিয়েছি, এবার ছবি আঁকা রুমাল, টেবিল ক্লথ কয়েকখানা এই ডাকে পাঠাচ্ছি; এগুলি একজিবিশনের স্মৃতি বলে যত্নে রেখে দিয়ে।

১৮, এডেলাইড-রোড, লন্ডন

২২শে আশ্বিন, বিজয়া-দশমী, ১৩৩১

আজ বিজয়ার দিনে সূদূর প্রবাস থেকে তোমাদিগকে বড়ই মনে প'ড়ছে। বিজয়ার আশীর্বাদ জানাচ্ছি। দেশের ছোট বড়, আত্মীয়-স্বজন, বন্ধুবান্ধব সবাইকেই আজ মনে প'ড়ছে। এই শরতের দিন—দেশের ধানের ক্ষেত, পদ্মের বন, শেফালী কুঞ্জ—এদেশে কল্পনায় আনাও হুঃসাধ্য। দেশের পকেট ডাইরী বই একখানি সঙ্গে আছে, তাই বাংলা দিন কালের খবর রাখি।

এপ্রিলে এখানে পৌঁচেছিলাম, তখন বৈশাখের প্রথম। এসে দেখি তখনও এখানে শীতকালের জের রয়েছে; বেলা ন'টা পর্যন্ত কৃষাসাধ পথ-ঘাট ঢাকা থাকত। এখন এই আশ্বিন মাস—এখনও আমার শোবার বিছানায় ছোটো লেপের কমে চলে না। সূর্য্যদেব দক্ষিণের এক কোণে উঠে কোণেই অস্ত যান, তাও মেঘ বৃষ্টির দিনে দর্শন মেলে না। আকাশ ভরা জলকো মেঘ আর গুঁড়ি গুঁড়ি বৃষ্টি প্রায় লেগেই আছে। শুনে আশ্চর্য্য বোধ করবে, আষাঢ় শ্রাবণে এখানে আঠার ঘণ্টা দিন আর ছ'ঘণ্টা মাত্র রাত্রি ছিল। জাম্বুয়্যারী ক্ষেত্রয়্যারীতে পুরো শীতের দিনে হবে ঠিক এর উল্টো। আষাঢ় শ্রাবণে সন্ধ্যা হত চটায়, তখন পোঁণে দশটা পর্যন্ত দিনের আলোতে বই পড়েছি।

এ-দেশের নতুন কথা শুনতে চেয়েছ, কোন্টা লিখব আর কোন্টাই বা বাদ দেব। কাল দেখলাম স্বামী জীতে চলেছেন—পথে জীর পায়ের জুতোয় একটুখানি কাদা লেগে গেল, স্বামী বেচারী তখন নিজের পকেট থেকে ধবধবে সাদা রুমালখানা বের

করে স্ত্রীর পা ধরে যত্নের সঙ্গে কাদা মুছে দিল। তারপর হুঁজনে মশ্ মশ্ করে চলল। আমরা যদি কালেভদ্রে তোমাদের পায়ের কাঁটা তুলে দিয়েছি, তবে একটা প্রণাম ত পেয়েছি নিশ্চয়ই, এদের ও-রকম কিছুই নেই।

গত রবিবারে বিশ মাইল দূরে 'Harrow on the Hill' নামে একটা পাহাড়ে' অঞ্চল দেখতে গিয়েছিলাম। পাহাড়ের উপর বেশ নির্জন মনোরম স্থানটি। উপরে একটা মস্ত বড় গির্জা ঘর আছে, তার গায়ে কাঁচের জানালায় প্রাচীন শাস্ত্রীয় বহু রঙিন ছবি আঁকা রয়েছে। দশ মাইল দূর থেকে এই গির্জার চূড়াটি দেখেছিলাম। স্বাস্থ্যকর স্থান বলে এখানে মস্ত বড় একটা স্থূল আর তার সঙ্গে তেমনই একটা বোর্ডিং রয়েছে। খুব কুয়াসার দিন ছিল, সারাদিন সেই কুয়াসার মধ্যে ঘুরলাম, শরীর হিম হয়ে গিয়েছিল কিন্তু অন্থ ধরে নি। পাহাড়ের উপর থেকে গ্রামের মধ্যে একটা রাস্তা গিয়েছে, হুঁধারে গাছের শ্রেণী, গাছের হলুদ রঙের পাতাগুলি সমান ভাবে প'ড়ে রাস্তাটি রঙিন হয়ে রয়েছে। রাস্তার হুঁ পাশের ঘাসের জমী বাঁকা বাঁকা ইট দিয়ে সীমানা করা, ঘাসের জমি থেকে পাতাগুলি যত্নে কুড়িয়ে এনে রাস্তার উপরে দেওয়া হয়েছে ; রাস্তাটি যেন হলুদ রঙের গালিচার মোড়া! এত সৌন্দর্য্যও কোটাতে জানে এরা।

বিদেশে তুমি আমাকে খুব হুঁসিয়ার থাকতে লিখেছ, বিশেষতঃ টাকাকড়ি সম্বন্ধে। হুঁসিয়ার অবশ্য থাকতেই হবে, তবে এ দেশের ব্যবস্থার কথা তোমাকে একটু শোনাই। সেদিন এক বৃদ্ধ ইংরেজের কাছে গুনলাম, তাঁর একগাছি সখের লাঠি তিনি লণ্ডনের পথে হারিয়ে ফেলেছিলেন। Lost-property officeএ খবর দিতেই অফিস থেকে তাঁর ডাক পড়ল। তারপর হারানো জিনিসের স্কদামে লাঠি

বিভাগে গিয়েই দেখলেন—সারি সারি সাজান হারানো লাঠি নম্বর দেওয়া রয়েছে, তার মধ্যে তাঁর গাছটিও পাওয়া গেল।

প্রদর্শনীতে ভারতীয় একটি দোকানদারের প্রতি একজন ইংরেজ একটু কটু কথা প্রয়োগ করেছিল। আশে পাশে অনেক ইংরেজ ছিল, তারা এই ইংরেজটির অত্যাচার হয়েছে বলে স্বীকার করল। ভারতীয় দোকানদারটি তাকে বলল—“তোমার এজ্ঞা ক্ষমা প্রার্থনা করতে হবে।” ইংরেজটির সঙ্গে তার স্ত্রীও ছিল, তারা দু’জনে পরামর্শ করে বলল, বাড়ী গিয়ে পত্র দ্বারা ক্ষমাপ্রার্থনা জানাবে। তারা অপরিচিত লোক, তথাপি ঠিক ক্ষমা চেয়ে পত্র দিয়েছিল।

সেদিন বিকেলে একটা সুন্দর ছোট পার্কে বেড়িয়ে এলাম। পার্কের দরজার বাইরে দেখলাম একটা লোক সদর রাস্তার উপর একা একা টেঁচিয়ে ধর্মের বক্তৃতা দিচ্ছে, শোনবার লোক একটাও নেই, তবু বুঝি পরকালের ভয় দেখাচ্ছিল। ভাবলাম, লোকটা পাগল নাকি! ব্যাপারটা বোঝবার জ্ঞান তার কাছে গিয়ে দাঁড়ালাম। আমি একাই ইলাম তার প্রোতা। সন্ধ্যা হয়েছে—পার্কের লোক হু’ একটা করে বেরুচ্ছে,—চলতে চলতে তার হু’ এক কথা শুনে যাচ্ছে। হু’ একটা ছুঁ ছেলে তার বক্তৃতার হু’এক কথার বিকৃত অনুকরণ করে তামাসা করছে। তারপর বাগান থেকে যখন বেশী লোক বের হল, তখন তাদের মধ্য থেকে হু’চারজন দাঁড়িয়ে গেল। তারপর বহু লোক জমে গেল। তার বক্তৃতার কথাগুলি ছিল ছোট ছোট, যারা পথ দিয়ে চলে যাচ্ছিল হু’একটা ধর্মকথা তাদের কাণেও ঢুকছিল।

সেদিন অলিম্পিয়ার বার্ষিক উৎসব দেখতে গিয়েছিলাম। ছেলে মেয়েদের নিয়ে আমোদ উৎসব দেখতে আমার কত আনন্দ তা ত জানই। যাবার সময় আমাদের ছেলে মেয়েদের কথা বড়ই মনে

পড়ছিল। পথে পিকাডিলির একটা ভোজনাগারে খেতে বসেছি— দেখলাম ন'বছরের একটি সুন্দরী মেয়ে, হোটেলের কর্তার। কর্তাকে বললাম, আমি অলিম্পিয়ান বাচ্ছি, তোমাদের খুকীটাকে আমার সঙ্গে যেতে দেবে? হোটেলওয়াল। আমার পরিচয় জেনেই মেয়েটিকে উপরে তার মায়ের কাছে অমুমতি চাইতে পাঠাল। কয়েক মিনিট পরেই মেয়েটি তার ছোট ভাইটিকেও সঙ্গে নিয়ে সেজে গুজে এসে হাজির। সহর থেকে পাঁচ মাইল পথ মোটর বাসে করে গিয়ে আমরা সেই উৎসব ক্ষেত্রে উপস্থিত হলাম। দেখলাম কত নতুন রকম জিনিষ পত্রের দোকান, নাগর দোলা, অশ্বচক্র কতই রকমে রকমে; সার্কাস, ভোজবাজী, জীবজন্তুর খেলা, বাজী পোড়ানো, আগুনের খেলা কতই অদ্ভুত রকমে। কী আনন্দেই মেতে গেলাম এই অজানা অচেনা ছেলে মেয়ে দু'টিকে নিয়ে! ধরচ হল আমার বোল টাকা। রাত্রি এগারোটার ছেলেমেয়ে দুটিকে ঘরে পৌছিয়ে দিয়ে বাসায় ফিরলাম।

লগুনে আমোদ উৎসব লেগেই আছে। ভাল কিছু দেখতে পেলে আনন্দ হয় বটে কিন্তু তার সঙ্গে একটা দুঃখও জড়িত থাকে আপনার জনকে না দেখাতে পেরে। সকল রকমে মনোবাহা পূর্ণ হওয়া ভগবানের কলমে লেখেনি। * *

আমি এখন নিজেই একটি বাসা করে রয়েছি। চিঠি পত্র খুব বেশী করে লিখো, তোমাদের চিঠি পত্রগুলো আমার এই বিদেশের প্রিয় সঙ্গী, ঐশুলি নিয়েই দেশের চিন্তা করি।

১৮, এডেলাইড্ রোড,

লণ্ডন, ১৬ই নবেম্বর, ১৯২৪

তোমার ২৫শে অক্টোবরের চিঠি কাল পেয়েছি! এবার এই ডাকে দেশের বন্ধু-বান্ধবদের এত চিঠি পেয়েছি যে দু-চার লাইন করে উত্তর দিয়েও সব চিঠির উত্তর দেওয়া সময়ে কুলোবে না। তোমার পত্রে দেখলাম—এখানে দিনের মধ্যে কতবার ঠকি আর লোকের কাছে কতবার বকুনি খাই তার হিসাব চেয়েছ। মাল্লব সব চেয়ে বেশী বকুনি খায় গৃহিনীর কাছে, সেখানেই যখন ওটা আমার ভাগ্যে জোটে না, তখন অত্থানে আর কত আশা করতে পারি? তবে এই বিঘোর বিদেশে কোনো কোনো কাজে যে ঠকতে হয় না—এমন বলা চলেনা।

প্রথম এখানে এসে যখন একটা বড় হোটেলে ছিলাম, তখন প্রথম দিনেই স্নানের ঘরে স্নানের জল গরম করবার গ্যাসের পাইপ নিভাতে গিয়ে ভুল করে এমন একটা কল খুলেছিলাম যাতে হোটেলের উপর-তলাকার রান্নার চুলো পর্য্যন্ত নিভে গিয়েছিল, আর সঙ্গে সঙ্গে আমার স্নানের ঘরও হিম জলে ভর্তি হয়ে গিয়েছিল। উপরকার লোক ছুটে এল তখনি আমার স্নানের ঘরে। আমি ত লজ্জায় মরি, লোকটা কিন্তু কোন কিছুই না বলে কলটি ঠিক করে দিয়ে চলে গেল।

প্রথমে এখানে বিলাতী টুপি প'রতাম না। মাল্জাজী ধরণের টুপি—যা দেশ থেকে নিয়ে এসেছিলাম তাই প'রতাম। একদিন ঝিমঝিমে বৃষ্টিতে চলছি আর টুপির জল চোখ মুখ বেয়ে পড়ছে—তিনটি যুবতী একত্র চলছিল—তারা আমার এই দশা দেখে হেসে ফেলল। পরদিনই এখানকার প্রচলিত ফেল্টের টুপি কিনলাম, তাতে বৃষ্টির জল পিছন দিকে গড়িয়ে পড়ে যায়।

এদেশের মেয়েদের সঙ্গে খুব মেশামেশি করি জেনে তুমি ইঙ্গিতে আমাকে একটুকু ঠাট্টা তামাসা করেছ। এটা খুব সত্যি কথা, আমাদের দেশের অনেক যুবক এখানে এসে ইংরেজ মেয়ে বিয়ে করে রয়েছে। কিন্তু যারা করেছে তারা যে বড় ভুল করেছে, তাদের গার্হস্থ্য জীবন থেকে তারা বুঝতে পারে।

এদেশের মেয়েদের চরিত্র সম্বন্ধে আমাদের দেশে অনেক কথা উঠে থাকে। কিন্তু এখানে বতদূর দেখছি' তাতে বোকা যায় মন্দের খবরটা আমাদের দেশে একটু অতিরঞ্জিত হয়েছে পৌছোয়। মেয়ে-পুরুষ সকলেরই সর্বত্র সমান গতিবিধি বটে, মেয়েরা পুরুষদের সঙ্গে নাচবারে একত্র নাচেও বটে, তথাপি এদের কোন মন্দের লক্ষণ দেখা যায়না। আমি এ দেশের বুড়ো অভিভাবকদের জিজ্ঞাসা করছি, যুবক যুবতীদের বেতাবে মিলতে দেওয়া হয় তার দ্বারা সমাজের কু-কলের আশঙ্কা আছে কিনা। অধিকাংশ স্থলেই উত্তর পেয়েছি—'বেতানে মন্দের আশঙ্কা আছে সেখানে অভিভাবকরা বাধা দিয়ে থাকেন।' বেশ বুঝলাম, অগ্রত্যক্ষে এরও একটা শাসনের ব্যবস্থা আছে। তুমি বোধ হয় অন্তরের সঙ্গে বিশ্বাস কর, আমি কোন মন্দ সংসর্গে যোগ দিই না। এদেশে অনেকেই একটু আধটু মদ খায়, বিশেষতঃ শীতের দিনে। কিন্তু বন্ধু বান্ধবের অহুরোধ সত্ত্বেও কোনদিন আমি ওটা স্পর্শ করিনি।

এখানে কি খাই দাঁই, কি ভাবে চলিফিরি—অনেক জানতে চেয়েছ। আমার বিশেষ কোন ধরাবাঁধা নিয়ম নেই। আজকাল সকাল সকাল ন'টার মধ্যে ঠোঙে করে আতপ চাউলে ভাত-ভাত করে খাই, সঙ্গে ডিম, মাখন আর একটু গরম দুধ খাই। সিদ্ধ চাউল এখানে মেলেনা।

আমাদের পাশের বাড়ীর এক ঘোষ বাবু একদিন আমাকে বলছিলেন—মিষ্টান্ন নন্দী, আপনি নিজে হাতে রান্না করে খান, এতে আমাদের বড় লজ্জা করে। আমি আপনাকে অবস্থাপন্ন গণ্যমান্ত লোক বলে এদের কাছে জানিয়েছি, এতে এরা মনে করতে পারে আমাদের বাঙালী ধনীরাও বুঝি নিজ হাতে রান্না করে খায়। আমি হেসে বললাম, কেন আপনি আমাকে বড় লোক বলে পরিচিত করতে গেলেন? আপনাদের জমিদারীর একজন প্রজা বললে দু'দিকেই ত শোভন হত।

এখানে দুধ, পাউরুটি, চাউল, আলু, মাখন, চিনি প্রভৃতি সাধারণ খাদ্যশুলি যাতে সকলেই কম দামে পেতে পারে সরকার থেকে তার ব্যবস্থা করা আছে। এজন্ত এই দুর্খমূল্যের দেশেও এগুলির দাম আমাদের দেশের চেয়ে খুব বেশী নয়। এক পাউণ্ড ওজন বললে আমাদের দেশের প্রায় আধসের বোঝায়। এই এক পাউণ্ড পরিমাণ চাউল চার আনা, মস্তুর ডাল ছ'আনা, মাখন আঠারো আনা। ডিম, মাংস প্রভৃতি আমাদের দেশের চেয়ে তিন চারগুণ বেশী দাম। কলা, কমলালেবু, আঙ্গুর, আপেল প্রভৃতি পাঁচছয়গুণ দাম বেশী। এছাড়া বহু রকমের তৈরী খাদ্য আছে সেগুলির দাম খুবই বেশী—তবুও অনেকেই খায়।

মধ্যাহ্নের খাবার এখানে প্রায় সকলেই বাইরে কর্তৃস্থলে গিয়ে খায়। আমিও তাই খাই। মধ্যাহ্নের হোটেলের খাবার সাধারণতঃ সূপ, পাউরুটি, মাংস, সিদ্ধ তরকারী, পুডিং, ফল, বাদাম প্রভৃতি। রাত্রিতে কখনো হোটেলে, কখনো ঘরে রান্না করে খাই। এদেশে পোলাওএর মত একটা গরীবান্না রান্না আছে, রাত্রিতে প্রায়ই আমি তাই করি। তার ফর্দ দিলাম—একপোয়া ভেড়ার মাংস, এক ছটাক

চাউল, আধপোয়া আলু, তার সঙ্গে দু-একটা পিঁয়াজ এক সঙ্গে সিদ্ধ করে নিয়ে মাখন, গোলমরিচের গুঁড়া ও তুন মিশিয়ে খাই। তোমরা নিশ্চয় হাসবে—এ রকম খাওয়ার কথা শুনে।

আজ এই পর্য্যন্ত।

স্যালভেসন্-আর্মি হোষ্টেল

৮৩, জ্যামেকা রো, বার্মিংহাম।

৭ই জানুয়ারী, ১৯২৫

তোমার ১৪ই ডিসেম্বর তারিখের লঙনে প্রেরিত পত্র, বার্মিংহামে এসে আমার হাতে পৌঁচেছে। কতদিনে দেশে ফিরব, দেশের বন্ধুবান্ধবেরা অনেকেই তা জানতে চেয়েছেন; এবার তোমার চিঠিতেও সেই কথা। কিছুকাল স্কটল্যান্ড ও আয়ারল্যান্ডে কাটিয়ে দু'সপ্তাহ হ'ল বার্মিংহামে এসেছি। এখানে একটু দীর্ঘ দিন থাকতে ইচ্ছে আছে। শিল্প সম্বন্ধে কিছু দেখে যাব,—বার্মিংহাম শিল্প বাণিজ্যের অতি প্রকাণ্ড সহর।

একদিন বড় বড় কলকারখানার অঞ্চল দেখে এলাম। সহরের সে দিকটা দশ বার মাইল বেষ্টনী নিয়ে কেবলই কলকারখানায় পূর্ণ। কলকারখানার ধোঁয়ার কালীতে, পাথুরে কয়লায় আর লোহালক্করের ময়লায় সে অঞ্চলটি একেবারে কালো হয়ে গিয়েছে। তাই সেই অঞ্চলটিকে Black Country বলা হয়। মোটর-বাসে ৫।৬ মাইল সোজা রাস্তার মধ্য দিয়ে চললাম; কেবল কলের ধোঁয়া আর হুড় হুড় শব্দ,—যেন বিখকর্মার পুরী।

বড়দিনের আমোদ উৎসব এখানে দেখলাম—এক একটি দোকান কি সুন্দর সাজানো হয়েছে ; কত রকমেই আলো দেওয়া হয়েছে তাতে। আমাদের হোস্টেলের পার্শ্বেই একটা প্রকাণ্ড ছ-পেনীর দোকান, অর্থাৎ তার অধিকাংশ জিনিসের দামই প্রতিটা ছয় পেনী করে। এছাড়া তিন পেনী করে দামের জিনিসও প্রচুর। প্রকাণ্ড একটি হলু তাতে বাট-বাষড়িটি বিভাগ আছে, প্রত্যেক বিভাগে অনবরত ছুটি করে মেয়ে জিনিস বিক্রী করছে। এই রকম প্রায় সওয়াশো'র উপর মেয়ে এই দোকানের বিক্রীর কাজে নিযুক্ত রয়েছে। একবার ভেবে দেখ—কত বড় দোকানটি আর কি পরিমাণ তার কেনাবেচা।

সেদিন গরীব ছেলেমেয়েদের বড়দিনের উৎসব-সভা দেখলাম। সাড়ে তিন হাজার ছেলেমেয়ে এসেছিল। বার্মিংহামের সমস্ত স্কুলগুলির গরীব ছেলেমেয়েদের জ্ঞান নিমন্ত্রণের কার্ড দেওয়া হয়েছিল, যারা ঠিক গরীব তারাই ঐ কার্ড পেয়ে এসেছিল। আমি এক শিলিংএর টিকেট কিনে দর্শক হয়ে প্রবেশ করেছিলাম। সেখানে দেখলাম, তাদের ছেলেমেয়েদের শিক্ষাপ্রদ থিয়েটার, ম্যাজিক বা ভোজবাজি, বক্সিং বা ঘুসিখেলা, অস্ত্রখেলা, নাচগান—অনেক রকমের সম্পন্ন হল। সহরের নামকরা ছোট ছেলেমেয়ে গায়ক গায়িকা-দেরও নিমন্ত্রণ করা হয়েছিল—তাদের নাচগান করবার জন্তে। তাদের যোগ্যতা অনুসারে প্রাইজ দেওয়া হল। আমি ত দেখে মুগ্ধ হয়ে গেলাম। ব্যবসায়ী থিয়েটার ওয়ালাদের চেয়ে স্কুলের ছেলেমেয়েদের এই উৎসবটি আমার চের ভাল লাগল। আমোদ প্রমোদের শেষে ছেলেমেয়েদের জলযোগ হল। চা খাবার জন্তে যে এ্যালুমিনিয়ামের গেলাস ছিল, সেগুলি তাদের একেবারেই বাড়ী নিয়ে যাবার জন্তে।

সভা ভাঙের পর তাদের একে একে বের হবার পদ্ধতি দেখলাম—বড়ই সুনিয়ন্ত্রিত। তারপর বের হবার পথে প্রত্যেকে বাড়ীতে নিয়ে যাবার জন্যে একটি করে থলি পেল। তার মধ্যে নানা রকমের কেক, বিস্কুট, ফল, রুমাল, জলছবি, আম্রনা, চিরুণী, সুগন্ধি দ্রব্যাদি ভরা ছিল। এই উৎসবটি প্রতি বৎসরেই হয়ে থাকে সহরের কি নাম এক সর্ব্বপরিচিত ‘খুড়ো’র দেওয়া টাকায়। এই রকম গরীব ছেলেমেয়েদের জন্য অনেক সুব্যবস্থা আছে।

শীত ক্রমেই বেশী পড়ছে। কাল সারাদিন বরফ পড়েছিল। কখনো গুঁড়ো ঝটির মত বিন্দু বিন্দু করে, কখনো কুয়াসা হয়ে উড়ে গাছপালার গায়ে জড়িয়ে যাচ্ছিল। কখনো কখনো এতই বরফ পড়ে যে বাড়ীঘর পথঘাট ঢেকে একেবারে সাদা হয়ে যায়। বরফের দিনে বুড়োরা ঘরের মধ্যে লুকোয়—আঙনের কাছে, আর ছেলেমেয়েরা বাইরে এসে বরফের উপর ছোটোছুটি খেলা করে, গুঁড়ি গুঁড়ি বরফ হাতে তুলে চেপে বল তৈরী করে গায়ে ছোড়াছুড়ি করে; একে বলে snow ball খেলা।

এখানে এসে এক বুড়ীর বাড়ীতে ছিলাম এক সপ্তাহ। বাড়ী-খানিতে সে আর তার স্বামী থাকে। সদর দরজায় তাদের দর্জির কারখানা। স্বামী দর্জির কাজ করে, বুড়ী ঘর আর কারখানা সব দিকে কর্তৃত্ব করে। বুড়ী লেখাপড়া জানেও বুড়োর চেয়ে ভাল। এদের অবস্থা আগে ভাল ছিল, কিন্তু যুদ্ধের সময় বাড়ীঘর নষ্ট হয়ে গিয়েছে। বুড়ী যখন যুদ্ধের কথা আর উপর থেকে আগুন গোলাগুলি পড়ে তাদের বাড়ীখানি ধ্বংস হবার বিবরণ আমাদের শোনাতে, তখন চ’খে তার জল ঝরত।

বর্তমানে এই হোটেলটিতে আছি, গ্রহস্থ বাড়ীতে থাকার চেয়েও

কম খরচে চলছে। বার্মিংহামে আমার কিছু বেশীদিন থাকতে ইচ্ছা আছে—এখানকার কলকারখানাগুলোর কিছু কিছু দেখবার জগ্গে। এখানকার কারখানা-ওয়াল প্রভৃতি ব্যবসায়ীদের সৌজন্যে আপনাপনিই মন এদের প্রতি আকৃষ্ট হয়।

কত হিজিবিজিই না তোমাকে লিখলাম, জানি না এসব তোমার কেমন লাগবে। বার্মিংহামের কাজ শেষ করেই আবার লণ্ডনে যাব, তার পরেই হয়ত দেশে ফিরতে হবে। মনে রেখো কোন সৌখীন উপহার তোমাদের জগ্গ নেওয়া হবে না। তবে নেব কিছু কিছু ছোট ছোট গৃহশিল্পের যন্ত্রপাতি—তাই হবে তোমাদের উপহার।

পঞ্চদশ অধ্যায়

[পরিশিষ্ট]

লণ্ডনের প্রধান প্রধান দ্রষ্টব্য

ব্রিটিশ মিউজিয়ম—লণ্ডনের সর্বপ্রধান ষাটঘর। বহু বিষয়ক বহু প্রকৌষ্ঠপূর্ণ স্মৃহং অট্টালিকা। একটি বাড়ীতে সঙ্কলান না হওয়ায় সহরের বিভিন্ন অংশে এর বিভিন্ন বিভাগ স্থাপিত হয়েছে। এই মিউজিয়মের বিবরণ সম্পর্কিত পুস্তকগুলি পর পর সাজানো রয়েছে, তা বড় বড় এক সহস্র ভলুমের কম নয়। সমস্ত মিউজিয়মের আলমারী-গুলির চারিদিক ঘুরে দেখতে যত পথ অতিক্রম করতে হয় তার পরিমাণ পঞ্চাশ মাইল। এটি ব্রিটিশের গৌরব এবং অপরিসীম জ্ঞানের ভাণ্ডার।

ভিক্টোরিয়া আলবার্ট মিউজিয়ম—রাজকীয় ঐতিহাসিক দ্রষ্টব্য বিষয়ে পরিপূর্ণ। এ ছাড়া জগতের নানা দেশ থেকে বিভিন্ন সময়ের অমূল্য দর্শনীয় শিল্প-সম্পদ এখানে সংগৃহীত হয়েছে।

সায়েন্স মিউজিয়ম—প্রাচীনকাল থেকে একাল পর্যন্তকার সমুদয় কলকারখানার নমুনা এখানে রক্ষিত হয়েছে। প্রাচীন যুগের শকটযান থেকে বর্তমানের ইলেকট্রিক ট্রেন, জাহাজ, অটোমোবিলের ক্রমোন্নতি স্তরে স্তরে সাজিয়ে দেখানো হয়েছে। বহু প্রকার ইণ্ডাস্ট্রি ও ইনজিনিয়ারিং সম্বন্ধীয় জ্ঞানলাভের জন্তু নানা প্রকার যন্ত্রের ব্যবহার এখানে দেখানো হয় ।

ইণ্ডিয়া মিউজিয়ম—এখানে ভারতবর্ষ, সিংহল, ব্রহ্মদেশ, আফ-
গানিস্তান, তিব্বত, শ্রাম প্রভৃতি দেশের নানাপ্রকার প্রদর্শনীতে পূর্ণ।
সদর দরজায় তাজমহলের একটি চমৎকার মডেল ভারতের স্থাপত্য-
গৌরব ঘোষণা করছে।

অষ্ট্রেলিয়া হাউস—অষ্ট্রেলিয়া ও নিউজিল্যান্ডের ঐশ্বর্যের নিদর্শনপূর্ণ
সুবৃহৎ ভবন। এখান থেকে কৃষক, গোপালক, মেঘপালকদিগকে
অষ্ট্রেলিয়া ও নিউজিল্যান্ড প্রেরণের সুব্যবস্থা করা হয়।

আসত্মাল গ্যালারী—বিখ্যাত চিত্রকরগণের অঙ্কিত মূল্যবান চিত্র
সমূহ এখানে রাখা হয়েছে। ইয়োরোপের বিভিন্ন নগরে যে সকল
বিখ্যাত চিত্র আছে তার অবিকল অনুলকরণ এখানে দেখতে পাওয়া
যায়।

ম্যাডাম টুসউডস্—মেরী টুসউড্ নামী সুইজারল্যান্ডবাসিনী এক
মহিলা প্রতিষ্ঠিত মোমের প্রস্তুত ভাস্কর শিল্পের প্রদর্শনী। বিখ্যাত
ঐতিহাসিক ব্যক্তিগণের এবং ঐতিহাসিক ঘটনাবলীর প্রতিমূর্ত্তি এখানে
দেখাবার ব্যবস্থা করা হয়েছে।

হাউস অব পার্লিয়ামেন্ট—ব্রিটিশ রাজত্বের রাজ্যপরিচালন ও বিচার
বিষয়ক কার্যের মূল কেন্দ্র। ১৮৪০ খৃষ্টাব্দে আরম্ভ করে ১৮৫০ খৃষ্টাব্দের
মধ্যে টেমসের তীরে সাড়ে চারি কোটি টাকা ব্যয়ে এই বিরাট সৌধ
নির্মিত হয়। দুইটি বিভাগ আছে—হাউস অব লর্ডস্ এবং হাউস অব
কমন্স। হাউস অব লর্ডসের চূড়া অতি উচ্চ চতুর্ভুজ আকারে উঠেছে
আর হাউস অব কমন্সের চূড়া ক্রমে সরু হয়ে উঠেছে এবং চূড়ার উপরে
চারিদিকে চারিটি বৃহৎ ঘড়ী। এই ঘড়ী অবলম্বন করে সহরের সময়
রক্ষা করা হয়। ভিতরে সভাগৃহ, বিচার-গৃহ বিরাট আয়োজনে গঠিত।

ওয়েস্ট মিনিষ্টার ব্রীজ—টেমসের উপর সৌষ্ঠবময় পোল। এইস্থানে

টেমসের তীরে রাজকার্য্য বিষয়ক অট্টালিকা সমূহ শ্রেণীবদ্ধভাবে শোভমান।

পিকাডিলি সার্কাস—সহরের থিয়েটার বায়স্কোপ প্রভৃতি নৈশ আমোদ-প্রমোদের কেন্দ্রস্থল। রাত্রিকালে এখানকার বৈদ্যুতিক আলোকের বিজ্ঞাপন সমূহ এক একটি উৎসব গৃহকে অভিনব রূপে দর্শকের মনে আনন্দ দান করে। বিলাসের চূড়ান্ত স্থান।

হাইড্‌ পার্ক কর্ণার—সুবিশাল হাইড পার্কের এক পার্শ্বে জনতাপূর্ণ স্থান। বিকালে সহরের নিকটের ও দূরের বহু লোক হাইড পার্কে ভ্রমণ করতে এসে এই স্থানে একত্র হয়। প্রতিদিনই এখানে সমরোপযোগী নানা বিষয়ক বক্তৃতা হয়।

ব্ল্যাক ফ্রান্সিস ব্রীজ—সহরের কেন্দ্রস্থলে টেমসের উপরে এই পোলটি অবস্থিত। পোলের উপরে দ্বিতল ট্রামগাড়ী ও বহু প্রকারের অটোমবিল যাতায়াত করে। পার্শ্বেই রেলপথের জন্ত আর একটি পোল, এই রেলপথ ফরাসী রাজ্যের দিকে গিয়াছে। ভারতীয় যাত্রীগণ এই পথেই লণ্ডনের বিখ্যাত ভিক্টোরিয়া স্টেশনে পদার্পণ করে।

রিজেন্ট পার্ক—হাইড পার্কের পরেই এই পার্কটি লণ্ডনের উদ্যানের মধ্যে দ্বিতীয় স্থান অধিকার করে। এর মধ্যে সহরের জুলোজিক্যাল গার্ডেন ও বোটানিক্যাল গার্ডেন। পার্লিগ্রামেন্ট হিল নামক একটি ছোট পাহাড় ইহার মধ্যে অবস্থিত।

টাওয়ার অব লণ্ডন—টেমসের তীরে সুশোভন প্রাচীন দুর্গ। এক কালে কারাগার রূপে ব্যবহৃত হত। বর্তমানে এটি রাজকীয় ঐতিহাসিক বিষয়পূর্ণ দর্শনীয় স্থান। এখানে প্রাচীনকালের যুদ্ধসজ্জা, অস্ত্রশস্ত্র বহু পরিমাণে রক্ষিত হয়েছে। মহারানী ভিক্টোরিয়ার মুহূর্ত, কোহিনুর প্রভৃতি রাজকীয় রত্নাভরণ যথাযোগ্য ভাবে এখানে সজ্জিত।

রয়েছে। টাওয়ারের বহির্ভাগে টেমসের তীরে ভারতবর্ষ, চীন, মিসর প্রভৃতি দেশের প্রাচীন কালের বৃহৎ বৃহৎ কামান শ্রেণীবদ্ধভাবে রাখা হয়েছে।

মার্কেল আর্চ—প্রথমে ব্যাকিংহাম প্যালেসের তোরণদ্বার রূপে নির্মিত হয়েছিল, বর্তমানে হাইড্‌ পার্কের উত্তরে জনসমাগম স্থলে স্থাপিত করা হয়েছে। ইহা বৃহদায়তন এবং সম্পূর্ণ খেতবর্ণের প্রস্তরে নির্মিত।

ব্যাকিংহাম প্যালেস ও ভিক্টোরিয়া মেমোরিয়াল—ব্যাকিংহাম প্যালেস ব্রিটিশ সাম্রাজ্যের রাজপ্রাসাদ। একটি মনোরম উদ্যানের মধ্যে স্থাপিত বিশালায়তন অট্টালিকা। সম্বন্ধের প্রসারিত প্রাক্কনে মহারানী ভিক্টোরিয়ার স্মৃতি স্বরূপ খেত প্রস্তর নির্মিত ভিক্টোরিয়ার মূর্তি অতি জমকালোভাবে স্থাপিত।

মন্ট্রুমেন্ট—লণ্ডন সহর এককালে প্রবল অগ্নিকাণ্ডে ধ্বংসপ্রাপ্ত হয়, বহু লোকজন ও ধন সম্পদ নষ্ট হয়; তারই স্মৃতি স্বরূপ এই মন্ট্রুমেন্ট স্থাপিত। এটি সম্পূর্ণ প্রস্তরে নির্মিত, দুইশত ফিট উচ্চ। লণ্ডনে আরও বহু মন্ট্রুমেন্ট আছে তথাপি কেবলমাত্র ‘মন্ট্রুমেন্ট’ নামে এটিকেই বোঝায়।

অলিম্পিয়া—এখানে সময়ে সময়ে নানা বিষয়ের প্রদর্শনী এবং বৎসরে একবার মাত্র একটি মেলা হয়। এই মেলাটিতে প্রতি বৎসর বহু বহু নুতন আয়োদ উৎসব হইয়া থাকে।

কৃষ্ট্যাল প্যালেস—লোহ ও কাঁচ নির্মিত অতি বিশালায়তন গৃহ। বোলশত ফিট দীর্ঘ। প্রথমে এটি লণ্ডনের একবারকার প্রদর্শনী উপলক্ষে হাইড পার্কে নির্মিত হয়। প্রদর্শনীর অন্তে সেখান থেকে সাত মাইল দূরে সহরের উপপ্রান্তে স্থাপিত হয়েছে। এখানে নানা

উৎসব হয় এবং সপ্তাহে একরাত্রি বাজী পোড়ানো হয়। এই স্বচ্ছ স্ফটিক-গৃহ তখন রমণীয় রূপ ধারণ করে।

গ্রীণউইচ্ অবজারভেটরী—জগদ্বিখ্যাত মানমন্দির। জ্যোতিষ তত্ত্ব সম্বন্ধীয় গবেষণার স্থান। এই স্থানটি শূন্য ডিগ্রী নির্ধারণ করে পৃথিবীকে পূর্ব পশ্চিমে ‘দ্রাঘিমা’ (longitude) কাল্পনিক রেখাঙ্কণ দ্বারা বিভক্ত করা হয়েছে। এই মানমন্দির লণ্ডনের পূর্বাংশে রমণীয় পাহাড়ের উপর স্থাপিত। এখানকার ঘড়ী অহুসারে দেশের সময় নির্ধারিত হয়।

ওয়েষ্ট মিনিষ্টার আবি—বৃটনের সর্বাপেক্ষা প্রসিদ্ধ ভজনালয় বা গীর্জা। এখানে বৃটিশ সাম্রাজ্যের রাজগণের রাজ্যাভিষেক হয়। রাজগণের সমাধিও এইখানে হয়। এটি ৮০০ বৎসরের পুরাতন।

সেন্টপলস ক্যাথিড্রাল—বৃহদায়তন ভজনালয়। ৫১৫ ফিট দীর্ঘ এবং ২৫০ ফিট প্রস্থ। খৃষ্টধর্মের ইতিহাসের বহু বিবরণ এই মন্দিরে স্মৃশ্রুত রূপে অঙ্কিত রয়েছে। প্রাচীন ধার্মিক পুরুষগণের মৃতদেহ ইহার নীচে সমাধিপ্রাপ্ত। ইহার চূড়া গম্বুজাকারে অতি উচ্চ।

ট্রাফালগার স্কোয়ার—লণ্ডনের কেন্দ্রস্থলে অবস্থিত মনোরম পার্ক। মহাবীর নেলসনের স্মৃতিচিহ্ন স্বরূপ একটি বৃহৎ মল্লমেন্ট এখানে স্থাপিত হয়েছে। মল্লমেন্টের চারিদিকে বিরাটকায় চারিটি সিংহমূর্তি। পার্কের মধ্যে দুইটি জলাশয়ে দুইটি স্মৃশ্রুত ফোয়ারা আছে। বিকালে এইস্থানে বহু লোক বেড়াতে আসে ও নানা বিষয়ক বক্তৃতা হয়।

সিংহলের বিবরণ

দেশে ফিরবার পথে ওরিয়েন্ট লাইনের জাহাজে আমি সিংহলের অন্তর্গত কলম্বো বন্দরে এসে নেমেছিলাম এবং আট দিন অবস্থান করে সেখানকার অনেক নূতন বিষয় জ্ঞাত হবার সুযোগ পেয়েছিলাম। * বিলাতের বিবরণ জানবার জন্তে আমাদের দেশীয় লোকের যতটুকু আগ্রহ, সিংহলের বিবরণ জানবার জন্তেও তার চেয়ে কম আগ্রহ হবার কারণ নাই। সুতরাং সে সম্বন্ধে যৎকিঞ্চিৎ বর্ণন এখানে অপ্রাসঙ্গিক হবে না।

রামায়ণের বর্ণিত লঙ্কার বর্তমান নাম সিংহল দ্বীপ। সুতরাং লঙ্কা নামটি স্মরণ হওয়া মাত্রই সেই স্বর্ণলঙ্কা, সেই প্ররল পরাক্রমশালী রাজা দশানন, সেই রাক্ষসপুরী প্রভৃতির কথা মনে পড়ে। কিন্তু পাঠক পাঠিকাগণকে সেই সকল বিষয় জানবার কোতূহল চরিতার্থ করতে অতি অল্পই সমর্থ হব। এখানকার বর্তমান অবস্থা সম্বন্ধে যা দেখেছি শুনেছি তারই কিঞ্চিৎ বর্ণন করব।

ইতিহাসে জানা যায় দু'হাজার বৎসর পূর্বে বাংলার সিংহবাহু রাজার পুত্র বিজয়সিংহ নিজের জাহাজে সৈন্তগণসহ লঙ্কা দ্বীপে উপনীত হয়ে এখানকার অধিবাসীদিগকে বশীভূত করে নিজের নাম অঙ্গসারে এ স্থানের নাম সিংহল রাখেন। প্রাচীন ইতিহাসে বাংলার পক্ষে ইহা একটি গৌরবের বিষয় ছিল। এর দেড় হাজার বৎসর পরে ক্রমে পোর্টুগিজ ও দিনেমারদিগের অধীনে কয়েক শতাব্দী থেকে প্রায়

* ১১০ পৃষ্ঠা জটয়।

একশত বৎসর হ'ল ইহা ইংরেজের অধীন হয়েছে। সিংহল আমাদের কলকাতা থেকে বারোশো মাইল দক্ষিণ-পশ্চিমে অবস্থিত। কলকাতা থেকে জাহাজে কম লোকেই যায়। বর্তমানে রেলপথ সুবিধা। মাদ্রাজ থেকে সেতুবন্ধ রামেশ্বরের নিকটবর্তী ধনুকোট বন্দর পর্য্যন্ত ট্রেনে, পরে জাহাজে সমুদ্র পার হতে হয়।

সিংহল আমাদের বাংলার মতই নদীবৃক্ষপূর্ণ দেশ। কোন কোন স্থান পাহাড় ও জঙ্গলময়। মাম্বুগুলি রামায়ণের বর্ণিত রাক্ষস-প্রকৃতির নয়, ঠিক আমাদের দেশের সাধারণ লোকের মত জ্ঞানবুদ্ধিসম্পন্ন। গায়ের বর্ণ বাঙ্গালী অপেক্ষা দীর্ঘ কালো। এখানে ছ'রকমের ভাষা প্রচলিত—সিংহলী এবং তামিল। ভারতবর্ষের মাদ্রাজ ও তিতুকরিন অঞ্চল থেকে বহু হিন্দু গিয়ে সিংহলে অনেক দিন বসবাস করছে, তারা এখানকার অধিবাসী হয়ে জাঁকজমকের সঙ্গে হিন্দু-পূজা পার্বণাদি করে থাকে।

সিংহলবাসীরা অধিকাংশই বৌদ্ধধর্মাবলম্বী। কয়েক শতাব্দী পর্য্যন্ত ইয়োরোপীয়দিগের অধীনতায় বাস করে অনেকে খৃষ্ট-ধর্মাবলম্বী হইয়া গিয়েছে। এখানকার অধিবাসীদের পরিচ্ছদ অতি সাদাসিদ্দে ধরণের। পুরুষেরা সকলেই লুঙ্গি পরে, গায়ে চাদর বা ঢিলে খাটো জামা। মেয়েদের পরণেও এক প্রকার লুঙ্গি, গায়ে আঁটা-সাঁটা জ্যাকেট। পুরুষদের লুঙ্গির নাম সারেঙ্গা আর মেয়েদের লুঙ্গির নাম ক্যান্সয়। বাংলার পরিচ্ছদ অপেক্ষা সিংহলের পরিচ্ছদ অল্পতর ধরণের হলেও কাজকর্ম করবার পক্ষে ইহা বাংলার পোষাক অপেক্ষা অধিকতর উপযোগী। এখানে আহায়ে জাতিভেদ একেবারেই নাই। অধিবাসীদের মধ্যে বৌদ্ধ ভিন্ন অনেক মুসলমান ও খৃষ্টিয়ান আছে। আহারাদির পৃথক-অপৃথক জ্ঞান কারও নাই, সকলেই সকলের ছোঁয়া অন্ন জল



সিংহলে ভামিনী ব্রথযাত্রা —২২০ পৃষ্ঠা



গ্রহণ করে। ভাত, ডাল রুটি খাদ্যাদি প্রায়ই বাংলার মত, তবে এরা অত্যধিক ঝাল খায়। গুটকী মাছের প্রচলন অত্যন্ত বেশী। গুটকী মাছ চূর্ণ করে এক প্রকার মসলা প্রস্তুত করে খায়। রান্নায় নারকেল তেল, গায়ে মাখতেও নারকেল তেল ব্যবহার করে।

সিংহলের সমুদ্র-তীরবর্তী সমতল ভূমিগুলি নারকেল বৃক্ষে পূর্ণ। অনেক মসলা এখানে উৎপন্ন হয়। বহু হস্তী জঙ্গলে বাস করে। নিম্ন জমিতে ধান এবং উচ্চ পাহাড়ে জমিগুলিতে চা উৎপন্ন হয়ে থাকে। কয়েকটি পার্শ্বত্যা অঞ্চল থেকে মূল্যবান জহরৎ প্রস্তর পাওয়া যায়। ভারতবর্ষ ও সিংহলের মধ্যবর্তী সাম্রাজ্য উপসাগর হতে প্রচুর পরিমাণে মুক্তা পাওয়া যায়। এখানে খনিতে কিছু কিছু স্বর্ণও পাওয়া যায়। রামায়ণে যে একে স্বর্ণলঙ্কা বলা হয়েছে—সে বোধ হয় তখনকার লঙ্কার ঐশ্বর্যের কথা মনে করে।

পঞ্চাশ বৎসর পূর্বে আমাদের দেশ যেমন ইংরেজ রাজত্বের একান্ত পক্ষপাতী ছিল, সিংহলবাসীরাও তদ্রূপ ইংরেজ-ভক্ত ছিল। বর্তমানে এরা বড় বড় সভাসমিতি গঠন করে জাতীয় শক্তি বৃদ্ধি করতে বদ্ধ-পরিকর হয়েছে। এখানে সাধারণ কথাবার্তা বলবার মত ইংরেজী শিক্ষার প্রচলন বাংলা দেশ অপেক্ষাও বেশী।

এখানকার এক শ্রেণীর বৃদ্ধেরা দীর্ঘ কেশ, দীর্ঘ শ্মশ্রুধারী; দেখতে অনেকটা আমাদের দেশের ক্যাপা বাউলদের মত। যুবকদের বেশ মাদ্রাজীদের মত। যদিও এই দেশটি খুব বড় নয়, তথাপি ধনশালী লোকের সংখ্যা বাংলা অপেক্ষা বেশী। বাংলার ছায় বিলাসিতাও সিংহলী যুবকদের মধ্যে দেখা দিয়েছে।

সিংহল ব্রিটিশগবর্ণমেন্টের ক্রাউন-কলোনির অন্তর্গত একটি দ্বীপ। ইহার পরিমাণ ২৫৪৮১ বর্গমাইল। জনসংখ্যা পঞ্চাশ লক্ষ মাত্র।

বাংলার অল্পপাতে শিক্ষিত ধনীর সংখ্যা বেশী। এখানকার টাকা আমাদের দেশের টাকার মূল্যের তুল্য, কিন্তু পরসী অপেক্ষাকৃত ছোট ও কম মূল্যের। পরসীর নাম সেন্ট (cent), একশত সেন্টে এক টাকা হয়। দশ সেন্ট, পঁচিশ সেন্ট, পঞ্চাশ সেন্ট মূল্যের রৌপ্য মুদ্রাগুলি যথাক্রমে আমাদের দেশের রূপার ছদ্মানি সিকি আঙুলির তুল্য। সেন্ট নামক তাহার পরসীগুলির উপর দেশের প্রধান উৎপন্নের চিত্ত্বরূপ নারকেল বৃক্ষ অঙ্কিত।

এখানকার বনে জঙ্গলে দলে দলে হাতী বিচরণ করতে দেখা যায়। কোন কোন স্থানে হিংস্র জন্তু ও সাপের প্রাচুর্য্য আছে।

মহিলাদের রীতি-নীতি যতদূর দেখেছি, তাতে বাংলার সঙ্গে তুলনা করে তাদের উন্নত বলতে পারা যায়। এরা বড় স্বাবলম্বনপ্রিয়। কলম্বোতে মেয়েদের হাতের প্রস্তুত সূক্ষ্মশিল্পের বস্ত্র, লেশ প্রভৃতি দ্রব্য ইংরেজরা অত্যন্ত আদরে কিনে থাকে। মেয়েদের বেশ কৃষ্ণবর্ণ ও সুদীর্ঘ। আমি দু-একটি মেয়ের চুল দণ্ডায়মান অবস্থায় হাঁটুর নীচ পর্য্যন্ত ঝুলে পড়তে দেখেছি। সম্ভবতঃ প্রচুর পরিমাণে বিশুদ্ধ নারকেল তেল ব্যবহারেই সিংহল-মহিলারা দীর্ঘকেশা হয়ে থাকেন।

সিংহলী মেয়েরা অনেকেই লেখাপড়া জানে, নিম্নশ্রেণীর মেয়েরাও লেখাপড়া শিখে থাকে। অনেক বাড়ীতে দাসী বা কী-রা পর্য্যন্ত লেখাপড়া জানে। বাংলার মত নারীর অবরোধ প্রথা এখানে নাই। মেয়েরা লেশবোনা প্রভৃতি কুটির-শিল্প সম্বন্ধীয় অনেক কাজ করে অর্থোপার্জন করে থাকে। সূক্ষ্ম সেলাই, জরির কাজ অনেক সম্ভ্রান্ত মহিলা জানেন। ডুম্বারা ব'লে চমৎকার লতা-ফুলের সূতার কাজ করা এক প্রকার বস্ত্র মেয়েদের দ্বারা প্রস্তুত হয়ে থাকে। মেয়েরা খড়ের প্রস্তুত টুপী বড় সুন্দর করে থাকে। কলম্বোতে একটি স্ত্রীলোকের

নিজের হাতের তৈরী চমৎকার লেশ কিনেছিলাম, তারই ফটো এই বইয়ে দেওয়া গেল।

নারকেল তেল বিদেশে রপ্তানী করে সিংহলবাসীরা অনেকেই বহু অর্থশালী হয়েছে। এই সমস্ত কার্যে নারীরাই বেশী সাহায্য করে থাকে। তৈল প্রস্তুত ব্যতীত নারকেল সম্বন্ধীয় আরও অনেক কাজ আছে, তাও মেয়েরা করে।

প্রতি পূর্ণিমা দিবসে বৌদ্ধ মহিলারা ‘পানশিল’ বলে এক প্রকার ব্রত করে থাকেন। তাঁরা ঐ দিন পবিত্র শুল বস্ত্র পরিধান করেন এবং সমস্ত দিবস উপবাস থেকে বুদ্ধের ধ্যান করে থাকেন। বৌদ্ধনারী অনেকেই জীবিত মাছ মারেন না, ডিম ভাঙেন না।

সিংহলের ইংরাজী নাম সিলোন, রাজধানীর নাম কলম্বো; কলম্বো একটি উল্লেখযোগ্য সামুদ্রিক বন্দর। ইংরেজের তত্ত্বাবধানে কলম্বো বন্দরটি অতি রমণীয়রূপে গড়ে উঠেছে। বহু দেশ-বিদেশের জাহাজ কলম্বো বন্দরে এসে থাকে।

কলম্বো সহরটি পৃথিবীর বড় বড় সহরের মত সুন্দর ভাবে গঠিত। এখানে বহু ইয়োরোপীয় ব্যবসায়ীর সুসজ্জিত দোকান আছে। সহরটি অতি পরিষ্কার পরিচ্ছন্ন। গতিবিধির জ্ঞান ট্রামওয়ে আছে। সহরটিতে এতই বিভিন্ন দেশীয় লোকের গতিবিধি যে, এখানকার রিক্সাওয়ালারা অনেকে ইয়োরোপের তিন-চারটি ভাষা এবং ভারত-বর্ষের তিন-চারটি ভাষার কথা বলতে পারে। কলম্বো সহরে অনেক ভাল ভাল মণিমুক্তার দোকান আছে। ঐ সমস্ত জিনিস আমাদের দেশে আনতে Custom-duty অর্থাৎ বাণিজ্য-শুল্ক দিতে হয়। আমি আমাদের ইকনমিক জুয়েলারীর ওয়ার্কসের জ্ঞান ঐ সকল মণিকারদের কয়েকটি কারখানার সঙ্গে যোগাযোগের ব্যবস্থা করে এসেছি।

কলম্বো সমুদ্রতীরটি বড়ই সুন্দর ; যেমন প্রাকৃতিক সৌন্দর্য্য, তেমনই আবার ইংরেজের তৈরী কৃত্রিম সৌন্দর্য্যের প্রভাব। ইম্বোরোপের অনেক সৌন্দর্য্যময় সমুদ্রতীরবর্তী বন্দরের সঙ্গে তুলনায় এর সৌন্দর্য্য কম নয়। এখানকার সিনামন-গার্ডেন উল্লেখযোগ্য দর্শনীয়। সিনামন গার্ডেনএর মানে দারুচিনির উদ্যান হলেও উদ্যানটি নানা জাতীয় বৃক্ষে পূর্ণ। এই সিনামন-গার্ডেনের অন্তর্গত ভিক্টোরিয়া পার্কের মত নানা জাতীয় সুদৃশ্য বৃক্ষাদি পূর্ণ উদ্যান নাকি সমগ্র এসিয়া ভূখণ্ডে আর নাই।

দারুচিনি, বৃক্ষের ছালমাত্র। উদ্যানের দারুচিনি বৃক্ষগুলি বহু পুরাতন হয়ে যাওয়ার উহার ছালে বিশেষ সুগন্ধ থাকে না। আমরা যে দারুচিনি ব্যবহার করি, ওখানে উহার পৃথক আবাদ আছে। গাছ পাঁচ-ছয় ফিট দীর্ঘ হলেই তার গা থেকে ছাল বের করা হয়। সিংহলের বহু পল্লীতে দারুচিনির বাগান আছে।

কলম্বো মিউজিয়মে যে সকল প্রাচীনকালের প্রস্তরমূর্ত্তি আছে, তন্মধ্যে আমাদের হিন্দু দেবতা গণেশ-মূর্ত্তি দেখেছি, এতে মনে হয় রামায়ণের যুগের পর হতে সিংহলে শক্তিপূজক হিন্দুদের রাজ্য ছিল ; মহারাজ অশোকের পর হতে তৎপুত্র মহেন্দ্র কর্তৃক বৌদ্ধধর্ম প্রচারিত হয়।

কাণ্ডী সিংহলের একটি বিশেষ দর্শনীয় স্থান। এই সহরটি সিংহলের মধ্যবর্তী স্থানে অবস্থিত ; ইহা পরম রমণীয় পর্কতমালায় পূর্ণ। হিন্দু ও বৌদ্ধরাজ্যে ইহা সিংহলের রাজধানী ছিল। বহু বিদেশী পর্য্যটক এই স্থানটি দর্শন করতে এলে থাকেন। কাণ্ডীতে বুদ্ধদেবের বিখ্যাত মন্দির অবস্থিত। শঙ্করাচার্য্যের সময় হতে ভারতে ব্রাহ্মণ কর্তৃক বৌদ্ধদের উপর উৎপীড়ন আরম্ভ হয় এই সময় বহু বুদ্ধ-ভক্ত

ভারতের বাইরে সিংহল, ব্রহ্মদেশ প্রভৃতি স্থানে পলায়ন করেন। শ্রাবস্তীর রাজকন্যা হেমমালা বুদ্বের পরম ভক্ত ছিলেন। ব্রাহ্মণগণ কর্তৃক তাঁর উপর উৎপীড়ন আরম্ভ হলে তিনি বুদ্বের একটি দস্ত্র স্বীয় কবরী মধ্যে লুকিয়ে সিংহলে পলায়ন করেন। বুদ্বের এই দস্ত্র কাণ্ডীর মন্দিরে সযত্নে সুবর্ণ-পাত্রে রক্ষিত আছে; এজন্ত এই মন্দিরটির নাম দস্ত্রমন্দির। এই দস্ত্রমন্দিরটি সিংহলের স্থাপত্য বিচার চমৎকার নিদর্শন। কাণ্ডীর দস্ত্রমন্দিরের নাম সভ্য জগতের সর্বত্র পরিজ্ঞাত। কলম্বো অপেক্ষা কাণ্ডীর উচ্চতা কম বলে বহু ইংরেজ এখানে বাস করেন। অনেক বিদেশী লোক এই স্থানটি দর্শন করতে এসে থাকেন।

অমুরাধাপুরা নামক স্থানটি দেড় সহস্র বৎসর পূর্বে সিংহলের রাজধানী ছিল। বর্তমানে তার বহু ধ্বংসাবশেষ ও উৎকৃষ্ট বৌদ্ধ মন্দিরাদির নিদর্শন রয়েছে।

অনেক পণ্ডিতের মতে নিউরাইলিয়া নামক পর্বতময় স্থানটিতে রাবণের রাজধানী ছিল। ইহা বর্তমান রাজধানী কলম্বো থেকে ১৩৫ মাইল পূর্বে। স্থানটি পরম রমণীয়। বর্তমানে এই স্থানটিতেই সিংহলের গবর্ণরের গ্ৰীষ্মাবাস অবস্থিত। এখানে সীতাগিরি নামে একটি পর্বত আছে, তারই নিকটে নাকি অশোক বন ছিল, এইখানেই নাকি জনক-নন্দিনী সীতা বন্দিনী ছিলেন। সীতাগিরি পর্বতের নিম্নে এখনও অশোক বৃক্ষশ্রেণী দেখতে পাওয়া যায়। রক্তবর্ণ পুষ্পশোভিত অশোক বৃক্ষশ্রেণী দেখলে ত্রেতাযুগের রামায়ণের বর্ণিত অশোক বন মনে পড়ে। পাঠক পাঠিকাগণকে একটি কৌতূহলের সংবাদ শুनाव—নিকটেই একটি বিস্তীর্ণ স্থান রয়েছে, ঐ স্থানে বহুদূর পর্য্যন্ত কোন বৃক্ষাদি জন্মে না। কিংবদন্তী আছে যে, ঐ স্থানটি হনুমান কর্তৃক দগ্ধ হয়েছিল। এরূপ কিংবদন্তীর মূল্য কি তা রামায়ণের ভক্তরাই বলতে পারেন। সীতা-

গিরিতে একটা ঝরণা আছে, কথিত আছে সীতাদেবী এই জল পান করতেন।

রামায়ণের যুগের বিশেষ নিদর্শন সিংহলদ্বীপে এই দেখতে পাওয়া যায় যে, যেখানে যেখানে বৌদ্ধ মন্দির নির্মিত হয়েছে তার নিকটেই দুর্গা মন্দির রয়েছে। এই দুর্গামন্দিরগুলি নাকি বিভীষণ কর্তৃক স্থাপিত হয়েছিল। তারই নিকটে পরবর্তী যুগে বৌদ্ধমন্দির নির্মিত হয়েছে। ঐশ্বর্য্যগৌরব সমন্বিত ‘রক্ষোপুরী’ বিনাশের হেতুস্বরূপ বিভীষণের উপর লঙ্কাবাসীরা এখনও বীতশ্রদ্ধ।

সিংহল বা লঙ্কার বিষয় লিখতে গিয়ে যদি আমি রামায়ণ বর্ণিত রাক্ষসের কিঞ্চিৎ বর্ণন না করি তবে বিষয়টি অসম্পূর্ণ হবে। সিংহলের অনেক পর্ব্বতময় জঙ্গলে এখনও এক প্রকার অসভ্য জাতি দেখা যায়, এদের চক্ষু রক্তবর্ণ, মস্তকের কেশ কুঞ্চিত, গঠন কিঞ্চিৎ খর্ব্বাকৃতি। সম্ভবতঃ এরাই রামায়ণের বর্ণিত রাক্ষসবংশ। এই জাতীয় লোক অতি অল্পই দেখতে পাওয়া যায়। বর্তমানের অধিকাংশ সিংহলবাসীই ভারতের নানাস্থান থেকে এখানে এসে বহুকাল হতে বসবাস করছে।

ভারতবর্ষ হতে সিংহলের অবস্থা অনেক বিভিন্ন ধরনের। আচার ব্যবহার রীতিনীতিতেও অনেক বৈষম্য লক্ষিত হয়। এই ভাবের বিভিন্ন দেশের অবস্থাগুলি জ্ঞাত হওয়ায় যে আমাদের কেবলমাত্র কোতূহল চরিতার্থ হয় তা নয়—এতে মনের প্রসারতাও বৃদ্ধি পায়।

বিদেশ যাত্রীর জ্ঞাতব্য *

আমি আমার গরীবয়ানা ভ্রমণের মধ্য দিয়ে বিদেশ ভ্রমণকারীর জ্ঞাতব্য সম্বন্ধে যা যা আবশ্যক মনে করেছি সংক্ষেপে তার কিছু কিছু এখানে উল্লেখ করব—

ভারত সাম্রাজ্যের বাইরে যে কোন স্থানে যেতে ভারত গবর্ণমেন্টের অফিস থেকে পাসপোর্ট (অনুমতি পত্র বা নিদর্শন পত্র) নিতে হয়। অন্ততঃ এক মাস আগে থেকে তার ব্যবস্থা করা আবশ্যক। কলকাতা রাইটাস' বিল্ডিংস্‌এ পাসপোর্ট আপিস আছে। বন্ধদেশ, মায় সিঙ্গাপুর পর্যন্ত যেতে পাসপোর্ট আবশ্যক হয় না।

কয়েকটি কোম্পানী আছে, তারা ভ্রমণকারীদের পৃথিবীর নানাস্থানে ভ্রমণের সুব্যবস্থা করে দেয়; তথাপি নিজের বন্দোবস্তে যাওয়াই ভাল। ঐ সব কোম্পানীর মধ্যে American Express Company এবং Thomas Cook & Son এর কাজ খুব প্রসারিত। এদের অফিস ও ব্যাঙ্ক সমগ্র পৃথিবীর বড় বড় সহরে আছে।

বোস্বাইএ টমাস কুক এণ্ড সন এর অফিস থেকে Oriental Traveller's Gazette নামে একখানা ইংরেজী মাসিক পত্রিকা বের হয়। বড়লোকদের বিদেশ ভ্রমণের অনেক সংবাদ তাতে থাকে। চারি আনার ডাক টিকেট পাঠালে একখানা পাওয়া যায়।

কলকাতা থেকে লণ্ডন জাহাজ-ভাড়া সিটি লাইনে খোরাক সমেত দ্বিতীয় শ্রেণীতে ৪৫ পাউণ্ড অর্থাৎ প্রায় ছয় শত টাকা এবং দুই

* ১৯৩১ খৃষ্টাব্দে আমার ২য় বার সমগ্র ইয়োরোপ ভ্রমণের অভিজ্ঞতা হইতে দ্বিতীয় সংস্করণে এই অংশ পরিবর্তিত হইল।



ভ্রমণ-পথে গ্রন্থকার

ব্যবস্থা ভারতীয় ২য় শ্রেণীর মত। ইয়োরোপের রেলপথের দৃশ্যে প্রচুর নূতনত্ব উপভোগ করবার আছে।

বিদেশে টাকাকড়ির ব্যবহার সম্বন্ধে ব্যাঙ্কের সহিত যোগ রাখা আবশ্যক। খরচের জন্ত সামান্য পরিমাণ টাকা সঙ্গে রেখে বাকী টাকা ব্যাঙ্কে জমা দিয়ে তা থেকে আবার কিছু টাকার Letter of Credit বা 'Travellers' Cheque' কিনে নেওয়া বিশেষ সুবিধাজনক। এতে টাকা হারিয়ে যাবার বা চুরি হবার কোন আশঙ্কা থাকে না। অথচ সব বড় বড় সহরের বিভিন্ন ব্যাঙ্ক থেকেও টাকা নেওয়া চলে।

ইয়োরোপের যে কোন স্থানে হোটেল খরচ নতুন যাত্রীর পক্ষে দৈনিক আহার সমেত সাত আট টাকার কম নয়। স্থায়ীভাবে কয়েক মাসের জন্তে ঘর নিয়ে রাস্তা করে খেলে মাসিক ১৫০ টাকায় চলে।

স্ত্রীকথাদি পরিজন সঙ্গে নিয়ে বিদেশ ভ্রমণে বেশী কিছু অসুবিধার কারণ নেই তবে খরচ অবশ্য কিছু বেশী হয়। কোন কোন জাহাজ লাইনে ভদ্র মহিলাদের জন্ত ৩য় শ্রেণীতে স্থান নাই কিন্তু ইয়োরোপের সমস্ত ট্রেনেই ৩য় শ্রেণীতে ভদ্রমহিলারা গতিবিধি করেন। স্ত্রীলোক সঙ্গে থাকলে ভাল হোটেলে স্থান লওয়া কঠিন।

এশিয়া খণ্ডের প্রায় সর্বত্রই চাউলের ভাত পাওয়া যায় কিন্তু ইয়োরোপে ভাত পাওয়া দুর্ঘট। ইয়োরোপে porridge (গুট বা ঘব সিদ্ধ) অনেক স্থলে খায়, পরিজ্ঞ অনেকটা ভাতের অভাব পূরণ করে।

• ভারতের বাহিরে বাঙ্গালীর পোষাক একেবারেই অব্যবহার্য। বিশেষতঃ ইয়োরোপে ইয়োরোপীয় পোষাক ভিন্ন গতি নাই, তবে টুপীর স্থলে পাগড়ী চালানো যেতে পারে। মোট দুই প্রস্ত স্ট্রট আর একটি ওভার কোট একান্ত আবশ্যক।

ভ্রমণকারীর পক্ষে যথাসম্ভব কম জিনিষপত্র সঙ্গে নেওয়া সুবিধা

জনক, বিলাতে মাত্র সূটকেশ একটা সঙ্গে নিয়েই সর্বত্র ভ্রমণ চলে। বিছানা, ঘাট বাটি সঙ্গে নেওয়া আবশ্যক করে না, আবশ্যক ব্যবহার্য দ্রব্যাদি হোটেলে পাওয়া যায়। একটা কম্বল সঙ্গে রাখা ভাল।

ঘড়ি, নোট বই, কাগজ, পেন্সিল, Personal visiting card বা Business card সঙ্গে রাখা দরকার। নোট বইএ গন্তব্য স্থানের আবশ্যক ঠিকানা, টেলিফোন নম্বর প্রভৃতি টোকা থাকা ভাল। সূচ-সূতা, সেকটিপিন, বোতাম, দেশলাই, ছোট মোমবাতি, সাবান, অতিরিক্ত রুমাল, ডাক টিকেট, পোষ্টকার্ড, Fountain pen, ছোট দূরবীক্ষণ, পকেট ক্যামেরা সঙ্গে থাকলে অনেক সময় কাজে লাগে।

লেবু, কমলালেবু, আমসহ, আচার, ছুগ্ধ, গরম জল, সোডা ওয়াটার, লেমনেড, Fruit salt, হরীতকী, আমলকী এই সব জিনিষ অবস্থা ভেদে পথক্লান্তি নিবারক; জাহাজে Sea-sicknessএর পক্ষে যে কোন লেবু অতি উপকারী।

বিদেশের শারীরিক অনাচারে পিত্ত বৃদ্ধি হয়, এর জন্ত মাঝে মাঝে নিমপাতা, চিরেতা, কোয়াসিয়া প্রভৃতির জল খাওয়া উচিত; একটুকু কুইনাইন সঙ্গে রাখা ভাল।

জাহাজে ডেক-চেয়ার ভাড়া পাওয়া যায়, জাহাজে উঠে প্রথমেই একখানা ডেক-চেয়ার লওয়া আবশ্যক। সারাদিন ক্যাবিনে ভাল লাগে না, সকালে বিকালে ডেকে বসে বড়ই আরাম পাওয়া যায়, বিশুদ্ধ সমুদ্র বায়ু স্বাস্থ্যের পক্ষে বিশেষ অমূল্য। মূল্যবান জিনিসপত্র বা বেশী টাকাকড়ি জাহাজে purserএর কাছে রাখা চলে।

একটা ভিন্ন দেশে প্রবেশ করবার আগেই সেই দেশের প্রচলিত টাকা কিছু সঙ্গে নেওয়া আবশ্যক। বড় বড় ষ্টেশনে বা ব্যাঙ্কে ভিন্ন ভিন্ন দেশের টাকা বিনিময় করা যায়।

প্রত্যেক নতুন যায়গায় গিয়ে সেখানকার ছোট মানচিত্র ও গাইড বই পাওয়া সম্ভব হলে সঙ্গে রাখা গতিবিধির পক্ষে অত্যন্ত সুবিধাজনক।

ছ-এক দিনের মধ্যে একটা বড় সহরের দেখবার বিষয়গুলি দেখে নেবার জন্তে সেখানকার একজন গাইড সঙ্গে নেওয়া উচিত। ষ্টেশনের গাইডেরা প্রায় সকলেই নানা ভাষায় কথা বলতে জানে।

ব্যবসার কার্য্য প্রভৃতির সুবিধার জন্তে অনেক সময় Interpreter অর্থাৎ দোভাষী আবশ্যক হয়। উপযুক্ত অর্থ দিলে ইন্টারপ্রিটার পাওয়া যায়। বড় বড় হোটেলের কার্য্যকারকেরা অনেকে বিভিন্ন ভাষা জানে, এজন্ত হোটেলে বাস করতে প্রথমে জেনে নেওয়া দরকার ইংরাজী জানা লোক তাদের আছে কিনা।

এক দেশ থেকে অন্য় দেশে প্রবেশ করতে বাতীর সেই দেশে প্রবেশের অধিকার আছে কিনা তার জন্তে পাসপোর্ট পরীক্ষা করা হয় এবং কাষ্টম আফিসের ইনস্পেক্টরগণ কর্তৃক সঙ্গে সমুদয় দ্রব্যাদি পরীক্ষা করা হয়। ডিউটী দিবার মত জিনিস সঙ্গে থাকলে ডিউটী আদায় করে এবং নিষিদ্ধ দ্রব্য সঙ্গে থাকলে আইন অনুযায়ী অনুবিধায় পড়ার কারণ হতে পারে। ট্রেনে সীমান্ত পার হবার সময় সমস্ত জিনিস-পত্র নিজের সঙ্গে থাকা একান্ত প্রয়োজন, নতুবা জিনিস-পত্র সেখানকার কাষ্টম আফিসে আটক পড়ে থাকতে পারে।

• ব্যবসায় বাণিজ্যের জন্ত বিদেশ যাত্রা করতে প্রথমে নিজের বাণিজ্য দ্রব্যের কাষ্টম ডিউটী, জিনিসের ভাড়ার হার প্রভৃতি জ্ঞাত থাকা প্রয়োজন। বিক্রয়ের মাল-পত্র বিদেশে চালান দিলে তার চালান-পত্র এবং কোথাকার কোন ফারম থেকে জিনিস কেনা হয়েছে, তার সেই সেই ফারমের বিল প্রভৃতি নিদর্শন পত্র সঙ্গে থাকা অতি প্রয়োজন।

ঐ সকল চালান পত্রের লিখিত মূল্যের হিসাব অল্পমাত্রী কাষ্টম ডিউটী দিতে হয়।

যদিও ভারতের বাহিরে সর্বত্র মেঘে পুরুষে অবাধ গতিবিধির নিয়ম আছে তথাপি আমার মতে কোন নতুন দেশে গিয়ে সে দেশের স্ত্রীলোকদের সঙ্গে অতি সাবধানে গতি-বিধি করাই ভাল।

চিঠিপত্রাদির জগ্রে নির্দ্ধারিত ঠিকানা না থাকলে স্থানীয় পোষ্ট মাষ্টার বা হোটেলের মারফৎ অথবা নিজের ব্যাঙ্কের মারফৎ দিয়ে চিঠির ঠিকানা ব্যবহার করা যেতে পারে। সময় মত সেখানে উপস্থিত না থাকলে ঐসব স্থানের ম্যানেজারকে লিখে নিজের ঠিকানা জানতে হয়।

বিদেশে চাল-চলন খাটো করে খুব কম খরচে চলেও শেষে দেখা যায়, হিসাবের বেশী খরচ হয়ে গিয়েছে, এ জন্ম খরচ আগাগোড়াই খুব হিসাবের সঙ্গে করতে হয়।

আহার্য্য দ্রব্যের বাদ-বিচার যত কম করা যায় ততই সুবিধা। ছুৎমার্গ রক্ষা করা অনেক স্থলেই অসম্ভব। আচার বিচারের গোঁড়ামী, প্রাচীন রীতিনীতির গোঁড়ামী যত পরিত্যাগ করা যায় ততই সুবিধা।

পথকষ্ট ও নানা অসুবিধা অবশ্যস্বাবী, সেগুলিকে দুঃখ কষ্ট বলে মনে না করে নতুন রকমের উপভোগ বলে মনকে প্রবোধ দেওয়াই বুদ্ধিমানের কাজ।

বিভিন্ন দেশের ধর্ম ও রীতিনীতিকে সমর্থন করে সেই সেই দেশ-বাসীর সঙ্গে গতিবিধি করা কর্তব্য। এতে ঐ ঐ দেশবাসীদের সঙ্গে সহজে সখ্যতা স্থাপিত হয়।

জানবার বিষয় প্রাণখুলে স্থানীয় লোকদের নিকট জিজ্ঞাসা করে নিতে হবে। এর জন্ম লজ্জা বা সঙ্কোচভাব মন থেকে দূর করতে

হবে। নিজের অজ্ঞতাটুকু সাবধানে ঢাকা চাপা দিয়ে চলবার দরকার নেই। সরল ভাবে নানা বিষয়ক জিজ্ঞাসা জ্ঞানলাভের সোপান।

পথ চলতে অপরিচিত লোকের সঙ্গে খুব বেশী আলাপ পরিচয়াদি করা চাই, গন্তব্য স্থানের সম্বন্ধে অনেক কিছু শুনে নেওয়া চাই। ট্রেনে বা জাহাজে বই পড়ার চেয়ে বিভিন্ন লোকের সঙ্গে গল্প করে পরস্পরেরই লাভ আছে। গায়ে প'ড়ে লোকের সঙ্গে আলাপ পরিচয় করে নিতে হয়।

ছোট ছেলে মেয়েদের সঙ্গে গল্প করবার সুযোগ গ্রহণ করা চাই, তাতে আনন্দ আছে, আর তা ছাড়া এমন কিছু তাদের কাছে শেখা যায় যা প্রবীণদের কাছে আশা করা যায় না।

দু' তিন জন বন্ধুবান্ধব মিলে একত্র ভ্রমণের চেয়ে একাকী ভ্রমণে অনেক স্থলে বেশী অভিজ্ঞতা লাভ হয়। সর্বদা বিনম্রী হলে একাকী ভ্রমণের অসুবিধা লাঘব হয়।

বিদেশ যাত্রার আগেই যত ভয় ভাবনা, বের হলে আর তত কিছু ভয় ভাবনার কারণ থাকে না। প্রথম প্রথম কিছু অসুবিধা হতে পারে কিন্তু দিনে দিনে সব অসুবিধাই কেটে যায়।

সমস্ত দেশেই শিক্ষিত সমাজে ইংরেজী জানা লোক আছে, এ জন্ত সামান্য ইংরেজী জানা থাকলেই বিদেশে স্বচ্ছন্দে গতিবিধি করা যায়।

• ইয়োরোপের প্রত্যেক দেশের প্রত্যেক নগরে এমন বহু শিক্ষালয় আছে যেখানে যে কোন ব্যক্তি তিন মাসের চেষ্টায় যে কোন একটা নতুন ভাষায় কথা বলা শিখতে পারে।

সমস্ত দেশেই অল্পাধিক সংখ্যক স্বদেশী লোক মেলে, দূর দেশে স্বদেশী লোকের নিকট অনেক সহায়তা আশা করা যায়।

যিনি নির্ভীক, নিরভিমান, কষ্ট সহিষ্ণু, স্থিরচিত্ত তিনিই বিদেশ ভ্রমণের যোগ্য ব্যক্তি ।

যে কোন উদ্দেশ্যেই বিদেশ যাত্রা করা হক না কেন তার সঙ্গে লক্ষ্য থাকা চাই—অভিজ্ঞতা লাভ করা, ভূগোলদর্শন দ্বারা মনের সঙ্কীর্ণতা দূর করা, বিদেশের ভাল ভাল রীতিনীতিগুলি নিজ দেশে প্রবর্তনের চেষ্টা করা, বিদেশের উৎপন্ন কৃষি শিল্পাদি স্বদেশে উৎপাদনের চেষ্টা পাওয়া, নিজ দেশজাত শিল্প বাণিজ্যের দ্রব্য দ্বারা বিদেশ বাণিজ্যের প্রসার করা, বিদেশের সঙ্গে নিজ দেশের সম্বন্ধ বৃদ্ধি করা, বিদেশের উপর নিজ দেশের প্রভাব বিস্তার করা ।

পরিশেষে আমার কথা এই যে, জানাঘেষা হয়ে, অনুসন্ধিৎসু হয়ে, শিক্ষার্থী হয়ে ভ্রমণ করলেই বিদেশ ভ্রমণ বেশী সার্থক হয় ।

জীবন-কথা

[‘বিলাত ভ্রমণ’—দ্বিতীয় সংস্করণে লিখিত]

জীবন-কথা লিখিবার প্রয়োজন ছিল না,—তাহা লিখিও নাই। যে স্বতন্ত্র ধারায় আমার জীবন গঠিত, বিশেষতঃ যে স্বাতন্ত্র্যের কিছু কিছু এই গ্রন্থখানিতে ফুটিয়াছে, অতীত জীবনের তেমন দুই-একটি কথাই লিখিলাম।

১৮৮২ খৃষ্টাব্দে যশোহর জেলার নবগঙ্গা তীরে বাটাগোড় গ্রামে আমার জন্ম। আমার তিন বৎসর বয়সের একটি কথা লইয়া বয়সের হইলেও লোকে আমাকে তামাসা করিত। আমি নাকি বলিয়াছিলাম, “আমি যদি নারকেল গাছের মত বড় হ’তে পারি আর সুপারি গাছের মত একখানা লাঠি ঘাড়ে নিতে পারি তবে তোমরা কি কেউ আমার সঙ্গে পার?”

সাত বৎসর বয়সের সময় পিসীমা একদিন আমাকে নদীর ওপারে নহাটা বাজারে গিয়া লবণ কিনিয়া আনিতে চারিটি পয়সা দিয়াছিলেন। আমি সেখানে গিয়া দেখিলাম, ঘাটে যাত্রী-ষ্টমার ভিড়িয়াছে; কোন ভাবনা চিন্তা না করিয়াই সেই চারিটি পয়সা দিয়া পরবর্তী স্টেশনের জন্য একখানি টিকিট কিনিলাম। জীবনে প্রথম ষ্টমারে ভ্রমণ এতই আনন্দের লাগিয়াছিল যে, চারি মাইল হাঁটিয়া সন্ধ্যায় বাড়ী পৌঁছা এবং পিসীমার নিকট গালি খাওয়া বিশেষ কিছু বলিয়া মনে করি নাই।

গ্রামের কেদার চক্রবর্তী গয়া কান্দী ঘুরিয়া আসিয়াছিল। বুক ফুলাইয়া পাড়ার লোকদের কাছে বর্জমানের গোলাপবাগ, পাঞ্জাব মেল, লুপ লাইন, মোগলসরাই, বেগীমাথবের ধ্বজা—কতই কি না বর্ণনা করিত। আমি লোলুপ দৃষ্টিতে তাহার মুখের দিকে চাহিয়া ভাবিতাম, কি ভাগ্যবান মানুষ! লালবিহারী সাধু পঁচিশ টাকা সম্বল করিয়া মথুরা বন্দাবন ছয়মাস কাটাইয়া কতই দেখিয়া শুনিয়া আসিল,—বন্দাবনে যমুনাতীরে বালির চড়ার উপর ওইয়া কেমন করিয়া রাত্রি কাটাইত, গামছায় বালি বাঁধিয়া কেমন আরাগের বালিশ গড়িয়া শিয়রে দিত—আমি প্রাণ ভরিয়া তাহার মুখে শুনিতাম। আগরার তাজমহল স্বচক্ষে দেখিয়াছে, শুনিয়া অবাক হইতাম; ভাবিতাম—“কবে হান নয়নে হেরিব বন্দাবন।”

আমার জ্যেষ্ঠ সহোদরের হাতে আমি মাহুৰ হইয়াছি। তিনি ফরিদপুর জেলার

গোপালগঞ্জ খৃষ্টীয় মিশন পরিচালিত ইংরাজী স্কুলের প্রধান শিক্ষক ছিলেন। দশ বৎসর বয়সে তাঁহার সহিত গোপালগঞ্জ গিয়া স্কুলে ভর্তি হই। ইহাই আমার প্রথম বিদেশ যাত্রা। তখন স্কুলের সেক্রেটারী রেভারেন্ড, মথুরানাথ বসু বিলাত ঘুরিয়া আসিয়াছেন। তাঁহার মুখে বিলাতের অনেক ভাল ভাল কথা শুনিলাম। আমিও বড় হইলে যেন বিলাত যাইতে পারি—এ সম্বন্ধে দাদা আমাকে উৎসাহ দিতেন; যদিও টাকাকড়ি তেমন কিছুই ছিল না, তথাপি তিনি ইহা অসম্ভব মনে করিতেন না।

শিক্ষকতা কার্যে দাদা যে বেতন পাইতেন তাহাতে আমাদের পরিবারস্থ সাত আট জন লোকে অতি কষ্টে দিনপাত হইত বলিয়া ঐ সঙ্গেই তিনি একটু ব্যবসা-বাণিজ্যের দিকে মন দিলেন। তাঁহাকে প্রথম ব্যবসায় কার্যে হস্তক্ষেপ করিতে দেখিলাম—দিয়াশলাই বিক্রয়। তখন বাংলার সর্বপ্রথম ম্যাচ-ফ্যাক্টরী হয় কলিকাতার নিকট সালিখা গ্রামে। তিনি সেখান হইতে কয়েক গ্রোস্ দিয়াশলাই আনিয়া বিক্রয় আরম্ভ করিলেন। স্বদেশী ম্যাচ, জলিত, কিন্তু কাঠিতে আগুন ধরিত না। গ্রাহকেরা অভিযোগ জানাইলে তিনি একটু কেরোসিনে ডুবাইয়া আলাইতে পরামর্শ দিতেন। গ্রাহকদের ভরসা দিতেন—“শীঘ্রই দেশে ভাল ম্যাচ, জন্মিবে।” বিভাগলের শিক্ষক হইয়াও তাঁতের মোটা কাপড় পরিতেন বলিয়া আমি মনে মনে লজ্জিত হইতাম। ইহার কয়েক বৎসর পরে বাংলায় স্বদেশী আন্দোলন আরম্ভ হয়। তখন তাঁহাকে চিনিবার কিঞ্চিৎ সুযোগ পাইয়াছিলাম।

কিছু বেশী বেতনের ব্যবস্থা হওয়ায় দাদা মেদিনীপুর জেলায় রাজবাড়ীতে রাজপুত্রগণের গৃহশিক্ষক হইয়া চলিয়া গেলেন। আমি বাড়ীর নিকটবর্তী বিভাগলয় হইতে ছাত্রবৃত্তি পাশ করিলাম। কিন্তু অর্থাভাবে কোন উচ্চ-ইংরাজী বিভাগলয়ে ভর্তি হইবার সুযোগ না পাইয়া পূর্ববঙ্গে ঝালকাঠি বন্দরে গিয়া ঢাকাই স্বর্ণকারদের দোকানে কাজ শিখিতে নিযুক্ত হইলাম। ভবিষ্যৎ আশা—তিন চারি বৎসর শিক্ষা করিয়া ভাল কারিকর হইতে পারিলে কুড়ি পঁচিশ টাকা বেতন পাওয়া যাইবে। সকাল বিকাল ঘণ্টা পাঁচেক কাজ শিখিতাম, বাকী সময় কয়লা ধোয়া, রান্না করা প্রভৃতি তাহাদের বাজে কাজগুলি করিতে হইত। বাংলার শিল্পীগণের একটা ধারা এই যে, তাহারা শিল্প শিক্ষার বিশেষ বিশেষ অংশ অপরের নিকট গোপন রাখেন। আড়াই বৎসর পরে দেখিলাম, রন্ধনে যেমন পরিপক হইয়াছি, অলঙ্কার প্রস্তুত কার্যে তেমন হই নাই।

মনে বড়ই দুঃখ হইল। শিক্ষানবিশি ছাড়িয়া কলিকাতা গিয়া হালুয়া-পুরী ফেরী

করিয়া বিক্রয় করিতে আরম্ভ করিলাম। সকাল বেলা সিটি-কলেজের প্রাঙ্গণে গিয়া বসিতাম। ছাত্রেরা অনেকে আমার গ্রাহক ছিলেন। তখন ঐ কলেজ ছিল কলেজ স্কয়ারের দক্ষিণে। বিকালে ‘গোলাপী রেউড়ী’ বেচিতাম। গোলাপী রেউড়ী অর্থাৎ উপরে তিল মাখানো চিনির চাকুতি। এই দুই রকম জিনিসই আমি হিন্দুস্থানীদের কাছে বিক্রিতাম। আমি ঠিক হিন্দুস্থানীদের মতই ‘হালুয়া পুরী—গরম’ ‘গোলাপী রেউড়ী—কড়াচ্ছেদার’ বলিয়া জোরে হাঁক ছাড়িতে পারিতাম। এইরূপে আমি কলিকাতা সহরের পথ-বাট সর্বত্র ভালরূপে চিনিয়া লইতে পারিয়াছিলাম। রেল ষ্টিমারের মাঙ্গুল দেড় টাকা বাঁচাইয়া কখন কখন একশত মাইল পথ হাঁটিয়া বাড়ী যাইতাম।

এই সময়ে কলিকাতায় প্রথম জার্মান-সিলভারের আমদানী হয়। দাদার পরামর্শে আমরা জার্মান-সিলভারের তার, পাত লইয়া দেশীয় অলঙ্কার প্রস্তুত আরম্ভ করিলাম। অল্পদিনেই আমাদের কাজ বাড়িয়া গেল। অনেক কারিকর রাখিলাম, আমার অলঙ্কার প্রস্তুতের সামান্য জ্ঞানটুকু এবার কাজে লাগিল। কলিকাতায় সিন্দুরিয়া গাটিতে পাইকারী বিক্রয় করিতাম। মাঝে মাঝে নবাবীপ, শান্তিপুর, গঙ্গানাগর, সাঁতের (ফরিদপুরে) প্রভৃতি বড় বড় বাৎসরিক মেলায় গিয়া বিক্রয় করিয়া আসিতাম। এইরূপে উৎসবগুলিতে অনেক দেখাশুনা হইত বলিয়া ‘মেলা করা’ আমার লোভনীয় ছিল। আমার পনের হইতে পঁচিশ বৎসর বয়সের মধ্যে আমাদের ব্যবসায় কার্য বিশেষ প্রসার লাভ করিয়াছিল। চিড়ি খাইয়া দিন কাটান, দশ-পনের সের বোঝা মাথায় লইয়া পাঁচ-সাত মাইল পথ হাঁটা, দুই তিন ঘণ্টা নৌকা বাওয়া প্রভৃতি কাজগুলি এসময় আমার সহজ মাধ্যম হইয়া উঠিয়াছিল। ক্রমে যখন কারিকর, কর্মচারী প্রভৃতিতে চল্লিশ-পঁয়তাল্লিশ জন লোক আমাদের অধীনে কার্য করিত তখনও আমি তাহাদের সহিত মিলিয়া এ সকল কার্যে আনন্দ লাভ করিতাম।

আমরা কোনদিনই নিছক ব্যবসায়ী হই নাই। দাদা পণ্ডিত মাহু ব ছিলেন। বিজ্ঞা-শিক্ষায় এবং অপরকে শিক্ষাদান করিতে তিনি বরাবরই একাধারে ছাত্র ও শিক্ষক ছিলেন। আমাদের সকল কর্মের মধ্যেই সংবাদপত্র পাঠ, উচ্চ-সাহিত্যের আলোচনা, ইংরাজী ভাষার আলোচনা, জগতের বড় বড় লোক ও তাঁহাদের বড় বড় কর্মের আলোচনা চলিত। ইংরাজী ভাষায় আমার যে সামান্য অধিকার হইয়াছে তাহাও এই প্রকারে যেরে বসিয়া।

পিতামাতার বর্তমানে দাদা আমাকে পঁচিশ বৎসর বয়সে প্রতিবর্ষী চৌদ্দ বৎসর বয়সের কন্যার সঙ্গে ব্যয়-ভূষণ করিয়া বিবাহ দিয়াছিলেন। ইহার ছয় মাস পরে পূর্ণ স্বদেশী

আন্দোলনের সময়ে অকালে ছত্রিশ বৎসর বয়সে তাঁহার পরলোকগমন হয়। দাদার মৃত্যুর পর আমি সব দিক রক্ষা করিয়া উঠিতে পারি নাই। অনেকে বলেন, স্বদেশী আন্দোলনে অত্যধিক মাতিয়া গিয়া আমি আমাদের কাজকর্ম অর্ধসম্পদ নষ্ট করিয়া ফেলিয়াছি। সে কথা সত্য হইলেও তাহার দ্বারা আমার ব্যক্তিগত ক্ষতি আমি স্বীকার করি না। কারণ উচ্চশিক্ষা লাভের অভাবে আমার যে যে ক্রটি ছিল, স্বদেশী আন্দোলনের সভা-সমিতির ভিতরে বিশেষভাবে নিযুক্ত হইবার সুযোগ পাইয়া আমি আমার সেই সব ক্রটি অনেকাংশে শোধরাইয়া লইতে পারিয়াছিলাম। আমাদের দলের এক এম-এ পাশ প্রফেসর বন্ধুর নিকট বখন আমার ইংরাজীতে স্বল্প জ্ঞানের দুঃখ প্রকাশ করিতাম, তখন তিনি আমাকে প্রবোধ দিতেন—“ওটা বেশী কিছু জিনিস নয়” অর্থাৎ ইংরাজী কম জানার বেশী কিছু আদে-যার না। আমি বন্ধুবরের ঐ কথাটি মহৎ বাক্য মানিয়া লইয়া নিজেকে প্রবোধ দিয়া আসিতে-ছিলাম বটে কিন্তু বরাবরই একটু একটু করিয়া বাংলা সাহিত্যে আগ্রহের হইয়া চলিতে-ছিলাম। বাংলা সংবাদপত্রের ‘স্বদেশী’ সংবাদগুলি অত্যন্ত আগ্রহে পড়িতাম।

সখারাম গণেশ দেউস্বরের ‘দেশের কথা’ গ্রন্থখানি পড়িয়াই আমি আমার দেশকে চিনিলাম এবং দেশবিদেশের কথা ভাবিতে শিখিলাম। ‘স্বদেশ-বাক্য সমিতি’ নামে আমাদের বড় দল গড়িয়া উঠিয়াছিল। এ উপলক্ষে যশোহর ফরিদপুর জেলার প্রায় সমুদয় অঞ্চলগুলি আমাকে ঘুরিতে হইত। আমরা হাতে লিখিয়া মাসিক পত্রিকা আকারে স্বদেশী বার্তা প্রচার করিতাম।

ইহার পর এক সময়ে জীবনে বড়ই সংগ্রাম উপস্থিত হইল, বিস্তারিত এখানে নাইবা বলিলাম। পিতা, মাতা, জ্যেষ্ঠ সহোদর সকলেই গত হইয়াছেন, অর্ধ-সম্পদ নষ্ট হইয়া গিয়াছে, চিন্তা চঞ্চল, বড়ই পরীক্ষার দিন। শত চেষ্টা করিয়াও কোন দিকে কোন কিনারা পাইতেছিলাম না। ভাবিলাম, মনের চঞ্চলতা লইয়া জীবনে কোন কাজ করিতে পারিব না। স্থির করিলাম, একবার তীর্থ ভ্রমণ করিয়া মনের প্রশান্তি আনিতে হইবে।

যরের পুরাতন জিনিসপত্র কিছু বিক্রয় করিয়া মাত্র বাইশটি টাকা হাতে জুটিল। তাহাই সঞ্চল করিয়া বাড়ী হইতে বাহির হইলাম। কলিকাতার গিন্না ভাবিলাম, এত সামান্য টাকার আর কি দেখাওনা হইবে? এই টাকার একটা কলের গান কিমিয়া তাহাই লইয়া বাহির হইলে কেমন হয়? গয়ে ভাবিলাম, এ যে আবার ব্যবসায়-বুদ্ধি! ও ঝগড়াটে আর কাজ নাই; ভ্রমণ ত ভ্রমণই হউক। ইহা ১৯১৪, এপ্রিল মাসের কথা।

কলিকাতা হইতে ট্রেনে বর্ধমান পৌঁছিলাম। বর্ধমানের রাজবাড়ী, মুখসাগর, গোলাপবাগ প্রভৃতি দেখিয়া আসিয়া সন্ধ্যায় কালীবাড়ী অতিথিশালায় আহার করিয়া সেখানেই রাত্রি কাটাইলাম। পরদিন প্রাণ্ড ট্রাক বোড্, ধরিয়া পশ্চিমাতিমুখে হাঁটিয়া চলিলাম। সন্ধ্যায় আগেই ভাবনা হইল—রাত্রি থাকিব কোথায়? একজন পশ্চিমা সাধুর সঙ্গে গল্প করিতে করিতে চলিতেছিলাম। তাহাকে রাত্রিতে থাকিবার স্থানের কথা জিজ্ঞাসা করায় সে বলিল “ক্যারা বোলতা হায় তোম, এস্তা জমীন্ ছনিয়ামে পড়্, রহা—আউর তোন্ বোলতা হায় কাঁহা ঠারেগা রাত কো?” আমার সাহস বাড়িল। পথে বর্ধমান রাজকোর্তি ১০৮ শিবমন্দির দেখিয়া আসিয়া রাত্রি তালিত ষ্টেশনে পৌঁছিয়া এক পাহারাওয়ালার নিকট হইতে রুট চাহিয়া থাইলাম এবং ষ্টেশনের নিকটেই রাত্রি কাটাইলাম।

এমনই করিয়া পর পর বৈষ্ণবধাম ধাম, গিরিডি, পরেশনাথ পাহাড়, মধুবন, গয়া, বোধ-গয়া, কাশী, প্রয়াগ, বিজ্ঞাচল, কানপুর, আগরা, মথুরা, বৃন্দাবন, গোবর্দ্ধন, মহাবন প্রভৃতি স্থানে স্থানে ছুই চারি দিন করিয়া কাটাইলাম। গয়ায় ক্ষমতীরে পিতৃশ্রাদ্ধাদি করিয়া মনে একটু ভৃগু পাইয়াছিলাম—পিতামাতার প্রতি সন্তানের কর্তব্য হিসাবে। কিন্তু ভায় আর তীর্থের ঠাকুর দেবতা দেখিয়া নিজের আত্মিক কল্যাণের কোন সহায়তা হইয়াছে বলিয়া বুঝিতে পারি নাই। কাশীতে শঙ্করমঠের ছাত্রগণ আমাকে জেরা করিল, “তুমি গজায় নান করিলে, বিশ্বের অন্নপূর্ণা দর্শন করিলে, ইহাতেও কেমন করিয়া বলিতেছ আত্মিক কল্যাণ হয় নাই?” আমি বলিলাম, আমার মন আমার সাক্ষ্য দেয়। পথে কোথাও ট্রেনে, কোথাও বা হুবিধামত হাঁটিয়া চলিতাম। আহারের বা থাকিবার স্থানের কোন ভাবনাই ছিল না। মন্দিরে, ধর্মশালায়, ভক্তগরিবারে, যখন যেখানে আবশ্যক বোধ করিতাম চাহিয়া থাইতে লজ্জা করিতাম না। এই ভাবে সাড়ে তিন মাস ভ্রমণ করিলাম।

বৃন্দাবনে এক ভক্ত বিধবা আমাকে স্থান দিয়াছিলেন। তাহার নিজের একটি ঠাকুর মন্দির ছিল। তাহার পনের বৎসর বয়সের দেবর-পুত্র দেশ হইতে বৃন্দাবনে বেড়াইতে আসিয়া বসন্তরোগে আক্রান্ত হইল। আমি কর্তব্যবোধে তাহার স্ত্রীজ্ঞার নিযুক্ত হইলাম। তাহার জ্যেষ্ঠ ভ্রাতাকে টেলিগ্রাম করিয়া আনিলাম, তিনি রোগীর ঘরে ঢুকিতেন না। রোগী সর্বদাই যন্ত্রণায় ছটফট করিত, আমি তাহার শয্যায় থাকিতাম। যন্ত্রণার সময় কোলে জড়াইয়া লইয়া সাহস দিতাম। নিজের সম্মুখে ভয় করিতাম না। জীবিতাম, কোলে জড়াইয়া লইয়া সাহস দিতাম। নিজের সম্মুখে ভয় করিতাম না। জীবিতাম, এমন ধামে এমন কাজে যদি মরি তাহাতেই বা মন্দ কি! বিশেষে ভয় ভাবনা আমার

কিছুই ছিল না। রোগী হুহু হইলে তাঁহারা আমাকে একজোড়া কাপড় আর দুইটি টাকা দিয়াছিলেন।

বৃন্দাবনে কীর্ত্তন শুনিয়া এমন মাতিয়াছি যে, কখন কখন চোখের জল সামলাইতে না পারিয়া অশ্রুভিত হইতাম। কিন্তু ইহাই আমার ধর্ম্মভের পরিচায়ক নয়। বাল্যকালে খৃষ্টীয় মিশনারী বিদ্যালয়ে অধ্যয়ন করার মধ্যে খৃষ্টের ধর্ম্মভ আমার ভাল লাগিয়াছিল। বিপুল জীবন যাপনের জন্য খৃষ্টের জীবনের অনুসরণ আবশ্যক বলিয়া মনে হইত। বৃন্দাবনে এই উভয় মতের একটা মীমাংসা হইয়া গেল। একজন প্রবীণ ভক্ত বৈষ্ণবকে পাইয়াছিলাম। তিনি আমার ধর্ম্মভ আভ্যন্তরীণ শুনিলেন এবং ভরসা দিলেন, খৃষ্ট নিজের পরম বৈষ্ণব, একমাত্র তোমার খৃষ্ট-প্রীতির সঙ্গে আমাদের বৈষ্ণবতার বিশেষ প্রভেদ নাই। আমি আনন্দ হইলাম। খৃষ্টীয়ানদের সঙ্গে আমার খৃষ্ট-প্রীতির পার্থক্য এই যে, তাঁহারা খৃষ্টকে একমাত্র পরিব্রাজকর্তা বলিয়া বিশ্বাস করেন—আমি তাহা পাই না। এই ‘একমাত্র’ কথায় আমার একটু আপত্তি আছে। বৃন্দাবনে ও রাধাকুণ্ডে যে সকল বৈষ্ণব ভক্তের দর্শন পাইয়াছিলাম, তাঁহারা যদি পাপমুক্ত না হইয়া থাকেন, তবে মুক্তি বোধ হয় মানুষের ভাগ্যের অতীত। আমি চিত্তের প্রশান্তি লইয়া দেশে ফিরিয়াছিলাম। এই চিত্তের প্রশান্তির ব্যাখ্যা করিবার স্থান এ নহে।

দেশে আসিয়া জীবন স্বচ্ছন্দ বোধ হইতে লাগিল। খুলনা সহরে গিয়া এক জ্ঞাতি-ভ্রাতার নিকট হইতে একশত টাকা ধার লইয়া ছোট করিয়া সোনার গহনার দোকান করিলাম। নিজ কল্পনা হইতে কয়েক প্রকার স্বল্পমূল্যের অলঙ্কারের নমুনা বাহির করিলাম। সেগুলি লোকে বেণ পছন্দ করিতে আরম্ভ করিল। দেখিতে দেখিতে আমার কার্য্যের শ্রীবৃদ্ধি হইল, কারখানা করিলাম। ১৯১৬ খৃষ্টাব্দে ইহার নাম রাখিলাম ‘ইকনমিক জুয়েলারী ওয়ার্কস্’। ১৯২০ খৃষ্টাব্দে কলিকাতায় আমাদের প্রধান কার্য্যস্থল হইল। শিক্ষিত যুবকগণকে আমাদের প্রণালী মত শিল্প-শিক্ষাদান করিয়া কারখানার অলঙ্কার প্রস্তুত আরম্ভ করিলাম। বিলাত হইতে উন্নত প্রণালীর যন্ত্রাদি আনিয়া কারখানার প্রসার করিলাম।

এই সময়ে জীবনের ধারা একটু পরিবর্তিত হইল। বাংলার নারী-প্রগতির অনুকূলে ‘মাতৃমন্দির’ মাসিক পত্রিকা পরিচালন সঙ্কল্প করিলাম। ১৯২৩ খৃষ্টাব্দে, বাঙ্গলা ১৩৩০ সালে ইহা আরম্ভ হয়। একমাত্র নারীজাতির কল্যাণ সম্বন্ধীয় বাঙ্গলা পত্রিকা ইহাই প্রথম। মাত্র ইহাই বলিয়া রাখি যে, এই পত্রিকাখানি আমার নারীজাতির প্রতি অঙ্গার নিদর্শন।

ইকনমিক জুয়েলারী ওয়ার্কস্ এবং মাতৃমন্দির কার্যালয়ের কার্যাকারকগণকে লইয়া আমাদের একটি শিক্ষা-প্রতিষ্ঠান গড়িয়া উঠিল। সাপ্তাহিক আলোচনা-সভা স্থাপিত হইল। আমাদের বিশেষ বিশেষ অন্তরঙ্গ ব্যক্তি এই আলোচনা-সভায় যোগদান আরম্ভ করিলেন। আমাদের মধ্যে যাহারা বক্তৃতা দিবার জন্ত দণ্ডায়মান হইয়া প্রথমে একবর্ণও বলিতে পারেন নাই, তাঁহারা পরে এই আলোচনা-সভায় কাজের কথা মুক্তকণ্ঠে বলিতে শিখিলেন। “মাতৃমন্দির” বিনিময়ে বঙ্গের সমুদয় পত্রিকা এবং সমালোচনার জন্ত বহু গ্রন্থ পাইতে থাকিলাম, এই সমুদয় আমাদের এই শিক্ষা-প্রতিষ্ঠানের সম্পদ হইল।

এই সময়ে আমি বিলাত যাত্রা মনস্থ করিয়া একজন ইংরেজকে প্রাইভেট শিক্ষক নিযুক্ত করিয়া তাহার নিকট উচ্চারণ শিক্ষার অনেক সহায়তা গ্রহণ করিতেছিলাম।

আমার সৌভাগ্য, আমার সহধর্মিণী শ্রীমতী হুণীলা এবং কনিষ্ঠ সহোদর শ্রীমান অতুলচন্দ্র আমারই ভাবে খানিকটা গড়িয়া উঠিয়াছিলেন। মাতৃমন্দির পত্রিকার সম্পাদিকারূপে সহধর্মিণীর যোগ্যতা এবং ইকনমিক জুয়েলারী ওয়ার্কসের প্রধান কার্যাকারকরূপে সহোদরের কৃতিত্ব তাহারই ফল। এই দুইটি মনের মত সহযোগী পাইয়াই আমি নারীমঙ্গল সমিতি, বিভাগাগর বর্ণি-ভবন, বঙ্গীয় সাহিত্য-পরিষদ, ইণ্ডিয়ান জার্নালিস্ট অ্যাসোসিয়েশন প্রভৃতি দেশের জনহিতকর অনুষ্ঠানগুলির মধ্যে প্রবেশ করিয়া ক্রিষ্ণু কার্য করিবার সুযোগ পাইয়াছি এবং নিশ্চিন্ত মনে একটি বৎসর বিলাত ভ্রমণ করিয়া আসিতে পারিয়াছি।

১৯২৪ খৃষ্টাব্দে যে উদ্দেশ্য লইয়া বিলাত যাত্রা করিয়াছিলাম, বেতাবে সেখানে দেখিয়া শুনিয়া আসিয়াছিলাম—সেই একটি বৎসরের দেখা-শুনা লইয়াই এই “বিলাত ভ্রমণ” পুস্তকখানি লিখিত হইয়াছে।

এই ভ্রমণ হইতে আবার ইয়োরোপের বড় বড় স্বাধীন দেশগুলি ঘুরিয়া দেখিবার আকাঙ্ক্ষা জন্মে। ১৯৩১-৩২ খৃষ্টাব্দে ভগবান আবার সে আশা পূর্ণ করিয়াছেন। আমার এই দ্বিতীয়বারের অভিজ্ঞতা আবার দেশের সম্মুখে উপস্থিত করিবার আশা রহিল।

কলিকাতা
১লা মার্চ, ১৯৩২

}

শ্রী অতুলচন্দ্র মল্লিক

ইকনমিক জুয়েলারী ওয়ার্কস

২০০নং কর্ণওয়ালিস স্ট্রীট, কলিকাতা।

[সর্বপ্রকার স্বর্ণালঙ্কার প্রস্তুতের খ্যাতিমান কারখানা]

পৃথিবীর সর্বশ্রেষ্ঠ দুইটি প্রদর্শনীতে

প্রথম শ্রেণীর সার্টিফিকেট সহ মেডেল প্রাপ্ত।



লণ্ডন



প্যারিস

অল্পব্যয়ে সর্বদা ব্যবহারোপযোগী অলঙ্কার উৎকৃষ্টরূপে প্রস্তুত করা এবং আধুনিক রুচির নূতন নূতন ফ্যাশনের অলঙ্কার যথাসম্ভব সুলভে প্রচলন করাই এই কারখানার বিশেষত্ব। এখানকার সমস্ত অলঙ্কারই বিশুদ্ধ গিনি সোণায় প্রস্তুত। গ্রাহকের পুরাতন সোণা খরিদ অথবা উহা দ্বারা গ্রাহকের ইচ্ছামুযায়ী গিনি সোণার অলঙ্কার প্রস্তুত হইয়া থাকে। মফঃস্বলের অর্ডার আমাদের নিজ দায়িত্বে অতি যত্নের সহিত সরবরাহ করা হয়।

পত্র লিখিলে বিনামূল্যে ক্যাটলগ প্রেরিত হয়।

স্বত্বাধিকারী ও পরিচালক

শ্রী অক্ষয়কুমার নন্দী।

